

Profet Aisaiago Po Aseai Buku

Hasia nedebo tau sabo po

Aisaia te profet me deli te Jerusalemde bidali sogo, te Asiria dabego te kantri t̄q Israel te not badu bidali hani dolainu yali, tama p̄ade augwaligo te saut badu bidali Juda dabe me dolagasainu yali. (Te s̄e yali po te buku 2 King, D̄aj 17, tede suao.) Dago te buku Aisaia sela badu pedaiba pedebaso, usu da. (1) D̄aj 1-39. Tede elalubo po e tiwai dao. Aisaiago te aseani po te Asiria ami bidi dabe te p̄aba yagaselama, te augwaligo Juda hani dolainu ebo sogo te po Aisaiago aseani. Aisaiago agade digi po bega selama, dwasianu po pusali te po te D̄aj 1-12 tede elalubao.

Juda we bidi hauwa te sogo augwali wi umagi mu yali, tama Aisaiago po augwaliba te pedalubo segēde po page bula selama, pusalio. Agai te tiwai po wali, te sē pedalubo da, te Asiria dabego homude niga selama ebeo. Menio. Te page Juda dabe augwade digi elalubao, magi baso meni, augwaligo God tudiba muanio, tama tibaso, Godigo augwaliba te dene mabo sē yaibao, wali. Aisaiago po hanilama pusuyu, te tiwai po wali, te Juda hani dabe augwa gegunai bidi dabe dali, augwali te Genuai Bidigo po dologoba pelama, te doloba pai kolesaga naga wali pīqo, wali. Augwaligo te tiwai kolesaga ebaso, te augwali bugagia bidaibao. Tiali goli, augwaligo te tiwai dwai kolesaga me wali pidubaso da, teda Godigo augwali dolaibao.

Aisaiago po d̄aj wabo po pusuyu, te tama po wali, te nosali wiegi yai sogo me pedelaibao, wali. Te king Devitde bulali w̄aj n̄q̄ me delide te king pedelama, te tigidali we bidi bidibo page wiegi yai pemenede bidaibao po wali.

(2) D̄aj 40-55. Tede e tiwai po wai elalubao. Te buku pedai badu wali po, te Juda dabe te Babilonde kalabusi bidali sogo wali po, te sē yali po te bobage sogo bidilama, te buku hasia pedai badu te po wai. Te Juda dabe haliga segē elalubadi, tama profetgo te po hanilama pusuyu, te augwali wiegi yai pemene elama bidabo sogo pedelabo po pusalio. God aga te tigidali nai nigali aga Aya dao, tama agai te king Sairus te kantri t̄q pedai Persia bidi d̄aj ilali, te agai sē emainogo, tama te Juda dabe augwa page buluba ma pomainogo yali. Te boi bidi dabego augwa buludu te gasa digibulu buluba odasa solama, bidigi soali, tiali goli Godigo augwali homu kone ebo gegeda palobeo. Menio. Agai augwali dali polobadu d̄aj wali bomo yai pode homu kone me elaludalio. Tama me profetgo te tama po me wali, te Israel dabego nogode Godigo te tigidali t̄q pedai we bidi hani dali wiegi

yai bugagia ilaibao po wai dao. Te buku pedai badu te po hauwa me weyu, te po wali, “Genuai Bidigo şe bidi,” te pedelama, te dene selama, te we bidi augwali tau saibao po wali. Te Godigo po odobo we bidi hauwago konealubo po te tiwai daş wai, te Genuai Bidigo şe bidi da wali, te Jisasbolo tama wali dao.

(3) Daş 56-66. Tede wali po e tiwai, te badu pedai badu bukude, te profetgo te Jerusalemba ma aselama, bidagasali hani dabebolo pusali po elalubao. Me badu po e tiwai wali, Godigo aga daş wali po homu kone elalubao, tama te pogo te Juda hani dabego haliga bomo ilalio. Te bukude me badu wali pogo augwalibolo e tiwai po wali, te augwali God dologode bidiyu, tama te lotu wabo doloba pai kolesaga wali pelama, te Godiba gedu haluasa po weyu, te agaba ofa mayu yao. Augwaligo te magi nai walu doado bage meni yai we bidi dabe tau sabo şe yao wali. Wiegi yai po me deli te Daş 61:1-2 tede elalubao, te po Jisasgo agai şe gagalama yainu, te we bidi hani augwaliba te po nedali. Me te buku Luk 4:16-21, tede elalubo suao. Te Aisaiago buku pedai hauwa badu te Godigo we bidi dabe augwali tau selama, haliga dua elama bidabo po wai, magi baso meni, te po dage pedaigo te Godigo bomo elalubo po hanilama pusali. Te we bidi augwaligo suali, te haniani seşe ebadi goli, te tagalao, God te augwa Aya mu da, te agai augwali tonaluali. Te Godigo po odobo we bidi dago te tiwai koneabo elalubao, Godigo te profet po waliba mu usu nanio, te Jisasgo bidibo ulade me isalide te po mu usu nai dao.

Aisaiago Godigo po te Juda de Jerusalem bulu side bidibo we bidi augwaliba te po pusali

(Daş 1-12)

1 E bukude te profet Aisaiago po elalubo, aga te Emosgo ogwa dao. Te nade ebo tiwai Genuai Bidi God agai po te Aisaiabolo mani, te Aisaiago te Juda we bidibolo, me Jerusalem we bidibolo pusa momainu. Aisaiago te po te tuni bidi king Usia, me Jotam, me Ahas, me Heskia, tama bage deli deli te Juda dabe tuni bidi bididubadi pusai dao.^a

Genuai Bidi aga we bidi dali wado po wali

²Dagalu, olo saganama, odao. Toş, nago me odao. Magi baso meni, Genuai Bidigo te po wai dao,

“Te wai dabe eno tonaluama, genuai yali.

Eno augwali bugagia negali.

Tiali goli, augwali da, augwaligo eno po sela şabo dao.

³Te kau kibu dabego augwa aya konebo dao,

me te donki kibu dabego

augwa ayago nai mabo pesage konebo dao.

Tiali goli, eno Israel we bidigo kolesaga menio.

Te kau kibu de donki kibu sigo kolesagago augwaligo

^a 1:1 2 Kin 15:1-7, 32-38; 16:1-20; 18:1-20:21; 2 Sto 26:1-23; 27:1-9; 28:1-27; 29:1-32:33

- kolesaga edelalio,” wali.
- ⁴ Tega, te we bidi dage dolama,
 dagego kolesaga me mu doali.
 Tigidali sogo dagego dwai seęęe sabo dao.
 Te duga dwai seęęe dage aiyaba kegebo dao.
 Dage Israel dabego duga Genuai Bidi tagalai dao,
 aga te Dwagi Yai Doloba Pai Kolesaga
 Naga Ebo God dao.
 Tama dagego aga tudi ola manio.
- ⁵ Magi baso dagego Godigo po me sela şadubawe?
 Dage tigidali sogo dene sabo hagela meniwe?
 Israel, nage te bidi me bidi dabego elai bidi tiwai dao,
 te agai tigi sese mu dolama, bomu mu meni yai.
 Agai tobolu keni kenigo paęana pai.
- ⁶ Te kenigo agai toboludu gagalama,
 şaęaba usu nigi pali,
 tama agai tigiwali olo me elalubeo.
 Te haniani kenigo agai tigide paęanama,
 tama agai tigi deda pali.
 Augwaligo agai tigi penama agai keni şisibeo.
 Te augwaligo madasin me pilibeo.
- ⁷ Awe, te boi bidi dabego dagego bulu
 polo dola silai dao.
 Tama augwaligo dagego hanu dabe ulali dao.
 Te dagego tonalubadi, augwaligo
 dagego gi nai dabe sai dao.
 Te gasa bulu bidi dabego bulu mu dolama,
 tama dagego tę olo mu elalubao.
- ⁸ Hobedagia! Jerusalem deli naga augwaligo tagalali.
 Agaduba deli naga elaluyu, tama bomu mu meni.
 Aga te bidi dabego olo gi be seę yai aę elalubao,
 te bobi gide seę yani dwasianu be tiwai naga
 elalubao.
 Aga te boi bidi dabe bagua sai hanu aę elalubao.
- ⁹ Ma, Genuai Bidi Tigidali Bomo
 Elalubo Bidigo da meba
 bidimainu sula tagalişama menigi sogo da,
 mu tama, teda da polo dolama siligi dao,
 te hanu Sodom de Gomora si dolali
 yali tiwai gilama, polo dologi dao.^b

^b 1:9 Gag 19:24; Rom 9:29

- 10 Dage tobolu bidi dabe,
 me dage Jerusalem we bidi dabe,
 dage te bidi dwai dabe te hanu
 Sodom de Gomora side
 polobadu bidali bidi dabe tiwai mu tama dao.
 Megi da, dagego olo bugagia munama,
 tama Godigo bomai po odao, dago Genuai Bidi.
 Agai dabolo mawainu ebo po bugagia odao.
- 11 Genuai Bidigo te po odu gebao,
 “Dagego homugo, dagego haniani ofa enabolo mabo
 te eno godolo ebawe, homu ebowe? Mu menio.
 Dagego te sipsip kibu dabe hauwa dagego seselama,
 te isigo ula silabo ofa yainogo ebo dao.
 Tiali goli, ena mu hagela mu yali.
 Tama eno dagego dwagi yai genuai
 dagego sesebo hasa ili dabe eno godolo ebeo.
 Ena te kau kibu omai kaneme me,
 me te sipsip kibu goŋgo kaneme,
 me meme kibu omai kaneme dabego
 enabolo usu yai dao.
- 12 Magi baso meni. Te dage lotuba asobo sogo,
 dage dua aselama,
 eno obo tomoba asobo menio. Menio.
 Dage asobo yaide, duga olo bilagasu,
 kulukulu genuai wainu asobo dao.
- 13 Dage odolali bomai şe elama,
 ofa nai dabe enaba sesigimio.
 Magi baso meni. Eno augwalibolo hagela yai dao.
 Tama me, dagego ulubo pauda denami
 eno gunide dwai denami pedalobo dao.
 Eno dagego gesi poluade, me Sabatde,
 me gasa lotu dabe dagego wabo
 eno me subo, hagela ebo.
 Magi baso meni. Duga dwai seŋeŋo
 duga lotu dabe dolali.
- 14 Eno dagego te gesi poluade lotu wabo,
 me gasa bodolu mani lotu dabe dagego
 wabo eno godolo mu menio.
 Te nai dabe tigidaligo enabolo seŋeŋ mabo.^c
 Tama eno tolobo mu hagela ebo.

^c 1:14 Amo 5:21-22

- 15 Te dagego nogo ugwa selama,
gedu haluasa po enabolo wabo si da,
teda eno dage sugobeo.
Tagala, dagego gedu haluasa po hauwa sogo obadi,
me teda ena olo palia saibao.
Magi baso meni.
Te bidi dabe dagego elali bidi dabego
kaneme dagego nogode me daganalubao.
- 16 Eno dage suali mu doali.
Dage wę paugi pja, tama duga digi duga pęnama,
tama dwai seęę dage elalubo sela sayao.
Tama dwai se ma igio.
- 17 Te dwagi yai doloba pai
kolesaga ebo kolesaga konea sao.
Tama te tobage dwagi yai kolesaga ugwa
ela holomainu yao.
Tama eyu, te gasa bidi dabego
aiyaba elaluali bidi dabe tau mao.
Te po tu ebode te tiana wai dabe bugagia tau sao.
Tama me te wilawe we dabe te po tu ebode tau sao.
Te tama bidi dabego augwali dali dwai se ebaso da,
dagego augwali tau sao.”
- 18 “Odao. Da deliba sisinama, po mimainao.
Dagego seęę hauwa elalubadi me, tagala.
Te dage te nala ugwa tiwai bidai goli,
hoda naigo polo dolai dao.
Ena Genuai Bidi, eno te po obao,
eno te dage te tedela ais tiwai ma ilaibao.
Awe, te hoda nai mu daę wai goli,
eno dage te tedela yai
sipsip kibu nisi tiwai ma ilaibao.
- 19 Ma, dagego eno po mu odama,
tama te homu kolesaga wali peyu da,
teda dage bidibo me bugagia bidiyu,
me duga gide bulubo wiegi yai nai
dagego tuyu, bidaibao.
- 20 Tiali goli, dagego hagela elama,
eno po sela sayani da,
teda boi bidi dabego dage ela muagasaibao.
Ena Genuai Bidi, eno po polo wali.”

Genuai Bidigo Jerusalem bagego kolesaga dodolabo homu yali

- 21 Mena tama te pedalaliwe?
 Hanu Jerusalem, polobadu nago eno po
 wali dolo pai dao.
 Tiali goli, megi da, nage penani we gaga wali.
 Tega! Polobadu nagede bidali bidi dabego
 te po tu dodolobo kolesaga dolo yai dao.
 Awe, polobadu nage te dwagi yai
 doloba pai kolesaga ebo
 bidi dabego pağawai dao.
 Tiali goli, megi da, nage bidi ela mabo
 bidigo pağayani.
- 22 Polobadu nage dwagi yai silva tiwai da.
 Tiali goli, megi da, nage yaba yai kapa tiwai dao.
 Polobadu da, nage pusai wain tiwai goli da.
 Tiali goli, megi da, nage olo we tiwai dao.
- 23 Jerusalem, nago genuai bidi me, tobolu bidi me,
 augwali te po odisiğwai dabe bidiyu,
 tama nai wi sabo bidi dabego abagi dao.
 Tigidali sogo augwaligo te mone pesa eyu,
 augwaligo te bidi dabe augwali dali
 mone dabe sainogo ili po wabo
 bidi dabe tau sabo homu ebo dao.
 Tama te po tu odobo sogo,
 augwali te tiana wai dabe tau sabo
 homu ebo menio.
 Tama me, augwaligo
 te wilawe we dabego homu seğe ebo
 dodolobo odama, dodolabo homu ebo menio.
- 24 Tama tibaso, Jerusalem,
 Godigo po dabe megi odao.
 Tigidali Bomo Elalubo Genuai Bidi
 te Israel dabego boma pai God dao.
 Ağı te po wali, "Ena Genuai Bidi,
 eno te ena boi bidi dabebolo dwai dene
 wei ponaibao.
 Usu dao. Tama augwaligo enabolo seğe ma magobeo.
- 25 Jerusalem, eno bomai se me deli nagede yaibao,
 te nago dwai se yali dodoliyu,
 eno nage posolai isigo ulaibao.
 Te bidi dabego te kapa nogi silva iside ulama,

tama dwai pobele bage dagana saibaso,
te sela şawainu isi ulubo tiwai yaibao,
te posolai iside.

- 26 Tama eno dwagi yai tobolu bidi me,
po tu dodola mu odabo bidi dabe
ena digi daı ilaibao,
te polobadu nago bidali bidi dabe yali gilama.
Tama bidi dabego nage nogi
te doloba pai kolesaga ebo hanu dao waibao.
Tama Godigo po dolo wali pabo hanu dao waibao.”

- 27 “Genuai Bidigo Jerusalem bugagia
doloba pai kolesaga dali aselama,
tama te bulu ma dobola saibao.
Tama te dwagi yai kolesagade naga
agai Jerusalem we bidi ma oda saibao,
te augwaligo augwa yali te dwai şede
ge neyu, homu begelama,
tama augwa yali dwai şede hobede ebaso.

- 28 Tiali goli, te we bidi dabego po sela şanama,
dwai şe elama, God tudi ola mabo
we bidi, agai augwali dolama,
tama agai augwali mu silaibao.”

- 29 “Magi baso meni, dagego genuai
ni silide te tibo god dabeba
lotu olama, tama tede dwagi yai
homu eyu bidai dao.

Tama me te gi elama, tama lotu
wabo digi dao olama, hage yai dao.

Tiali goli, dage te yali kolesaga dabede hobede elama,
tama hale genuai mu yaibao.

- 30 Te dage te genuai ni kali sasilama,
mobia pabo tiwai yaibao.

Tama dage te gi we meni yai gi tiwai dage tama tiaibao.

- 31 Te kala sasia pai da,

te isi deli sogo tama dela pabo dao.

Tama te tiwai şe te doado bage hauwa
elalubo bomai bidi dabede yaibao.

Augwa digi dwai kolesaga ebogo

augwali deli sogo tama dolaibao, sia saibao.

Tama te sogo augwali tau sabo bidi meni yaibao.”

Genuai Bidigo te po wali.

Genuai Bidigo we bidi hani bugagia bidibo kolesaga mawaibao

(Mai 4:1-3)

2 ¹Te Aisaiago nade ebadi tiwai, Genuai Bidigo agai po Aisaiabolo mani, te Emosgo ogwabolo, te agai te Juda de Jerusalem we bidi dabebolo pusa momainu. Te po e tama dao.

² Te me sogo nosali, te Genuai Bidigo
be dolalubo te bulu du,
te genuai ugwanu ma dolaluyu,
tama gasa bulu du dabe aiyaba elalui elaluaibao.
Tama tigidali we bidi hani teba sisinagasaibao.

³ Te tigidali bulu badu we bidi hanigo te po waibao,
“Asiao. Da bulu du Saionba pinao,
Genuai Bidigo bulu duba.
Te Israel dabego Godigo beba pinao.
Te agai dabolo dago emaina homu ebo
te kolesaga ola momainu.
Tama da aga digi sa muani sunumidu pogo o.”
Augwaligo te tama po waibao. Magi baso meni,
Genuai Bidigo bomai po te bulu du Saionde gagalasa,
tama tigidali buluba paibao.
Awe, Jerusalem te Genuai Bidi agai bulu elaluama,
tama agai po we bidibolo ola mabo digi elaluaibao.

⁴ Genuai Bidigo tigidali hani we bidigo po tų dodolama,
tama augwali bugagia deliba bidaibao.
Tama augwali hwıbo bainat
te gi tų elebo ain tiwai gagawaibao.
Tama augwa hwą gagawai sesemone te hamago elama,
gi sę yabo hwą tiwai pedalaibao.
Tama tigidali we bidi hanigo me hwıgobeo.
Tama augwaligo te boi hwıbo kolesaga
munu ma konea sagobeo.^d

⁵ Asao, Jekopgo wąj dabe dage,
da Genuai Bidigo da mani uladu pinao.

God aga genuai nogi haninaibao

⁶ Genuai Bidi, nago naga we bidi

^d 2:4 Jol 3:10

- tudi ola mawai dao.
 Nago augwali Jekopgo wai dabe tagalali.
 Magi baso meni. Augwaligo to haniani
 pobigo paana pali, te Filistia bagego to
 tiwai yali gilama.
 Augwaligo te dwai kolesaga dabe
 sia asobo badu sai dao.
 Megi da, nago we bidi hanigo gasa
 we bidi hanigo kolesaga wali pabo.
 7 Te Israel dabego to te silva, me gol, me hos, me karis
 dabego mu paana pali.
 Tama bidigo nedebo usu egobeo.
 8 Tama me ma, augwaligo to tibo
 god dabego piksago paana pali.
 Tama augwaligo augwa te nogogo
 nigali nai dabeba lotu po wabo dao.
 9 Tama tibaso, Genuai Bidi,
 nago tigidali we bidi aiyaba elaluama,
 tama tigidali we bidi hale dwai mu yaibao.
 Genuai Bidi, nago augwaligo sege sela sagio.
 10 Te we bidi dabe, dage wi pelama,
 masigi dudulaweba dabe duala sigi pia.
 Dage tode dedage nigilama, duala sia.
 Tiyu, dage Genuai Bidi aga ula me bomo dali asobaso,
 dage wi elama, dolabuo, Genuai Bidi asobode.
 11 Te Genuai Bidi sabalobo sogode da,
 agai te dene mabo kolesaga elama,
 augwa nogi ugwa sabo bidi dabe
 aiyaba elaluaibao.^e
 Tama augwali hale mu yaibao.
 Tama te sogo Genuai Bidi deli naga genuai nogi saibao.
 12 Genuai Bidi Tigidali Bomo Elalubo
 Bidigo bodolu elalubo,
 te augwa nogi ugwa sabo bidi dabe
 aiyaba elalubo sogo.
 Tama te sogo agai te bidi dabego genuai
 nai dabe me augwaligo godolo
 elama, gawebo nai dabe dolaibao.
 13 Te agai te Lebanon bulude elalubo
 dwagi yai bobobage ni bo dolaibao.

^e 2:11 2 Te 1:9; Ped 6:15

- Me, te Basande bomai ni dabe me.
 14 Te agai genuai bulu du dabe me agai dolaibao.
 15 Me, te bobobage taua dabe, me te
 tigidali hanugo bomai obo dabe me.
 16 Te agai te genuai dwagi yai
 sawi sip dabe me dolaibao.
 17-18 Te Genuai Bidi sabalobo sogo da,
 agai te dene mabo kolesaga elama,
 augwa nogi ugwa sabo bidi dabego
 nogi aiyaba elaluaibao.
 Tama augwali hale mu yaibao.
 Tama me te tibo god dabe mu sia saibao.
 Tama te sogo Genuai Bidi aga deli naga
 te sogo genuai nogi saibao.
 19 Tama te sogo Genuai Bidigo te t̄ mali iliyu,
 tama e t̄de nai dabe wi mu ilaibao.
 Tama te we bidi dabe me wi mu elama,
 tama masigi dudulaweba me, t̄ dudulaweba me,
 wi duala sigi paibao.
 Te augwaligo Genuai Bidi aga bomo dali,
 genuai ula dali, asobo augwaligo suidali weyu.
 20 Tama te sogo te we bidi dabego te tibo god dabe
 augwa lotu wabo god dabe saibao,
 te augwaligo silva de gol sigo nigali nai dabe.
 Tama augwaligo te bologo buluba me
 bogw̄ bidibo buluba dabe tama şawaibao.
 21 Tama te sogo da, Genuai Bidigo te t̄ mali iliyu,
 tama t̄de wi mu yabo ş̄ dabe yaibao.
 Tama te we bidi dabe me wi mu elama,
 te masigi ola beba me,
 bulu du dologode elalubo masigi dedageba dabe
 wi duala sigi paibao.
 Te augwaligo te Genuai Bidi aga ula dali,
 bomo dali, asobo augwaligo suidali weyu.
 22 Dagego homugo bidi mego da
 tau saiba homu elamuo. Mu menio.
 Da bidi da olo nai mu dao. Magi baso meni.
 Da p̄w̄adage sogo bididama, tama da isaibao.

Jerusalem bulu we bidi bidibo page dwaibao

3 ¹Odao. Tamadi tama God, Tigidali Bomo Elalubo
 Bidigo

- te we bidi dabe ugwaba sagualu
tonalubo nai dabe sela şawaibao.
Te Jerusalem me Juda bulu we bidi dabe
bidibo wiegi yai ilibo nai dabe,
te agai tigidali nai me, we me, sese silaibao.
- 2 Agai te hwıbo bomai bidi dabe,
me olo ami bidi dabe, me po tu odobo bidi dabe,
me profet bidi dabe, me sogo yesi bidi dabe,
me hanude genuai bidi dabe, agai sela şawaibao.
- 3 Tama me, agai te ami ofisa,
me gavman ofisa bidi dabe,
me tuni bidibolo wiegi yai kolesaga
mabo bidi dabe me, agai sela şawaibao.
Tama me, agai te bidi dabe haniani
nai dabe nigibo koneai bidi dabe me
agai sela şawaibao, me te bidi dabe te haniani sogo
yesi pobi koneai bidi dabe me, agai sela şawaibao.
- 4 Tama Genuai Bidigo te olo ogwa dabe
te Juda bulu me Jerusalem bulude
genuai bidi dabe nigimainu sula tagalaibao.
Awe, te wai dabe augwa homugo digi
te bulu tonaluaibao.
Tama haniani kolesaga dabe yaibao.
- 5 Te tigidali bidi dabego aga hasi me
aiyaba elaluainu şe bomo yaibao.
Te gesi ogomani wegi manigo
te augwa bolo monu dabego
po obaso, sela şanama, daęa waibao.
Tama dwai kolesaga homu paęana pai bidi dabego
te dwagi yai homu kolesaga yai
bidi dabego po sela şawaibao.
- 6 Tama te sogo bidi dabe augwali
augwa ama mu deli me bidibo digi pelama,
tama agabolo te po waibao,
“Nago deli naga te gudabo ugwa te elalubao.
Te nage dago genuai bidi nigilama,
tama da e dwai sogo nago tau sao,” waibao.
- 7 Tiali goli, agai te po waibao,
“Eno dage tau sabo sunumi menio.
Ena me ena nai me ugwa menio.
Dagego ena dagego genuai bidi nigimainu dagego

ena sa mugimio,” te po waibao.

8 Jerusalem de Juda si te dwai sogoba
sabolama, tulalubo gagalali.

Magi baso meni. Augwaligo tigidali pogo me, sego me,
augwaligo Genuai Bidigo nogi aiyaba elalubo dao.
Augwaligo te dwai kolesaga agai gedude ma ebo dao.

9 Te po tų odobode augwaligo augwa
godolo ebo bidi dabe naga tau sabo dao,
tama gasa bidi dabe aiyaba elalubo dao.

Tama te kolesagago augwa digi augwa
ma po tų ela mabo dao.

Augwali te we bidi dabego gedude
dwai şe ebode augwali hale me ebeo,
te Sodom bagego polobadu yali gilama.

Augwali dolaibao. Augwa dagede augwa dolaibao.

10 Te dwagi yai doloba pai kolesaga ebo we bidibolo
te dwagi yai homu yao po walao.

Magi baso meni, augwali dwagi yai
pe saibao, augwa yali dwagi yai şede.

11 Tiali goli, dwai bidi dabe da, dolaibao.
Augwali te dwai pe te augwa yali dwai şede saibao.

12 Hobede mu da, dage eno we bidi dabe.
Te gesi we bidigo dage te tonalubao.

Te tobolu bidi dabego dage halubaso,
tama dagego augwaligo dwai
sunumidu dage wali te pobao.

13 Genuai Bidigo tigidali we bidigo
po tų odainu no sealuba.

14 Agai aga we bidi dabego tobolu bidi
me genuai bidi dabe po tų ela mani.

Tama agai te po wali, “Te we bidi dabe
te eno wain gi tiwai dao.

Tiali goli, dage da, dagego tama te gi dolama,
tama te gide elaluali nai dabe dagego wi salio.

Dagego bidi nai dabe habuge yai
bidi dabe dagego hobede ebo menio.

Mu menio. Dagego augwaligo
dwasianu nai dabe kegelama,
tama duga bede pesage holobo dao.

15 Dego dagebolo obaso, dagego eno we bidi agalama,

tama nai meni yai bidi dabe dolaliwe?
 Ena Genuai Tigidali Bomo Elalubo Bidi,
 eno dagebolo dolo obao.
 Dagego dwai kolesaga mu yali.”

Te Jerusalemde dwai kolesaga ebo we dabe dwai dene saibao

¹⁶ Genuai Bidigo te po wali,

“Jerusalem we dabe, suiåo.
 Augwaligo homugo augwali dwagi yai
 mu dao homu eyu, hagoma homu ebao.
 Te augwali bilibo sogo, augwaligo augwa şağå aulama,
 tama augwa şağåde hqå omainu ebo dao.
 Augwaligo augwa tobolu sagolama,
 augwa dogoni dodolobo dao.
 Tama augwaligo gedu subigila bidi gedu tonobo dao.

¹⁷ Tama tibaso, ena Genuai Bidi eno

te Saion hanu we dabe dene mawaibao.
 Eno augwaligo tobolude keni pağana pomainu yaibao.
 Tama augwaligo tobolu nisi ma menia saibao,” wali.

¹⁸⁻¹⁹ Tama te sogo Genuai Bidigo te Jerusalem we dabego dwagi yai aubo nai dabe sela şawaibao. Agai te şağåde, me nogode, me dogonide, me olode aubo nai dabe agai sela şawaibao. Me te tobolu aubo nai dabe me, me te tobolu halubo ugwa dage dabe me sela şawaibao. ²⁰ Agai te tobolu nisi dıbo mq, me tobolu nisi tomagebo name ugwa, me te ugwa pedai te kukulu gudubo aq ebo nai, me te dwasianu paus augwaligo sanda wel me te pobi nai dabe te dogonide kebo nai agai sela şawaibao. ²¹ Agai te nogo danide me gunide mubo ring agai sela şawaibao. ²²⁻²³ Agai te sawi yai ugwa dabe sela şayu, me agai augwaligo haniani dwagi yai ugwa dabego nigai gudubo ugwa dabe me, paus dabe me, hankasip dabe me, agai sela şawaibao.

²⁴ Tama te sogo te Jerusalem

we dabego polobadu auwali tiai me egobeo.
 Te augwaligo sanda wel meniama,
 tama augwaligo tigi kugumini dwai mu yaibao.
 Te augwaligo sawi yai ugwa me,
 ugwa name me augwaligo kukulu
 gudabo ugwa name menia saibao.
 Tama tibaso, augwali dwai ugwa dabe gudama,
 tama dwai bonogo augwaligo ugwa dağ walaibao,
 te bono te kukulu gudubo aq yaibao.

Te augwaligo augwa tobolu au me
 iligobeo. Magi baso meni.
 Te boi bidi dabego augwaligo tobolu nisi
 sese poala şanama,
 tama augwaligo tobolu wane yaibao.
 Tama me augwaligo sawi gesabidide da,
 te boi bidi dabego kalabus bagego
 magi augwaligo gesabidide togaibao.

25 Jerusalem, boi bidi dabego nago
 bomai ami bidi dabe hwı̄bode ela muaibao,
 me gasa olo bidi dabe ela silaibao.

26 Tama augwaligo nago nai tigidali saibao.
 Nage te we me augwaligo agai ugwa
 dabe sese sela şawai tiwai yaibao.
 Tama aga t̄ode habu olo dulalubo tiwai yaibao.
 Tama te obo sunumi dabego te nai dabe
 nage tigde pedalobo sulama,
 tama augwali hobede elama, gela waibao.

4 ¹Tama te sogo te nogo a naga olama, me badu
 nogo si we dabego
 bidi me deli tola selama, te waibao,
 “Da dena digi nai me ugwa dabe da
 dena digi sela tuyu yaibao.
 Tiali goli, dago bidi mu menio.
 Tama da hale mu ebo.
 Tama tibaso, te hale silimainu eyu,
 nage dago bidi bidibo aq̄ yaibao,” te po waibao.

Jerusalem dwagi yai noma yai bulu ma gagawaibao

²Te me sogo nosali pedalaibao, Genuai Bidigo te ni me deligo gesi
 nologo ma kolimainu yaibao. Tama t̄ogo dwagi dwagi yai nai dabe holiyu
 yaibao. Tama te Israel we bidi dabe dolis̄ama me bidibo bage, augwaligo
 te nai dabe wiegi yai holobo sulama, augwali dwagi yai homu ela
 paibao. ³Te Saion hanude bidibo we bidi dabe, augwali te Jerusalemde
 me bidibo we bidi dabe da, Genuai Bidigo augwali bugagia bidimainu
 sa polo muai dao, augwali bugagia bidimainu. Tama agai augwali nogi
 agai bukude aşai dao. Tama megı̄ da, agai augwali aga we bidi mu dao
 waibao.

⁴Genuai Bidigo bomai homu kolesaga mu yali, te Jerusalem bulu
 dolama, tama nosali ma te Jerusalem bulu ma usu ma ilama, wiegi
 yai bulu ma ilainu. Te aga genuai bomogo agai te Jerusalem bulu
 w̄ę tedalama, tama tigidali meda elalubo sela şawaibao, te hanude

daganaluali meda dabe. Agai te we dabego yali dwai kolesaga dabe sese sela şawaibao. Me te bidi dabego gasa bidi dabe dolainu yali dwai kolesaga dabe me sela şawaibao, te Jerusalem wiegi yai pedalobo si da. ⁵Tama Genuai Bidigo bobobage yai p̄q me deli te bulu du Saionde elalumainu elama, me te we bidi lotu wabo pesageba sisinalubo madi. Te giligade Genuai Bidigo te p̄q elalumainu yaibao. Tama hulide da, agai bobobage yai hano dali, genuai isi bogoli dali elalumainu yaibao. Te p̄q me, hano me, isi me, Genuai Bidigo bogw̄ wali yali gilama, aga te bulu dude me aga dwagi yai nai dabede ugwadu walaluaibao.^f ⁶Te bogw̄ waligo te Jerusalem bulu haluama, tama bomai giliga posolo palialuaibao. Tama me, agai Jerusalem te mone tulubage sogo bugagia bidimainu yaibao.

Wain gi balia po

- 5** ¹Eno ena abagi me delide balia po waibao.
 Te baliago aga wain gi po pusali.
 Te ugwadu bulu du dwasianu
 mede t̄q ili hauwa me elaluali.
 Tede eno abagigo wain gi tede yali.
- ²Agai t̄q elama, tama masigi tigidali sela şawai dao.
 Tama dwagi dwagi yai wain nologo bulali.
 Te gi tomode agai be şani,
 te aga tede bidiyu, te gi tonaluainu.
 Tama te masigi pesage me delide agai
 te wain du mimiabo digi te nai
 nigali, t̄q dedage nigali.
 Tigidali ş̄ silibo si, agai te homu yali,
 ‘Eno ni wain du bugagia mu walaibao,’ homu yali.
 ‘Tama wain du pusu mu yaibao.’ Tiali goli, meni.
 Te ni dabe du bugagia me walobeo.
 Tama te du dabe dwasianu mu elama,
 tama pedauwalide ha yali.^g
- ³Tama tibaso, eno abagigo te po wali,
 “Dage Juda we bidi, me Jerusalem hanu
 we bidi, dagego enabolo walao.
 Te dego tiabo ş̄ yaliwe? Enawe?
 Ma, eno wain gigo dawe?”
- ⁴Eno koneani. Eno dwagi yai ş̄ yali,
 te gide dwagi yai wain du walaiba weyu,

^f 4:5 Sai 13:21; 24:16 ^g 5:2 Mat 21:33; Mak 12:1; Luk 20:9

- tiali goli magi baso mu te wain du
 dwasianu mu walama,
 tama pedauwalide ha yaliwe?
 Te gi tonalubo şe me deli te eno bugagia dolo ebewe?
 5 Megi da, dagebolo ena wain gide yaiba homu yali po
 dagebolo eno pusa mawaibao.
 Te eno wain gi obo hugia şawaibao.
 Awe, te obo dolama, tama te bulu hasa dabe te gi
 tomoba pelama,
 tama te wain ni tulama, dolomainu yaibao.
 6 Te eno te tş dolama, tama busi holama, nosai holiyu,
 tama te sesane ni dabe holama,
 te gi halua somainu yaibao.
 Tama eno te wain ni ma tonalubo şe ma egobeo.
 Te me eno te gi tşba tulubage me
 tulamo olama, habu selaibao,”
 eno abagigo te po wali.
 7 Te Juda we bidi, me Israel we bidi,
 te Genuai Bidigo Tigidali Bomo Elalubo Bidigo
 wain gi tiwai dao.
 Agai godolo mu elama, agai augwali
 bugagia mu tonalubo dao.
 Te we bidi dabego wiegi yai doloba pai
 kolesaga naga emaina homu ebo dao.
 Tiali goli, augwaligo dwai kolesaga ebo dao.
 Agai homugo augwaligo gasa
 we bidi dabe dali wiegi yai kolesaga
 emai homu ebo dao.
 Tiali goli, augwaligo gasa we bidi aiyaba elaluama,
 tama augwaligo augwali dali boi bidi
 homu kolesaga ebo dao.
 Tama te aiyaba elaluali we bidi dabego i wabo agai odali.
- Te dwai dwai haniani kolesaga ebo we bidi dolaibao**
- 8 Dage te tş dabe, be dabe hauwa
 abelama, duga naga pesage
 hola sabo bage, dage dolaibao.
 Te tamadi tama dagego tigidali tş me,
 bulu me, sese sela silaibao.
 Tama gasa bidi dabe meba bidabo bulu menia saibao.
 Tama dage naga tama bidaibao.
 9 Eno odali, Genuai Bidi Tigidali Bomo Elalubo Bidigo

te po wabo eno odali,

“Mu tama, te genuai dwagi yai be dabe
dolama, te olo elaluaibao.

Awe, bidi dabe te wiegi yai be dabe me bidigobeo.

10 Tagala, augwaligo wain gi hauwa bulu badi goli,
me wain du dabe hauwa me walogobeo.

Tama augwaligo dwasianu wain ađ naga nigaibao.

Tagala me, augwaligo nogo si begi
te wit ge augwaligo te gide bulai.

Tama te wit ininama, augwaligo
togolama, te begi deli digi bueibao,”

Genuai Bidigo te po wabo eno odali.

11 Dage dolaibao.

Dage te kigamu hulide hodaloama,
wain wę tuyu, te haniani bomai
wę tubo bage, dage dolaibao.

Dagego te wę tulama, polodubadi be
huli sesabi edelebo dao.

12 Te nai daa tuyu, wain wę tuyu,
me haniani musik gitago eliyu, genagego eliyu,
hąbidigo eliyu ebo, te dagego mu koneani.

Tiali goli, Genuai Bidigo yainu ebo,
te sę dabe dagego munu me konebeo.

Dagego te sę dabe te olo nai dabe da homu ebo dao.

13 Tama tibaso, Genuai Bidigo te po wali,

“Mu tama, eno we bidi dabe dagego
ena konebo hagela yali.

Tama tibaso, boi bidi dabego dage gasa buluba me
kalabus elama, odasa paibao.

Te genuai bidi dabe nai menia saibao.

Te olo we bidi dabe te ađ nogone eyu bidaibao.

Tama augwali mu dolaibao.

14 Megi dage wiegi yai homu elama,
gana paide dagego daa hauwa mu te tubao.

Tiali goli, mu tama, te gų pagede te kele a olama,
tama te Jerusalem bulu genuai bidi dabe,

me olo we bidi dabe dalainu polo no munalubao,”
Genuai Bidigo te po wali.

15 Te tigidali we bidi hale mu yaibao.

Tama te we bidi augwa digi augwa nogi

- ugwa sabo we bidi dabe
 augwali nogi mu menia saibao.
- 16 Te agai doloba pai kolesagago Genuai Bidi Tigidali
 Bomo Elalubo Bidigo
 te we bidi dabego bomo aiyaba elaluaibao.
 Tama aga deli naga genuai nogi saibao.
 Tama agai te dwagi yai doloba pai kolesaga naga ebogo
 agai te we bidibolo ola mawaibao,
 aga te tedali gasagi yai mu dao.
- 17 Te hanu dabe sese dolaibao.
 Tama nosai dabego bulu mesega saibao.
 Tama sipsip kibu de meme kibu sigo
 te mone hauwa elaluali bidi dabego
 be elaluali pesageba nosai tuagasaibao.
- 18 Te dage dolaibao.
 Dagego te gasa bidi dabe ili po walama, seşę te soba.
 Te seşę dabe dage tigi dagana selama,
 tama dagego sela şabo usu egobeo.
- 19 Dagego te po wabo dao,
 “Dago odobo Israel dabego God,
 aga te Dwagi Yai Doloba Pai Kolesaga Naga Ebo
 God dao.
 Ma, agai dabolo magi seş me yabo homu
 ebaso da, teda agai polo emainao.
 Tama tibaso, dago sulama, tama dago
 aga homu kolesaga koneaibao.
 Awe, agai te seş polo emainao,” wabo.
- 20 Dage dolaibao.
 Te dagego haniani nai hasegelama,
 tama te po wabo dao,
 “Dwai kolesaga te wiegi yai dao,
 te wiegi yai kolesaga te dwai dao,” wabo dao.
 Me, dagego te po wabo dao, “Te hulia sali te ula dao.
 Me, te ula ebo te ma huli sali dao,” wabo dao.
 Tama me dagego te po wabo dao,
 “Te ha ebo nai te pusu ebo, ma te pusu ebo nai te kelede
 ha ebo,” po wabo dao.
- 21 Dage dolaibao.
 Te dage bidi duga homugo dagego
 kolesagago gasa bidi dabego kolesaga aiyaba

- elaluali dao homu ebo bidi dabe, dage.
- 22 Dage te bomai wę tubode genuai
nogi elalubo bidi dabe, dage dolaibao,
te dagego bomo de kolesaga si da,
te haniani wę şışbo delide naga dao.
- 23 Te dagego po tų odobo sogo da,
dagego te augwaligo nogode te ili po wabo
po tų abelebo masigi dagego selama,
tama te dwai sę yali bage olo taga palobo dao.
Tiali goli, dagego te po sęę
meni yai bidi dabego po bugagia osola subo menio.
- 24 Tama tibaso, dage te ni sasia pabo
tiwai elama, tama te ni pedali mobia pelama,
tama te ni yabe dabe tau elama,
tegalubo tiwai yaibao.
Te dwai sę dage tigiba polo tama pedalaibao,
te isigo nosai delama, silibo tiwai tama yaibao.
Magi baso meni.
Dagego te Genuai Bidi Tigidali Bomo Elalubo Bidigo
bomai po sela şabaso,
dagego Israel dabego God tudi ola mabo.
Aga te Dwagi Yai Doloba Pai Kolesaga
Naga Ebo God dao.
- 25 Tama tibaso, Genuai Bidi agai
aga we bidi dabe dali sębę eyu,
te sębę posolo mu ebao.
Tama megi da, agai nogo ugwa
sagua selama, dolainu no munalubao.
Agai nogogo deli sogo elebaso,
te tigidali tų dabe bulu du dabe
elebaso, memenege elama,
bulu du dabe aluasa dulaibao.
Tama we bidi hauwa isila paibao.
Tama augwaligo tigi dabe te hanu sunumi dabede
olo pobele bage dabe munalua pabo aų yaibao.
Genuai Bidi agai tama tiaibao.
Tiali goli, te tama tibogo Genuai Bidi agai sębę
siligobeo.
Menio. Agai nogo me ugwaba me dodolalubao.
- 26 Genuai Bidigo te digibulu
ami bidi dabe aga we bidi dolagasomainu i wabo
sa muaibao.

- Awe, te digibulu mu bidibo bage
 asomainu eyu, agai ho bomonama waibao.
 Tama te ami bidi dabe bomona togwa asaibao.
- 27 Te ami bagego bidi dabe da,
 te bomai bidi dabe naga dao.
 Te augwali me deli şağ dili telega
 elama, tulaluainu yai me menio,
 o te agai gedu godege magana pai me menio.
 Augwaligo kibu waligo te gudali ugwa
 bugagia kenama, asaibao.
 Augwaligo bomai su şağ sendol guda sesa paibao.
 Te togwa pabo aq isawai me gudugobeo.
- 28 Augwaligo ene da, mu poa pai.
 Tama augwaligo enesigi dolama,
 tama enabo no sealubuo.
 Augwaligo hos dabe da, boma pai mu dao.
 Tama te hos dabego şağade kapa dabe
 te dila pai masigi tiwai, tama togwa pogobeo.
 Augwaligo karis dabe bomona mu pabo dao.
 Tama te karis wili dabe da, te wali ebo aq ebo dao.
- 29 Te ami bidi dabego te hai wabo te
 laion yowigo bulu hasa ela munama,
 dağ wabo tiwai waibao.
 Augwaligo boi bidi dabe toulama, tama sela paibao,
 te laion yowigo bulu hasa elama,
 sela pabo tiwai yaibao.
 Tama bidi mego augwali ma sogobeo.
- 30 Tama te sogo boi bidi dabe aselama,
 Juda bulu dolagasaibao.
 Tama augwaligo kulukulu genuai mu waibao,
 te tamu wę holama, wę kemi saneba
 asiyu, u wabo tiwai yaibao.
 Tama te bidi dabego te buluba tonagasobo si da,
 teda augwaligo te bulu sisi pogo mesega
 selama, giliga ula sininai suaibao.
 Tama te bulu mu hulua sai suaibao.

Godigo Aisaia profet bidi nigimainu i wali

6 ¹ Te king tuni bidi Usia isali kibu bede, eno Genuai Bidi aga tuni
 bidi saide dualalubo suali. Agai tuni bidi sia ugwanu mu elaluali.
 Tama tuni bidigo ugwa agai gudali da, moni bobobage mu elama, aga be

mu usu nai suali.^h ²Tama geninama ensel sibigo aga bagua sai elaluali. Te tigidali deli deli ensel dabego bogo a naga olama, me badu nogi deli naga elaluali. Tama deli deligo augwa bogo me sigo augwa gesabidi halua siyu, ela pai suali. Tama gasa bogo me sigo augwa tigi mesega siyu yai yali. Tama gasa bogo me sigo da, augwali bola peyu yali. Te ensel sibi da, te isi ula tiwai.ⁱ ³Tama augwa digi augwa hasi ma i weyu, te po wali, “Genuai Bidi aga tedali gasagi yai mu dao. Aga tedali gasagi yai mu dao. Aga tedali gasagi yai mu dao. Genuai Bidi Tigidali Bomo Elalubo Bidi aga tedali gasagi yai mu tama dao. Agai genuai ula de bomo sigo t̄ tigidali mu usu nani,” te po wali.^j ⁴Ena yaide be sunumide bidali, tama tigidali sogo augwali deli mego hae wabo sogo da, eno suali, te moni masigi me augwaligo be ş̄ yali, te masigi tigidali mobodo yali. Tama eno suali, hano bede pağana pabo suali.^k ⁵Tama tibaso, ena wi ebaso, te po wali. “Mu tamao, ena mu dolaibao. Tigidali sogo eno pedauwalidu dwai po wabo dao. Tama ena dwai po wabo we bidi dabe tomode bidibo dao. Ena dwai ş̄ğ̄ wa abibo bidi dao. Tama megi da, eno te tuni bidi polo suali, aga Genuai Bidi Tigidali Bomo Elalubo Bidi. Tama tibaso, ena isaibao,” eno te po wali.

⁶Tama te ensel dabe me deligo ala gagawai naide isi dage tolasa, ena pageba bola asali. Agai te isi dage te altade sali. ⁷Agai te isi eno pedauwalide munama, agai te po wali, “Eno te isi nago pedauwalide muani dao. Tama nago dwai ş̄ğ̄ sia selama, tama megi Genuai Bidigo nago yali dwai ş̄ sela ş̄wai dao,” wali. ⁸Tama eno Genuai Bidigo ensel sibi hanaluyu, te po wabo odali, “Dago de tagala palaibawe? Dego eno po sela paibawe?” Tama eno te po wali, “Nago ena tagala palao.” ⁹Tama tibaso, Genuai Bidigo enabolo te po we bidibolo pusugi pao po wali,

“Dagego po hauwa sogo odaibao.

Tiali goli, dagego te page kuna konegobeo.

Dagego gedugo hauwa sogo tonono bilaibao.

Tiali goli, dagego magi ş̄ pedelali me konea sogobeo.

¹⁰ Magi baso meni.

E we bidi hanigo homu kolesaga te puna pai dao.

Tama augwaligo odogo po odobo hagela eyu,

tama augwaligo augwa gedu palia sai.

^h 6:1 2 Kin 15:7; 2 Sto 26:23 ⁱ 6:2 Te tobage mobo bidi enselgo bogo dabe te a naga me badu deli elalubo, augwali te gasa me badu ensel bogo nigai bidi dabe tiwai me elalubeo. Te tobage ensel dabe augwali nogi e tiwai “Serafim” te Hibru pogo nogi da, tama augwaligo po me te buku Baibel Aisaia pedai delide naga elalubao. ^j 6:3 Ped 4:8

^k 6:4 Ped 4:8

Tiyu, augwaligo gedugo te magi nai
 me deli suidali weyu tiali,
 tama augwaligo odogo po odidali weyu tiali,
 tama augwaligo homude te po page
 ma koneama, tama augwali begasa,
 enaba ma aselama, tama eno augwali usu ma
 ilidali weyu, augwaligo
 tama kolesaga yai dao,” wali.¹

¹¹Tama tibaso, eno aga e tama po hanalu wali, “Genuai Bidi, eno te şe ela pelama, mena sogoba usu nigı paibawe?” Tama agai po wei ponoyu, te po wali,
 “Te tigidali hanu dabe, me tı dabe,
 me be dabe sese dola silama,
 be dabe olo elalua pabo sogode.
 Tama bidi dabe te bede dabe bidi me
 bidışama ebo sogoba usu nigı paibao.

¹²Ena Genuai Bidi.

Eno te we bidi tigidali augwali augwa
 bulu pađe eno augwali
 te digibulu buluba sela şawaibao.
 Tama te bulu we bidi menia saibao.

¹³Tama ma dwasianu we bidi hani

te tıde me bidibaso da, augwali me silaibao.
 Tiali goli, tagala, te bulude we bidi meni baso me,
 te nosali ena we bidi me ma pedalaibao,
 te ni age te bidigo polo gelai ni tanede age
 ma dalasa holobo tiwai ma yaibao,” wali.

Godigo tuni bidi Ahasbolo tau sabo po wali

7 ¹Te Ahas te Jotamgo ogwa, aga wai Usia, aga te Juda dabego tuni bidi bidibadi, hwıbo sogo pedalali. Resin, Siria bulu tuni bidi, me Peka, te Ramaliago ogwa, Israel dabego tuni bidi, augwali sigo Jerusalemba hwıgi pali. Tiali goli, augwali sigo te hanu sabo usu ebe.

Te hwıbo Jerusalemba sabolişama ebadi da,^m ²te Juda dabego tuni bidigo te e tama po odali, te Siria ami bidi dabe te Israel bagego tıba polo asai dao wabo po odali. Tama tuni bidi aga we bidi hani dali augwali wi mu eyu, haliga midigi sali, te bomai waligo te ni silide elalubo ni yabe dabe memenege ilibo tiwai yali. ³Tama Genuai Bidigo Aisaiabolo te po walali, “Naga ogwa Searjasup” oda selama, tuni bidi Ahas sugi pao. Dage te wı sabo wı gamia Jerusalem

¹ 6:10 Mat 13:14-15; Mak 4:12; Luk 8:10; Jon 12:40; Tpi 28:26-27 ^m 7:1 2 Kin 16:5; 2 Sto 28:5-6 ⁿ 7:3 Te Hibru pode te nogi Searjasup te tobage po tiwai si elalubao, “Dwasianu hani we bidi te augwa page buluba ma asaibao,” wai dao.

ugwa badu piąo. Tama dage sigo te tuni bidi te name ugwa wę telabo pesageba pabo genuai sunumide te tuni bidi tiąba pao. ⁴Te tuni bidibolo aga homu ąą olama bidao, tama te haniani po dabego agai homu elalumainu elamo dao po walao. Aga yaide dua bidama, tama te tuni bidi Resin aga hani dali, me te Israel dabego tuni bidi dabe dali, wi igio po wao. Te tuni bidi sigo sębę te isi pąde sula sainu dabo tiwai ebao. Te sula sainu hano naga holobo tiwai te ebao. ⁵Te mu tama, te Siria dabe augwaligo te Israel dabego tuni bidi dali augwaligo po mia sali, te Ahas aiyaba elaluaio olama, ⁶augwaligo te po wali, augwali te Juda buluba hwągasaibao po wali. Tama we bidi wi ilama, tama te bulu selama, tama te bidi Tabelgo ogwa tuni bidi bidimainu sa muaibao, augwaligo te po mia sali,” wali.^o

⁷“Tiali goli, ena God, Genuai Bidi, eno te po te obao, te nai dabe te me pedalogobeo. Mu tama, augwaligo te sę ebo usugobeo. ⁸⁻⁹Magi baso meni. Te tobolu bidi Resin agai bomogo naga te genuai hanu Damaskus tonalubo dao. Tama Damaskusgo bomogo te Siria tą kantri tonalubo dao. Tiali goli, te Resin da, te aga bidi naga dao. Te tiwai me, Ramaliago ogwa Peka agai bomogo naga te Israelgo genuai hanu Samaria tonalubo dao. Tama te Samaria hanugo bomogo te Israel tą pedai kantri tonalubo dao. Tiali goli, te Peka da, aga bidi naga dao. Te 65 kibu be tomode te Israel bulu dolama, tama te we bidi sese besela pelama, tama augwaligo nogi mu tama sia saibao. Tama ma, te Juda dabe dagego eno pode homu ąą wasiąma yali da, teda dage me bobobage sogo me bidigobeo,” Genuai Bidigo te po wali.

Godigo tuni bidi Ahasbolo bomo yai sę ola mani

¹⁰Tama Genuai Bidigo Ahasbolo gasa po me wali. ¹¹Agai Aisaibolo te Ahasbolo te po wao po wali, “God naga Genuai Bidibolo hanalu wao, te nagebolo bidigo gedugo susiąwai bomai sę me ola momainu. Nago agabolo mena tama bomai sę, me nago suabo homu ebo sę me, nago agabolo hanalu wao. Ma, nago te bomo yai sę te bidi gų pagede suabo homu ebaso me, o ma nago dagalude bomai sę pedalobo suabo homu ebaso, o ma menade me naga homugo godolo me ebo digi te tobage sę suabo homu ebaso da, nago Godibolo hanalu wao, tama Godigo nage ola mawaibao,” wali. ¹²Tiali goli, Ahasgo te po wali, “Menio. Te eno agabolo bomai sę me suainu me hanalugobeo. Eno Genuai Bidigo bomo usu sabo hagela ebo,” wali.

¹³Teda Aisaiago po wei ponoyu, te po wali, “Dage tuni bidi Devitgo wąi dabe, dagego bugagia odao. Dagego ebo kolesagade da te bidi dabego dage hagela mu yali. Tama megı ma eno Godigo tonalubo kolesaga te dagego usu sogowe? ¹⁴Teda Genuai Bidi aga digi dage bomo yai sę me

^o 7:6 Dago te nogi yali bidigo nogi konebeo, “te bidi Tabelgo ogwa,” tiali goli te kolesaga koneai bidi dabego homugo aga te Siria bulu bidi hani me deli da homu yai.

deli ola mawaibao. Te şe da e tama tiwai dao. Te gesi wegi me tabi elama, tama agai ogwa ame naibao, tama agai nogi Emanuel poaibao.^p ¹⁵Tama nosali te ogwa aga te homu kolesaga elama, te mena kolesaga dwai yaliwe, ma mena kolesaga wiegi yai yaliwe wabo sogode, tama te sogo agai hani bunu ađ, me sis augwaligo kau kibu ame pego, me sipsip kibu ame pego nigai nai, tuaibao,” wali.^r

¹⁶“Ahas, megi da, nago te tuni bidi side nage wi ebo dao. Tiali goli, augwali sigo bulu dolama, tama augwaligo tų olo elaluaibao. Tama te nai şe da, te ogwa wai bųgo mena kolesaga dwai yaliwe, ma mena kolesaga wiegi yai yali homu konesiabadi, te şe yaibao. ¹⁷Tama Genuai Bidigo dwai sogo taga palama, tama nage me, naga we bidi me, naga ayago togali seseba taga palaibao. Te seųeųe da, te polobadu yali te seųe mu edelama, mu yaibao, te Israel dabego Juda tagalama, taga palidu gagalasa, megiba usu nagasali. Te seųe e dao, Genuai Bidigo Asiria tuni bidi Juda buluba sela asaibao,” Aisaiaگو te po wali.

¹⁸Tama te sogo Genuai Bidigo Isip dabeba ho obaso, augwali augwa bulu tagalama, tama augwali te dinai sibi asobo aų yaibao. Tama agai te Asiria haniba ho wabo si, tama augwali te mano sibi isidigi asobo tiwai asaibao. ¹⁹Tama augwali te bulu Juda tųde mu paųa yaibao. Tama augwali te tigidali dwai pesage me, masigi dedage me, dwagi yai nosai elalubo pesage me, sesane yai bono elalubo pesage me, mu usu naibao.

²⁰Tama te sogo Genuai Bidigo te Asiria tuni bidi te weų Yufretis u badu oda saibao. Aga te Genuai Bidigo nisa tiwai elama, dagego nisi poawaibao, te dage Juda dabego tigi nisi. Agai dagego penane nisi me, tobolu nisi me, tigi nisi me, tigidali agai poawaibao.

²¹Tama te sogo da, te boi bidi dabego dagego kibu bulmakau dabe, sipsip kibu dabe sese ela silaibao. Tiali goli, bidi me deligo kau kibu deli bidiyu, me meme kibu si me bidibaso da, ²²augwaligo ame peų hauwa mu nigilaibao. Tama agai te ame peų selama, tama te tubo nai sis geselaibao. Tama te dwasianu we bidi bidibo bage augwaligo te sis dali, hani bunu ađ dali si tuyu yaibao.

^p 7:14 Te Hibru pogo te nogi Emanuel te page da te elama dao, “God da dali bidibao,” wali.

^q 7:14 Mat 1:23 ^r 7:15 Te Israel dabe augwali te tų wa pai bulude bidali sogo, augwaligo te nai hauwa elalubeo. Tama augwaligo odali, te Kenan tųde te nai hani me hasago ame peų hauwa elalubo po odali, tama te wiegi yai nai mu da augwaligo te homu yali. Te buku Ma Dobola Sali, Daj 3.8, tede te po elalubao. Tiali goli, nosali da, augwali te Kenan tųba sabolama, bidali sogo da, augwaligo te tobage nai hauwa mu elaluali, te nai hani me hasago ame peų te tubo nai si naga me elalubeo. Tama tialima, bidi mebago homugo te hanigo te po wali, te wai dabego te wiegi yai nai naga tuabo po wali da homu yali, te nai hani me sis. Tama bidi mebago homugo te po page te gasagi yai tedali wali da homu yalio. Augwaligo homugo te hanigo te gide nai dabe tigidali dolaibao po olama, wali da, te homu yali. Te wali po te ves 21-25 tede suao. Te tobage nai si naga elalueibao, te bulude elalubo hani dali te tubo ame peų, ma te sis nigabo, te nai si naga elalubo po olama, wai dao.

²³⁻²⁴Te sogo da, dagego gi dabe dola silaibao. Megi te dagego dwagi yai wain ni gi deli delide te 1,000 wain ni bono elalubo, tama te ni dude dagego masigi 1,000 kina te sabao. Tiali goli, te dwai sesane ni me, sesane bono si holama, te ni mesegelaibao, te dwagi yai gi dabe, tama bidi dabe olo bilibo wi yaibao. Ma, bidi dabe augwali teba poloba painu da, teda augwaligo enesigi me selama, hasa kegegi paibao. ²⁵Megi da, bidi dabego te dwasianu bulu dude dabe te augwa gide nai sabo dao. Tiali goli, te ni sesane yai ni dabe holiyu, bono dabe holiyu elama, te gi mesegelaibao. Te bidi dabe augwali te sesane dabe wi ebaso, teba pelama, gi dabe ma egobeo. Menio. Te da, augwaligo te kau kibu de sipsip kibu naga te pesageba bilama, nai teba gegegi pomainu sula tagalaibao.

Polo wi sa, polo sela pa

8 ¹Genuai Bidigo enabolo walali, “Te po tede aşabo genuai nai me sao, tama ugwadu nago te po aşao, ‘Polo wi sa, polo sela pa.’ Nago bugagia aşao, tama te bidi dabego bugagia nedebo usu yaibao. ²Tama te po sagoa maiabo bidi si nago sao, te dwagi yai bidi pris Uria, me Sekaraia, te Jeberekiago ogwa,” wali. Tama eno te tama yali. ³Nosali ena ena we dali piali.⁵ Tama aga haliga elama, ogwa ame nani. Tama Genuai Bidi enabolo te po wali, “Nago te nogi agabolo mao, ‘Polo wi sa, polo sela pa’. ⁴Tama te waigo ida aya wabo gagalisiqbadi da, te Asiria bagego te Damaskus de Samaria sigo wiegi yai nai dabe tigidali wi sagasaibao, tama augwa tuni bidiba sela paibao,” wali.

Asiria tuni bidigo Juda dabe aiyaba elaluanu yai goli, God augwali dali bidali

⁵Genuai Bidigo enabolo te po ma wali,

⁶“Ena Genuai Bidi, ena te wę
Jerusalemde gebo dabo tiwai dao.

Aga tigidali sogo dua soabo dao.

Tiali goli, te Juda we bidi dabego
homugo eno bomo meni da homu ebo.

Tama augwaligo homugo te Aram tuni bidi Resin dali,
te Israel dabego tuni bidi Peka,
augwali sigo bomo te genuai mu dao homu ebo.

⁷⁻⁸Tama tibaso, ena Genuai Bidi, te eno te wę Yufretis
genuai mu ilama, tama te wę gisigiluyu,
tigidali pesage mesega sigi pomainu yaibao.
Te węgo tigidali bulu mesega saibao.

⁸ 8:3 Bidi mebago te homu ebao, te profet bidi Aisaiago we, aga me te profet we me dao homu ebo.

Te wę Yufretisdu gagalama, tama Juda
 buluba sabolagasaibao.
 Tama te wę gebo dabo te bidigo dogoni daġ yagasaibao.
 Te wę Yufretis te Asiria tuni bidigo piksa tiwai dao,
 te aga ami bidi dabe dali sigo tiwai.
 Te bage augwali aselama, te Emanuel
 nago tō usu nagasaibao.”^t Godigo te po wali.

⁹ Bugagia odao, dage te we bidi
 digibulu bidibo me, pađe bidibo me,
 dage Israel hani isawai bage.
 Dagego hwjabo no muyu, bomu selama elalubo sę yao.
 Tiali goli, dagego bomu da, toga paibao.
 Tama dage noma selama, kone tuą pebela waibao.

¹⁰ Duga homugo mena sę yabo
 homu yali po duga maiąo.
 Tiali goli, dagego te sę ebo usu egobeo.
 Dagego te po da, aga nai meni yaibao.
 Magi baso meni. God da dali bidibao.”^u

Aisaia aga hani dali, augwaligo God deli naga wi yao

¹¹ Eno Genuai Bidigo bomu enaba asobo gagama yali. Tama agai enabolo te po wali, “Nago te we bidi dabego homu dali deli igio. Tama nago augwaligo ebo kolesaga wali pigio,” wali.

¹² “Te we bidi dabego te po obaso da, ‘Bidi hani mebago Juda bulu dolaibao po mia salio,’ po obaso, nage dali, naga hani dali, dagego te po mu dao homu igimio. Tama me, te we bidi wi elama, noma sobaso da, dage augwali ebo gilama wi elama, noma selamuo. ¹³Dagego e tama koneao. Ena Genuai Bidi Tigidali Bomu Elalubo Bidi, ena te wiegi yai doloba pai kolesaga naga tigidali sogo ebo God dao. Dagego ena deli naga wi elama, noma sao.”^v ¹⁴⁻¹⁵Ena te we bidigo geme duala sabo bomai pesage dao. Tiali goli, ena te Israel de Juda sigo we bidigo sunumide masigi tiwai bidibao. Tama augwali te masigide saġa dani tuą palama, tama tulaluama, tama augwali dolaibao. Tama te Jerusalem we bidide da, te ena te ke tiwai, augwali tola sabo bidibao. Tama augwali hauwa te keđe tola saibao,” wali.”^w

^t 8:7-8 Te Hibru pode te nogi Emanuel wali, te page te tobage tiwai si elaluali, “God da dali bidibao,” wai. Te Aisaia 7:14, tede Aisaiaġo te po weyu, te wai me deli ame nobaso, te augwaligo aga nogi te Emanuel nogi yaibao po wali. Aisaiaġo agai te waide homu kone elama, tama agai te Juda hanigo tō nogi e poali, “Emanuel, nago tō dao,” wali. ^u 8:10 Te Hibru pogo, te po dage e tiwai, “God da dali bidibao” wai, te tobage po tiwai wai te nogi Emanuel wali. Te Aisaia, Daġ 7:13-15 me Daġ 8:7-8, tede te po suo. ^v 8:13 1 Pi 3:14-15 ^w 8:14-15 1 Pi 2:8

Aisaiago Genuai Bidigo yaibao wali te şe tonaluali

¹⁶Te ena skul ogomani gesabidide eno te Genuai Bidigo enabolo mani po mesegelama, haluali. Tama eno aşenama, tama eno dađi tede ilali.^x

¹⁷Megi da, eno te Genuai Bidi agai yaibao wali te şe ebo deli naga tonaluaibao. Agai Israel we bidiba polo tudi ola mawai dao. Tama agai augwaliba te begela ma tonogobeo. Tiali goli, eno agai bomo deli naga konealuaibao.^y ¹⁸Genuai Bidi Tigidali Bomo Elalubo Bidi aga te Saion bulu dude bidibao. Agai ena te wai dabe mawai dao. Tama agai da te Israel we bidide yabo şe dađi tiwai ilali.^{z a}

God agaduba deli naga we bidibolo dwagi yai sogo mabo usu yaibao

¹⁹Te we bidi dabego dagebolo te isai bidi dabego noma dali po wabo we bidiba pao po waibao, tama augwaligo homu kolesaga sigi pao po waibao. Te isai bidi dabego noma dali po wabo bagego augwaligo pedauwalidu pomu po weyu, keledude haniani dwasianu po waibao. Tiali goli, te isai we bidi dabego te bidibo we bidi dabe homu kolesaga mabo usu egobeo. Te tama tiali goli, magi baso mu augwali te isai we bidiba udalama, tama augwalide te kolesaga sabo dawe? Augwali augwa Godiba pomainao.

²⁰Te augwaligo te augwa Godiba pelama, tama agai homu kolesaga siyu, agai bomai po sigi peyu eyao. Ma, augwaligo tama tisama yali da, teda augwali hulua sai madi me bididuaibao. Tama wiegi yai sogo me sugobeo.

²¹Menio. Augwali dwai dene mu saibao. Te augwali genuai homu şeşę mu elama, nasi elama, tama augwali subigila te bulude bilaibao. Nasigo augwaligo haliga şeşę mu elama, tama augwaligo augwa tuni bidibolo, me augwa Godibolo dwai po waibao. Te augwaligo dagaluba tonoyu,

²²toba tonoyu yaibao. Tiali goli, augwaligo dwagi yai nai dabe me sugobeo. Menio. Te augwaligo te dwai şeşę, me dwai şeşęgo augwali tigidali bulude bilibo digi te hulua saigo augwali mesegasa bilibo tiwai yaibao. Tama augwali wi pelama, te dwai şeşę gedelabo sunumi mu meni yaibao.

^x 8:16 Godigo te po wali, te we bidi augwaligo agai po wali pişabaso da, teda haniani şe nosali pedelaibao wali. Tama Aisaiago te yabo şe po aşani. Te agai te aşani po kęnama, dađi ilali, te niwai bidi mego agai te aşani po hasegelabo usu me egobeo. Tialima, nosali da, te po wali şeşę dabe pedalubo si da, te we bidi augwaligo te duani buku yabe dagalama, tama agai te aşani po nedama, tama augwaligo te tiwai konemainogo, te Aisaiago wali po dabe te mu po wai yabo homu yaibao te po wai. ^y 8:17 Hib 2:13 ^z 8:18 Aisaiago Godigo po pusali silagasobao wali. Megi da, te aga dua digi bididu, te Godigo mena şeşę ebo te suainogo tonalu bidali. Tialima, te we bidi dabego aga sulama, tama augwaligo agai wai dabego nogi pagede homu kone kone ebo sogo, augwaligo te agai augwaliba pusali pode homu kone palaibao. Te Aisaiago wai dabego nogi page koneainogo da, te buku Aisaia, Dađi 7:3; 8:3-4, tede suao. Te ves 17 me 18 tede wali po, "te Israel we bidi dabego wali po," te tų kantri Israel me Juda dali te tų kantri pedai side te po wai dao. ^a 8:18 Hib 2:13

Godigo we bidi wiegi yai homu elama, bidabo tuni bidi mani

9 ¹ Polobadu Genuai Bidigo te Naptaligo hanigo bulu pesage, me Sebulungo hanigo bulu dolai dao. Tama augwali hale dali mu bidai dao.^b Tiali goli, me sogo nosali da, te badu dabe te tamu węba pabo sunumide bida bida pabo bulu, me te wę Jordan ugwa bulu badu bulu dabe, me te Galili distrik bulu tigidali, me te Israel hani isawai bidi dabe hauwa bidibo madi, te bulu dabe sese genuai nogi saibao. Tama augwaligo dwai sogo sia saibao.^c

² Te we bidi augwali moni hulua sai madi bilai goli,
megi augwali genuai ula suali.
Augwali hulua sai madi bidai goli,
megi da, augwaliba genuai ula pedalali.^d

³ Genuai Bidi, nago naga we bidi
genuai hani pedalomainu yalio.
Tama nago augwali wiegi yai homu emainu geninanio.
Augwali naga gedude wiegi yai homu yalio.
Te augwaligo augwa gi nai hasia inawai
siyu ebo homu tiwai yalio.
Tama me, te ami bidi dabego wabi hwınama,
gasa bidi dabe aiyaba elaluama,
te augwaligo sali nai dabe dobayu
ebo homu tiwai yalio.

⁴⁻⁵ Te we bidi dabe wiegi yai homu yali.
Magi baso meni.
Nago augwaligo boi bidi dabego bomo
polo toga sayai da weyu,
te polobadu nago Midian hanigo bomo toga
sayani yali gilama.^e
Te boi bidi dabego naga we bidi tonaluama,
tama augwali genuai seęę tolalumainu yai dao,
te bidigo seęa pai ni name kau kibu
dogoniba munama,
tama te kau kibugo seę emainu wabi dagego elama,

^b 9:1 Te Asiria dabego boi hwıagaselama, Sebulun me Naptali hani sigo tı dabe sobadi, te gasa te pade elaluali bulu dabe, me distrik dabe, te kantri Israel te not badu elaluali bulu dabe me salio. Te buku 2 King, Dajı 15:29, tede suao. Galili tı te gasa nogi te tı pedai badu kantri nogi me dao. ^c 9:1 Mat 4:15 ^d 9:2 Mat 4:16; Luk 1:79 ^e 9:4-5 Polobadu te Midian dabego te Israel dabeba dwai seę ebaso, tama te bidi Gideongo nogode Genuai Bidigo augwaligo bomo togwaluai dao. Te buku nogi Tobolu Bidi, Dajı 6:16; 7:9-25, tede te po dabe elalubo suao.

tonalubo tiwai yai dao.
 Tiali goli, nago te ni name dabe, me te wabi dage dabe,
 nago polo toga sayai dao.
 Te boi bidi dabego nai tama,
 te boi bidi dabego nago we bidi dabe
 dali dwai se megi me egobeo.
 Te boi bidi dabego gudama, hwigi pabo
 nai dabe sese isigo dela silaibao.
 Te augwaligo moni su dabe, me hwiyu gudubo ugwa
 te bidi kaneme dagana sali, te isigo delama, silaibao.
 Te tigidali sege dabe sese silaibao.
 Tama wiegi yai sogo ma asaibao.
⁶ Magi baso meni. Ogwa me ame neyu,
 daba polo sabolali.
 Te wai me deli Godigo dabolo mani.
 Aga dago tuni bidi bidaibao.
 Tama agai tama nogi dabe elaluaibao,
 te Dwagi Yai Kolesaga Mu Mabo Bidi dao,
 tama God Tigidali Bom o Elalubo Bidi,
 tama Tigidali Sogo Bida Bida Pidu Bidibo Aya,
 tama Bugagia Bidibo Page Sela Mayu,
 me Tabi Nagame Ilibo Tuni Bidi.
 Agai te tobage nogi dabe elaluaibao.
⁷ Te tuni bidi te tuni bidi Devit hasegelama, bidaibao.
 Tama aga te Devitgo tuni bidi siade dualaluyu,
 te we bidi dabe tonaluaibao.
 Te agai gavmanigo bomo tigidali sogo
 genuai holudaibao.
 Tama hwibo me menia pelama,
 bugagia tigidali sogo bidaibao. Magi baso meni.
 Te tuni bidi aga te tigidali sogo
 dwagi yai doloba pai kolesaga naga ebo dao.
 Tama agai te kolesagago aga
 te bomai tuni bidi bidaibao,
 te megi me, tigidali sogo nosali me.
 Genuai Bidi Tigidali Bomo Elalubo Bidigo homugo
 bomu elama,
 we bidi dabe dali wiegi yai se yabo homu ebao.
 Tama tibaso, agai te se dabe me elama, pedalaibao.^f

^f 9:7 Luk 1:32-33

Genuai Bidigo Israel dabe dene mani

- 8 Genuai Bidigo polo wali, te agai
te Israel bulu dolaibao wai dao.
Te Jekopgo wai hani dabe,
tama te dwai sogo augwaliba pedalobo sogo da.
- 9 Te genuai hanu Samaria we bidigo,
me gasa tigidali Efraim hani
bidi dabe, augwaligo koneaibao,
Genuai Bidigo te se augwaliba te yali dao po waibao.
Te megi da, augwaligo homugo augwali
geninama mu dao olama,
augwa nogi ugwaba te sobao.
Augwaligo te po wali,
- 10 “Te boi bidi dabego dago brikigo
şani be augwaligo huşiyu,
me dago fik ni geliyu yali goli,
te dago tede moni homu egobeo.
Te olo nai dao.
Dago masigi togolama, wiegi yai
bomai be dabe se yaibao.
Tama dago wiegi yai ni bo wai bulaibao,
te ni fikigo pesage hasegeleyu,” te po wali.
- 11-12 Genuai Bidigo Israel dabe dali seşeyali.
Tama tibaso, agai te boi bidi dabego homu hodolali,
te augwaliba wai hwıaşasomainu.
Agai te Siria dabe te giliga asobo badu
bidigo homu hodolali, te tuni bidi Resingo hani,
tama me agai giliga dega
sabo badu bulu Filistia hanigo homu me
hogodolama, hwıaşasomainu yali,
Israel dabe aiyaba elalumainu.
Genuai Bidigo te tama tiali goli,
tego agai seşey siligobeo.
Menio. Agai nogo me dodalubao.
- 13 Te Israel we bidi homu begelebeo.
Genuai Bidi Tigidali Bomo Elalubo Bidigo
augwali dene mani.
Tiali goli, augwali agaba ma asobeo.
- 14 Tama tibaso, Genuai Bidigo
te bulu Israel dene mawaibao.

- Te deli sogo tama agai Israel dabego
tobolu dali, danu dali, si togaibao.
Me po begelama weyu, agai te wiegi yai
ni pam nologo dali, te olo sigi dali si togaibao.
- 15 Tobolu te polo monu dabe de genuai
nogi yai bidi sibolo wali.
Te danu te tibo po we bidibolo pusali
profet bidi dabebolo wali.
- 16 Te tobolu bidi dabego we bidi dabebolo
wiegi yai sunumi dali kolesaga si
ola mawai menio.
Tama tibaso, we bidi polo hagawali.
- 17 Tigidali we bidi God tagalama,
God dologode bidisabo bidi polo gagawai dao.
Augwaligo tigidali po dabe,
kolesaga dabe mu dwai mu dao.
Tama tibaso, Genuai Bidigo tigidali mu dolaibao.
Agai te gesi bidi me bidimainu me sula tagalogbeo.
Tama agai te we sibi me hobede me egobeo.
Wilawe we dabe, me te tiana wai dabe,
agai hobede me egobeo.
Genuai Bidi agai te tama tiaibao.
Tiali goli, tego agai şeşę siligobeo.
Menio. Agai nogo me balalubao.
- 18 Te we bidi augwa haniani dwai
kolesagago augwa ma dolali.
Te dwai nosaide isi dola selama,
te genuai nide dela selama,
moni busi dabo tiwai yali.
Tama genuai hano ugwaba holali.
- 19 Genuai Bidi Tigidali Bomo Elalubo Bidigo şeşę
genuai mu elama,
tama agai tode we bidi tigidali dene mani.
Tama augwali silali, te isigo mone busi delama,
tigidali nai dabe dela silibo tiwai yali.
Te deli deli we bidigo homu kolesagago da,
gasa we bidi aiyaba elaluabo homu elalubo.
- 20 Tama augwaligo nai anoma elama, sabo şeşę ebo dao.
Tiali goli, tego augwaligo homu kolesaga pağanabeo.
Augwali te bidi nai hauwa tuai goli,
augwali tabia pişama ebo tiwai dao.
Tama augwaligo te kolesaga augwa deli

hani dali me ebo dao.

21 Te Manase hanigo Efraim hani

aiyaba elaluainu yaibao.

Tama Efraimgo Manase hani aiyaba

elaluabo homu yaibao.

Tama te hani sigo Juda dabe aiyaba

elaluabo homu yaibao.

Genuai Bidigo augwa digi augwa hasi

ma dolomainu yaibao.

Tiali goli, tego agai şeşę ebo siligobeo.

Menio. Agai nogo me balalubao.

10 1-2 Dage te gesi gesi bomai po mubo bage,
dage dolaibao.

Te gesi bomai pogo te po tų ebode

gasa bidi dabe aiyaba elaluama,

tama nai meni yai bidi dabego nai sainu.

Tama tiyu, te nai meni yai bidi dabe

po tų ebo sogo asobaso da, te bomai pogo augwali

tau sabo meni.

Tama augwali po tų ebode geda mubo dao.

Tama te dolo meni yai kolesagago

dagego Genuai Bidigo we bidi dabe aiyaba elaluama,

tama dagego te wilawe we dabe,

me tiana wai dabego nai dabe dagego wi sabo dao.

3 Te Godigo dagego dwai kolesaga

wei ponabo sogo bodolu muani,

te sogoba sabalobo si, dagego magi şę yaibawe?

Te agai gasa bulu me te bomai wali tiwai aselama,

dage dolomainu ebaso, dagego magi şę yaibawe?

Dage te deba udalama, dage tau somainu yaibawe?

Tama te nai dabe hauwa dagego sali,

te nai dabe dagego menade mugi paibawe?

4 Dagego magi şę me ebo usu egobeo. Mu menio.

Te boi bidi dabego dage ela wialobo,

o dage deli deli pibia sidubadi,

augwaligo dage sela pelama,

kalabusiba tagaligi pabo şę yaibao.

Genuai Bidigo şę dabe dageba pedalumainu yaibao.

Tiali goli, tego agai şeşę siligobeo.

Menio. Agai nogo me balaluaibao.

Te bulu t̄ kantri Asiria dolaibao

- 5 “Ena Genuai Bidi, eno te po obao,
te bulu t̄ kantri Asiria dolaibao.
Megi da, te Asiria te w̄bi tiwai nigilama,
tama eno we bidigo ena s̄b̄ ilibo
we bidi te elebao.
- 6 Te we bidi dabego ena tagalama,
tama God dologode bidis̄bo bidi gagawali.
Tama augwaligo ena s̄b̄ ilali.
Tama tibaso, eno Asiria bage
taga palama, augwali elama,
tama augwaligo nai dabe selama, tama augwali
aiyaba elaluama,
agalama, tagalomainu yai dao,
te bidi dabe t̄ nagamea pai
pudu pabo tiwai emainu yai dao.”
- 7 “Tiali goli, Asiria tuni bidigo homu
kolesaga, eno kolesaga dali side gasa me tali.
Agai te gasa bulu hauwa me dolabo homu elalubao.
Tama augwali sese silabo homu ebo.
- 8-9 Agai dwai homu tali eyu, te po wali, ‘Eno bulu
hauwa me elaluama,
tama augwaligo genuai hanu dabe
eno polo sai dao,’ po wali.
‘Tama me, te tuni bidi dabe eno augwali aiyaba elaluali,
te bidi dabe augwali eno ami bidi
tomode ofisa bidi bidimainu,
eno augwali te s̄ mani.
Te eno te hanu dabe aiyaba elaluali
hanu dabe te Karkemis, me hanu Kalno, me Arpat,
me Hamat, me Damaskus, me Samaria, tama dao.
- 10 Eno te bulu dabe dolama, elama, tagalai dao.
Te bulu dabede te tibo god dabe piksa hauwa mu elalubo
hanu dabe augwaligo elaluali.
Tama augwa te tibo god dabego augwali tau sabeo.
Te tibo god dabego te Jerusalem me Samaria sigo
tibo god dabe aiyaba elaluali.
- 11 Eno te Samaria dabe augwa
tibo god dabe dali eno dolai dao.
Tama tibaso, eno te kolesaga tiwai te Jerusalem augwa
tibo god dabe dali me yaibao,’

te Asiria tuni bidigo te homu ebao.”

12 “Te tuni bidigo te po wali.

Tiali goli, ena Genuai Bidi eno te po obao.

Te Asiria dabe tuni bidigo eno agabolo

te bulu du Saion me Jerusalem side

yao wali şe ela silibo si da,

teda aga tigide eno şe yaibao. Magi baso meni.

Agai homugo aga genina mu dao homu elama,

tama aga nogi ugwaba mu sabo.

13 Agai tobolu tali eyu, agai te po tama wali,

‘Ena bomo de ena homu kolesaga sigo

eno te şe dabe yalio,’ po wali.

‘Magi baso meni. Eno dwagi yai

homu kolesaga mu elaluali, te şe dabe yabo.

Eno te bulu dabe daı ilali, eno polo sela şawani dao.

Tama tigidali ena dologode naga bidibo.

Tama eno augwaligo wiegi wiegi yai nai dabe

augwaligo sisiniduali nai dabe eno sai dao.

Ena bomai bidi mu dao.

Tama tiyu, eno te bulu we bidi dali,

me augwaligo king bidi dabe dali agalama,

tama eno augwali aiyaba mesegelai dao.

14 Te e tõe kantri dabe tigidali te ba be tiwai dao.

Tama augwaligo wiegi yai nai dabe eno sali,

bidigo te ba ge sabo tiwai yalio.

Awe, te ba kimi dabego augwa ge dabe tagalama,

tama bidigo olo sabo tiwai gilama,

eno te kantri dabe sisinani.

Tama te ge tagalali ba kimigo

te ge sabo bidibolo hwa wasiawai tiwai eyu,

te kantri dabego bomo elaluali

bidi dabego enabolo

tagala po me wabeo. Mu menio.’

Te tuni bidigo te po wali.”

15 “Tuni bidigo te po tama wali.

Tiali goli, ena Genuai Bidi eno hanalu waibao,

‘Te sigi hwa me deligo te po waibawe,

‘Te ena genuai dao, tama bidigo nogo toulama,

nigilibo te enaduba bomogo edelalio,” po waibawe?

Te so mego “Ena te bidigo nogo toulama,

ni togobo bomo te eno edelalio,” po waibawe?

Te hwiıbo ni dage dabego bidi nogo

toulama, hwiġi pabo meni.
 Menio. Te bidigo te ni dage dabe nogo
 toulama, hwiġi pabo dao.' ”
 Genuai Bidigo te po wali.

- 16 Megi da, Genuai Bidi
 Tigidali Bomo Elalubo Bidigo
 te Asiria dabebolo genuai gasi me deli
 augwalibolo menama,
 tama augwali bomo sia somainu yaibao.
 Tama me ma, bidigo magi nai dolainu
 sia noġebo tiwai eyu,
 aġai te Asiria bagego bomo me,
 genuai nogi dali, mu dolaibao.
- 17 Genuai Bidi aġa te Tigidali
 Wiegi Yai Doloba Pai Kolesaga Naga Ebo God dao.
 Tama aġa te Israel dabego ula dao.
 Tiali goli, Asiria dabe dali da, aġa te isi gaġalama,
 augwaligo bulu isi ulaibao.
 Te deli bubagade naga aġai te tigidali
 dwai nosai dabe isi ulaibao.
- 18 Tama bogi peyu, moni genuai genuai
 ni dabe dela pelama,
 tama gi yabo wiegi yai tō me dela paibao.
 Genuai Bidigo Asiria dabe dolama,
 tama augwali mu tama silaibao,
 te gasigo bidi me deligo tigi bomo doloyu,
 ela silibo tiwai yaibao.
- 19 Te Asiria bulude tigidali nai dabe mu silaibao,
 tama deli deli ni naga dolaluaibao,
 te dwasianu wai boġ dabego me nedabo usu
 nama.

Dwasianu Israel we bidi hani naga ma asaibao

- 20 Genuai Bidigo bodolu me polo muai
 dao wali, te Israel hani dwasianu
 te Jekopgo waġi tomode bidibo
 hanigo i aġabolo omainu.
 Te Israel dabe augwali augwa boi
 bidi dabede wi ebaso,
 tama augwaligo gasa bulu
 bidi dabego augwali tau somainu i wali.

Tama te bulu bidigo augwali tau somainu tonaluali.
 Tiali goli, te bulu bidigo begelama,
 augwali ma dolaibao.
 Tama te sogo augwaligo te Israel dabego
 Genuai Bidiba i waibao.
 Aga te Wiegi Yai Doloba Pai Kolesaga
 Naga Ebo God dao.
 Tama augwaligo agai tau somainao
 olama, tonaluaibao.
 21 Tama te dwasianu Israel we bidi
 bidibo dabe augwali te God
 Tigidali Bomo Elalubo Bidi pageba ma asaibao.^g
 22-23 Megi da, te Israel we bidi hauwa mu te bidibao,
 te tamu weđe kemi sane tiwai dao.
 Tiali goli, augwali dolaibao,
 tama dwasianu we bidi naga ma pedalaibao.
 Genuai Bidi Tigidali Bomo Elalubo Bidigo te bulu sese
 tama dolabo po polo wai dao.
 Tama da agai dolaibao.
 Tama agai doloba pai kolesaga genina
 mu ma haninaibao,
 tama te we bidi dabego sueibao.^h

Genuai Bidigo Asiria dabe dolaibao

24 God, Genuai Bidi Tigidali Bomo
 Elalubo Bidigo te po wali,
 “Eno we bidi dage Saionde bidibo,
 dage te Asiria dabede wi igimio.
 Augwaligo dage te wabigo elama,
 dage dali dwai se ebadi me tagalao.
 Te Isip bagego polobadu yali tiwai ebadi goli.
 25 Megi da, eno dage Asiria dabego
 dage dolomainu sula tagalobao. Magi baso meni.
 Eno sebe dage dali me ebaso.
 Tama tamadi tama ena ma begelama,
 Asiria dabe dolaibao.
 26 Ena, Genuai Bidi, Tigidali Bomo
 Elalubo Bidi, eno augwali bigo elaibao,

^g 10:21 Te Hibru pode, te po weyu “Dwasianu hani naga te ma begasa asaibao,” wai. Te tiwai po te Aisaiago wai me deli nogi wabo tiwai si yali dao. Te buku Aisaia, Daı 7:3, tede te tiwai po elalubo suao. ^h 10:22-23 Rom 9:27

eno te Midian dabe te Orengo Masigi
nogi wabo bulude dali tiwai elali.

Eno nogo ugwa selama, tama elaibao,
te polobadu eno Isip dabe
te tamu wede elali tiwai yaibao.

- 27 Megi da, dage te Asiria dabego
dage tonaluyu, te kau kibu
magede ni name munama,
tama se emainu selebo tiwai te ebao.
Tama te Asiria dabe bugagia dualalubao.
Tama augwaligo te ebo kolesagago
ena sebe te ilibao.
Tama tibaso, te eno bodolu muani
sogode da, te eno te Asiria dabego
bomo silama ebode da,
te bagego dage sege ma mayu egobeo.
Awe, dage te boma pai hani pedalubaso,
dagego te tolobo sege mu tagalaibao.”

Te boi bidi dabe Jerusalemba hwi yagasainu asali

- 28 Te boi bidi dabe bolo hanu Aiba sabolagasali.ⁱ
Augwali te hanu Miklondu sa asali.
Tama augwaligo nai dabe meba
te hanu Mikmasde osogo muani.
- 29 Augwali aiya dulama, we odogo nogegi pali.
Tama augwali ugwaba holama, hanu Gebaba pigi pali.
Te Rama hanu we bidi wi genuai mu eyu, midigi sali.
Tama te hanu Gibeaa, te tuni bidi Solgo hanu,
augwali hanu tagalama, wi pepelawali.
- 30 Te hanu Galim we bidi dagego i bomonama wao.
Olo saganama, odao, te Laisa be nani
we bidi, dagego odao.
Hobede mu dao, dage te hanu Anatot we bidi.
- 31 Te bulu Matmena we bidi,
me te hanu Gebim we bidi,
wi pepelawali, te duala sabo pesage gegegi pali.
- 32 Megi da, te boi bidi dabe

ⁱ 10:28 Te not badu boi bidi dabe aselama, te Jerusalem dolabo homu elama asiyu da, augwali asobo te taun Ai te badu suani aselama, te gasa taun dabe te nogi me badu te ves 28-32 tede nogi elalubo taun dabe sabolaibao. Magi baso meni, te taun dabe te Jerusalem pa badu te not badu elaluali.

- te hanu Nopba polo sabolali.
 Augwaligo te bulu du Saionba edaba tonagasali.
 Tama augwaligo nogo sugunani,
 te hanu Jerusalem dolabo polo
 no muanio olama, ola mobao.
- 33 Te agai genuai bomogo da, God,
 Tigidali Bomo Elalubo Genuai Bidigo
 agai te genuai bomai genuai
 nogi elalubo bidi dabego nogi aiyaba elaluaibao.
 Megi augwali te genuai bobobage ni dolalubo tiwai ebao.
 Tiali goli, agai augwali gelama, degelaibao.
- 34 Tagala augwali te Lebanonde
 genuai bobobage ni tiwai,
 me te buside genuai bobobage ni tiwai me.
 Agai augwali gelama, tōba degelaibao.^j

Gesi noma tuni bidigo bugagia bidabo page dodolaibao

- 11** ¹Te Jesigo hani te ni bidi dabego gelai ni tane
 tiwai bididuali.
 Tiali goli, gesi age te ni tanede ma
 kolibo tiwai yaibao.^k
 Awe, te ni tanedu te gesi ni tigi holama,
 tama nologo me deligo du walaibao.^l
- ² Te Genuai Bidigo Spirit Moba Bidi
 aga dali bidagaselama,
 tama aga te wiegi yai homu kolesaga dabe
 magasaibao.
 Tama agai aga we bidi tonalubo homu
 kolesaga wiegi yai mu saibao.
 Tama aga bomai tuni bidi bidiyu,
 tama agai aga we bidi tonalubo kolesaga wiegi yai
 mu elaluaibao.
 Agai te Genuai Bidigo homu kolesaga koneaibao.
 Tigidali sogo aga te Genuai Bidi dologode naga bidaibao.
- ³ Tama te kolesagago aga wiegi yai
 homu ilibo geninaibao.
 Tama agai te po tū odobode da,

^j 10:34 Ais 14:24-27; Nah 1:1-3:19; Sef 2:13-15 ^k 11:1 Jesi te king Devitgo aya dao, te po te buku 1Samuel, Daḡi 16:10-13, tede elalubo suo. Te nide gesi ni hogodo pedalubo tiwai yaibao, agai te daḡi ilali po te gesi king te Devitgo hanide pedelabo po olama, wai dao.

^l 11:1 Ped 5:5; 22:16

agai te bidi dabego po wabode naga
o gedugo suali pode naga osola suyu
egobeo. Menio.

- 4 Te po tų odobo dolo naga agai
te nai meni yai bidi dabego
homu şeęę elalubo po odama, te bagenu tau saibao.
Te gasa bidi dabego augwali aiyaba
elaluama, augwali dolama,
dwai şę yali dabede agai pode
te tiabo şę yali we bidi dabe dene saibao.
Tama te dwai şę ebo bidi dabe da isaibao.^m
- 5 Te tama doloba pai kolesagago
tama aga we bidi tonaluaibao.
Aga bomo elama bidiyu, aga şę bugagia yaibao.ⁿ
- 6 Te bulu yowi de sipsip kibu gųų si
aga bugagia deliba bilaibao.
Tama te lepat moni hasa dabe
te meme kibu gųų dali piyu yaibao.
Te kau kibu gųų dabe,
me te laion yowi gųų dabe dali,
deli hodobo nai tudu bilaibao.
Tama dwasianu wai dabego augwali tonaluaibao.
- 7 Te kibu bulmakau de te bulu hasa bea
aga si nai deliba tuaibao.
Tama augwa wai dabe augwa hasi deliba piaibao.
Tama te laion dabego te bulmakau kibugo nosai tubo
tiwai yaibao.
- 8 Te wai bųų dwasianu ame tubo dabe
augwali te dwai gula manego
tų dedage pade gagali yaibao.
Awe, te waigo aga nogo te bidi gaų kelebo hasamanigo
pibo madiba muaibao,
tiali goli te hasamanigo aga gaų kelegobeo.
- 9 Te Genuai Bidigo bulu du ugwadu
te tigidali nai dabe augwa hasi
bugagia deliba bidaibao.
Te mego me dali dwai şę me egobeo. Magi baso meni.
Te tigidali tųde nai dabe sesego
Genuai Bidi mu konea pela silaibao.
Te kolesaga te tigidali tų mu usu nigi paibao,

te tamu aigo aga daiba usu nani tiwai yaibao.^o

Genuai Bidigo aga we bidi ma sisinaibao

¹⁰Tama te sogo Genuai Bidigo gesi tuni bidi me sa muaibao, te Jesigo hani bidi me deli dao. Agai te tigidali we bidi deliba ma sisinabo dai tiwai bidaibao. Augwali te tigidali to pedai kantri tedu augwali agaba asaibao, te Israel hani isawai bage. Tama agai hanu da, genuai nogi mu elaluaibao.^p

¹¹Tama te sogo Genuai Bidi agai bomo te si wabo sogo ma ola mayu, tama aga we bidi hani augwa buluba ma odasa asaibao. Te we bidi dabe te bulu Asiria, me Isip, me Sudan, me Elam, me Babilon, me Hamat, me te Mediterenian tamu aida ailande bidibo dabe me dao.

¹² Te Genuai Bidigo dai me deli dodolaibao
te tigidali to pedai kantri we bidigo sumainogo.
Tama agai te Israel me Juda we bidi dabe ma sisinaibao,
te boi bidi dabe kalabus elama
odasa pali we bidi dabe.

Megi augwali tigidali tode bida bida pabo.
Tiali goli, Genuai Bidigo augwali ma odasa asaibao.

¹³ Te bulu Israelgo te bulu Juda dali
dwai homu me egobeo.
Tama Juda dabego Israel dabe dali
boi bidi homu me egobeo. Menio.

¹⁴ Augwali si talua selama,
tama augwaligo te giliga pabo badu
buluba hwigi peyu,
te Filistia dabe dali hwigi yaibao.
Tama me, augwali sigo te giliga
asobo badu we bidi dabego
nai dabe hwigi pelama, augwaligo nai dabe saibao.
Te augwali sigo te bulu Idom we bidi, me Moap,
me Amon we bidi dabe
augwali sigo elaluaibao.

Tama augwali sigo te bulu dabe tonaluaibao.

¹⁵⁻¹⁶ Genuai Bidigo tamu we Retsi
sula somainu yaibao.
Tama agai bomai posolai wali pedalomainu yaibao.
Tama te waligo te we Yufretis
sula selama, dwasianu emainu yaibao.

Te wę te a naga olama, me badu nogo si
 wę gamiadu pomainu yaibao.
 Tama tibaso, we bidigo te wę nogebo usu yaibao.
 Tama tiali, te sogo te sunumi genuai bage mu yaibao,
 te we bidi dabe te Asiria tagalama, asela yabo.
 Te yaide te Genuai Bidigo te Israel dabe Isip tagalama,
 asomainu sunumi genuai yali tiwai yaibao.⁹

Te buba hwi wabo balia po

12 ¹Tama te sogo dage Israel dabego te balia po waibao.

“Genuai Bidi, eno nago nogi ugwabo sobao.
 Nago ena dali sębę yali, tiali goli nago sębę silalio,
 tama nago ena wiegi yai sę ilalio.
 Tama megi da, eno homu bugagia bidibao.
² Mu tama, Godigo ena ma oda sai dao.
 Tama megi da, eno agaba homu daų ola saibao.
 Tama ena wi me egobeo.
 God, Genuai Bidigo ena bomu ilibo dao,
 tama tibaso, eno balia po obao,
 te agai nogi ugwaba sainogo. Magi baso meni.
 Agai ena ma oda salio.”^r

³Tę dedagede wę sia sabo menio. Agai te wę te nai dabebolo mabo dao. Tama augwali bugagia bidibo dao. Genuai Bidi te sia sisąbo wę tiwai dao. Tigidali sogo agai dage tau sabode dage bugagia daų olama, bidimainu ebo dao. Tama tibaso, dage agaba wiegi yai homu dali pelama, tama Genuai Bidibolo dage tau somainu hanalugi paibao. ⁴Tama te sogo dagego balia weyu e tama waibao,

“Genuai Bidigo nogi wao.
 Tama agaba i weyu, tama agabolo buba hwi wao.
 Te tigidali we bidi hani dabebolo pusao,
 te genuai sę dabe agai yalide.
 Tama augwalibolo pusao, aga genuai nogi elalubao.

⁵ Te tęąbi po weyu, Genuai Bidigo nogi ugwaba sao.
 Magi baso meni, aga genuai nogi salio,

te agai yali wiegi wiegi yai sę yalide.

⁹ 11:15-16 Ped 16:12 ^r 12:2 Sai 15:2; Tib 118:14

Agai wiegi wiegi yai şe yali po tigidali
tode we bidibolo pusao.

- ⁶ Israel dabego God aga te Wiegi Yai
Doloba Pai Kolesaga Naga Ebo God dao.
Aga genuai nogi elalubo.
Tama aga dage Saion we bidi dabe dali bidibao.
Tama tibaso, dage wiegi yai homu iyao.
Tama i bomona weyu, agaba balia po wao.”

Te aga hani we bidi ma sisinibo sogo dagego te balia po waibao.

Aisaiago Godigo po te tų kantri dabeba pususu bilali

(Daı 13-23)

Godigo te bulu Babilon dene mawaibao

- 13** ¹ Godigo Babilon bulu dolabo homu yali, tama te po te nade
ebo tiwai agai te po Aisaiabolo walalio, te Amosgo ogwabolo.^s
² Genuai Bidigo e tama po wali,

“Dagego te ni meni yai bulu dude te plak me dodolao.
Tama te ami bidi dabego sulama, sisinagasomainao.
Teba augwali polo asomainu i wao.

Nogo tų elama, te Babilon hanugo sunumi magi yao.
Tama augwali te hwıgi pomainu taga palao.

- ³ Eno Babilon dabe dali şeşę mu ebao.
Tama eno ena digi ena bomai ami bidi dabe daı ilali.
Tama eno augwali i olama,
te Babilon dabe dolomainu i wali.

Te ami bidi dabe augwali Babilon dabeba
hwıgi pabo wiegi yai homu mu yali,
magi baso meni, augwaligo koneani,
eno te hwıbode ugwa ela holaibao,” te po wali.

- ⁴ Dagego odao, te kulukulu
te bulu dude dabe wabo odao.
Te geninama bidi dabego kulukulu te obao.
Te tigidali bulu hauwa badu
ami bidi dabe te sisinagasali dao.
Tigidali Bomo Elalubo Genuai Bidigo
aga bomai ami bidi dabe sisinagasali dao,

^s 13:1 Ais 47:1-15; Jer 50:1-51:64

te hwıabo bidi dabe.

5 Augwali te digibulu bulu dabe te asalio,
tama augwali te Genuai Bidigo
enesigi de ene si tiwai dao.

Genuai Bidi aga şeşę mu elama,
tama augwali sabolama,
te tşde bulu dabe sese dolama, silimainu yaibao.

6 Dage gela bomonama wao. Magi baso meni.
Te Genuai Bidigo aga tigidali
we bidi po tşde dodolabo bodolu paşa
polo yagasalio.

Tama te sogo God Tigidali Bomo
Elalubo Bidigo te genuai dolabo şę taga palaibao.^t

7 Tama tibaso, tigidali we bidigo dili naga mialuaibao.
Tama augwaligo bomo mu menia saibao.

8 Tigidali wi mu yaibao.
Tama augwali genuai dene mu saibao,
te wego wai sainu dene ebo tiwai yaibao.
Te tigidali bagego gesabidi augwali
tigidali dene ebao wabo gesabidi ola mawaibao.
Tama augwaligo gasa bidi dabego
gesabidiba tonobo sogo da, augwali wi mu yaibao.

9 Mu tama, te dwai sogo megi te pedalobao.
Te da te Genuai Bidigo polo bodolu muani,
te sogo te agai genuai şeşę dali asiyu,
tigidali tş dabe doliyu,
tama te dwai şę ebo we bidi dolama, silaibao.

10 Te sogo te tigidali hş dabego ula sula saibao.
Tama giliga pedalaibao, tiali goli agai
ula hulıa sigi paibao.

Tama polua munu me nanogobeo.“

11 Genuai Bidigo te po wali, “E tş te we bidigo
dwai şeşęgo paşana pali.
Tama tibaso, eno augwali dene mawaibao,
te augwaligo dwai şę yalı wei ponoyu yaibao.
Te bidi dabe augwa digi augwa nogi
ugwaba sabo bidi dabego nogieno aiyaba elaluaibao.
Me, homu dene isişyu, te augwaligo gasa bidi dabe
aiyaba elalubo bidi dabe me.

12 We bidi hauwa mu isaibao.

^t 13:6 Jol 1:15 ^u 13:10 Ese 32:7; Mat 24:29; Mak 13:24-25; Luk 21:25; Ped 6:12-13; 8:12

- Tama eno deli deli naga bidimainu talagalo paibao.
 Tama augwali hauwa mu ma sugobeo,
 te Ofir bulude sabo wiegi yai gol
 susiaşbo tiwai yaibao.
- 13 Tama te sogo
 ena Tigidali Bomo Elalubo Genuai Bidi,
 ena te eno genuai posolai şeşę dali mu asaibao.
 Tama eno dagalu dali, tş dali si mali ilaibao.
 Tama tş iba kila selama, tama aga pesage taga paibao.”
- 14 “Tama te sogo we bidi dabe wi pabo
 te bulu hasa dabe bidigo enainu
 ebaso, wi pabo tiwai yaibao.
 Me, te sipsip kibu dabe augwa tonalubo bidi meniama,
 gegade bilibo tiwai yaibao.
 Te augwali augwa bulu muba dabe wi ma paibao.
 Awe, augwali augwa page buluba dabe polo wi soaibao.
- 15 Tiali goli, mena bidi me boi bidi dabego touwali,
 teda augwaligo hwş bainatgo enama, isilaibao.
 Mu tama, te boi bidi dabego augwali
 bobobage hwşgo elaibao.
- 16 Me, te boi bidi dabego te dwasianu
 wai bşş dabe augwa idago nogode kega selama,
 tama augwa ida aya sigo tonalubadi,
 augwaligo te wai bşş dabe tşba
 şşbo side, te wai dabe isaibao.
 Tama boi bidi dabego augwaligo be
 dolama, augwaligo nai dabe wi saibao.
 Tama me, augwali we dabe me penani şş yaibao.”
- 17 Genuai Bidigo te po wali, “Suao!
 Eno te Midia dabego homu hogodolama,
 Babilon dabeba hwşşagasomainu yaibao.
 Augwaligo Babilon bagego silva de
 gol si homu kone elama,
 te buluba wşbi hwşşagasobeo. Menio.
- 18 Augwaligo te Babilon dabe mu
 sia sayabo homu bomu mu yalio.
 Augwali gesi bidi dabe augwaligo
 enesigigo elama, isilaibao.
 Tama me augwaligo genuai me dwasianu wai bşş dabe
 augwaligo elama, isilaibao.
 Augwaligo augwali dali homu dene mu egobeo,” wali.

- 19 Genuai hanu Babilon te genuai mu
 elama, tama sawi mu elama,
 tama tigidali gasa hanu dabe aiyaba elaluali.
 Te Babilon bulu we bidi dabego
 augwa hanugo wiegi yai nogide mu
 gana pabo dao.
 Tiali goli, Godigo Babilon dolaibao,
 te agai Sodom de Gomora si
 dolali tiwai dolaibao.^v
- 20 Te bulude bidi munu me ma bidigobeo.
 Tama me ma, te Arap dabe augwaligo
 sel be teba şe yagasogobeo.
 Tama te sipsip kibu tonalubo bidi dabego
 te sipsip kibu teba nosai tumainu
 teba me tonaluagasogobeo.
- 21 Te bulu te olo bulu gagalama,
 tama te bulu hasa dabe naga teba bidagasaibao.
 Te hulide bilibo ba dabe te bede dabe bidaibao.
 Te haniani dwai ba dabe me bidaibao.
 Tama bulu meme dabe te dolali hanude
 ugwaba samanuyu,
 edaba samanuyu, ela bilaibao.^w
- 22 Tama me, te tuni bidigo bede,
 me genuai bidi dabego bede dabe
 te bulu yowi dabe bidagaselama, go weyu yaibao.
 Mu tama mu, te Babilon dolabo sogo
 bodolu paba polo yagasalio.

Genuai Bidigo aga we bidi ma oda saibao

- 14** ¹Genuai Bidigo aga Israel we bidi hobede ma
 elama,
 augwali tau siyu, tama augwali aga
 we bidi tiwai daı ma ilaibao.
 Tama agai augwali augwa tıba ma odasa paibao.
 Tama gasa hani we bidi augwali dali bidagaselama,
 tama augwali te Jekopgo hani dali taluama,
 augwali Israel we bidi mu pedelaibao.
- ² Awe, Genuai Bidigo te Israel hani isawai we bidigo
 te Israel dabe augwa buluba
 ma asomainu tau somainu ilaibao,

te Genuai Bidigo augwalibolo sa muani t̄o dao.
 Tama te we bidi dabe te Israel dabego
 olo şę ebo we bidi tiwai pedalaibao.
 Te bidi hani polobadu Israel dabe kalabus elaluali bage,
 megi da augwali Israel dabego
 kalabus bidi dabe bidaibao.
 Te polobadu te Israel dabe
 aiyaba elaluama, augwali dali dwai şę yali.
 Tiali goli, megi da, Israel dabego augwali tonaluaibao.

Te bomai tuni bidi tulaluai wabo balia po

³Genuai Bidigo dage Israel dabego dene me dwai sogo silama, tama dage Israel dabe bugagia bidaibao. Te gasa bagego dage aiyaba elaluama, tama augwaligo dage tonaluai dao. Tama dage bomai şę mu yai dao. Tiali goli, te tigidali şęę dabe sia saibao. ⁴⁻⁵Tama Genuai Bidigo te tama tibo si da, dagego te Babilon tuni bidide elalubo po page hanilama waibao. Te hanilabo po da, e tama dao.

- “Suao. Bomai tuni bidi polo tulalualio.
 Mena tama tibaso te tobage bomai
 şę ebo bidi dolaliwe?
 Genuai Bidigo tama te we bidi dabe
 dwai şę ilali bagego bomo silalio.
 Tama te augwali wi mu ilali bidi dolalio.
⁶Te tuni bidigo gasa we bidi dali
 odolali genuai şębę eyu,
 tama dwai şę elama, tama augwali dolai dao.
 Tama agai gasa bulu dabe dolobo şę me
 hodo me dolobeo.
 Agai te şę mu tagalobeo.
⁷Tiali goli, megi da, tigidali bulu
 t̄o dabe bugagia ma bidaibao.
 Tama tigidali we bidi wiegi yai homugo
 i weyu, balia po obao.”
⁸“Te ni pain de sida si te Lebanon bulu du ni dabe
 augwaligo me te wiegi yai homu
 yaibao, te Babilon tuni bidi aga isalide.
 Augwaligo te po obao, ‘Te da gelagasabo bidi me menio,
 agai da ma gelagasogobeo.’”
⁹“Te isai bidi dabego bulude augwaligo
 te homu pemene ebo po wainogo dodalubao,
 magi baso meni, te tuni bidi asobao.

Te gų pagego tede bidibo bagebolo te po waibao,
 ‘Te genuai bidi dage hodaloao.

Me, dage tuni bidi dabe duga tuni bidi sia sai
 tagalao.

Dage tigidali aselama, e bidi asobo
 suagasiąo, tiąba asiąo,’ waibao.

10 Babilon king, augwali tigidaligo
 nage dali te tobage po naga waibao,

‘Tegoba, dago homugo tiai dao,
 nago bomogo da tigidaligo bomo
 aiyaba elalui dao homu yai dao.

Tiali goli, megi da, nago bomo sia selama,
 tama nage da tiwai te pedalali dao.

11 Polobadu nago haniani aubo nai dabe muai dao.

Tama te we bidigo gita dabe eliyu,
 nago genuai nogi ugwaba sainu yai dao.

Tiali goli, megi da,
 te sawede nago pibo sai tiwai dao.

Tama te osogane dabego nage tigi
 bolama, tama te ugwa banunobo ąo yaibao,’
 te gų pagege bidibo bagego te po waibao.”

12 “Nage genuai nogi mu elalui dao.

Te tigidali tųde we bidi dabego gedude
 nage te kigamu dagalude nanebo hų tiwai bidai dao.

Tiali goli, megi da, Godigo nage polo tųba sųwai dao.

Nage boma pai hwųbo bidi dao,
 nage tų pedai kantri hauwa aiyaba elaluali bidi dao.

Tiali goli, megi da, mu menio.^x

13 Nago te tama homu elalui dao,

‘Eno te hų dabe ela pelama,
 tama ena dagaluba mu paibao,’ homu yai dao.

‘Tama eno tuni bidi sia te Godigo hų daide muaibao.

Tama me ma, ena te god dabe
 sisinagasabo not badu bulu dude dualaluaibao.

14 Te ena te pų dabeba ugwaba mu

holama, tama ena God tiwai ogwade mu bidaibao,’
 nago te homu yai dao.”

15 “Tiali goli, hobede mu dao.

Nage polo tulaluali, tama nage aiyaba aba mu tulaluama,

^x 14:12 Ped 8:10; 9:1

- tama isai bidi dabego bulu paibao.
 Tama nage dologode mu bidaibao.^y
- 16 Te isai bidigo bulude,
 te isai bidi dabe noma mu saibao, te nage subode.
 Tama augwaligo nage dolo si mu tonaluama,
 tama augwaligo augwa hasi nagede hanalu waibao,
 ‘Aga tama te bidi da, agawe, te t̄ mali ilali bidi,
 me te gasa bulu tuni bidi dabe wi elama,
 noma selali bidi aga dawe?
- 17 Aga tama dawe, te hanu dabe
 dolama, tama te bulu dabe olo bulu nigilali bidi
 dawe?
 Te tama dao, te bidi agai te aga kalabus
 ilali bidi dabe hobede elama,
 tama agai augwa buluba
 ma pomainu sula tagalai menio,
 augwaligo te tobage po augwa hasi hanalu waibao.”
- 18 “Te gasa tuni bidi dabe isibo sogo,
 te we bidi dabego wiegi yai s̄ elama,
 tama augwaligo te wiegi yai
 ḡ pageba pubaligi pabo dao.
- 19 Tiali goli, nage da, menio.
 Augwaligo nage şayani,
 te bidi dabego ni nologo togalama,
 damumainu şabo tiwai mu yalio.
 Nago tigi te masigi elalubo t̄ dedagede munalubo,
 te meba bidi dabego tigi dologode munalubo,
 te w̄bi hw̄ani sogo isali bidi dabe tigi dologode.
 Tama bidi dabego agayu ebo,
 te augwali ugwa eda udula bilibode.
- 20 Te augwaligo nago tigi wiegi yai
 s̄ elama, pubalogobeo,
 te meba tuni bidi dabego tigi yali
 gilama. Magi baso meni.
 Naga digi naga bulu dolama,
 tama naga we bidi naga digi ela silai dao.”
 “Te wiegi yai mu dao, te tuni bidi dwaigo hani sese
 e t̄de sia siyu da, usu dao.
- 21 Tama tibaso, agai wai b̄q̄ dabe
 odasa aselama, ela muagasao,

^y 14:15 Mat 11:23; Luk 10:15

te aga ayago yali dwai şe, me augwa wai dabego
 yali dwai şe wei ponoyu tama yao.
 Tama augwali deli me bidama, tama tuni bidi nigilama,
 tama bulu dabe tonaluyu,
 tama hanu dabe tigidali bulude dabe ma nigilamuo.”

Genuai Bidigo Babilon dabe dolaibao

- 22 Tigidali Bomo Elalubo Genuai Bidigo te po wali,
 “Ena Genuai Bidi, ena digi te Babilon
 dabe dali hwina, tama eno augwali sese mu
 dola silaibao.
 Te eno augwali me deli bidimainu me
 sula tagalogobeo. Mu menio.
 Te tigidali we me bidi me, wai dabe me,
 sese mu tama silaibao.
- 23 Te eno te Babilon eno te hogomu
 poabo naigo poabo tiwai yaibao,
 te tigidali nai dola silibo hogomu poabo nai dao.
 Tama eno te Babilon sele pu bulu nigilaibao.
 Tama te dwai ba dabe naga bidagasaibao.
 Ena Tigidali Bomo Elalubo Genuai Bidi,
 eno po polo walio,” wali.

Genuai Bidigo Asiria dabe dolaibao

- 24 Tigidali Bomo Elalubo Genuai Bidigo bomai po
 me deli e tama wali,
 “Mu tamao. Şe me eno yabo homu yali,
 te şe eno yaibao.
 Şe me eno pedalabo homu yali, te şe mu pedalaibao.
- 25 Te Asiria dabe eno toba aselama,
 tama eno we bidi şeş tolomainu yaibao.
 Te Israel dabe te bulmakau kibu tiwai bidibao.
 Te bidigo şegai ni name magede munama,
 tama şe emainu tonalubo tiwai yaibao.
 Tiali goli, te Asiria dabe Israel dabego
 bulu dude dabe bidibadi yaide,
 teda eno augwali agalama, mimieibao.
 Tama te genuai şeş Israel dabego tolali,
 te şeş dabe sese mu tama silaibao,” wali.
- 26 Te tobage kolesaga naga
 Genuai Bidigo tigidali tade elalubo

kantride yabo homu yalio.
 Tama tibaso, agai nogo ugwa sagulama,
 tama augwali dolabo no sealubao.
 27 Magi baso meni.
 Tigidali Bomo Elalubo Genuai Bidigo
 te tama şę yabo homu kolesaga polo yali.
 Tama dego aga paliaibawe?
 Agai nogo dolalubao.
 Tama mego agai aiyaba mubo usu egobeo.^z

Genuai Bidigo Filistia dabe dolaibao

28 Te tuni bidi king Ahas isali kibu
 bede, Genuai Bidigo po me mani.
 Te po da e tama dao.^a
 29 “Te Filistia bage, dage tigidaligo odiaę.
 Te dage elali wabi dage polo toga pali dao.
 Tiali goli, dagego homugo dage bugagia
 bidaibao homu igimio.
 Te dwai gula mane me isibosi, te gasa
 dwai gula mego agai pesage sabo dao.
 Tama te gula manego gasa dwai
 gula mane mu me ame nabo dao.
 Aga te iba, eda bola bilibo bogo yai gula mane dao.^b
 30 Te nai meni yai Israel bidi dabe augwaligo nai
 selama,
 bugagia homu tegaluama, bidaibao.
 Tiali goli, dage Filistia dabe da, ena Genuai Bidi eno
 dagebolo dwai nasi si taga palaibao.
 Tama te nasigo dage elama, dage mu silaibao,” wali.
 31 “Dage te genuai Filistia dabego
 hanu, me dage te hanu dabede bidibo we bidi,
 dage sese wi dwai mu elama,
 gela dwai olama, i bomona waię.
 Magi baso meni. Te ami hani me deli
 te not badu asobao.

^z 14:27 Ais 10:5-34; Nah 1:1-3:19; Sef 2:13-15 ^a 14:28 2 Kin 16:20; 2 Sto 28:27

^b 14:29 Te profetgo ede pusali po te agai te Asiria king me deli isibaso, te tiwai po pusali.
 Agai po digi begelama, e tiwai po wali, te gasa king dabego agai bidali pesage hasegelama,
 sabo po wali, tama augwaligo te gasa tų pedai kantriba şęę mabo şę te genuai mu uganu
 igulu, te polasa bidali kingo kolesaga aiyaba elalueibao, te po olama, wali.

Tama augwali nosali badu hano holobao.
 Te ami bidi dabe augwali tigidali
 hwı̄bode boma pai bidi dabe mu da weyu,
 tama augwali deli me nosali me dua dua asobeo.”^c

³² Te dago mena po wei ponaibawe,
 te Filistia dabe augwaligo dago
 augwali tau somainu hanaluagasobaso?
 Te dago augwaligo po wei e tama ponaibao,
 “Te hanu Saion te dago Genuai Bidigo
 digi duala sabo bulu tiwai nigilai dao.
 Tama aga we bidigo genuai seęę elaluyu,
 me seęę yai seę eyu ebaso da,
 augwali teba pelama, tama augwali
 bugagia bidaibao,” wali.

Genuai Bidigo te Moap dabe dolaibao

15 ¹ Te bulu Moap polo dolalio. Tama Genuai
 Bidigo te po mani.

Te hulide boi bidi dabe aselama,
 te hanu Ar me hanu Kir dolagasali,
 tama megı̄ da, Moap mu tama sese dolalio.^d

² Tama tibaso, te genuai hanu Dibon
 we bidi augwali te augwa tibo god dabeba
 lotu wabo pesageba dabe pelama,
 tama gela wagi pali.

Te Moap dabego te hanu Nebo,
 me hanu Medeba polo dolai yaibaso, gela wali.
 Augwali hobede mu elama, tama augwa tobolu nisi me
 penane nisi poala şayanio.

³ Tama augwaligo hobede yai ugwa dabe
 gudama, tama te hanu sunumi dabede bilalualı̄.
 Tagala, augwali augwa be pedude
 bidibo me, o deliba sisinibo pesagede bidibo me.
 Tigidali gela genuai mu wali.

Tama gela ūga hauwa mu augwaligo gedudu tulalualı̄o.

⁴ Te hanu Hesbon we bidi, me hanu
 Eleale we bidi, augwali me moni gela mu wali.
 Tama te hanu Jahasde bidibo we bidi
 augwaligo te bage augwaligo gela wabo odalı̄.

^c 14:31 Jer 47:1-7; Ese 25:15-17; Jol 3:4-8; Amo 1:6-8; Sef 2:4-7; Sek 9:5-7

^d 15:1 Ais 25:10-12; Jer 48:1-47; Ese 25:8-11; Amo 2:1-3; Sef 2:8-11

- Te bomai ami bidi dabe me gela olama, i hae wali.
 Te Moap dabego bomo sese sia sali.
- 5 Eno Moap dabe hobede ebaso, gela obao.
 Magi baso meni. Augwali augwa bulu tagalama,
 wi te hanu Soarba peyu, te hanu
 Eklat Selisia wi peyu ebaso.
 Augwali gela genina mu olama,
 tama augwali te sunumidu ugwa
 hanu Luhitba holobao.
 Tama me, augwali gela elali
 te Holonaimba pabo sunumidu
 ugwaba holoyu, tama augwaligo
 geda genuai mu obao.
- 6 Magi baso meni, te wę Nimlim sese mu sula selama,
 tama te nosai da, te wę sesegede
 elaluali me sasia pali.
 Tama te pesagede tonali, te nosai me, ni dabe me,
 me holabo badi tonobo aq ebeo.
- 7 Tama tibaso, te Moap dabe augwa
 wiegi yai nai dabe augwa hanude saboduali nai
 dabe augwaligo sela,
 te nai dabe dali wi pali.
 Augwali te ni sili bulu aiya dulai sunumidu pelama,
 te bulu Moap taga pali.
- 8 Te hanu Ekclaimde bidibo we bidi,
 me te hanu Bedelimde bidibo
 we bidi, me te bulu Moap tomode
 bidibo we bidi, augwali gela obao.
 Tama augwaligo gela genuai pedalali.
- 9 Te mu tama, te wę Dimon
 te Moap dabego kanemego pağana pali.
 Tiali goli, Genuai Bidigo te po wali,
 agai te Moap dabe dene genuai genina mu ma
 mawaibao, wali.
 Agai te bulu yowi laionbolo polo
 walai dao, te Moap dabe wi pali,
 me te Moap dabe meba te bulude bidibo bage
 dola silimainu agai polo wali dao.
- 16 ¹Da te Moap we bidi da,
 te Idom dabe genuai hanu nogi Selade
 bidibo bage, dago te kibu sipsip goş
 te Juda dabego tuni bidi pageba

Jerusalemba tolinao.

Te sipsip kibu te agabolo te takis ma mawainu gagaliyu,
ola mabo tiwai eyu, te bidi dabego te sipsip kibu
sela pomainao.

Augwali te wa pai buludu pelama,
tama te Saion bulu duba saboligi paibao.

² Tama augwaligo tuni bidibolo elama, po omainu yao,
“Tuni bidi, te boi bidi dabego da dena
hanu dabede, me dena bulu dabede pobeasa bilibaso,
tama da wi pelama, te wę Arnon
sesegeba bidigi pali.

Tama da dodola mu bidibao.

Da te bulude te ba gų aga bede tulaluama,
tama subigila bilibo tiwai, da subigila bilibao,
te ba buside bilibo tiwai ebao.

Te da gela dali biliyu, tama tibao.

³ Tama tibaso, dago homugo dagego
homu dago po osola sulama, tama da tau sao.
Tama da dagego buluba pelama,
tama te bidi dabego te posolai giligade te tiwai digi
duala sigi pabo tiwai,

nago buluba duala sagasaio.

Te boi bidi dabego da dena buludu pobeasa bilama,
tama da te adalalubo bidi bidibao.

Tama tibaso, nago augwaligo da
ma dolagasomainu me tagalamuo.

⁴ Da nago tųba bidagasomainu sula tagalao.
Nago da tonaluama, tama te boi bidi dabego da
dolagasogobeo,” te Moap bage augwaligo te po obao.

Dago koneani, te seęę dabe daba pedalali,
te seęę dabe sia selama,
tama boi bidi dabego dago bulu tagalama,
tama da dali dwai seę me isųma ebaso da,

⁵ teda te sogo te Devitgo hani me deli
me tuni bidi pedalaibao.

Tama agai aga we bidi godolo mu elama,
tama agai aga we bidi te doloba pai
kolesagago naga tonaluaibao.

Agai aga we bidigo homu seęę elalubo
po odama, tama agai polo dodolaibao.

Tama agai wiegi yai kolesaga ebo bomu mu yaibao.

- 6 Te Juda dabe augwaligo
 te Moap dabego po odobo si da,
 augwaligo augwa hasi tomode po weyu, e tama po wali,
 “Dago te Moap dabego dwai kolesaga
 ebo po dago polo odai dao.
 Augwaligo haniani po olama, augwaligo augwa nogi
 ugwaba sabo dao.
 Augwaligo homugo augwali wiegi yai
 mu dao homu elama,
 tama augwaligo gasa we bidi aiyaba
 elalubo po olama,
 tama gasa we bidi posobo po wabo dao.
 Tiali goli, te Moap dabe augwali ili po wabo bage dao.
 Te augwaligo po mu dao homu igimio,”
 Juda dabego te po wali.
- 7 Te Moap we bidi dabego augwali te dene sali dali,
 te seęę sali dali side gela obao.
 Polobadu augwali Kirheres hanude
 bidiyu, augwaligo te wain augwaligo olai te wain du
 tuyu, yai dao.
 Tama megı augwaligo te wiegi yai nai homu kone palali.
 Tama augwali augwa ma hobede mu
 elama, augwali gela obao.
 Magı baso meni. Augwaligo wiegi yai
 nai dabe sese dola silai dao.
- 8 Augwaligo wain gi me,
 te hanu Hesbonde elaluali wiegi yai wain gi me,
 te hanu Sipmade elaluali
 wiegi yai wain gi me, kone palali.
 Tama augwali hobede genuai mu ebao.
 Te polobadu te gasa bulu tuni bidi dabego
 te gide wain dabe tubo godolo mu yai dao.
 Tama te wain tulama, augwali poloyu yai dao.
 Tiali goli, megı da, te gi dabe sese mu dola silai dao.
 Augwaligo wain gi hauwa mu elaluai dao.
 Te hanu Hesbondu me Sipmadu gagalama,
 tama hanu Jaserba usu nigı pelama,
 tama te not usu nigı pelama,
 me te wa pai bulu te giliga asoboba usu nigı pai
 elaluai dao, te wę Detsıba sabolıgi pelama,
 tama giliga paboba usu nigı pai dao.

9 Ena te hanu Jaser de Sipma si wain
 gi hagede gela obao.
 Tama me eno gela ęga te hanu Hesbon
 me Eleale buluba tulalubao.
 Magi baso meni, dage sese dola silalio.
 Tama dagego we bidi augwa wain giba pelama,
 tama augwali te wain du tau yali
 sainu wiegi yai homu elama,
 hai dali iba, eda egobeo.

10 Te wain gi dabe augwaligo
 wain du dabe hauwa mu walai dao.
 Tama te we bidi dabe augwaligo sabo sogo da,
 augwali wiegi yai homu elama gana pai dao.
 Tiali goli, megi te wiegi yai homu elama,
 hai wabo kolesaga sia sali dao.
 Tama te we bidi dabego te wiegi yai
 homu ebo teębi me wabeo.
 Tama me te bidi dabego te wain nigibo
 madide te wain du te saęaęo me agagobeo.
 Genuai Bidigo tama augwaligo penane paninama,
 tama augwaligo hai wabo silalio.

11 Tama tibaso, ena te Moap dabe
 me hanu Kirheres we bidide
 haliga dene genuai mu ebao.
 Ena hobede e tama tibo, te bidigo hobede
 ebaso, gita eliyu, te hobedai balia wabo tiwai ebao.

12 Te Moap we bidi augwali te tibo
 god dabeba te bulu duba holama,
 lotu po wagi pabo dao.
 Tama augwaligo te tibo godiba aga lotu
 bede gedu haluasa po odu gebo dao.
 Augwaligo te bage augwaligo te seę dabe
 yabo bomu dabe silai dao.
 Tiali goli, augwa te kolesaęaęo augwali
 tau me sai menio.

13 Te Moap dolaibao wabo po te Genuai Bidigo polobadu digi wai dao.

14 Tiali goli, megi Genuai Bidigo po genina ma weyu, e tama obao, "Kibu be sela digi mu elalubao, te Moap dabe augwa wiegi yai nai dabe dali dolabo. Eno te sela kibu bego deli deli bubuga me polua bugagia mu nedebao. Tama te kibu be selago dei dolo mu tama eno te yaibao wali seę eno yaibao. Te we bidi hauwa mu megi te Moapde bidibao. Tiali goli, te bulu dolobo side, te bidi hani dwasianu naga te bulude bidaibao, tama augwali bomu mu meni yaibao," wali.

Genuai Bidigo te Siria dabe me Israel dabe si dolaibao po wali

17 ¹Genuai Bidigo te hanu Damaskus dolaibao po mani. Agai e tama po wali,

“Te boi bidi dabego te Damaskus dolaibao,
te Siria dabego genuai hanu,
tama olo pobele bage pesage naga
pesage holaluaibao.

² Te Aroer dabego hanu dabede
we bidi me bidigobeo.

Tama tibaso, te bulu dabe te olo sipsip
kibu dabego bulu pesage gagawaibao.
Tama te sipsip kibu dabe bugagia bidaibao.
Magi baso meni. Te augwali wi ilabo
bidi mu menia saibao.

³ Te boi bidi dabego te Israel dabego
bomai hanu dabe dolaibao.

Tama me ma, augwaligo te Damaskus
we bidi tonaluaibao.
Megi da, Israel de Siria si genuai nogi
elama, genuai we bidi hani hauwa te bidibao.
Tiali goli, te bulu si dolama,
tama dwasianu we bidi hani naga tede bidaibao.
Ena Tigidali Bomo Elalubo Genuai Bidigo
eno po polo wai dao,” wali.^e

⁴ “Te sogo te Israel dabego genuai nogi sia saibao.

Tama augwaligo wiegi yai nai dabe me
augwaligo we bidi hauwa sia selama,
tama te bulu dwai mu bidaibao.
Te gasigo te tigi genuai yai bidi gegelama,
tama te bidi nomona selama,
dili pulu ha ebo tiwai yaibao.

⁵ Megi te Israel dabe te wit nai hauwa
te odogo malu Refaimde bulubo
wit hauwa holobo aq te ebao.

Tiali goli, augwali boi bidigo dabego elebo si da,
teda augwali te wit dili bidigo togai
deli deli dolalua pabo tiwai yaibao, te wit gide.

⁶ Te we bidi deli deli naga me elaluaibao,

^e 17:3 Jer 49:23-27; Amo 1:3-5; Sek 9:1

te ni oliv du bidigo wabi dagego elama,
 tama sai digi te nedu du deli deli ni abude walalubo,
 me si sela te nologode dabe walalubo tiwai yaibao,
 te hauwa bidigo siyu tagalai dabe.
 Ena Genuai Bidi, Israel dabego God,
 eno po polo wai dao,” wali.

7 Tama te sogo te we bidi dabe homu begelama,
 tama Israel dabego Godiba lotu po waibao,
 te aga te augwali nigali God dao.
 Tama aga da te Israel dabego Dwagi
 Yai Doloba Pai Kolesaga Naga Ebo God dao.

8 Tama augwaligo te alta augwa digi
 nigali teba lotu weyu,
 me augwaligo we piksa tibo god
 Aseraba lotu weyu, me egobeo.
 Me, augwaligo te wiegi yai denami ebo
 pauda altade lotu po me wagobeo.
 Te augwaligo augwa digi augwa nogogo
 nigai naiba lotu wabo sia saibao.

9 Tama te Godigo te Israel bulu dolobo
 sogo da, te augwaligo
 bomai hanu dabe dola silama,
 tama augwali olo bidaibao.
 Te hasia te tode bidali bidi hanigo hanu tiwai yaibao.
 Te hani augwali Israel dabego hwiagasainu asobaso,
 augwali augwa hanu taga peyu, augwali wi pai dao.
 Tama te hanu dabe olo te bulu dude dabe
 elaluyu ebadi, te busi hola paibao.

10-11 Magi baso meni. Israel dabe,
 nago te God nage ma oda sabo God
 nago homu kone ebeo.
 Aga te genuai masigi te dwai sogo duala
 sigi pabo masigi tiwai dao.
 Tiali goli, mu tama, nago aga mu gegeda pali.
 Tama nago gasa hanigo godiba lotu po wali.
 Tama nago homugo tibo te god dabego nage tau selama,
 tama nage bugagia bidiba homu ebo.
 Tiali goli, nage dolama, tama nage usu ma yabo sunumi
 mu menia saibao.

Te naga gide ni wain wai bulama,
 tama kulubi polo holama, tama aga
 du walainu duduli ebo sulama
 nage wiegi yai homu ebo tiwai dao.
 Tiali goli, nago agai du sogobeo. Menio.
 Deli sogo polo tama te wain ni dolama,
 sasi elama, te wain gi dolaibao.

Godigo bomai bulu dabe aiyaba elaluali

- 12 Tega, te kulukulu genuai wabo odao.
 Te tigidali bulu ami bidi dabe
 sisinagasabo kulukulu dao.
 Tama augwaligo kulukulu te tamu wę holama,
 degeyu wabo kulukulu tiwai dao, te tamu wę saneba.
- 13 Te boi bidi dabe asali,
 te tamu wę aluasa asobo tiwai yali.
 Tiali goli, Godigo augwali sesanobaso,
 tama augwali augwa buluba ma wi pela wali.
 Te Godigo augwali sela şayani,
 te waligo ni yabe dabe subigila sela şabo tiwai eyu,
 me te hogabo waligo
 te hogomu dabe pobebe bage ugwaba
 sela holobo tiwai yaibao.
- 14 Polo tama te boi bidi dabego te bulu
 pio bagua sagasobo si da,
 te we bidi dabe wi dwai mu ebo dao.
 Tiali goli, kigamu da, boi bidi dabe menia saibao.
 Tama te tobage kolesagago Godigo
 te boi bidi dabego da dolama,
 dago nai dabe wi sela pai badi
 te sunumi palibo dao.

Genuai Bidigo te bulu Sudande po elaluali

- 18** ¹Te Sudan bulu wę u badu bidibo we bidi
 hobede mu dao,
 te haniani mano dabe hauwa ugwaba,
 edaba bola biliyu ebo tode.
- ² Augwaligo augwa po sabilibo bidi
 dabe taga palama,
 tama augwali te wę Nail dulu te augwaligo
 wę sesegede holobo nosaigo nigai geba tiwai nai,
 te naidu ibaba dulubo dao.

Dage Sudan dabego po sabilibo bage,
 dage te po polo sela asobo bage dao,
 dage duga bomai buluba ma piąo,
 te wę hauwa elalubo bulu dao.
 Te bulu we bidi dabe augwali bobobage
 elama, tama augwaligo tigi sawi yai mu elalubo dao.
 Tama dagego te bulu te wabi hwibode
 genuai nogi elaluyu,
 tama gasa bulu dabego dage mu wi ebo dao.

3 Dage te tigidali tđde bidibo we bidi,
 dagego odao.
 Te dagego bulu dude magi me dodolai
 yaibaso da, dagego bugagia suiąo.
 Tama bu wabo nai biugel po wai da
 wabo si da, dagego olo saganama, bugagia odiaąo.

4 Magi baso meni, Genuai Bidigo
 enabolo e tama po walali,
 “Ena Genuai Bidi, ena ena bulu dagalude
 bidiyu, tama eno we bidi dabego
 ebo kolesaga subo sogo da,
 ena haliga nagame elama, tama eno olo
 tama tonaluaibao.
 Eno homu polo hogodama,
 augwali polo dolabo homu ebo menio. Meni.
 Eno dua tonaluyu, tama te giliga
 nanama, tama masigi sanede
 bomona nanebo tiwai elama,
 tama te agai posolo ugwaba dua holobo aąo ebo dao.
 Tiali goli, isi mu dadala sabe.
 Tama me ma, ena te hulide te nai ininama,
 sabo magade te tulubo u meni yai
 tulubage tulubo tiwai ebo dao.”

5 Te mu tama, megı te bulu^f
 te ni wain bomona holama,
 tama dudili elama, tama telega pelama,
 te wain du tau yabo magą ebo tiwai dao.
 Tialigo Genuai Bidigo te bulu dolaibao,

^f 18:5 Bidi mebago homugo te kantri Sudan po olama wali homu yali. Tiali goli, gasa bidi dabego homugo te kantri Asiria po olama wali da, homu ebao.

te bidigo şeşę elama,
 te ni wain nologo te wain du
 tau isıabadi toga sabo tiwai yaibao,
 te nedu du sabo magı isıabadi
 toga sabo tiwai yaibao.

- 6 Genuai Bidigo te gasa bulu
 bidi dabego te bulu dolagasomainu
 elama, tama te bulu ami bidi dabego
 tigi dabe te tıde dabe olo munalua paibao.
 Tama giligade da, te ba kemodage
 dabego tuagasaibao, ma te kedau ebo sogo da,
 te bulu hasa dabego tuagasaibao, te tigi pulu dabe.

- 7 Te sogo augwaligo te Tigidali Bomo
 Elalubo Genuai Bidibolo
 te olo maiabo wiegi yai nai
 sela asaibao, te boma pai kantridu.
 Te bulu te wę hauwa elalubo bulu dao.
 Te bulu we bidi dabe augwali bobobage mu elama,
 tama augwaligo sawi yai tigi mu elalubo.
 Tama te bulu te wıbi hwıbode
 genuai nogi mu elalubaso,
 te gasa bulu dabego agade wi mu ebo dao.
 Te bage augwaligo augwa olo maiabo
 nai dabe te bulu du Saionba sesaibao,
 te Genuai Bidigo te we bidi aga paıba aselama,
 tama agaba lotu weyu emainu dıı ilai pesage dao.^ş

Genuai Bidigo Isip dabe dolaibao

- 19** ¹ Genuai Bidigo te Isip bulu dolaibao wabo po
 mani. Te po e dao.^h
 Suao. Genuai Bidi te pıde ugwadu dualaluyu,
 tama te bulu tı kantri Isipba polo sabolaibao.
 Tama te sogo pedalobo si da,
 te Isip dabego tibo god dabe noma genuai mu
 saibao,
 tama te Isip we bidi noma selama,
 tama augwali wi mu elama,
 tama augwaligo bomo mu sia saibao.

- 2 Tama Genuai Bidigo te po wali,
 “Te eno te Isip dabego homu
 hogodolama, tama Isip dabe augwa
 hasi ma hwjaibao.
 Te ama hasi ma hwiyu, tama yaibao.
 Te Isip hanu dabe aga hasi ma hwiyu, tama yaibao.
 Tama te provins dabe aga hasi tomode
 ma hwiyu, tama yaibao.
- 3 Te eno te Isip we bidigo homu kolesaga paninama,
 tama augwaligo bomu sia sanama,
 tama augwaligo yainu yali şe dabe
 augwaligo egobeo.
 Te augwaligo augwa tibo god dabebolo
 augwali tau somainu hanaluyu yaibao.
 Tama augwaligo te isai bidi dabego
 noma dali po wabo bidi dabe dali po wagi paibao.
 Tama augwaligo homu kolesaga
 hanaluyu, mena şe augwaligo yagawe waibao.
- 4 Eno te Isip dabe te tuni bidi dwai me
 dologode tagalaibao.
 Aga te sesena pai bidi mu, tama agai
 augwali bomona mu tonaluaibao.
 Ena God Genuai Bidi, Tigidali Bomo Elalubo Bidi, eno
 po polo walio.”
- 5 Te wę Nail sula selama, aiya dulama,
 tama tų pedalama, tama mu sula saibao.
 Te tų te gebo pai tų pedalaibao.
- 6 Te aı gamiade te wę dua dua sula sesa duludubadi da,
 te dwai denami holaibao.
 Tama te nosai, me te sigi dili dabe
 węde elaluali nai dabe sese mobia paibao.
- 7 Tama me ma, augwaligo te wę
 sesegede bulali nai dabe me sese sasilama,
 tama waligo sela paibao,
 te nai dabe me elalugobeo.
- 8 Tama te wę Nailde şuę şabo
 bidi dabe augwali homu dwai elama,
 tama augwali gela waibao.
 Te augwaligo huk dabede me umben wa
 dabego siyu yabo şuę menia saibao.
 Tama te bidi dabe homu şeę dali bidaibao.

- 9 Tama me, te name ugwa nigibo
 hobi nigibo we bidi augwali me homu seęę mu
 yaibao. Magi baso meni.
 Te hobi nigibo nai dabe me te gide me holisama ebaso.
- 10 Te hobi meni baso, te name ugwa
 nigibo seę ebo bidi dabe dolama bidaibao.
- 11 Te hanu Goan genuai bidi dabe
 te kolesaga meni yai bidi dabe naga dao.
 Tama te Isip tuni bidibolo wiegi yai
 kolesaga mabo bidi dabe
 augwa geda muai kolesaga agabolo mani.
 Isip tuni bidi, augwali te kolesaga sai
 bidi dabego nagebolo te tama
 po wabo dao, augwali te polobadu
 kolesaga sai bidi dabe,
 me te wiegi yai kolesaga hauwa
 elalui bidi dabego hanidu asai dao po waibao.
- 12 Tiali goli, augwaligo kolesaga menade dualaliwe?
 Te Tigidali Bomo Elalubo Bidi Godigo
 te Isip dabe dali yabo seęę po geme dualaliwe,
 te agai nage dali yabo seęę po wabewe?
- 13 Te hanu Soan, me genuai hanu
 Mempis genuai bidi dabe,
 augwali te kolesaga meni yai bidi dabe naga dao.
 Tama me ma, te Isip bulu tobolu we bidi dabe augwaligo
 te bulu bugagia tolasa seęę ebeo.
- 14 Genuai Bidigo te Isip dabego
 homu kolesaga polo dolai dao.
 Te pagede te Isip dabego ebo seęę dabe dolo me pabeo,
 te geda mubao, te polobo bidigo aga bogu agalama,
 tulaluainu ebo tiwai te ebao.
- 15 Te bulu Isip bugagia bidimainu
 tau sabo bidi menio, tagala,
 aga te genuai bidi, o aga olo bidi.

Genuai Bidigo Isip dabe mu dolama, tama augwali homu begelaibao

16 Tama te sogo te bulu Isipgo te tama seęę tolalubaso da, augwaligo suaibao. Te Tigidali Bomo Elalubo Genuai Bidigo augwali dolainu nogo dolalubo sueibao. Tama augwali te we dabe wi elama, noma sabo tiwai yaibao. 17 Tama te Isip we bidi dabe augwaligo te bulu Juda nogi ebo si da, tego augwali te Tigidali Bomo Elalubo Genuai Bidiba homu kone

yaibao. Me, te augwaligo agai augwalibolo yai ebo şe dabe kone yaibao. Tama augwali wi genuai mu yaibao.

¹⁸Te sogo te Isip dabego a naga hanu we bidi dabego te Hibru pogo po waibao. Tama te hanu we bidi dabego te Tigidali Bomo Elalubo Genuai Bidigo nogide augwali te aga dologode bidai olama, augwaligo mu po waibao. Te hanu me deligo nogi augwaligo te nogi nogi yaiba, Giligago Hanu.ⁱ ¹⁹Tama te sogo te Genuai Bidigo te alta me te bulu Isip hanude elaluaibao. Tama me te masigi pos me elaluaibao. Augwaligo Genuai Bidigo mu daş ilama, elaluaibao. Te bulu Isip daş side elaluaibao. ²⁰Te alta de masigi pos si te we bidigo Tigidali Bomo Elalubo Genuai Bidi sulama, homugo konebo te daş tiwai elaluaibao. Tama te boi bidi dabego augwali dolainu asobaso da, teda augwaligo Genuai Bidiba i olama, tama Genuai Bidigo augwali tau somainu bidi me augwaliba taga palaibao, te augwali tau selama, augwali ma somainu. ²¹Tama Genuai Bidigo te Isip dabego aga deli naga te Genuai Bidi dao olama, konemainu tagalaibao. Tama agai tama tibo sogo da, te Isip dabego bugagia mu koneama, agaba lotu po weyu, agaba ofa nai dabe sela peyu yaibao. Tama augwaligo agaba bomo yai pogo daş olama, tama augwaligo yaibao wali şe dolo tama augwaligo yaibao. ²²Te mu tama, Genuai Bidigo Isip dabe dene mawaibao. Tiali goli, agai te ebo kolesagago da, teda augwaligo dwai kolesaga ebo dodolaibao. Tama augwali homu begelama, tama augwali agaba ma paibao. Tama agai augwaligo gedu haluasa po wabo odama, tama augwali bugagia tau saibao.

²³Tama te sogo da, te mone sunumi te Isip dali Asiria si tomode elaluaibao. Tama te Asiria dabe Isip buluba peyu, me te Isip dabe te Asiria buluba asiyu yaibao. Tama te bulu si we bidi dabe augwali te Genuai Bidi deliba naga lotu waibao. ²⁴Tama te sogo te Israel dabe, me te bulu Isip, me Asiria sigo hai namu si pedalaibao. Tama te we bidigo te gasa tõe we bidigo dabebolo dwagi yai mobo mawainu da, augwaligo te tama po waibao, “Eno homugo Godigo te sela bulu bidi dabe dali yali şe tiwai dage dali me emainao, te Isip ebadi, me Asiria ebadi, me Israel, te tama sela bulu yali gilama.” ²⁵Tigidali Bomo Elalubo Genuai Bidigo dwagi yai mobo po mayu, te po waibao, “Dage Isip dabe, ena we bidi dabe dage dali eno wiegi yai şe yaibao. Tama eno te Asiria dabe dage dali me eno wiegi yai şe yaibao. Tama me eno dage Israel dabe dali me, eno wiegi yai şe yaibao. Te Israel we bidi da, ena we bidi bidimainu yali we bidi.”

Asiria dabego ebo kolesaga te Godigo yabo homu ebo kolesaga ola mobao

20 ¹Te Asiria tuni bidigo pode te aga polalubo ami ofisa bidigo aga ami bidi dabe selama, te hanu Asdotba me bulu Filistiaba

ⁱ 19:18 Te meba poloba Hibru pogo aşani bukude te nogi elalubao, “Giligago Hanu,” da wali. Tama te po mebade te tiwai nogi elaluali “Dolabo Taun,” da wai dao.

hwigi pali. ²Te kibu be sela polasa, te Asiria dabego te Filistia hanu dabe sabode, Genuai Bidigo Aisaiabolo hasia po wai dao, te Amosgo ogwabolo te kolesaga yabo po. Aisaia aga hobedai ugwa me aga saęa nadoba me gudubo tagalama, olo bilao po wali. Tama Aisaiago Genuai Bidigo po odama, tama tiai dao. ³Tama te Asiria dabego te hanu Asdot polo sabo sogo da, Genuai Bidigo te po wali, “Te kibu be sela tama, Aisaia eno se bidi aga ugwa me saęa nadoba gudisama olo bilai dao. Teda te dwai se te Isip dali Sudan side pedalabo se daę tiwai aga bidali dao. ⁴Te Asiria tuni bidigo te Isip dali Sudan bulu siba hwigi paibao. Tama agai te bulu sigo gesi bidi me, monu dabe me, kalabus elama, gasa buluba sela paibao. Tama augwali pabo sogo da, augwali ugwa me, saęa nadoba me, me gudasa pogobeo, mu meni yaibao. Augwali habu olo bidiyu, augwali hale mu yaibao. ⁵Te Filistia we bidi dabego te Sudan dabego augwali hwibode tau siyu, me te augwaligo genuai nogi ugwaba sabo Isip dabe, te augwaligo te se sulama, tama augwali noma selama, tama augwali homu dwai yaibao. ⁶Tama te sogo, te nambis we bidi, te Filistia dabe, augwali augwa hasi tomode po miyu, te po waibao, ‘Iya, tegoba! Dago te bomai bulu bidi dabebolo da tau somainu no munaluao po hanalu wai goli dama, tiyu Asiria dabego da dolagaidali weyu. Tiali goli, suao, augwa digi dolalio. Te da te Asiria dabego bainat hwaę geda muabo sunumi menio,’ te po waibao.”

Babilon bulu dolaibao

21 ¹Genuai Bidigo Babilon^j bulu dolaibao wabo po mani.

Te genuai seęe me, dene me,
te nai meni yai wa pai bulude pedalaibao,
te tę te bidi dabe wi elama, paęa pişama ebo bulude.
Agai te polo asaibao, te nai menia pai
madi pobegebo wali tiwai bomai wali.

²Eno te se te God ena mani na me deli dwaide suali.
Eno Godigo te po wabo odali,
“Te Babilon dabe te ili po olama, geagano bilibo se eyu,
tama gasa we bidi hani dali dwai se ebo bage dao.
Tama augwaligo te kolesaga genuai mu
pedalomainu ebo.
Tama tibaso, te Elam ami bidi dabe,
dagego te Babilon buluba hwięasao.

^j 21:1 Te Hibru pogo te nogi Babilon me elalubeo. Agai te po olama wai, “te wa pai bulu te nambis paęe elalubao,” wai. Tiali goli, te po wali te Babilonde po digi po begelama wali da, homu ebao.

Tama Midia ami bidi dabe, dagego
 te hanu bobegela sagasiąo.
 Eno te Babilon dabego gasa
 we bidi dabebolo mani seęę silaibao,” wali.

3 Te nade suali naigo ena wi ilama, didibili ilali.
 Tama eno tigide dene genuai me yali,
 te we sibigo wai sainu dene ebo tiwai yali.
 Eno wi mu elama, eno homu mu doali.
 Tama eno magi nai me suyu, me po
 me odoyu yabo homu me ebe.

4 Eno tobolu geę elama, tama wigo
 eno tigi didibili yali.
 Eno te pio giliga iba dega siyu, hulia sagasabode,
 eno godolo mu ebo dao.
 Tiali goli, te sogo hulide te naigo ena wi mu ilalio.

5 Eno te bidi dabego genuai nai sisi ebo suali.
 Tama augwaligo moni ugwa name tąba mubo suali.
 Tama bidi dabe dualama,
 nai tuyu, we tuyu ebo suali.
 Tiali goli, deli sogo tama bidi mego
 haę olo e tama po wagasali,
 “Te genuai bidi dabe, te boi bidi dabe polo asalio.
 Te duga hwıbo awa name polo selama, no muao,” wali.

6 Tama Genuai Bidigo enabolo te po walali,
 “Nago bidi me nage tonalumainu tama,
 nago daę ilao, agai tonalumainu.
 Tama agai te mena tama nai agai suali
 agai nagebolo omainao.

7 Te agai te bidi dabe hos dabede
 dualama si si asobo sulama,
 me agai te bidi dabe te donkidu,
 me kameldu dabe dulasa asobo sulama,
 teda agai olo saganama, bugagia mu odama,
 mena seę egowe bugagia odaibao.
 Tama agai bugagia sumainao,” wali.

8 Tama te tonalubo bidigo laion yowigo
 wabo tiwai iyu,
 agai te po bomona wali,

“Genuai bidi, ena te boi bidi dabe
 tonalubo pesagede tede bidama,
 tama ulade me, hulide me,
 eno bugagia tonaluai dao.

⁹ Tama eno te bidi dabe te hosde
 dulama si si asobo suali.”

Tama tonalubo bidigo te po wali,
 “Babilon polo dolalio, aga polo dolalio.
 Tama augwaligo tibo god dabego
 piksa dabe tulaluama, tologa palio,” wali.^k

¹⁰ Eno we bidi dabe, hobede ya,
 te boi bidi dabego dage
 te bidi dabego wit elebo tiwai yalio.
 Tiali goli, megi da,
 eno te God Tigidali Bomo Elalubo Bidigo mani po
 dagebolo pusubao.
 Aga te Israel dabego God dao.

Te profet bidigo Idom dabego hanalu wali po wei ponani

¹¹ Te Genuai Bidigo te nai dabe me te
 hanu Dumade pedalabo po mani.^l
 Te bulu Idomde bidibo bage augwaligo
 i olama, hanaluyu, te po wali,
 “Tonalubo bidi, me sogo te hulialubo silaibawe?
 Mena sogo mu aga silaibawe?”

¹² Tama eno te po wei ponoyu, te po wali,
 “Te be da posaiba, tiali goli hulialu siyu me yaibao.
 Tama dagego ma hanaluabo
 homu ebaso da, teda dage ma aselama,
 ma hanaluagasiqo,” wali.

Genuai Bidigo Arebia dabe dolaibao

¹³ Genuai Bidigo te Arebia dolaibao wabo po mani.

Te Dedan dabe dage, te dage biliyu,

^k 21:9 Ped 14:8; 18:2 ^l 21:11 Te lain 11 me 13 tede wali po page kuna konebeo. Me badu bidigo homugo te taun Duma te Arebia dabego taun yali bogo homu ebao. Te buku Page Gagalali, Daı 25:13-15, tede te tiwai wali te nogi Duma te nogi Tema dali elalu, me Kedar dali elalubao, te po te Daı 21de te ves 14 me 16, tede suo. Tiali goli, te ves 11de te kantri tı Idom po olama me walio, tama tiyu, me badu bidigo homugo te vesde wali nogi Duma te tı kantri Idom po olama wali dao, te homu ebao.

nai abelama dobu si eyu ebo bidi dabe dao.
 Dage pelama, te Arebia dabego nai
 meni yai wa pai buluba duala sigi pabo dao.
 14 Te teba wi asali we bidi augwali
 wę nogonego mu isibao,
 tama tibaso, dagego nai magasao.
 Tama te tų Tema we bidi dagego
 te nai me augwaliba sela piąo.

15 Augwali wi pai dao.
 Magi baso meni, te boi bidi dabe hwıbo
 bainat hwą me enesigi enego
 augwali dali bomo elama, hwıbaso.

16 Genuai Bidigo enabolo e tama po wali, “Te kibu be deli elalubao, te hanu Kedar we bidi dabe dali augwaligo wiegi yai nai dabe dolama silabo. Te kibu be bubuga deli deli sogo eno bugagia nedebao. Tama te kibu bego bubuga dolo mu sia sigi pabo si da, teda eno augwali dali yaibao wali sę dabe eno yaibao. 17 Te Kedar dabe augwali bomai ami bidi dabe augwali enesigi dali hwıbo bugagia mu koneai dao. Tiali goli, augwali dolaibao. Tama dwasianu bidi hani ami dabe naga bidaibao. Ena Genuai Bidi, Israel dabego God, eno po polo wali.”

Genuai Bidigo Jerusalem we bidi dabe dali wado po wali

22 1-2 Genuai Bidigo te Na Yabo Odogo Bulu tede
 na dabe pedalabo po mani.
 Te genuai hanu Jerusalem we bidi dabe,
 dagego mena homu mu eyu, dagego hai olama,
 wiegi yai homu ebawe?
 Tama dage duga be peduba hola pelama,
 tama hai bomona mu olama,
 tama te kulukulu tigidali te hanu usu nubao.
 Naga te bidi dabe isali da.
 Augwali te bomai ami bidi dabe tiwai
 e hwınama, isai menio.
 Te boi bidi dabego augwali moni hwągo elebeo.
 Menio.^m

^m 22:1-2 Te Asiria boi bidi dabe aselama, te taun hanu Jerusalem bagua sagasali sogo, te Jerusalem bidi augwali te bidi dabe wi eyu, te augwali bomo elalu dolaluabo homu isąma, te Asiria ami bidi dabe dali hwıabo usu meni yai. Te Jerusalem bidi dabe meba te wi pelabo si da, te Asiria dabego augwali pageabi elama, te augwali ela muani. Tama meba te taun tomode bidaludubadi, te augwali gasi selama isiyu, ma nasi elama isiyu yalio.

- 3 Dagego genuai bidi dabe augwali
 digibulu mu wi peyu, tedela pai dao.
 Tiali goli, boi bidi dabego augwali sulama,
 tama augwali dua dua tola sai dao.
 Magi baso meni, te genuai bidi dabego
 ene dabe me te hwıabo nai dabe meni baso.
 Te boi bidi dabe dali hwıabo nai dabe meni yaide.
- 4 Tama tibaso, eno dagebolo te walobao.
 Dagego eno haliga nagame elama bidimainu igimio.
 Dagego enaduba deli naga bidimainu
 tagalao. Magi baso meni.
 Eno we bidi mu dolai baso, ena homu seęę elama,
 ena gela weyu ebao.
- 5 Magi baso meni.
 God, Tigidali Bomo Elalubo Genuai Bidi,
 agai te haniani seęę dabe dage
 te Na Yabo Odogo Bulu pedalabo sogo me
 polo bodolu muai dao.
 Te boi bidi dabe hauwa mu aselama,
 tama augwaligo hae dali iba,
 oba bomona ela bilaibao, te udula biliyu.
 Tama dage noma selama, gegede bilaibao.
 Augwaligo te hanu obo dabe huęiyu yaibao.
 Tama dage wi yaibao.
 Tama dagego i wabo da, digibulu mu paibao,
 te tigidali bulu du usu naibao.
- 6 Te bulu Elam ami bidi dabego enesigi
 dali, ene dali si tolasa asaibao.
 Tama augwali te hwıbo kibu hos,
 me te hwıbo awa dali tama asaibao.
 Tama te hanu Kir ami bidi dabe da,
 augwali te hwıbo sabili dabe dali asaibao.
- 7 Te hwıbo nai o awa da dagego
 sawi yai odogo bulu paęawaibao.
 Tama te hos kibude duabo ami bidi dabe
 augwali te hanu sunumide
 doligi pelama, tama hwıabo no munaluaibao.
- 8 Te boi bidi dabego te seę dabe yaibao.
 Magi baso meni, Genuai Bidigo te bulu
 Juda me tonalusięama ebaso.

Tama te sogo dagego koneama,
 te boi bidi dabego dageba
 hwiğasaibao homu ebaso da,
 teda dagego te hwiğbo nai dabe
 te Moni Ni Sili Lebanon Be nogi ebo
 tede munalubao homu eyu da,
 teda dagego agai bugagia bidibo tau saibao.

9-10 Tama dagego suai dao,
 te hanu Jerusalem obo hauwa dolai
 elalubo suai dao.

Tama tibaso, dagego Jerusalemde
 be dabe tigidali nedai dao,
 te tuni bidi Devitgo hanu.

Tama dagego te be dabe huğilama,
 te be dabego masigi dabe te obo şe
 ma yainogo sai dao.

Tama dagego tğ dedagede wę sainu,
 te wę gamia dabe geselai dao.

11 Tama dagego genuai dedage deli
 te hanu bobegelali obo si tomode nigai dao,
 te tigidali uludu asobo wę ge bo dağ elalumainogo.

Dagego te tama şe dabe yai dao.

Tiali goli, dagego God me kone me ebeo.

Agai deligo naga te nai dabe dageba
 pedalabo po polobadu digi bodolu muai dao.

12 Tama te sogo God, Tigidali Bomo Elalubo Bidigo
 homugo dagego homu dene
 elama, gela omaina homu ebaso.

Tama dagego duga tobolu nisi gudama,
 tama hobede ebo ugwa gudumainu homu ebaso.

13 Tiali goli, dagego te hobede yabo
 şe yai menio. Meni.

Dagego gisugu olama, gana pelama bidalio.

Tama dagego bulmakau kibu me sipsip kibu elama,
 tama moni daa mu tuai dao.

Tama dagego wain wę dabe tama tuali.

Tama dagego e tama po wai dao, "Asao.

Da wę dali nai dali tuinao," wali.

"Magi baso meni, do da isaibao,"

tama po wali."ⁿ

¹⁴Tigidali Bomo Elalubo Genuai Bidi aga digi ena pageba mu aselama, eno olode te po mu tama walio, "Eno dagego te dwai seęę gegeda saęobo, te dage isiboba usu nigi paibao," wali. Te da, te Godigo po dao, Tigidali Bomo Elalubo Genuai Bidigo po.

Genuai Bidigo Sepna aga seęe sela saęaibao

¹⁵Tigidali Bomo Elalubo Genuai Bidigo enabolo Sepna sugi pao po wali. Te bidigo te tuni bidigo bede tigidali nai tonalubo dao. Tama eno te po agabolo pusa mawaibao,

¹⁶ "Sepna, nago naga hani me nago tų ede menio.
Te nago homugo nage de dao homu eyu,
nago te bidi dabebolo te bulu du dologode dilai
masigi dedage dogwao po waliwe?
Tama te masigi dedage nago dwagi yai
gų page tiwai elaluaibawe?

¹⁷⁻¹⁸ Nago homugo nage bomai
bidi dao homu ebawe? Mu menio.
Genuai Bidigo nage tola selama, gosegelama, miminama,
tama dwasianu kiki tiwai yaibao.
Tama agai nage tų me genuai digibulu
me elalubo madi digibulu mu saęaibao.
Tama nage te bulude isaibao.
Tama nago te tagalobo sawi yai karis tagalaibao.
Nage da, te tuni bidigo seę ebo bidi dao,
tiali goli nago tuni bidigo haniba
nago hale sela asobo bidi dao.

¹⁹ Genuai Bidigo nage nago ebo seęe
sela saęama, tagalaibao.
Tama nage nai meni yai bidi bidama,
tama nage dwai mu bidaibao.
Tama nage nogi meni yai bidi mu bidaibao," wali.

²⁰ "Genuai Bidigo Sepna nagebolo te tama po wali, "Te nai dabe pedalobo sogo da, teda eno seę bidi i olama, asaibao. Aga te Eliakim dao, te Hilkiago ogwa dao. ²¹Tama eno te nago te tuni bidigo ofisa bidigo gudubo wiegi yai ugwa me kibu wali selama, te Eliakim gudulaibao. Tama agai nago megi ebo seę saibao. Tama agai te Jerusalem we bidi,

me te Juda we bidi, tigidali tonaluaibao. Tama aga augwaligo aya tiwai bidaibao. ²²Tama eno agai nogoba te tuni bidi Devitgo be ki agai nogoba muaibao. Tama mena nai agai dabo si da, teda bidi dabego ma palibo usu egobeo. Tama me tama nai dabe agai paliali da, bidi dabego dabo usu egobeo. ²³Te eno aga te şede bomo elama, mu bidimainu ilaibao, te huk augwaligo be tomode daş walai tiwai yaibao. Tama agade aga hani tigidaligo genuai nogi sela silaibao.’ ”

²⁴“Tama aga hani tigidali aga pageba sisagaselama, tama agabolo augwali tau sao po waibao. Te augwali te sene dabe, me meba nai dabe te hukude walalubo tiwai yaibao. ²⁵Ena Tigidali Bomo Elalubo Genuai Bidi, eno te tama po wali. Tama te şe pedalobo sogo da, te si wali huk hala pelama, tulaluaibao. Tama agade walaluyu, aga seşe mani hani dolama, tulaluaibao. Ena Genuai Bidi, eno polo wai dao.’ ”

Genuai Bidigo hanu Tair dolaibao

23 ¹Genuai Bidigo te hanu Tairde pedalabo şe dabe po mani.^p

Te genuai sip dabe, dage tamu weşe
bilibo sip dabe, dage hobede elama,
gela waişo. Magi baso meni.

Dagego bulu Tair sese tigidali polo dolai dao.
Tama tede be me dolalubeo, te bulude.
Me, te sip dabe tubo pesage tede dolai dao.
Nago te şe te ailan Saiprus tagalama,
ma asobode dagego koneaibao.

²Te dage Tair bage, te tamu weşe
sesegede bidibo Tair bidi dabe, dage,
me te hanu Saidonde bisnis
bidi dabe, dage hobede elama,
po wasişayu, dua bidişo.

Hanu Saidon, te sip dabego haniani dabe
hauwa mu nageba sela asai dao.

³Tama nage te nai abeliyu,
te nai maketde muyu ebo genuai
nogi sabo bulu tiwai yai dao.

Te sip dabe te Isipba, te weşe Nail elalubo badu pelama,
tama te wit nai dabe nageba sesai dao.
Tama nago te nai dabede bisnis şe elama,
te naide mone hauwa sai dao.

- 4 Hanu Saidon, nage hale yao. Magi baso meni.
 Te bomai hanu te tamu ađe elaluali hanu polo dolalio.
 Tama te tamu ađgo te po walio,
 “Hobede mu dao.
 Eno wai dabe ame nabe.
 Tama ena te wego wai ame nainu dene isawai ađ yalio.
 Tama eno sawi ogwa wegi ame nisawai
 ađ elama, negisawai ađ yalio,” wali.
- 5 Tama te Isip dabego te se dabe
 te hanu Tairde pedalali po odobosi da,
 teda augwali wi mu elama,
 augwaligo bomo mu sia saibao.
- 6 Dage te tamu we sesegede bidibo
 we bidi dabe, dage hobede elama,
 gela olama, te Tarsis buluba poloba tama wi pao.
- 7 Magi nai mu te Tairde pedalaliwe?
 Te polobadu bomai hanu mu,
 te dage tigidali wiegi yai
 homu elama gana pai madi dao.
 Polobadu te hanude we bidi dabe meba
 te gasa digibulu buluba taga palama,
 te gasa gesi hanu geseligi pomainu yai dao.
 Tiali goli, magi baso te hanu dolama elalubawe?
- 8 Dego pode mu te hanu Tair dolaliwe?
 Te hanugo te gasa hanu dabe
 tonalumainu sa muai hanu dao.
 Tama agai bisnis bidi dabe
 te genuai bidi mu tiwai bidama,
 tama te tode we bidi dabego augwali
 nogi ugwaba siyu,
 genuai nogi mu mabo dao.
- 9 Te da te Tigidali Bomo Elalubo Genuai Bidigo pode
 te bulu tama dolai dao.
 Genuai Bidigo te tama tiali da. Magi baso meni.
 Agai te bidi hani augwa bomo de
 augwa genuai nogi dabe ugwa siyu,
 me augwa homu gana peyu ebo
 bidi dabego nogi aiyaba elalubo dao.
 Tama me, agai te bidi dabe
 genuai nogi yai bidi dabe me agai
 aiyaba elalubo dao.

- 10 Dage te Tarsis badu bidibo we bidi,
dage duga homu duga haniani
şę dabe iyao. Magi baso meni.
Te hanu Tair bidi dabego dagego
homu kolesaga tolalugobeo.
- 11 Genuai Bidigo nogo
te tamu wę daide balalubao,
te tamu wę sesegede elalubo bulu dabe dolainu.
Tama tibaso, te bulu we bidi dabe
augwali didibili dwai mu ebao.
Agai te Fonia bulude bomai hanu dabe
dolainu po polo mawai dao.
- 12 Agai e tama po wali, “Sawi yai hanu Saidon,
nage wiegi yai homu me ma elama,
bidigobeo. Magi baso meni.
Nage dolama, mu dolama elaluaibao.
Tama tibaso, dage hanu Saidon we bidi, dage hogodama,
te ailan Saiprusba piyo.
Tama tiali goli, tede me dage bugagia
me bidigobeo,” wali.
- 13 Te Babilon dabego to suiyo,
te bidi dabe me tede bidibeo. Magi baso meni.
Te Asiria dabego augwaligo bulu dolai dao.
Tama augwaligo bulu te bulu
hasa dabego bulu gagalai dao.
Te Asiria dabego te augwaligo hanu obo
bobegelama, sai ela pai dao.
Tama augwali te sai dabede dolaluyu,
tama augwali dali hwi yai dao.
Tama augwaligo te hanu dabego bomai
obo dabe hugiai dao.
Tama te hanu dabe sese tama dolai dao.
- 14 Te genuai sip dabe, dage tamu węde
bilalubo sip dabe,
dage hobede elama, gela waiyo.
Magi baso meni. Dagego te bomai hanu polo dolai dao.

15 Tama te şę dabe pedalobo sogo da, te we bidi dabego te hanu Tair te kibu be
70 tama gegeda pelama, bidaibao. Te hanu Tair te penani şę ebo we te bidi dabego
te we tagalama teşabi wabo we tiwai bidaibao. Te teşabi wabo po e tama edao,

16 O penani şę ebo we.

Augwaligo nage homu kone gegeda palalio.
 Tama tibaso, nage gita selama, hanuba biligi pao.
 Tama nago te teąbi po wao.
 Tama wiegi yai musik elao.
 Tama te bidi dabego nage ma koneaibao.

¹⁷Tama te 70 kibu be silibo si da, Genuai Bidigo te hanu Tair te we bidigo nai dabe abeliyu, nai maketde muyu ebo bulu ma emainu sula tagalaibao. Tama te hanu Tairgo te gasa tode bulu dabe sese aga dali bisnis se yagasomainu kegaibao, te penani se ebo wego agaba asomainu kegebo tiwai yaibao. ¹⁸Tiali goli, te mone dabe agai sabo da, aga sabo sabogobeo. Menio. Te nai dabe te God Genuai Bidigo nai dabe tiwai pedalaibao. Tama te Genuai Bidigo we bidigo te hanu Tairgo sisinani nai dabe saibao. Tama augwaligo tuabo nai hauwa mu elaluaibao. Tama wiegi, wiegi yai gudubo ugwa me elaluaibao.

Genuai Bidi te Saion bulu dude bidiyu, te tigidali we bidi hani tonaluaibao

(Dqj 24-27)

Genuai Bidigo to dolama, tama aga digi te we bidi tonaluaibao

24 ¹Genuai Bidigo to mu dolama, tama to olo mu elaluaibao.

Agai te to agalama, tama to bebegelama,
 tama te to gasagi yai mu pedalaibao.
 Tama agai te we bidi dabe subigila
 wi tedela pomainu yaibao.

² Tagala, augwali mena tiwai we bidi yaibaso me,
 augwali deli se tiwai naga suaibao.
 Te pris bidi dabe dali, me te olo we bidi dabe me,
 tama me te tonalubo bidi dabe me,
 olo se bidi me, olo se we dabe me.
 Tama me te bisnis bidi dabe,
 me te augwalide nai dabe abelebo bidi dabe me,
 tama me te nai negeli sabo bidi dabe dali,
 te nai negeli mabo bidi dabe dali me.

Tama me te moni bidi dabe dali,
 me nai meni yai bidi dabe dali me.

Augwali tigidali sese tama te dwai dene saibao.

³ To tigidali mu dolama,
 tama te to olo mu elaluaibao.

- Genuai Bidigo te şe dabe yabo po polo walio.
 4 Tq wa pelama, tama agai bomo polo sia salio.
 Tama aga hobedai gela obao.
 Tama te genuai nogi elalubo we bidi
 augwaligo bomo me sia salio.
- 5 Te tq te we bidigo dwai meda yai
 kolesagago meda ilalio.
 Augwaligo te Godigo bomai habu selali
 poba tudi ola menama,
 tama agai po sela şanama,
 tama augwaligo God aga dali
 daş walali po toga şayu yai dao.
 Teda te aga dali tigidali sogo bidiabo
 daş wali po augwaligo sela şawai dao.
- 6 Tama tibaso, Godigo pode
 te dwai sogo mu te tqde pedalama,
 te we bidi hauwa mu
 dwai kolesagadu wali pao olama, i ola mawai dao.
 Tama dwasianu we bidi hani naga bidaibao.
 Agai tama tiali. Magi baso meni.
 Te we bidi dabe augwa dwai kolesagago
 augwa şeşę tolaibao.
- 7 Te gesi ni wain du me walisiaşbadi,
 te ni wain me sasia mobia pai dao.
 Tama te we bidi te wain wę tubo bage
 augwali megi da homu şeşę mu yali.
- 8 Augwali wiegi yai homu elama,
 tama augwa te bagwa pai
 wiegi yai musik po wabo te temborin me elebeo.
 Tama augwaligo haniani gitago
 wabo dabe sese mu tama sia sali.
- 9 Augwaligo te wain wę tubo sogo
 augwaligo te teşabi po me wabeo.
 Augwa şeşęgo yali şede augwaligo
 te wain augwaligo tubode
 augwaligo pedauwalide pusu me ebeo, te ha ebao.
- 10 Te genuai hanude nai dabe sese mu dola silalio.
 Tama tigidali be sunumi dabe palialua pali.
 Te bidi me tomoba me pabo usu ebeo.
- 11 Tama te we bidi dabego
 te tuabo wain wę menia salio.
 Tama augwali te hanu sunumi dabede

- dolalua peyu,
 augwaligo te wain gogono bilibao.
 Te we bidi dabego wiegi yai
 homu elama, gana pali dabe mu sia sali.
 Tama homu sese elama, hobede
 ela pabo şe naga te tigidali tşde ebao.
- 12 Genuai hanu sese mu tama dolali,
 tama agai genuai obo sunumi tulaluama, tama
 pebeda pali.
- 13 Te tobage dwai şe naga te tigidali
 tşde we bidide pedalaibao.
 Tama dwasianu we bidi hani mu naga bidaibao.
 Te ni oliv du te bidigo sela silaide
 te deli deli walalua pabo tiwai elaluaibao.
 Me te ni wain du te bidigo siyu,
 deli deli tagalai te elalubo tiwai yaibao.
- 14 Tiali goli, te me bidibo dwasianu
 we bidi hani augwali wiegi yai
 homu elama, tşabi po waibao.
 Te tamu we şesegede bidalubo we bidi augwaligo
 te Genuai Bidigo bomode me genuai
 nogide augwaligo wiegi yai
 homu elama gana paibao.
- 15 Tama tialima, dage tigidali tş
 habu badu bidalubo we bidi dabe,
 te giliga asobo badu,
 me te tamu aşı sesegede elalua pabo
 bulude bidalubo bage,
 dage tigidaligo te Genuai Bidigo nogi ugwanu sao,
 te Israel dabego Godiba genuai nogi maişo.
- 16 Te we bidi te tş sesegede digibulu
 bidibo bage augwali wiegi yai
 homu elama, tama augwaligo
 wiegi yai homu ebo tşabi po wabo.
 Tama augwaligo te tşabi po da e tama dao,
 “Genuai Bidigo nogi ugwaba sao.
 Agai tigidali sogo wiegi yai kolesaga mu ebo dao.”
 Tiali goli, eno e tama po wali,
 “Hobede mu dao.
 Ena wiegi yai homu mu egobeo.
 Eno haligade moni şeşe mu elama,
 eno olo dali mu sia sabo homu ebo.

- Magi baso meni. Te eno suali,
 te dwai şeyu, ili po weyu tama
 ebo bidi dabego gasa bidi dabe ili po ola mani,
 augwali dali dwai şeyali, eno te po wali.
- 17 Te tşde we bidi, dage hobede mu dao.
 Te dwai sogo me, tş dedage me,
 şuşuş sabo wa tamago dage
 tonalubao, dage tola sainu.
- 18 Tama bidigo te dwai sogo te asobao
 wabo po odama, wi pobaso da,
 aga te tş dedageba tulaluaibao.
 Tama aga te tş dedagede
 ma hola aselama, ma wi painu yali da, teda aga
 te şuşuş sabo wade ma tola saibao.
 Te dagalude sunumi dabe dala pelama,
 tama te wş e tşba gealuaibao.
 Tama tş pagede mali yaibao.
- 19 Te tş mali genuai mu elama,
 tama te tş tomode peda pelama,
 tama te tş dedage olo dala pai elaluaibao.
- 20 Aga te polobo bidi ugwaba edaba ebo tiwai eyu,
 me te dwasianu be te bomai wali ebo
 sogo uba edaba ebo tiwai yaibao.
 Te tşde we bidi dabe augwa dwai şeşeşo
 yaligo te tşgo tolobo usu egobeo.
 Tama tibaso, te tş tulaluama, tama te tş ma hodalobo
 usu me egobeo,” eno te po wali.
- 21 Polobadu digi Genuai Bidi aga digi
 po bodolu muai dao.
 Agai te dagalude bidibo bomo elalubo bage dene mayu,
 me te tşde tuni bidi dabe dali dene mawaibao.
- 22 Genuai Bidigo augwali sisinama,
 augwali kalabus ilaibao,
 te bidi dabego te kalabus bage
 tş dedage deliba tagalobo tiwai mu yaibao.
 Tama agai augwali kalabuside
 bobobage sogo tonaluaibao.
 Tama nosali augwaliba agai homugo
 yainu yali şey augwaliba yaibao.
- 23 Tama te giliga ula de polua ula si,
 te olo nai tiwai yaibao.
 Magi baso meni. Tigidali Bomo Elalubo

Genuai Bidi aga bomo dali,
 me aga bomai ula dali, asaibao.
 Tama aga te bulu du Saionde we bidi tonaluaibao.
 Tama te we bidi dabe augwa genuai
 bidi dabego aga suaibao.

Godigo nogi ugwaba siyu wabo balia po

- 25** ¹O Genuai Bidi, nage eno God dao.
 Tama eno nago nogi ugwaba saio.
 Magi baso meni.
 Nago te bidigo isawai bomai şe dabe mu ebo dao.
 Da tau sainogo, nago tigidali nai dabe mu usu nani,
 te polobadu digi nago yaibao po wali gilama.
- ² Nago te genuai hanu dabe
 te pobele bage pesage holai dao.
 Tama te bomai obo dabe elalui
 hanu dabe sese dola silai dao.
 Tama te Israel hani isawai bagego
 bomai hanu dabe te boi bidi dabego
 sese mu dola silai dao.
 Tama augwaligo ma hodolobo usu egobeo.
- ³ Te bomai bulu we bidi dabego
 nagebolo genuai nogi mawaibao.
 Te tş pedai kantri meba we bidi dabego
 gasa we bidi dali homu dene isawai goli,
 te tobage kantrigo moni hanude bidibo we bidi
 dabego nage wi eyu, nage dologode bidaibao
- ⁴⁻⁵ Nage te nai meni yai bidi dabe
 duala sabo bulu tiwai nage bidai dao.
 Tama augwali şeşe ebo sogo augwali bugagia bidai dao.
 Te dwai bidi dabego homu şeşe
 te bomai waligo te be daga tigiba
 hudula palobo tiwai dao, me te sesana pai giliga
 te kemi tş wa pai bulude nanebo tiwai dao.
 Tiali goli, te tulubage sogo, me wali ebo sogo,
 nago augwali mesegelama, tonaluai dao.
 Te nai meni yai bage nago tonaluai dao.
 Tama bomai giligago augwali ulumainu
 sula tagalai menio.
 Genuai Bidi, nago te boi bidi dabego
 pedauwali paninama,
 tama te dwai bidi dabego i hae wabo

tama sia sabo dao.
 Te pogo te sesana pai giliga dualobo tiwai ebo dao.
 Tama te bulu kedaua pabo dao.

Godigo genuai nai te bulu du Saionde sisi elama, muaibao

- 6 Te bulu du Saionde,
 Tigidali Bomo Elalubo Genuai Bidigo
 geninama nai mu sisi yaibao.
 Te wiegi wiegi yai hasa dabe me,
 tuabo wain aḡ dabe me elaluaibao.
 Tama tigidali bulu we bidi dabe
 te nai tuboba sasinagasaibao.
- 7 Megi da, te we bidi hani augwali
 homu seḡe elama bidibao,
 te augwali te isibo kolesagade
 homu dene elama, te bidibao.
 Tama augwali te seḡeḡo te ugwa tiwai
 augwali mesega sai dao.
 Tiali goli, te Saion bulu dude da,
 Genuai Bidigo augwaligo homu seḡe me
 hobede ebo dabe sese sia saḡaibao.
- 8 Agai te isibo me silama, tama augwali
 me isibo seḡ me egobeo.
 God Genuai Bidigo augwaligo gela uḡa
 sia saḡama, tama augwaligo gedu aḡ wa saḡaibao.
 Te we bidigo gedu aḡ menia saibao.
 Tama agai aga we bidi tigidali tḡde
 bidibo we bidigo hale me sia saḡaibao.
 Genuai Bidigo te seḡ yabo po polo
 wai dao.⁹
- 9 Te seḡ dabe pedalobo sogo,
 te we bidi dabego te e tama po waibao,
 “Mu tama dao, Genuai Bidi dago God dao.
 Dago homu agade daḡ olama, tonaluai dao.
 Tama agai da ma oda sai dao.
 Aga deli naga Genuai Bidi dao.
 Tama agai da tau sai dao.
 Tama tibaso, da wiegi yai homu
 penene genina mu inao.
 Magi baso meni. Agai da polo ma

⁹ 25:8 1 Ko 15:54; Ped 7:17; 21:4

oda sai dao,” te po waibao.

Genuai Bidigo bulu Moap dolaibao

- ¹⁰ Genuai Bidigo Saion bulu du bugagia tonaluaibao.
Tiali goli, agai te Moap dabe mu dolaibao.
Agai te boi bidi dabego augwali dolama, mesegelama,
agayagasomainu yaibao.
Te kau kibu dabego nosai augwa diba
agalama, ela bulubo tiwai yaibao.^r
- ¹¹ Te Moap dabe te bidi moni tamu wę
tomode hagayabo ąq ebaso,
te wę saneba painu paulama,
nogo ąi togobo tiwai yaibao.
Te augwaligo dolidali weyu, haniani sę mu yaibao,
te augwali dolobo side.
Tiali goli, Genuai Bidigo augwaligo
bomo dali kolesaga si aiyaba elaluaibao.
Tama mena sę augwaligo yali
te sę dabego augwali tau me sogobeo.
- ¹² Tama agai augwaligo hanu bomai
obo dabe hugia şawaibao.
Megi da, te obo dabe sigide ugwanu mu te elalubao.
Tiali goli, agai te obo dabe tşba mu tulalumainu yaibao.^s

Juda dabego balia me deli waibao

26 ¹ Te sogo nosali pedalobaso, te Juda tşde bidalubo we bidi
dabego te balia po waibao.

- Dago hanu mu boma pai mu dao.
God aga digi dago bomai obo bidalio.
Agai da ma polo oda sai dao,
tama tebogo agai da bugagia bagulali, te hanu me
deligo bomai obo tiwai yalio.
- ² Te homugo genuai sunumi dabe dayao.
Te doloba pai we bidi tomoba tula asomainao.
Tigidali sogo te bage augwali
Genuai Bidi dologode naga elalubo dao.

^r 25:10 Matmena, te Moap dabego taun hanu me deli da. Tiali goli, te Hibru pogo te nogi Matmena te tiwai si page pade elalubao, “di tabo pesage da,” wabo. Te da, te profet bidigo te hanu te gagali po weyu, wabo ąq yali, te Moap dabego hanubolo. ^s 25:12 Ais 15:1–16:14; Jer 48:1-47; Ese 25:8-11; Amo 2:1-3; Sef 2:8-11

- 3 Genuai Bidi, augwali nage dologode naga bidibo dao,
tama augwaligo homu nage delide
naga daŋ olama, elalubo dao.
Tama tibaso, nago augwali dali
homu nagame ebo kolesaga
augwali mu paŋamainu ebo dao.
- 4 Tigidali sogo Genuai Bidi
dago bomai duala sabo pesage dao,
te moni dobo masigi tiwai dao.
Tama aga tigidali sogo tama bidada peyu, bididuaibao.
Tama tibaso, dago agade homu daŋ mu olama,
tama aga dologode tigidali sogo bidinao.
- 5 Genuai Bidigo te we bidi genuai
nogi yali we bidigo nogi aiyaba elalubo dao.
Tama agai te bomai hanu dabe huŋibo dao.
Tama augwali tŋba sese tama tulalubo dao,
te tŋ hogomude elalubo dao.
- 6 Te we bidi dabe augwaligo
te nai meni yai we bidi dabe dali dwai se mu yali.
Tama te bagenu augwali nai dabe mu menia pali.
Tiali goli, megi da, te nai meni yai
bidi dabe augwali te dolama,
tagalali hanu pobele bage daide agaga bilibao.
- 7 Te sunumi te doloba pai we bidi dabe
bilalubo sunumi da dolo naga te elalubao.
Genuai Bidi, nage doloba pai God dao.
Tama nago augwali bilibo sunumi dodolobo dao.
- 8 Awe, Genuai Bidi, da nago bomai po
wali peyu, bilibo dao.
Tama dago nage deli naga tonaluyu, tonalubo dao.
Dago nago genuai nogi godolo mu ebo dao.
- 9 Te hulide eno homu nage delide naga elalubo dao.
Tama kigamude ena nage dali bidibo
godolo mu ebo. Magi baso meni.
Nago te tŋde we bidi po tŋ ela mabo dao,
te augwali nago doloba pai kolesaga
ola mawainogo.
- 10 Tiali goli, nago dwai we bidi hobede igi sogo da,
teda augwaligo te nago doloba pai
kolesaga konea sigi menio.
Augwali doloba pai we bidigo
te tŋde bidibo me tagala,

- augwaligo te dwai kolesaga me ebo şe yaibao.
 Tama augwaligo nago
 genuai nogi koneyu, me augwaligo
 nago bomo me koneyu, me augwali
 nage dologode me elalugi menio.
- 11 O Genuai Bidi, nago nogo polo balalubao,
 te dwai we bidi dene mawainogo.
 Tiali goli, augwaligo subeo.
 Genuai Bidi, te nago naga we bidi godolo mu elama,
 tau sabo kolesaga te augwaligo sumainao.
 Tama te dwai bidi dabe augwali hale dwai mu yaibao.
 Tama nago naga boi bidi dabe ulabo isi,
 te isigo augwali mu ula silaganio.^t
- 12 Genuai Bidi, nago da tomode
 wiegi yai homu nagamea pai ebo
 sogo pedalomainu ilibo dao.
 Nago dago tigidali şe dabe dodolama,
 tama wiegi yai pedalumainu ilibo dao.
- 13 O Genuai Bidi, dago God,
 te gasa genuai bidi dabego da tonalubadi goli,
 dago nage deliba naga genuai nogi mabo dao.
- 14 Megi da, te genuai bidi dabe polo isila palio.
 Augwali me bidibeo,
 tama augwali ma hodalobo usu me egobeo.
 Nago augwaligo bomo aiyaba elaluama,
 tama nago augwali dolama,
 tama nago augwali mu dolai dao.
 Tama te we bidi dabego
 augwaligo nogi me kone ebeo.
- 15 Genuai Bidi, nago dago hani genina mu ilalio.
 Awe, nago we bidi hani moni hani mu pedelalio.
 Tama dago bulu genuai mu pedalumainu eyu,
 nago dago t̄o d̄aḡ ibanu mu kidilalio.
 Tama te tialigo naga genuai nogi
 genuai mu pedalumainogo yalio.
 Awe, dago bulu genuai mu pedalomainu ilalio.
- 16 Genuai Bidi, nago naga we bidi
 dodolomainogo eyu, dene mu mani,
 tama augwaligo bomo mu sia salio.

^t 26:11 Hib 10:27

Tiali goli, augwali moni homu dene dali
 nage pageba aselama,
 nageba gedu haluasa po walio.

17-18 Te nago gedude da

te wego wai ame nainu dene ebo
 tiwai elama, bidai dao.

Da te genuai dene dali, seęę dali tolama,
 dago homugo tiali,

dago wiegi yai nai dago me sugowe homu yali.

Tiali goli, te menio.

Dago magi nai me haninibeo.

Dago te boi bidi dabe aiyaba elalubo
 bomu mu meni sai dao.

Tama dago tõe bugagia bidabo meni yai dao.

19 Tiali goli, naga te hani polo isila pali,

tama augwali megi hulua sai madi bidibao.

Te augwali ma hodaloama, te ula ma sueibao.

Nago te isai bidi dabe bidibo ula ma mabo dao,

te hulide tulubage segeni elama,

te tõe wa pai madi te gesi noma

nosai hogonu ma holomainu ebo tiwai ebo dao.

Dage te gų pagede pila mubo bage, dage hodaloama,

dage wiegi yai homu elama, po hae waiąo.

**Genuai Bidi aga we bidibolo dene menama, tama
 augwali bugagia ma bidimainu ilali**

20 Eno we bidi dabe, dage duga be

tomoba dabe pelama,

duga be sunumi dabe palia siąo.

Dage pęwądage sogo dualaluama,

tama Genuai Bidigo sebę silibo side tagalao.

21 Suao, Genuai Bidi aga bulu dagalu

tagalama, e tõe te asobao,

te e tõe we bidi dene mawainu,

tama augwa yali dwai se wei ponainu.

Tama tõe te bidi dabego kaneme me geme dualogobeo,

te gasa bidi dabego augwali

ela wialali dabe. Menio.

Agai te bidi dabego yali dwai kolesaga

dabe sese tama haninaibao.

27

¹ Te sogo te Genuai Bidigo agai genuai bomu olamayu, te Leviatan, te tamu węde bulu hwą bidigula mane elaibao. Genuai

Bidi agai aga poa pai genuaiboma pai ge hwa selama, tama te bulu hwa
 bidi gula, tegagela bilibo gula mane toga şawaibao. 2-3 Tama te sogo
 Genuai Bidigo balia po me e tama waibao,^u

- “Te wiegi yai wain gi balia po wao. Ena Genuai Bidi,
 eno te gi bugagia tonalubo dao.
 Tama tigidali sogo eno aga we mabo dao.
 Eno aga te giligade me hulide bugagia tonalubo dao.
 Tiyu, te bidi dabego dolagasidali weyu.
 4 Megi da, eno te wain gi hagede wado po me wabeo.
 Ma, eno te gide te sesane yai nosai
 me gasa dwai nosai dabe tede holobaso da,
 teda eno augwali doliyu yaibao.
 Teda eno isi tulama, augwali sese ula silaibao.
 5 Tiali goli, te boi bidi dabe
 augwaligo homugo augwali enaba
 aselama, augwali eno tonalumainu
 homu eyu da, teda augwaligo
 ena dali bugagia bidainu po deli
 da olama, asomainao.
 Awe, augwaligo te boi pimainao
 homu eyu, po deli da olama,
 ena dali bidagasomainao,” wali.

- 6 Te me sogo nosali, te Israel dabe
 te Jekopgo wa auwa bidi dabe,
 augwali te ni wain pedali tba pelama,
 dudili hauwa walama,
 du hauwa walama, dili elama,
 dolalubo tiwai yaibao.
 Tama augwaligo nologode da,
 Genuai Bidigo augwalibolo wiegi yai sogo me tde
 we bidibolo mawaibao.
 7 Genuai Bidigo te Israel dabebolo
 dene me mawai menio,
 te agai augwaligo boi bidi dabebolo
 mabo dene tiwai me mabeo.
 Tama me agai te gasa hani we bidi
 elama, isilali tiwai aga we bidi
 hauwa me elama, isilibeo. Menio.

^u 27:2-3 Jop 41:1; Tib 74:14; 104:26

8 Genuai Bidigo aga we bidi agai
 augwali kalabusiba tagala palali sogo,
 augwali dene mawai dao.

Agai te bomai wali te giliga asobo badu
 asiyu, te haniani nai dabe
 selasa pabo tiwai yali gilama,
 agai aga we bidi aga bomai waligo
 augwali sela şayagasai dao.

9 Tiali goli, tebogo agai te Israel dabe
 augwa digi yali te seęę mu tama sia şawainu da.
 Teda augwaligo te tibo godigo alta dabe
 sese toga şayao.

Tama te alta masigi dabe te olo hogomu gagalao.
 Tama me, augwaligo te tibo god
 we Asera piksa elalubo ni pos
 gelama tagaliyu, me augwali
 te dwagi yai hano denami ebo pauda
 ulubo alta doliyu emainao.

10 Te hanu da, polobadu bomai obo elalui dao.
 Tama megi da, sese mu tama dolama, elalubao.
 Megi da, olo kala sili bulu te we bidi
 te bulude me bidisawai bulu aę ebao.
 Te bulude we bidi me bidibeo.
 Tama te kau kibu dabe naga te buluba sisinagaselama,
 tama me te dwasianu ni yabe dabe
 tuyu, tede bidibao.

Tama augwali tede toma tuyu bidibao.

11 Tama te ni nologo dabe sasia
 pabo si da, te ni nologo dabe
 mobia pelama, tęba tulalubo si da,
 te we dabe sibigo isi nogainu gigila sagasobo dao.
 Te tobage dwai sogo pedalali. Magi baso meni.
 Te hanu we bidi augwali bidi po sela şabo we bidi mu.
 Tama tibaso, God, te aga te God augwali
 deli we bidi hani pedalomainu
 ilai goli, agai augwali godolo elama,
 augwali me hobede me yai menio.

12 Tama te sogo Genuai Bidigo aga we bidi gasabulude dabe bidibo
 we bidi ma oda saibao. Te weYufretisdu gagalama, te Isip buluba usu
 nigi paibao. Agai augwali deli deli saibao, te bidigo aga wit dili dali bo
 dalisela şanama, te du naga elalubo tiwai yaibao. Tama tewiegi yai wit
 du selama, te tęgo nigai senede mubo tiwaiyaibao. 13 Tama te sogo te bu

wabo nai biugel bu genuaimu waibao. Teda te Israel dabe i weyu, te boi bidi dabegoaugwali te bulu Asiriaba sela şayyu, me te bulu Isipba selasayyu yali bage dabe. Tama augwali Jerusalem buluba maaselama, tama augwaligo Godiba ma lotu po waibao, teaga tedali gasagi yai bulu dude.

Genuai Bidigo te Jerusalem we bidi augwaligo kolesaga dodolaibao wali

(Dqı 28-35)

Genuai Bidigo te sawi yai taun Samaria dolaibao

- 28** ¹Hobede mu dao, te Israel bagego sawi yai taun nage.^ı
 Nage mu dolaibao.
 Te naga genuai bidi dabego wain wę hauwa mu tulama, poliyu, tama nago nogi ugwaba mu sabo dao.
 Augwaligo te po wabo dao,
 nage te bomai hanu mu dao, po wabo dao.
 Nage te nai bula tuabo tı wiegi yai bulu dude te bidibao.
 Tama nage te naga genuai bidi dabego tobolude mubo plaua kula wai bono elalubo aq te elalubao.
 Tiali goli, nage pađe tama te plaua bono sasia pelama, dolobo tiwai nage dolaibao.
- ² Mu tamao. Genuai Bidigo te bomai hani me deli polo nage elalumainu sa muanio.
 Te hani te bomai wali tiwai asaibao, tama me te tulubage te talua ge tulubage tulubo tiwai yaibao, tama augwaligo nage togolama, tıba tula palaibao.
- ³ Tama te hanigo nage agalama, nage daidu augwali bilaibao, nage te genuai bidi dabe poliyu, nago nogi ugwaba sabo hanu dao.
- ⁴ Nage te nai wai bulabo tıde te dwasianu bulu du elalubo madi nage te bidibao.
 Tama nage sawi yai plaua bono tiwai elalubo aq te ebao.
 Tiali goli, nage te plaua bono mobia

^ı **28:1** Te vesde, Aisaiago te taun Samaria po olama wali, te kantri Israelgo genuai hanu taun te not badu elalualio.

pelama, dobo tiwai yaibao.

Tama nage deli sogo tama silaibao,
te ni fik du me deli hasia tau ebo
tiwai, tama bidi me deligo sulama,
polo sela tubo tiwai yaibao.

5 Te sogo te Godigo we bidi hani
dwasianu naga bidiyu da,
teda augwaligo Tigidali Bomo Elalubo Genuai
Bidiba wiegi yai homu yaibao.

Genuai Bidi aga digi aga wiegi yai
tuni bidigo madi tobolude bulai,
me te wiegi yai plaua bono
augwaligo tobolude mubo tiwai bidaibao.

6 Genuai Bidigo te po tų odobo
bidi dabebolo wiegi yai kolesaga
menama, tama augwaligo
po tų bugagia osola sueibao.

Tama agai te hanude ami bidi dabe bomo mawaibao.
Tama augwaligo te boi bidi dabe
te hanu tomoba we bidi dabe dali
hwıagasomainu sula tagalogobeo.

Te pris dabe dali, profet dabe dali sigo Aisaia posobo po wali

7 Te profet dabe, me pris dabe,
augwaligo te wain wę me bia wę hauwa tulama,
polobo homu yabo homu elama, dodolama,
wa bilabo homu eyu, dodola bilabo homu ebo dao.

Augwaligo homu kolesaga menia pabo dao.
Tama augwaligo augwa sę bugagia ebo menio.

Tama me, te pris bidi dabe augwaligo
te we bidi dabego sęę bugagia dodolobo menio.

8 Augwa bogu te augwa bugulama,
wę tubo tebol saide pesage holobo dao.
Tama dwasianu wiegi yai me elalubo menio.

9 Te augwaligo eno po odobo si da,
augwaligo e tama po wabo dao,
“Te bidigo homugo de mu agai skul
ola mawainu homu eyu ebowe?
Agai pogo de mu ola mawainu ebowe?
Da dwasianu wai bų dabe meni.

Tamadi tama, da ame tubo tagalama bidibe.

10 Tigidali sogo agai dedeli po naga wabo,

te bidigo wai bqu dabe te leta dabe
 dolo nogi eyu emainu,
 me po dage deli me hani deli deli dolo nogimainu
 ola mabo aq ebo,”
 augwaligo te tobage po enade wabo dao.

11 Te we bidi dabe augwaligo

eno po odobo hagela mu ebo.

Tama tibaso, Genuai Bidigo augwalibolo

te gasa po wabo bagego

pedauwalidu augwali po ola momainu,

te gasa bidi dabebolo te agai po ola mawaibao.

12 Aga digi aga we bidi te tq badu

tagalai dao.”

Tama agai augwalibolo te po wai dao,

“Te bulude dage toma tuyu, bugagia dua bidiagianio.

Tama te bidi dabe, augwaligo tigi

boma pelama, augwaligo tigi hagela

pobaso da, augwali hodo doliyu,

te bulude dua bidageameo,” wai dao.

Tiali goli, augwaligo agai po odobo hagela mu yali.

13 Tama tibaso, Genuai Bidi aga digi

augwali deli deli leta dabe dolo

nogi ebo, me deli deli po nogi ebo, me deli deli lain

nogi ebo me,

te tiwai Genuai Bidi aga digi augwali ola mawaibao.

Te dwasianu wai dabe ola mabo tiwai aga digi yaibao.

Tama augwali homu kone tua pelama, dene mu saibao.

Tama te boi bidi dabego augwali nogo bono dunama,

augwali kalabus elama, odasa paibao.

Godigo te dwagi yai boma pai masigi te bulu Saionde muaibao

14 Dage e Jerusalemde we bidi tonalubo we bidi,

dagego Genuai Bidigo po odiao.

Dagego homugo Genuai Bidigo po

olo nai dao homu ebo.

15 Tama dagego e tama po wabo dao,

“Dago te isibo kolesaga dali dago polo po daq ola selama,

tama dago te gu page dali dago

po polo daq ola sai dao.

Tama tibaso, augwali sigo da me dologobeo.

Te dwai se da dolo pedalubadi me tagala,
teda da geda muaibao.

Magi baso meni. Dago te ili po olama,
te hasegelu hasegelu ebogo
da tau siyu, tama da bugagia bidaibao,”
dagego te po wabo dao.

16 Tiali goli, God, Genuai Bidigo te po wali,
“Odao. Eno te be page daŋ walabo
masigi dila pai deli me polo daŋ ilai dao.

Te aga te dwagi yai boma pai mu dao.
Tama eno te masigi te bulu du Saionde muaibao.^x
Te bidi dabego agaba homu daŋ wabo bidi dabe da,
teda augwali wi elama, didibili me egobeo.^y

17 Te ena te doloba pai skel
te dagego kolesaga skel ebo te skel tiwai bidaibao.

Tama te doloba pai kolesaga naga
te eno usu ni tiwai elaluyu,
tama tego eno dage usu saibao.

Dagego homugo te tibao, te dagego dwai kolesaga ebo
te kolesagago dage tau saibao homu te ebao.

Tiali goli, eno te dwai sogo dageba
pedalomainu yaibao.

Tama dage te bidi dabe te genuai
talua ge tulubage asiyu,
ela silibo te tiwai yaibao.

Tama dage pelama, duala sigi pabo
pesage mu menia saibao.

18 Tama eno dagego te isibo kolesaga dali,
me te isibo bidi dabego bulu dali,
dagego daŋ olama yali po eno
tomode togolama, mu silaibao.

Tama te dwai kolesaga mu dagede
pedalama, tama dage mu isila paibao.

19 Te dwai kolesaga dabego dage
munu me taga pogobeo. Menio.

Te augwali geninama mu dageba tigidali sogo hulide
me ulade dageba me pedalidu geaibao,” wali.

Ma, dagego Godigo te wiegi yai po page

^x 28:16 Bidi mebago homu te e nosali wabo po te tiwai po wabo da, “Tama te masigi nogi te tiwai wali, ‘Te konealubo po mu daŋ wabo bidi dabe da, augwali da te wi elama, midigi me egobeo,” te po wai dao. ^y 28:16 Tib 118:22-23; Rom 9:33; 10:11; 1 Pi 2:6

- dagego bugagia mu koneyu da,
dage noma selama, wi mu yaibao.
- 20 Dage te dwai dene mu saibao.
Te bidi pibode te dene dene hauwa ebo
tiwai dagego tigide yaibao. Magi baso meni.
Te pibo sai te pęwådage mu elama,
agai saęa olo pobialuali.
Me, te banua pibo blanket te dwasianu mu elama,
agai banua pibo usu sisąbaso,
o agai tigi sese usu isąbaso.
- 21 Genuai Bidi aga bomo dali
hogodasa asaibao, te agai polobadu
te bulu du Perasimde,
me te Gibeongo odogo malu bulude yali tiwai yaibao.
Tama agai yainu yali sę agai yaibao.
Tiali goli, dagego te sę ebo sulama,
tama dagego te gasagi yai mu da, te homu yaibao.^z
- 22 Tama tiali, dagego te Genuai Bidigo
po dolobo kolesaga tagaliąo.
Ma, meniyu da, dagego sęę dabe
genuai mu pedalaibao. Magi baso meni.
Eno odali, God Tigidali Bomo Elalubo Bidigo te bomai
po tama wabo suali.
Agai e bulu tigidali pesage mu dola silaibao.

Bidi dabego wiegi yai kolesaga dabe Godigo naga manio

- 23 Dagego olo saganama, eno po bugagia odiąo.
- 24 Te bidi mego te nai wai bulainu agai
te tų elebo sę naga ebo yali bogo,
- 25 tama agai te nai wai dabe bulubo meniwe? Meni ma.
Agai tų elama, silibo si, agai te ono ge tede bulubo dao.
Agai te dola pai lainde agai te nai wit wai dabe bulama,
tama me du dage badu agai
te nai bali wai tede bulubo dao.
Tama agai gasagi yai wit me agai te gi
homu badu me bubula bilibo dao.
- 26 Godigo digi aga te nai wai bulama,
sela tubo kolesaga ola mani dao.
- 27 Te ono ge dabe dwasianu sabo usu yai de da,
te bidigo agai te ni name selama,

^z 28:21 Jos 10:10-12; 2 Sml 5:20; 1 Sto 14:11

tama te nai ono agabo menio.
 Tama agai te wit ge dabe sainu,
 te wilkar dabe me te nai wit ge sainu,
 ugwadu kegebo yaligila ebo menio. Mu meni.
 Agai te dwasianu wabi dage dabe naga selama,
 tama te ono dabe elebo dao,
 te augwaligo dwasianu ge dabe sainu.
 28 Agai te nai wit ge dabe sabo
 kolesaga agai mu koneani, te agai te nai dwasianu
 ge dabego bret nigabo.
 Te agai te hos dali, me te wilkar si agai
 te nai wit aga dilide sela sawainu da,
 teda agai te hos kibu dali,
 te wilkar sigo te wit dolama,
 mia saidali weyu agai bugagia tonalubo dao.
 29 Te tigidali se ebo kolesaga Godidu naga asalio.
 Tigidali Bomo Elalubo Genuai Bidi
 agaduba deli naga tigidali haniani wiegi yai
 kolesaga dali, homu kolesaga mu paşana pai dao.

Genuai Bidi Jerusalemba wali dali, me tş mali, me isi dali asaibao

29 ¹ Genuai Bidigo e tama po wali.
 “Jerusalem, megi da, nage eno
 alta tiwai bidibao.

Tiali goli, nage dolaibao.
 Nage te genuai hanu polobadu tuni bidi
 Devit bidali madi, nage dolaibao.
 Kibu be deli o si bolo pomainu yao,
 te tigidali lotu po wabo genuai sogo me.

² Tiali goli, ena Genuai Bidi,
 eno te seş nageba sela asaibao.
 Nage eno alta tiwai bidali.
 Tiali goli, nage gela olama, hwş dwai mu waibao.
 Tama kaneme nagede paşana paibao,
 te bidi dabego te alta saide te hasa dabe elama,
 te kaneme alta saide paşabo tiwai yaibao.^a

^a 29:2 Te ves 1 me 2de, Hibru pogo te Jerusalem nogi Ariel wai. Te kolesaga konea pai bidi dabego te nogi page bugagiakonesiawai. Me badugo te tiwai homu ebao, “Godigo Laion da,” wali. Te me badugo homu te tiwai ebao, “Godigo buludu da” wai. Tiali goli, me badu hauwago te homu yali, “Godigo alta da,” wali, tama te ves side wali pogo te e wabo homukolesaga wali paiba homu ebao.

- 3 Eno boi bidi dabe odasa aselama,
 nage bagua sagasomainu yaibao.
 Tama augwaligo pu diganama, nago obo pađe munama,
 te t̄o unana pelama, te pağawai,
 te daide doligiluama,
 tama augwali nage dali hwiabo yali gilama.
- 4 Tama nage mu tama tulaluama,
 tama t̄ogo nage mu mesega saibao.
 Tama nago po dabe te isi bidigo po
 te t̄o dologode dua dua wabo tiwai t̄odu pedalaibao.
- 5 Tiali goli, te gasa bidi dabe nageba
 hwiagasobo bage da, augwali te t̄o hogomu tiwai
 hauwa mu yaibao.
 Tama augwali sese polo tama gasaba
 paibao, te bidigo te wit haluama,
 agai nai sainu ebode te yabe dabe hauwa
 bola bilibo tiwai yaibao,” wali.
 Tiali goli, deli sogo tama,
- 6 Tigidali Bomo Elalubo Genuai Bidi te bomai wali dali,
 t̄o mali dali asaibao.
 Tama te be kulu weyu, te genuai
 kulukulu dwai mu waibao.
 Tama agai te tigidali nai dabe ulabo isi
 dwai dali sesaibao.
- 7 Tama te gasa genuai bulu dabe
 te Jerusalemba hwiagasainu asali da,
 te Godigo altaba, teda augwali munu me bidigobeo.
 Tama augwaligo te hanu sainu yali s̄e
 olo dali hagawaibao.
 Te s̄e dabe sese sia saibao,
 te Jerusalengo nade suali tiwai yaibao.
- 8 Tama te tigidali bulu ami bidi dabe,
 te bulu du Saionba hwiagasali bidi dabe,
 augwaligo magi nai me sogobeo. Mu menio.
 Te bidi pila muyu, nade nasi ebaso,
 nai tubo tiwai yaibao.
 Tama ma hodalobode da, nasi me elaluaibao.
 Te nai tabi egobeo. Te tiwai yaibao.
 Tama me bidi agai w̄e nogonego mu isai,
 tama nade te w̄e ma tuali,
 tiali goli, aga ma hodalobode te w̄e
 nogone me elaluaibao.

Te tibo tiwai yaibao.

Godigo we bidi wabo polomainu homu begelali

⁹ Te Juda we bidi, me Jerusalem

we bidi, dage te gedu hwidai we bidi yali gilama,
me tama subigila paliyu, me tama bidiageo.

Dage te bidi dabego wain wę tuyu, me bia wę tulama,
subigila bilibo tiwai me tama bidiageo.

Tiali goli, dage te wain me bia tulama, polobeo. Menio.

¹⁰ Genuai Bidigo dagego gedu şęę ilali.

Tama dage te bidi godege mu pilama, isai tiwai bidali.

Tama Genuai Bidigo te profet bidi dabego

augwaligo suabo nai dabe goli

augwaligo susiaşmainu yaibao.^b

¹¹ Tama tibaso, Jerusalem, nago te Genuai Bidigonage ola mawainu ebo şę dabe page nago munu mekonogobeo. Te da, te buku augwaligo bomonama haluaibuku nage nedao olama, mawai buku tiwai dao.

Tamanagebolo nedao po wali. Ma, nago te buku te nedebobidibolo menama, te bukude elalubo po nedao obaso da, teda agai te po waibao,

“Eno usu ebeo. Buku me daşolalubo.” ¹² Tama ma, nago te buku nedisaşwai bidibolo nago te bukude elalubo po dabe nedao obaso da, teda agai te po waibao, “Eno te buku nedebo konebeo.”

¹³ Genuai Bidigo te po wali,

“Te we bidi hani dabe augwaligo

eno nogi augwaligo pedauwalidu

naga ugwaba sabo dao.

Tiali goli, augwaligo homu dali,

homu kolesaga si enade digibulu mu elalubao.

Augwaligo enaba mu lotu po wabo menio.

Augwaligo te bidigo digi muai bomai po,

te po naga augwali ola mani po,

augwaligo te po naga wali pabo dao.^c

¹⁴ Tama tibaso, eno gasa şę dabe mu

te we bidiba pedalumainu yaibao.

Tama augwali mu noma mu saibao.

Eno te bidi dabego augwalibolo

wiegi yai kolesaga mabo bidi dabego

homu kolesaga sela şawaibao.

^b 29:10 Rom 11:8 ^c 29:13 Mat 15:8-9; Mak 7:6-7

Tama eno augwaligo kolesaga sai
bagego kolesaga eno mu silaibao,” wali.^d

Genuai Bidigo tigidali haniani nai dabe hasegelaibao

- 15 Te we bidi dabego augwa
dwai kolesaga dabe Genuai Bidigo
gedude dualainu usu sabo dao.
Te augwali da, mu dolaibao.
Augwaligo te kolesaga dabe augwaligo sesawai madi,
me hulua sai pesagede augwaligo
te kolesaga dabe ebo dao.
Tama augwaligo te po wabo dao,
“Dego mu da sulama, dego mu koneaibawe?”
- 16 Augwaligo te tigidali nai dabe hasegelama,
tigidali nai dabe dolobo dao.
Te augwaligo wali po tiwai tama,
“Te t̄ sene nigibo bidi te sene nigibo t̄ tiwai dao.”
Mena tama tialiwe?
Te olo nai mego te aga nigali bidibolo
te tama po waibawe,
“Nago ena nigai menia?”
Ma, te t̄ senego te aga nigali bidibolo
te tama po waibawe,
“Nago mage nai me konebeo,” te po waibawe?^e
- 17 Te p̄w̄adage sogo tigidali nai dabe hasegelaibao.
Te Lebanonde moni busi te gi yabo t̄
wiegi yai pedalaibao.
Tama wiegi yai gi dabe te moni busi mu gagawaibao.
- 18 Tama te sogo da, te olo degai dabego
te bidigo te bukude nedebo po augwaligo odaibao.
Tama te gedu hwidai dabe megı augwali
moni hulua sai madi bidibo,
te bidi dabe augwaligo ma gedu peda paibao, tama
nai dabe ma suaibao.
- 19 Tama te we bidi augwa digı augwa
aiyaba elalubo we bidi dabe
augwali te Genuai Bidiba wiegi yai homu yaibao.
Tama te nai habuge yai we bidi dabe
augwali me te Israel Dabego
te Dwagi Yai Doloba Pai Kolesaga Naga Ebo Godiba

^d 29:14 1 Ko 1:19 ^e 29:16 Ais 45:9

wiegi yai homu yaibao.

20 Tiali goli, te gasa bidi dali

homu dene isaþo dwai bidi dabe,

me te Godigo po olo nai dao homu ebo bidi dabe,

me te dwai kolesaga hauwa yabo homu ebo

bidi dabe, augwali sese dolama, hagala silaibao.

21 Tama te deli tobage dene me te ili po olama,

gasa bidi dabe po tų ela mabo

bidi dabe me, dene saibao.

Te gasa bidi dabe olo dali po tų ela mabo

bidi dabe tiaibao.

Te dwai seęę elalubo bidi dabe tau sela menama,

te seęę meni yai bidi dabego po dolobo bidi dabe,

te dedeli dene naga saibao.

Te augwaligo po tų dolama,

tama doloba pai bidi dabego te po tų dolama,

tama doloba pai bidi dabego

te po tų ugwa ela hologobeo.

22 Tama tibaso, te Genuai Bidi te polobadu Abraham te dwai sogo ma
oda sali, te Godigo te tama po walio, te Israel we bidi dagebolo,

“Dage Jekopgo we bidi wai hani, dage hale me elama,

tama dage gesabidi huli me egobeo.

23 Te dagego eno seę dabe dagego

tomode te seę ebo subo si da,

teda dagego ena mu koneaibao.

Ena te Dwagi Yai Doloba Pai Seę Ebo

God dao homu koneaibao.

Tama dagego eno nogi ugwaba selama,

tama dage wi eyu, ena dologode naga bidaibao.

24 Tama te bidi dabe homu kolesaga

megi umuna pabo bidi dabe,

augwali te wiegi yai homu kolesaga ma saibao.

Tama te konila po dabe hauwa olama,

tama po sela saþo bidi dabe,

augwali te wiegi yai homu elama,

eno po ola mabo odaibao,” te po wali.

Genuai Bidigo te po wali, te Isip dabego te

Juda dabe tau sabo me usugobeo

30 ¹Genuai Bidigo te po wali, “Te Juda hani, te
da augwali

eno wai bõu hani dabe, augwali dolaibao.

Magi baso meni.

Augwali bidi po odisiqwai hani mu dao.

Augwaligo eno homu kolesaga wali me pabeo. Menio.

Augwaligo augwa homu kolesaga wali naga peyu,
augwaligo gasa bulu bidi dabe dali abagi

me olama, bidibao.

Tama tiyu, augwaligo dwai sege hauwa

augwa hasi tigide pesage holalio.

² Augwaligo eno homu kolesaga hanalusaiama,

tama augwaligo Isip tuni bidi dali po wali pali dao.

Te Isip dabe dolaluama, augwali tau selama,

tama augwali me dolidali weyu.

³ Tiali goli, augwaligo homu kolesaga

geda munama, tama augwali geda

mubode augwali hale mu yaibao.

Te Isip tuni bidigo augwali te dolainu

ebo me togologobeo.

⁴ Te mu tama. Te Isip tuni bidigo aga

po sabilibo bidi dabe,

me aga ofisa bidi dabe aselama,

tama Juda hani deliba sisinagasali.

Te hanu Soanba, me hanu Hanesba sisinagaselama,

tama te teba asali Juda dabe dali po wagasalio.

⁵ Tiali goli, Juda dabego augwa hobede mu yaibao.

Magi baso meni. Te Isip dabego

magi se me elama, augwali tau me sogobeo.

Mu menio. Augwaligo moni hale mu

te Juda dabeba sesaibao,”

Genuai Bidigo te po wali.

⁶ Genuai Bidigo te po te bulu hasa dabe te nai meni yai kemi sane bulu,
te saut badu bulu nogi Negeb, tebolo te po wali. Genuai Bidigo te tama po wali,

“Te Juda dabego genuai bidi dabe

te olo kemi sane yai saut badu bulu badu bilali.

Te da te dwai pesage badu mu,

te bidi dabe te genuai sege sabo pesage mu.

Te pesagede te laion dabe, me bidi

gaq kelebo dwai gula mane,

me bola bilibo gula mane,

me gasa bulu hasa dabe me, te bulu badu bidibo.

Tiali goli, te genuai bidi dabego
 te wiegi yai homua pai nai dabe
 te augwa kibu kamel daide munama,
 me donki kibu daide munama,
 tama bomai şe mu elama,
 te wiegi yai nai te gasa bulu
 te augwali tau sabo usu isayabo
 buluba sela pali dao.

- 7 Te Isip dabego te gasa bulu bidi dabe
 ili ili po olama, tau saibao po wabo dao.
 Tiali goli, agai te şe ebo menio.
 Tama tibaso, te Isip te gesi nogi te nogi ebao,
 "Te Olo Dulalubo Gula Mane dao,' wabo," te po wai.

Te we bidigo Godigo po odobo hagela yali

- 8 Genuai Bidigo enabolo te we bidigo
 ebo kolesaga po te bukude aşao wali, me te po me
 te masigi togalama, aşao wali.
 Te da te po te tigidali sogo mu elaluama,
 tama te we bidigo sulama,
 tama augwali te po sela şabo we bidi yabo omainu.
- 9 Magi baso meni. Augwali te bidi po
 mu sela şabo we bidi mu dao.
 Tigidali sogo augwaligo Genuai Bidigo
 po sela şabo dao, te augwa Aya.
 Te tigidali sogo augwaligo ili po olama,
 tama augwaligo agai po oda mabo
 po odobo hagela ebo dao.
- 10 Tama augwaligo Genuai Bidigo po
 ola mabo profet bidi dabe dali e tama po wabo dao,
 "Dage pedauwali pania şiao.
 Dagego dabolo wiegi yai
 doloba pai kolesaga wali pomainu da ola magimio.
 Te dago odainu ebo po naga pusa mao.
 Teda te dwai nai dabe munu me pedalogobeo.
- 11 Dage digibulu mu bidiyu,
 tama dago sunumi paligimio.
 Dago te Israel dabego Godigo po odobo da hagela ebao.
 Aga te Wiegi Yai Doloba Pai Kolesaga
 Naga Ebo God dao," wali.

- 12 Tama tibaso, Israel dabego God

- te Wiegi Yai Doloba Pai Kolesaga Naga Ebo God,
 agai e tama po wali,
 “Dagego eno dua dao wali po
 sela şanama, tudi ola manio.
 Tama dagego te ili po olama,
 te dolobo kolesaga dage tau saiba homu ebo
 te mu dagego daş waliio.
- 13 Tama tibaso, dagego dwai kolesaga polo yalio.
 Tama te dwai kolesagago dage mu tama dolaibao.
 Te da te dwasianu dedage te obo ugwadu
 tobolude elaluamo,
 te genuai elasa pabo tiwai dao.
 Tama deli sogo tama,
 te obo togwa pelama, degasa pali.
- 14 Mu tama, dage te tş sene te alua pelama,
 tama olo genuai me elalusişma ebo tiwai yaibao.
 Te isi dage tomode muabo, o te wş
 te tuabo tiwai genuai olo me elalugobeo,” wali.
- 15 God, Israel dabego Genuai Bidi, aga
 te Wiegi Yai Boma Pai Kolesaga Naga Ebo God dao.
 Agai e tama po wali,
 “Dage bugagia bidabo sunumi da, e tama dao.
 Dage enaba ma aselama,
 tama dage bugagia homu nagame elama, bidişo.
 Tama dagego ena deli naga wali asişo.
 Tama eno deli naga dage tau saibao.
 Tama eno dage ma aselama,
 tama dage bugagia tigidali sogo
 bomo elama, bidaibao.”
 Godigo te tama po wali.
 Tiali goli, dagego agai te po wali pabo hagela mu yali.
- 16 Tama dagego te po wali, “Tagalama,
 dago bomonama udabo kibu hos bidibao.
 Tama da te kibu hosde dualama,
 tama da wi paibao,” wali.
 Te dagego te boi bidi dabede wi paibao
 wabo po da, teda mu tama dao.
 Tiali goli, tagala, dagego kibu hos
 bomonama udabo da, tagalao.
 Te boi bidi dabego hos kibu bomonama
 mu dagego kibu hos nosali wali pobeasa asaibao.

- 17 Te dagego 1,000 ami bidi dabe
 augwali boi bidi me deli aselama,
 hwjaibao po wagasobo si da,
 teda augwali wi mu elama, augwali wi paibao.
 Tama ma, te boi bidi dabego ami bidi
 a naga aselama, hwjaibao hae
 wagasobo si da, teda dage hani tigidali wi ogodama,
 wi peyu, te hanu taga paibao.
 Tama te bidi me deli me bidigobeo.
 Tama te hanu te bidi dabego bulu dude
 plak ugwa walobo ni te bulu dude
 tula ma elalubo tiwai yali gilama
 tama agaduba elaluaibao.
- 18 Tiali goli, Genuai Bidi da,
 tigidali sogo doloba pai kolesaga naga ebo God dao.
 Tama tibaso, agai dage homu dene elama,
 agai hobede ebo dage ola mawainu te tonalubao.
 Te we bidi dabego Genuai Bidiba
 homu kolesaga daŋ olama,
 tama agai augwali tau somainao olama,
 tonaluali we bidi dabe da,
 augwali wiegi yai homu pemene mu yaibao.

God aga we bidi dali wiegi yai şe mu yaibao

19 Te Jerusalemde megi bidalubo we bidi, tega, dage hobede elama, gela me wagobeo. Megi te Genuai Bidigo dage hobede elama, dage tau sabo deli naga no munalubao. Te dagego aga i olama, gedu haluasa po wabo si da, polo tama agai dagego i wabo odama, dage olo mu tau saibao. 20 Te mu tama, Genuai Bidigo dage moni şeŋe somainogo yaibao. Tama dage te bidi nai me we meniama, habuge yai bidi tiwai bidaibao. Tiali goli, aga digi dage dali bidama, tama dage bugagia elama waibao. Tama dagego aga munu me gegegobeo. Menio. Dagego aga duga gedugo ma sueibao. 21 Tama dage peyu, te mena sunumide geda muainu ebaso da, te dolo nogo badu sunumi badu, o pobase nogo badu sunumi badu me, teda agai dage tudi badu bidama, tama mena sunumidu painu yali, agai dage ola mawaibao. 22 Tama da, dagego duga tibo godigo piksa dabe saibao. Te da te bidi dabego nigilama, silva dali, gol dali sigo haluai piksa. Tama dagego te piksa dabe te dwai damua pai nai tonobo tiwai tonama, e tama po waibao, "Gedao. Dago nage subo hagela ebo."

23 Tama Godigo tulubage te dagego bulali nai wai dabeba mawaibao. Tama te wego dagego nai wai dabe bugagia mu holaibao. Tama dagego nai dabe hauwa mu elaluaibao. Tama te sogo dagego kau kibu dabego

tuabo nosai dabe hauwa me elaluaibao. ²⁴Tama me, dage duga gide nai selama, tama duga gi t̄ elebo kau kibu dabe, me donki kibu dabe bugagia mawaibao. ²⁵Te Genuai Bidigo te dwai sogo te dagego boi bidi dabeba pedalomainu ebode, teda augwali subigila isila paibao. Tama augwaligo bomai obo dabe sese dola silaibao. Tama te sogo te w̄ dabe bulu dudu dabe asiyu, tama dage w̄ me habuge me egobeo. ²⁶Te sogo te polua te giliga tiwai bomo elama, mu nanaibao. Tama te sogo te giligago ula te bomo yai mu nanama, tama megi tama ula ebo edelama, mu nanaibao, te tigidali sogo ula ebo edelaibao. Te a naga olama, me badu nogo si sogo nanebo giliga deliba sisinama, deli bubugade nanebo tiwai yaibao. Te s̄ dabe te Genuai Bidigo aga we bidibolo mani s̄ s̄ dabe, me dene dabe mani sela ş̄bo sogo, te s̄ dabe yaibao. Tama agai augwali usu ma ilaibao.

Godigo te Asiria dabebolo dene mawaibao

- ²⁷ Suama. Genuai Bidi digibulu
 hogodoma, aga bomo dali, ula dali te asobao.
 Agai wado elama, tama moni isi dali,
 hano si, te pedalobao, te agai s̄ s̄ ebo ola mayu,
 te agai po wabo si da.
 Te tigidali nai dabe ulubo isi agai keledu pedalobo.
- ²⁸ Agai mobogo tigidali nai dolobo dao,
 te w̄ asiyu, tigidali nai dabe
 mesegelama, bidigo dogoniba usu ni pabo tiwai dao.
 Genuai Bidigo te tigidali bulu t̄
 kantri dabe agai nogogo toulama,
 pepebo dao, te augwali dolomainu.
 Tama agai augwaligo homu kolesaga
 dolama, tama augwaligo pabo
 hagela ebo buluba odasa pabo dao,
 te bidigo hosgo kelede ain dage
 mubo tiwai dao, te hos kibu bugagia
 dolasa pomai ebo gilama.
- ²⁹ Tiali goli, Genuai Bidigo we bidi dagego da,
 te s̄ dabe ebo subo sogo da,
 teda dagego homu gana pabo balia te genuai lotu
 wabo sogo wabo tiwai waibao.
 Dagego te bidi dabe te Genuai Bidigo bulu duba holama,
 tama wiegi yai homu eyu,
 te genagego ona dabe elebo tiwai yaibao.
 Genuai Bidi da, te genuai bomai masigi tiwai dao.
 Tama aga te Israel dabego duala sabo pesage tiwai dao.

- 30 Genuai Bidigo bomonama mu hae olama,
tama agai bomonama i hae wabo
aga we bidi tigidaligo odama,
augwaligo agai şeşę ebo mobo
augwaligo tigde dolomainu yaibao.
Aga te moni bomai isi te tigidali nai dabe
dabo isi, me moni genuai tulubage,
me wali, me talua ge tulubage dali,
tama aga asaibao.
Tama te be kulu obaso, te tigidali
we bidigo agai şeşę ebo sueibao.
- 31 Genuai Bidigo daę wabogo
te Asiria dabe wi mu ilaibao.
Tama agai aga kelo toulama,
te Asiria dabe genina mu elaibao.
- 32 Tama te Genuai Bidigo
te Asiria dabe elebo sogo da,
te Genuai Bidigo we bidigo wiegi yai
homu gana pelama,
tama augwaligo haniani hıbidi me
gita dabe te Genuai Bidigo nogo toulama,
te Asiria dabe eliyu, poge wabo te wali pelama,
augwaligo te nai elaibao.
- 33 Augwaligo te Asiria tuni bidi
ulabo isi tę dedage polo dodolama, elalubo.
Augwaligo te tę dedage genuai mu elama,
tama ayanu mu dulai mu nigali,
tama augwaligo isi dabe hauwa mu polo sela muani.
Tama Genuai Bidi agai mobogo pona palebo si da,
te polo tama isi bogoli dala saibao.
Magi baso meni. Genuai Bidigo mobo
te posolai isi tiwai dao.

**Genuai Bidi agai bomo ola mani digi, tama te
bomai bulu tę kantri dabe tulaluali**

- 31** ¹Dage te Isip buluba pelama,
tama augwaligo dage
tau somainu hanalugi pabo bage,
hobede ya, dage dene saibao.
Dage te Isip dabego hwıbo hos kibu hauwa elaluyu,
me karis dabe me hauwa, me te ami bidi dabe hosde
dualama hwıbo ami bidi dabe hauwa elalubo

- sulama, tama dagego homugo Isip dabego dage
tau somaina homu ebao.
- Tiali goli, dagego Israel dabego
Genuai Bidiba tonalubeo.
- Aga te Wiegi Yai Doloba Pai Kolesaga
Naga Ebo God dao.
- Tama dagego agai tau sao po hanalubeo
- 2 Tiali goli, agai me wiegi yai homu kolesaga elalubao.
Tama agai dwai dene te dwai
we bidibolo me dene ilaibao.
- Tigidali sogo Genuai Bidigo aga wali po
wali naga pabo dao, hasegelegobeo.
- Agai te dwai bidi dabe dali,
me te bidi dabe te dwai kolesaga
ebo bidi dabe wali bilibo dabe dali, hwjaibao.
- 3 Tiali goli, te Isip dabe, augwali te god menio.
Augwali te olo bidi dabe dao.
Me augwaligo hos dabe me te hos mu naga dao,
te tigi mi dali, dili dali elalubao.
- Tama te Genuai Bidi agai bomo ola mabo si da,
teda te bomai bulu tulaluaibao,
tama me te agai tau sali da,
te bulu dabe me tulaluaibao.
- Tama si dali si tama, mu tama dolaibao.
- 4 Genuai Bidigo enabolo e tama po wali,
- “Te bulu yowi laiongo sipsip kibu me
elama, tudubadi da, teda aga wi elama,
tama te sipsip taga peyu, wi me pogobeo.
Te sipsip kibu tonalubo bidi hauwa
aselama, aga tonaluyu,
hae mobadi goli, aga wi me egobeo.
Menio. Agai augwali dali wado elama,
tama te sipsip kibu bugagia tonaluaibao.
Te tama tiali goli, ena Tigidali Bomo
Elalubo Genuai Bidi, te eno te bulu du Saionba
hwjagasaibao, te Jerusalem bulude.
Tama magi nai dabe mego ena togolobo usu me egobeo.
- 5 Te ba dabe augwali ugwadu
bola biliyu, augwa wai dabe bugagia tonalubo dao.
Te tama tiali goli, ena Tigidali Bomo
Elalubo Genuai Bidigo da, teda eno Jerusalem

bugagia tonaluaibao.

Te tigidali sogo ena augwali pagede bidiyu,
tama eno augwali ma oda selama,
tama eno aga bugagia tonaluaibao.”^f

Te po wali.

6 O dage Israel dabe, dagego

Genuai Bidigo po sela şabo dao.

Tiali goli, dage mu begelama,
tama agaba ma asişo.

7 Te Genuai Bidigo bodolu paşa yagasobo si da,
teda te sogo dagego te dwagi yai silva de gol sigo
nigali tibo god piksa dabe şawaibao.
Te nai dabe duga nogogo digi nigai dao.
Tama te kolesaga yaligo dage seşe sai dao.

8 Genuai Bidigo te po wali,

“Te hwıbo hwş bainat mego te bulu Asiria dolaibao.

Tama te Asiria dabe mu silaibao.

Te bainat hwş ena Genuai Bidi ena digi tagala palaibao,
te bidi dabe mego menio.

Te Asiria dabe te bainatde wi paibao,
tama te Asiria dabe gesi bidi dabe da
kalabus seşa yaibao.

9 Te Asiria dabede genuai wi mu pedalaibao.

Tama augwaligo bomai
genuai hanu tulaluaibao.

Tama te augwaligo ami ofisa dabego eno
hwıbo plak ugwa walai subaso,
augwali noma selama, augwaligo
dili nagamea pelama, tama augwali wi paibao.”

Te da te Godigo po dao.

Te agai bomai isi te bulu du Saion
te Jerusalem bulude elalubao.

Te wiegi yai tuni bidigo te bulu tonaluaibao

32 ¹Odao, te tuni bidi me deli pedalaibao.
Tama te tuni bidi dali, tigidali tş pedai

^f 31:5 Godigo te hanu taun Jerusalem tonaluali, aga taun da, te ves 5de wali po tiwai yali. Tiali goli, te hanu taunde bidibo we bidigo aga tudiba munama, te ves 1-3 tede wali tiwai ebaso da, teda agai te hanu Jerusalem me boi hwşagasigi da, te ves 4de wali po tiwai gilama igi dao.

- kantrigo genuai bidi dabe dali,
 augwaligo wiegi yai doloba pai kolesaga naga elama,
 te we bidi dabe tonaluaibao.
- 2 Te deli deli genuai bidi dabego
 te we bidi dabe augwali tau somainu asali bidi dabe,
 augwaligo tau saibao.
- Augwali da, te we bidi augwali te genuai
 wali dali tulubage dabe ebo side,
 augwali te duala sabo pesage tiwai dao.
- Tama me, augwali te wę te hogomua pai
 pesageba pabo tiwai, me te moni masigigo
 te hogomua pai pesage
 te masigigo seselalubo tiwai dao.
- Tama te bidi dabe te tiwai madi duala selama,
 toma tubo tiwai dao,
 te boma pai giligade.
- 3 Tama megi e tibo sogo, te we bidi augwaligo gedugo
 tigidali nai dabe subo usu mu yaibao.
 Tama me augwaligo olo bugagia dala pelama,
 tama augwaligo tigidali po bugagia odaibao.
- 4 Tama te bidi dabe te homu kone bugagia palisama,
 te dwai dwai sę dabe yali bidi dabe,
 te bage augwali wiegi yai homu kolesaga selama,
 te sę dabe tama yaibao.
- Tama te bidi dabe te augwa hasi
 po wabo pedauwali sęęę yali bidi dabe, augwali
 bugagia po mu waibao.
- 5 Tama te dwai bidi dabebolo genuai nogi me
 te dwai polobo kolesaga dabe yali da,
 te sę dabe mu sia saibao.
- 6 Te polobo sę ebo bagego
 te subigila po dabe wabo dao.
 Tama tigidali sogo augwaligo
 dwai polobo sę naga ebo dao.
 Augwaligo Genuai Bidigo
 godolo yabo sę dabe ebo menio.
 Tama ili po hauwa Genuai Bidide ela palobo dao.
 Tama augwaligo te nai meni yai
 bidi dabebolo nai masiqma eyu,
 me augwaligo te wę nogone ebo
 bidi dabe wę mayu ebo menio.
- 7 Tama te dwai bidi dabego

te dwai homu kolesaga hauwa
 augwaligo tobolude pağana pabo dao.
 Augwaligo homu kone palama,
 tama augwaligo haniani ili po wabo
 homu kolesaga dabe gegelama,
 tama augwaligo te nai meni yai
 we bidi dabego po tų ebode dolama,
 aiyaba elaluabo sunumi dabe gegebo dao.
 8 Tiali goli, bidi wiegi yai dabe augwali
 genuai nogi elaluaibao.
 Te tigidali sogo augwaligo doloba pai
 kolesaga naga ebo dao,
 tama augwaligo wiegi yai kolesaga naga
 yabo homu bombo ebo dao.

Te we sibi augwali hobedai gela omainao

- 9 Te Jerusalem we dabe,
 dagego homugo da, dage wiegi yai
 bidiba homu te ebao.
 Tama dage tigidali sogo bugagia bidaiba homu te ebao.
 Tiali goli, dagego olo saganama, eno po bugagia odiağ.
 10 Te usu, megi dage homu tegaluama bidiagameo.
 Tiali goli, dage tonaluiğ.
 Te 13 o 14 polua bolo pomainao.
 Teda dage wi elama, noma saibao. Magi baso meni.
 Dagego te wain gi dabe te du me walogobeo.
 11 Megi da, dage wiegi yai te bidibao,
 tama dagego homugo dage wiegi yai
 te bidiba homu ebao.
 Tiali goli, dage noma selama, wi elama,
 tama duga wiegi yai ugwa dabe
 peda şanama, tama hobedai ugwa dabe gudiagameo.
 12 Dagego duga hagawiade nogo sawaligo elama,
 tama dage hobedai gela duga wiegi wiegi yai gi dabe,
 me duga wiegi yai sawi yai wain
 gi hagede dage hobedai gela waiagameo.
 13 Tama dagego eno we bidigo
 tğ hagede dage hobedai gela waiagameo.
 Magi baso meni.
 Te dwai sesane bono me dwai nosai dabe
 te bulu tğde koliaibao.
 Awe, dagego duga te gana peyu ebo

- te be dabe homu kone elama,
 tama dage hobedai gela waiąo.
 Tama me, dage te duga te gawelama
 bidibo te hanu dabede me hobeda gela waiąo.
- 14 Magi baso meni.
 Te tigidali we bidi dabe augwali te hanu taga pelama,
 tama augwali te hanude ugwa
 eda iyu, augwali te hanude sę dabe me egobeo.
 Te tuni bidigo be, me te ami bagego
 bomai obo, me te ami bidi dabe
 bidama boi bidi dabe asobo tonalubo te bobobage
 sigi be dabe,
 sese olo elaluama, tama dolaibao.
 Tama te bulu yowi donki dabe
 tede biliyu, wiegi yai homu yaibao.
 Tama me, te sipsip kibu dabe aselama,
 teba nosai tuagasaibao.

Genuai Bidigo aga we bidi dwagi yai bidabo sogo mawaibao

- 15 Tiali goli, Genuai Bidi aga mobo
 bidi daba ma tagala palaibao,
 bidigo wę gelebo tiwai yaibao.
 Tama te nai meni yai kemi sane nai
 meni yai olo elalubo bulu
 wiegi yai bulu tų ma yaibao.
 Tama haniani nai dabe tede holaibao.
 Teda te mone buside te ni dabe
 olo holobo tiwai holaibao.
- 16 Te wiegi yai doloba pai kolesagago
 naga te tigidali tų dabe tonaluaibao.
 Te po tų dolo naga dodolobo kolesagago
 te we bidi dabe bugagia dodolaibao.
- 17 Tama te doloba pai kolesagago
 te bidi hasi godolo ebo kolesaga ilaibao.
 Tama te we bidi wi me isąma elama,
 tama augwali tigidali sogo bugagia
 dili elama, dolaluaibao.
- 18 Tama Genuai Bidigo e tama po wali,
 agai we bidi dabe augwali bugagia bidiyu, augwali
 augwa bulude bugagia homu tegaluama,
 toma tuaibao.
 Tama augwali magi naide wi me egobeo.

- 19 Te genuai talua ge tulubage tulama,
te mone buside moni ni dabe me
dolobadi me, tagala.
Tama tigidali hanude be dabe tde wiala pai goli,
20 te Genuai Bidigo we bidi, dage bugagia bidaibao.
Tama dagego te nai dabe te w elalubo
bulu badu dagego nai bulaibao.
Tama dagego duga kibu bulmakau dabe,
me donki kibu dabe, augwali augwa
digi nai tumainu sula tagalaibao.

Te we bidigo Genuai Bidigo augwali tonalumainu gedu haluasa po wali

33 ¹Dage te gasa bulu dabe dolobo hani, dage
dolaibao.

- Te mu tama, dage me dolobe dao.
Tiali goli, dagego gasa bulu dabe
dolobo bodolu sia saibao.
Tama duga digi duga dolaibao.
Dagego te gasa hani dabe ili po walama,
tama dagego te po mia selama,
tama dagego augwali te boi
bidi dabego nogoba mubo dao.
Te mu tama, te gasa hanigo da dage me
ili po me ola masiqbadi goli.
Tiali goli, dagego te gasa bidi dabe
ili po wabo sogo te sia saibao.
Tama te gasa bidi dabego dage ili po olama,
tama dage te boi bidi dabego nogoba muaibao.
2 O Genuai Bidi, dago homu kolesaga
nage deliba naga elalubao.
Nago da hobede elama, tama tigidali
sogo da bugagia tonaluagameo.
Tame te seęe ebo sogo, nago da
ma selama, tama dago augwali
aiyaba elalumainu ilao.
3 Te bomai bulu bidi dabego nago
te be kulukulu tiwai i wabo odoobo sogo, me nago
augwali dali hwıainu hogodasa asobo si da,
augwali we bidi sese wi paibao.
4 Tama augwaligo te taga pabo
nai dabe da, te gasa bidi hani dabego
polo sagasaibao.

- Teda te gide mano dabego gide nai dabe
tula silibo tiwai yaibao.
- 5 Genuai Bidi aga genuai nogi mu
elaluyu, tama aga bulude ugwade mu bidibao.
Tama agai aga doloba pai kolesaga dali,
agai po tų dolo naga ebo kolesaga dali, te tigidali
Jerusalem tųde paęana paibao.
- 6 Tama tigidali sogo agai aga
we bidi dage bugagia tonaluyu,
tama agai dage bomo elama,
tigidali sogo bidimainu yaibao.
Tama agai dagebolo dwagi yai homu kolesaga dabe,
me kolesaga dabe hauwa mu mawaibao.
Tama dagego mu tobolu dęa holai elalumainu yaibao.
Te wi elama, Genuai Bidi dologode elalubo kolesagade,
Genuai Bidi agai wiegi yai nai dabolo maiabo dao.
- 7 Suama, te Jerusalemde genuai bidi dabe
te sunumi dabede bidiyu, gela dabe obao.
Tama te bidi dabego te boi pibo sogo pedalomai ebadi,
augwali gela bomonama me oduali.
- 8 Te genuai sunumi dabe olo elalubao,
te we bidi te sunumidu ugwa eda me bilibo menio.
Te boi bidi dabego augwa daų walali po bogi pelama,
tama augwaligo gasa hani
bidi dabego hanu dabe dolali.
Augwaligo gasa bidi dabe tonobo da,
te olo nai dabe tonobo tiwai ebao.
- 9 Te tų hobedai gela weyu,
tama aga bomo sia sali.
Tama te Lebanon genuai busi hale yali. Magi baso meni.
Agai ni dabe sasiyu, ela pobaso.
Te Sarongo odogo malu bulu wiegi yai te tų wa pelama,
tama wę meni yai kemi nai elalubo
bulu tiwai yaibao.
Tama me, te ni yabe dabe te Basan
distrikde holali, me te bulu du Karmelde holali dabe,
augwali bogwa pelama, telega peyu yali.

Te we bidi dabego Genuai Bidigo bomu sueibao

- 10 Genuai Bidigo e tama po wali,
“Megi da, ena hogodama, sę yaibao.
Tama te we bidigo ena sulama,

- tama augwaligo eno genuai nogi
ugwaba somainao.
- 11 Te bidi hani dagego ena dali boi bidi elaluali bage,
dage da te olodali bomai şę
mu elama, masigi meni yai nai dabe
dagego sabo dao.
Te bidigo aga gide wit genina soba homu ebo tiwai dao.
Tiali goli, agai olo nosai dabe salio.
Tama duga bomai şęgo
te isi bogoli tiwai pedalama,
tama dage mu sia şawaibao.
- 12 Tama dage te augwaligo kambang
isi ulai hogomu tiwai,
me augwaligo sesane bono isi ulama,
keli hogomu ebo tiwai yaibao.
- 13 Te dage pađe bidalubo we bidi,
me dage digibulu bulu bidalubo
we bidi, dagego eno bomai şę yali po odao,
me dagego eno genuai nogi po pusa maiąo,” wali.
- 14 Te Saionde te dwai kolesaga ebo
we bidi augwali wi elama, noma sali.
Tama augwaligo e tama po obao,
“Genuai Bidigo şębę da, te da te bomai
isi tigidali sogo dabo isi tiwai,
tama tigidali nai dabe dela silibo tiwai dao.
Te da tomode de mu te isi dali bidaibawe?”
- 15 Te doloba pai kolesaga eyu, me mu po naga weyu,
me gasa bidi dabego doado bage sabo homu isąyu,
dwai kolesaga isąbo bidi dabe,
augwali te Genuai Bidi dali bidibo usu yaibao.
Tama augwaligo te ili po wabo mone sisąma eyu,
me te dwai kolesaga ebo bidi dabe
dali dagana sisąma eyu,
me te gasa bidi dabe ela mubo
bidi dabe dali kisa selama ebo menio.
- 16 Augwali te tobage bidi dabe augwali
bugagia bidaibao.
Augwali te bidi me te bugagia wiegi yai
boma pai bulu dude geme dualalubo aą yaibao.
Tama nai dabe mego augwali aiyaba me elalugobeo.
Tama tigidali sogo augwaligo tuabo
nai elaluyu, we elaluyu yaibao.

Genuai Bidigo wiegi yai sogo mu Jerusalem dabebolo mawaibao

- 17 Dagego duga tuni bidigo aga
 sawi yai tuni bidigo ugwa ma gudama, tama te bulu
 ma tonalubo sueibao.
 Tama dagego duga bulu genuai ma pedalobo sueibao.
- 18 Tama dagego te dwai sogo dagede
 polobadu pedalali ma kone palama,
 tama dagego e tama ma hanalu waibao,
 “Te boi bidi dabe aselama,
 te takis moni sali bidi dabe
 augwaligo tobolu bidi megi menadewe?
 Tama me te boi bidi dabe aselama,
 te dago ami bidi dabego
 te boi bidi dabe asobowe weyu tonaluainu, te şani
 bobobage bedede tonaluyu yali,
 te tobolu bidi menawe?
 Augwali polobadu te dago hanu dabede elaluali bidi da.
 Megi augwali ede menio.” Te po waibao.
- 19 Dagego te tobolu gagea pelama,
 augwa digi augwa nogi ugwaba siyu yali
 boi bidi dabe dagego gesabidi me sugobeo.
 Tama dagego augwaligo dwai augwa
 wabo po me odogobeo.
 Te bidi mego te dagego konesişwai po
 augwaligo wali po bidi mego me odogobeo.
- 20 Dagego Jerusalemba tonişo.
 Te da dago genuai hanu,
 te da tigidali genuai lotu po wabo
 sogo dabe sisinagasabo hanu dao.
 Te da te da bugagia bidiyu, toma tuyu ebo bulu dao.
 Aga te sel ugwa be te bidi dabego bono
 togolama, ni dabe gudasa,
 pişama yabo sel be tiwai dolaluaibao.
- 21 Genuai Bidi te dago boma pai
 polalubo bidi tede bidaibao.
 Tama agai te Jerusalem te wiegi yai
 sawi yai genuai wę me,
 dwasianu wę me elalubo bulu nigilaibao.
 Tiali goli, te dwasianu geba kanu me,
 genuai hwıbo sip dabe me,

- te wę dabedu me asogobeo.
- 22 Magi baso meni. Genuai Bidi
aga digi dago tuni bidi bidama,
tama po tų dabe dodolobo sę elama,
tama aga digi da bomai po dabe
menama, da tonaluaibao.
Tama agai da bugagia tonaluyu,
tama da dwai dene me sogobeo.
- 23 Ma, te boi bidi dabego te Jerusalem
sabo homu yali da, teda augwali usu me egobeo.
Augwali te sip boskru bage te sip
pomainu, te pobigisąma ebo
boskru dabe tiwai bidaibao.
Magi baso meni. Te sip tobolu
bugagia dolalusiąma eyu,
me te bono dabe bugagia bomalusiąma eyu,
me te sel dinigalusiąma eyu isąma ebaso.
Tama tibaso, boi bidi dabe wi peyu,
te nai dabe hauwa tagalama paibao.
Tama te Jerusalem dabe udala,
te nai dabe sigi paibao.
Tagala, te sąą dwai bidi dabe me,
augwali me te gasa bidi dabe nosali aselama,
augwaligo me te nai dabe hauwa mu saibao.
- 24 Tama te sogo te Jerusalemde bidibo
we bidi dabego e tama po munu
ma wagobeo, “Ena gasi ebo.”
Tama Genuai Bidigo te Jerusalemde
bidibo we bidigo dwai sę yali sęę sela sąwaibao.

Godigo te Idom tų kantri dolaibao po

- 34** ¹Dage tigidali tų habu we bidi dabe, asiąo.
Dage sisinagaselama, te po odagasiąo.
Tųde me tigidali elalubo nai me,
dagego me olo muiąo wai.
- ² Genuai Bidigo te tigidali bulu tų kantri dali haliga
sębę eyu,
te augwa ami bidi dabe dali me sębę yali.
Tama agai te po weyu, te augwali tigidali isaibao po
wai dao.
Awe, agai augwali sese mu dola silaibao.
- ³ Te augwali tigi dabe te bidi dabego pubalubo

- usugobeo. Menio.
 Te bulu t̄ dabede danamu pelayu,
 te bulude dwai kugumini mu yaibao wali.
 Te augwaligo kaneme dabe te bulu du dabede
 paḡanalueibao wai dao.
- 4 Giliga, me polua, me h̄ dabe hala pelama, te
 tutudulaluama,
 te mu tigidali silaibao.
 Tama dagalu da, te bidi dabego 1pepa yabe bebe pelama,
 keḡe pabo tiwai yaibao.
 Te dagalu daide ula ebo h̄ dabe tigidali
 te ni wain yabe wa pai te t̄ba tudulalubo tiwai eyu,
 te ni kaya fik yabe wa pai tudulalubo
 tiwai yaibao wai dao.[§]
- 5 Genuai Bidigo te tama po wai, “Eno haliga s̄beḡ yali,
 eno te ena bainat hw̄ sisi elama,
 tama te bainatgo hwawa mu weyu,
 te dagalu tagalama,
 te Idom dabe eligi painu yali,
 te eno augwali dolaibao po wali hani dao.
 Te megi eno aga tagala palubo te augwali ela mugi
 pomainu yaibao,” wali.
- 6 Tialima, te Idom dabego kaneme me iligo te Genuai
 Bidigo bainat hw̄ halua saibao.
 Te sipsip me meme dabe te bidi dabego te ofa yainu
 elama,
 te ofa yainu ebo bidi dabego nogode kaneme piliga
 pabo tiwai yaibao.
 Genuai Bidigo te genuai hani we bidi dabe mu te taun
 Bosra te Idom bulu t̄ kantride elaiibao wali,
 te aga digi genuai ofa ebo tiwai dao.
- 7 Genuai Bidigo te tobage bomai uni bulmakau dabe
 me elama,
 te augwaligo kaneme me ili te gea paliyu, te Idom
 bulu t̄ kantri mesegelaibao wali.
- 8 Te s̄ pedelaibao, magi baso meni,
 Genuai Bidigo te boi bidi dabeba te aga taun Jerusalem
 doliyu, aiyaba elalubo boi bidi dabebolo
 te dene mabo bodolu mawai dao wai.
- 9 Te Idom bulu t̄ kantri w̄ dabe te kolta tiwai

§ 34:4 Ped 6:13-14

- pedelama,
 te hogomu dabe te bomai masigi dabe tiwai
 pedelaibao,
 te Idom bulu kantri t̄q te kolta sia dabo tiwai yaibao.
- 10 Te sia dabo munu me sia sogobeo. Menio.
 Te tigidali sogo ulade me hulide bomo elama, dedu,
 te hano sesemane sogo pedaliduaibao wai.
 Te Idom dabego t̄q olo sesemane sogo elalu,
 te bidi teba munu ma biligi pogobeo.^h
- 11 Te bulu t̄q te dwai ba dabe, te ba kemedage dabe,
 me sisi yai ba kotkot,
 me hulide bilalubo ba dabego bulu naga pedelaibao.
 Godigo te Idom dabego nai doado bage tigidali sia
 somainu elama,
 te Idom dabego t̄q olo elalumainu yaibao wali.
 Te polobadu digi agai te t̄q nigilama,
 te t̄q olo mu elaluali tiwai gilama pedelaibao wai
 dao.
- 12 Te tigidali genuai bidi dabe,
 me tobolu bidi hetman dabe, te munu me bidigobeo,
 tama te king mego te bulu t̄q kantri me tonalugobeo
 wali.
- 13 Te sesane yai bono me nosai dabego te kingo be,
 me gasa be dabe mesegelaibao.
 Te bulu uni yowi dabe bidagaselama,
 te badu i wagasobaso, te uni ba dabe te beba
 piagasaibao wali.
- 14 Te olo masigi bulu kemi t̄qde te bulu uni hasa dabe
 teba sisinagasaibao wali.
 Te bulu uni meme dabe me te bidagaselama,
 i weyu, ga udaibao, te tobage hasamani dabe me,
 te hulide bilalubo hasa me, te aselama,
 te badu piabo pesage gegagasaibao wai dao.
- 15 Te hulide bilibo ba sibigo te be selama,
 te augwa ge dabe tede sagonaibao,
 te augwa bogo dinigilama, te augwa
 gesi ogomani tonalueibao.
 Tama te omai ba kemedage me,
 so ba kemedage me, augwali aselama,
 tonaluagasaibao walio.

^h 34:10 Ped 14:11; 19:3

16 Te Genuai Bidigo buku tomoba sulama, nago te nai
 dabe elalubo po nedao.
 Tigidali hasa me ba dabe te bukude po wali gilama,
 te bulu Idomba bidagasaibao.
 Te me deli augwali me bidigobeo.
 Magi baso meni, Genuai Bidigo digi augwali asao wali.
 Te aga Mobo Bidigo augwali sisinama,
 te augwali odasa asaibao wali.

17 Te Genuai Bidigo digi te Idom t̄o pedaide deli delide
 d̄aḡ ilama,
 te augwaliba dobawaibao.

Tama augwali te Genuai Bidigo d̄aḡ ilama,
 muani madi sesemane bidada paibao wai dao.

Godigo tigidali nai wiegi yai ma pedalumainu ilaibaoⁱ

35 ¹ Te masigi kemi bulu me, t̄o wa pai bulu dali,
 te augwali pemene wiegi yai mu yaibao,
 magi baso meni, te sawi mu yai plaua pedelama,
 te badu mesegelaibao.

² Te wa pai bulu t̄o tonobo te sawi wiegi yai mu yaibao.
 Te aga genuai i hai dali weyu, genuai pemene yaibao.
 Te wiegi yai sawi yai nai hauwa mu pedaliyu,
 te bulu tonobo wiegi yai sawi me tedali eyu,
 te Lebanon genuai busi tonobo tiwai eyu,
 te Saron bulu odogo tonobo tiwai yaibao.

Te we bidi dabego bomonama tonoyu, te genuai nogi,
 me te dago Genuai Bidi Godigo wiegi yai au dali
 elalueibao.

³ Dagego te bomo meni yai bidi dabe d̄aḡ waliyu,
 te haliga wi ebo bidi dabe,
 me didibili ebo bidi te d̄aḡ waliyu yao po wai dao.^j

⁴ Te tabi haliga homu kolesaga te bomo is̄awai bidi
 dabebolo te tiwai po wao,
 “Dage te bomonama dolalu, te wi me elamuo,” wao.
 “Te dagego God ma asiyu, dage dobola ma selama,
 te boi bidi dabe dwai dene mu mawaibao,” wali.

⁵ Tialima, te gedu widai bidi dabego gedu ma pedaibao,
 te olo degai bagego po ma odaibao.

⁶ Te saḡa dwai penelai bidi dabe gesa soyu, posoga
 palaibao,

ⁱ 34:17 Ais 63:1-6; Jer 49:7-22; Ese 25:12-14; 35:1-15; Amo 1:11-12; Oba 1-14; Mal 1:2-5

^j 35:3 Hib 12:12

me te pedauwali pania sai bage te i weyu, pemene
yaibao.^k

Te wę dabe te masigi kemi tęde pedaliyu,
te tigidali habuba usu nama paibao.

7 Te olo kemi tę bulude te sigi ąi tiwai pedelaibao.

Te wa pali tę dologode me wę ulu pedelaibao.

Te polobadu te uni yowi dabe naga te wa pali tęde bidali.

Tiali goli, te sogo te nosai,

me awi hauwa tede pedelaibao.

8 Tama genuai sunumi me deli te badu elalueibao.

Te genuai sunumi nogi e tiwai waibao,

“Godigo Tedali Gasagi Yai Genuai Sunumi Digi Dao,”
wai.

Te God gedude wiegi yai isąwani bidi dabe,

augwali te sunumide me biligobeo. Mu menio.

Te Godigo we bidi dabego sunumi naga elalueibao.

Te homu kolesaga meni yai bidi dabe,

te augwali te pąba me pogobeo.

9 Te dwai laion me, dwai hasa dabe me,

te sunumidu me soagobeo. Menio.

Te Godigo augwali ma sali we bidi dabe naga,

augwali naga te sunumidu bilaibao.

10 Te Genuai Bidigo ma dobola sali we bidi dabe,

te augwali wiegi yai pemene dali

te Jerusalemba ma asaibao.

Te augwa genuai po daęa weyu, balia weyu,

te sunumidu aselawaibao.

Te augwa wiegi yai bugagia mu dugulalu, te augwa

pemene umabo mu yaibao.

Augwa te wiegi yai pemene ebo munu me sia sogobeo.

Te dene, me haliga seęę, te augwalide munu ma me

elalugobeo.

^k 35:6 Mat 11:5; Luk 7:22

Asiria dabego te Jerusalem taun sagasainu yali

(Daı 36-39)

Te Asiria augwaligo Jerusalem sagasainu yali po

(2 Kin 18:13-37; 2 Sto 32:1-19)

36 ¹Te Hesekia king bidibadi, te kibu be nogo si olama, saęaęo me si me si, te¹⁴ yia elalubo sogo, te Asiria king Senakerip te aga ami dabe dali aselama, te Juda dabeba boi hwıagaselama, te augwali aiyaba elaluama, te tigidali bomai obo elalubo hanu sali. Tiali goli, te Jerusalem augwaligo sisabadi, te elalualio. ²Senakerip te Lakisde bidiyu, agai aga amide polalubo namba wan ofisa dali, te genuai ami hani dali tagala palali, te Jerusalemba pomainu yai. Augwali te Jerusalemba sabolama, tialima te ofisa te Jerusalemba pabo te Ugwadu Elalubo Ulu Wę nogi wabo sabo wę paęa pelama, bidigi pali. Te aı gamia te pelama, bidigi pali. Te aı gamia te name ugwa nigibo madiba pabo genuai sunumi paęde elaluai. ³Tialima, te Israel ofisa bidi selago aga sugi palio. Augwaligo nogi e tiwai, Eliakim, te Hilkiago ogwa, te kingo be tonalubo bidi da, tama Sepna, te kingo kuskus, me Joa, te Asapgo ogwa, aga te kingo ebo se po page tigidali asebo bidi dao. ⁴Augwali sela bidi te Asiria ofisa bidiba sabalubo si da, agai po bomonama, augwaliba te tiwai po wali, “Dage pelama, Hesekiaba te kingo bomai po magi pao, aga te Asiria king dao. Agai te tiwai po wali, ‘Hesekia, nago mena tobage tiwai bomo elalu, tama nage ena dologode bidisaıu ebawe? ⁵Te odolali mibo pogo te boi hwıabo bomo usu elalueibao, agawe? Nago enade hagoma ebao. Nago homugo dego nage tau sagasaıba homu elama, te nago enade hagoma eba, agawe? ⁶Eno koneani, nago te kantri Isipba tonaludu, te agai nago hwıbo tau sagasomainu tonalubao. Tiali goli, eno nagebolo obao, Isip te togwa pai awi dili tiwai elalubao. Te nago bilibo dono tiwai tola selama, pobaso da, teda te awi dili sagago nago nogode dolaıbao. Te Isip king bidigo kolesaga te tobage tiwai elalubao. Tama nago te boi hwıbaso, te aga aselama, nage tau me sagasogobeo.¹ ⁷Tialima, nago te po weyu, te dage Israel dabego konealubo homu te Genuai Bidiba mubaso, te duga God, te agai dage tau saıbao po obaso, eno homugo te me usugobeo homu ebao. Magi baso meni. Hesekia, nago te agai lotu wabo pesage dabe, me te gasade elalua pali alta dabe, dolali. Nago te Juda dabeba me Jerusalemba te po weyu, augwali te Jerusalemba aselama, tama te alta deliba naga lotu wagasao po wai dao.’”

⁸“Te eno kingo gasa po elalubao. Hesekia, eno kingo nageba te 2,000 hos mawaıbao wali, nago te hosde dugulama, te hwıabo ami bidi te

¹ 36:6 Ese 29:6, 7

2,000 elalubaso da, te tama tiaibao. Tiali goli, eno koneani, nagede digi te tobage bidi tama me elalubeo. ⁹Nago homugo te Isip ami bidi dabe te hosidu ma karisdu aselama, te nage boi hwıbo tau sagasaibao homu ebao. Tiali goli, mu menio, augwali me asogobeo. Tama tialima, nago bomogo te dago dwasianu ami hani aiyaba elalueiba homu ebaso da, te usu me egobeo. ¹⁰Eno kingo te po wali, ‘Nago homugo ena homugo digi aselama, te nago bulu tı kantriba hwıagaselama, te dolagasali homu eba, agawe? Mu menio. God Genuai Bidigo digi enabolo te kantri dolagasao po obaso, ena asai dao,’ eno kingo te po wali.” ¹¹Eliakim, me Sepna, me Joa, augwali selago te po odama, tialima augwaligo te Asiria ofisa bidiba te po wali, “Nago te po dabolo te Siria pogo wao, magi baso meni, dago te bulu po koneai dao. Nago te Hibru po me wagio, tiyu te taun obo daide dodolalu bidibo bidi hani dabego nago te wabo po odabuo,” wali.

¹²Tiali goli, te ofisago po wei ponoyu, te tiwai po wali, “Eno kingo ena tagala palali, te po dage dali, me dagego king dali naga omainu me tagala palobeo. Menio. Te obo daide dodolalubo hani bage, augwaligo me te po odomainao. Magi baso meni, te boi hwıbaso, dago te Jerusalem bagua sagasobo si da, teda te dwai şe ebo si dage tigidaliba pedelaibao. Tama te obo banisde dodolalubo hani bage te nai mu şa paibao, tama augwa di ma tuyu, poi wı ma tuyu yaibao, te tiwai dage me yaibao,” wali.

¹³Tialima, te Asiria ofisa bidigo te obo daide bidibo hani bidiba tonalu, te Hibru pogo genuai po daę olama, i weyu, te tiwai po wali, “Dagego te bomai kingo poba olo bugagia muięo, aga te Asiria king dao. ¹⁴Agai te tama po wai, dage te Hesekiago dage tibo po ola momainu me elamuo. Hesekiago dage tau selama, te dage bugagia me bidigobeo, wali. ¹⁵Dagego te Hesekiago dage homu bega sabo po me odigio, dagego konealubo homu te Genuai Bidiba daę wabo te agai dage tau selama, te da Asiria dabego dage aiyaba elaluama, te taun Jerusalem sogobeo wabo po, te po odogio. ¹⁶Hesekiago po dagego odolama, te ena dali hwıabo homu me egio. Te tobage homu ebo tagalama, te hanu eno somainu buluba teda solama, tama da dali te poi pibo ilibo po minao. Tama tibaso da, teda dage bugagia bidiyu, te duga elalubo ulu wıde wı tuyu, te ni wain du, me te ni kaya fik du, te duga gide digi tuyu bidaibao. ¹⁷Te dage bugagia bididubadi, te ena ma asiyu, te dage gasa bulu kantriba selasa peyu, te duga bulu tı kantri tiwai buluba paibao. Te bulu kantride te wain gi, me bret nigibo wit gi, te hauwa elalubo dao,” te po wai.

¹⁸“Hesekiago dage tibo po ola mayu, te po obao, ‘Genuai Bidigo da tau sobaso, te dago augwali aiyaba elalueibao,’ po wai. Tiali goli, te Hesekiago tibo po wabo po odogio. Dagego homugo te gasa hani dabe augwa godigo te augwali tau selama, te boi hwıani augwaligo da Asiria dabe aiyaba elaluali da, agawe? Mu menio. ¹⁹Dago te taun Hamat, me

Arpat, me Sefarvaim, teba boi hwigi pali sogo, te augwa god menade bidiyu, te augwali tau sagasobewe? Te dago Samaria buluba boi hwigi pali sogo, te Samaria augwa godigo augwali tau selama, te da aiyaba elalualiwe? Mu menio. ²⁰Dago te bulu tş kantri hauwaba boi hwigi pali, te augwa god hauwa elaluali. Tiali goli, te god me deligo te aga bulu tş kantri me tau selama, te da hwigi pali aiyaba me elalubeo. Tama tialima, magi baso dage Jerusalem bagego homugo te duga Genuai Bidigo dage tau saiba homu elama, te dago dage aiyaba me elalugobe da homu ebawe?" wali.

²¹Te Asiria ami ofisago te aga wali po te siminani, tiali goli te genuai obo daide bidali hani bidi te augwa pedauwali pania selama, te po me deli wei me ponobeo, magi baso meni, king Heseikiago augwali habu seliyu, te augwaligo Asiria dabego po wei me ponamuo po wai dao.

²²Tiali goli, te Asiria ami ofisa bidigo wali pogo te Eliakim, me Sepna, me Joa te haliga seşę mu ilali. Tama augwa gudali ugwa pişilama, tama augwali pelama, te ofisago wali po tigidali te king Hesekiabolo pusigi palio.

Heseikiago te profet Aisaiabolo aga seşę yai po pusali

(2 Kin 19:1-7)

37 ¹Heseikiago te Asiria dabego po odobo si da, teda aga haliga seşę mu elama, te aga ugwa pişawalio. Te agai homu dene ebo ugwa gudama, te Genuai Bidigo tempel be tomoba palio. ²Tama Heseikiago te Eliakim i wai, te kingo be tonalubo bidi dali, Sepna, te kingo kuskus bidi, te polalubo pris bidi dabe me i wai. Tama agai augwali tagala paliyu, te profet Aisaia sugi pomainu yali, te Amosgo ogwa dao. Te bidi dabego me te homu dene ebo ugwa gudasa pali. ³Augwali pela sabolama, Aisaiabolo te tiwai po wagi pali, "Kingo te po walio, megi te genuai haliga seşę ebo sogo elalubao. Te Asiria dabego dabolo te da begela dolobo dwai posobo po hauwa waligo te da hale genuai elalubao. Da te haliga yai we me deli elalubo tiwai eyu, te wai ame nabo sogo pađe pedelalio. Tiali goli, te wego wai ame nabo te bomu me elalubeo. ⁴Te Asiria kingo aga ofisa tagala palama, te dago God Genuai Bidiba dwai po wagasomainu yalio, aga te sesemane sogo bidada pabo God dao. Dago homugo Genuai Bidigo te dwai posobo po dabe odama, tama agai te dwai po dabe pusagasali bidi dabeba te dwai dene ilaibao. Tama tiyu, dago homugo nago te Godiba gedu haluasa po weyu, te agai da dwasianu bidalubo hani bidi tau somainao," po wali.

⁵Te Aisaiago te Heseikiago po odobo si da, ⁶tialima agai te po sela asali bidi dabeba te tiwai po wali, "Dage te kingba ma begasa pelama, te Genuai Bidigo po agaba pusugi pao. Genuai Bidigo te po wai, 'Nage wi eyu, tama homu hauwa te wali dwai pode elamuo, te Asiria king

bidigo olo şe ebo bidi dabego enade te po wali dao. ⁷Magi baso meni, ena Genuai Bidi dao, eno te Asiria kingo homu kolesaga bega palama, agai te po me deli odobo sogo, te agai dage mu tagalama, te aga bulu kantriba geasa paibao. Tama aga te Asiriade bididubadi, eno aga te bidi mebago te moni hwągo ela mumainu yaibao,' ” te po wai dao.

Te Asiria dabego Jerusalem dolaibao po ma wali

(2 Kin 19:8-19)

⁸Te Asiria ami ofisa bidigo po odali, te king Senakeripgo te taun Lakis taga pali po odali. Tialima, te ami ofisago te Jerusalem taga peyu, ma begasa pelama, tama te king te taun Lipnade boi hwıdubadi suali, tama aga pelama, aga sugi palio. ⁹Te Asiria dabego boi hwıdubadi, te bidi meba aselama, te king Senakeripbolo te tiwai po wagasali, “Te King Tirhaka te bulu kantri Itiopia bidi, te aga ami bidi dabe dali, augwaligo te nageba boi hwıagasainu asobao,” wali. Senakeripgo te po odama, te agai bidi meba tagala paliyu, te agai pas te Juda dabego king bidi Hesekiaba selasa pomainu yali, magi baso meni, agai te Jerusalem sabo homu daų weyu, bomo elaluai dao. ¹⁰Te Senakeripgo pasde te tiwai po wali, “Eno koneani, nago konealubo homu te daų wabo god, agai te po weyu, te agai eno dage aiyaba elaluama, te Jerusalem sogobeo po obao. Tiali goli, agai tibo po obao, tiyu nago agai poba daų wabo homu me mugio. ¹¹Naga digi nago te da Asiria king dabego ebo kolesaga koneai dao, te dago gasa bulu kantri hauwa mu dolali. Nago homugo eno nago bulu kantriba te tama tegobe da homu eba, agawe? ¹²Polobadu eno waı dabego te taun Gosen, me taun Haran, me taun Resep dolama, te taun Telasarde bidali Beteden hani dabe ela muani. Te augwa god dabego te hani augwali tau sabo usuşbaso, te augwali bugagia me bidibeo. Mu menio. ¹³Te taun Hamat, me Arpat, me Sefarvaim, me Hena, me Iva, te tama moni taun king dabe bidiba, agawe? Menio, dago te augwali tigidali ela silai dao,” wali.

¹⁴King Hesekiago te pas te Senakeripgo tagala palali bidi dabego nogode salio. Te pasde po agai nedama, tialima agai te Genuai Bidigo tempel be tomoba sela palio. Tama agai te pas te Genuai Bidi bidibo gesabidi badu pađe muani, te agai dinigilama, bugagia dodolama, muai. ¹⁵Tama Hesekiago gedu haluasa po Genuai Bidiba weyu, te tiwai wali, ¹⁶“Genuai Bidi, Tigidali Bomo Elalubo Bidi, nage da Israelgo God, nage te ensel mobo bidi daide ugwadu bidiyu, te naga king sia saide dugulalubao. Tiali goli, nage naga God mu da, tama nago te tigidali bulu tų habu tonalubao. Nago naga nago te tų me dagalu nigai dao.^m ¹⁷Genuai Bidi, eno homugo nago olo eno gedu haluasa po waboba bugagia munama, te eno gedu haluasa po odolama, tama nago daba te pedalubo dwai şe dabe

^m 37:16 Sai 25:22

bugagia suao. Tama eno homugo nago te tigidali dwai po wabo odomainu hagede ilali, Senakeripgo nageba te şę yai, God nage te sesemane sogo bidada pabo dao. ¹⁸Genuai Bidi, dago koneanio, te Asiria king dabego te we bidi hani dabe hauwa dolama, te augwa bulu tş kantri dabe dali dolali. ¹⁹Tama te king augwaligo te hani we bidi dabe augwa god dabe sela şayu, te tigidali siaba ulali. Te god dabe dolali, magi baso meni, augwali te tibo god naga dao. Te bidi augwa digi te ni me masigi selama, augwa nogogo nigai dao. ²⁰Te Genuai Bidi, dena God, eno homugo te megi nago da tau somainu homu eyu, tama da te king Senakeripgo nogode ma dobola sao homu yai. Tama te tigidali tşde we bidi hanigo te tiwai bugagia koneyu, nage naga nage te Genuai Bidi da waibao,” po wai.

Profet Aisaiago Godigo po te kingba mawai

(2 Kin 19:20-37)

²¹Tialima, profet Aisaiago Hesekiaba te tiwai po ola tolali, “Genuai Bidi, da Israel dabego Godigo te po wai, nago agabolo hanalu, dage te Asiria king nogode ma sao po wali. ²²Tama tialima, megi da, agai te Senakerip dali po elalubao, te Asiria king dao. Genuai Bidigo te tiwai po wali,

‘Senakerip, te Saion bulu dude bidibo we bidigo nageba gisugu mabo dwai mu eyu,
tama te Jerusalem bagego nageba posobo dwai weyu,
te nage begela dolobo dao.

²³Senakerip, nago posobo po weyu, te po dwai weyu,
te naga digi naga nogi ugwaba siyu,
hagoma po wali sogo,
nago homugo te nago de dali yali da homu yaliwe?
Nago ena dali tama yalio, te Israelgo God,
ena te Wiegi Yai Doloba Pai Kolesaga Ebo God dao.

²⁴Nago po te naga ami tobolu bidi ofisabolo mayu,
te augwaligo nago nogi ugwanu mu sali,
tama te enaba posobo po wali.

Te eno augwaligo pedauwalide
te tiwai po odali, nage Senakerip,
nage te naga karisde dolugulama,
te nage ugwanu mu igulama,
te Lebanon genuai bulu du dabeba
te nago tobolu usu nama,
nage te Lebanon genuai busi tomoba mu pali,
te bidi me pişabo buluba pali,
tama nago te bobage bobage ni sida dabe,
me te wiegi wiegi yai ni pain dabe togwali.

- 25 Tama nage gasa biligi pabo sogo nage te wę sqa pabeo.
 Te bulu tq tigidali wa pai madi,
 te wę ulu dabe nago nigali,
 te mu paęana pelama, te nago hani bidigo tumainu yali.
 Te nage te Isip genuai wę elaluboba pobaso,
 te nago saęago te wę dabe wa pomainu yai dao.’ ”
- 26 “ Senakerip, nago konebeo,
 te polobadu digi eno te sę ebode homu kone palama,
 tama nage te sę emainogo sa muyu daę ilali.
 Eno nageba bomo menama,
 nago te bomai obo elalubo taun dolomainu yai.
 Te nage peyu, nago te taun dabe alubaso,
 te augwali degasa pelama,
 te masigi pesage genuai holama,
 tama te pobele bage hogomu genuai pesage igulali.
- 27 Te taunde we bidi dabe wi mu yali,
 te augwa homu kolesaga umuna pelama, te augwa bomo kimi menia pali.
 Augwali te sasia pabo nosai tiwai elalu,
 te posola pai wali asobo sogo dela pabo tiwai elaluali.
 Te be pedude holobo nosai dabe,
 me te gasa madi holobo nosai dabe
 te bomai wali pedalubo sogo te bugagia me hologobeo.
- 28 Tialima, eno nage bugagia mu koneanio.
 Eno nago homu kolesaga,
 me te eno nago ebo kolesaga te nage pabo bulu tigidali me konea pali.
 Tama nago enade genuai haliga sębę elalubo me,
 te eno koneai dao.
- 29 Eno te nago haliga sębę ebo po,
 me te hagoma ebo po tigidali te tama kolesaga ebo po odali,
 te nago tama tiyu, naga digi naga nogi ugwaba sali.
 Tiali goli, megi da, eno nagede bomai po elalubao.
 Eno te huk te bisigi ebo nai selama,
 te nago gunide munama,
 te eno ain dage augwaligo te hos pedauwalide mubo nai selama,

te nago pedauwalide muaibao.

Tama nosali eno nage te naga asali sunumidu ma kekasa
paibao,' Genuai Bidigo te po wai."

³⁰Tama Aisaiago te Hesekiaba po me deli mayu, te Hesekiago te
Genuai Bidigo yaibao wabo şę tigidali te Senakeripba mu pedelaibao,
Genuai Bidigo te wali po dađ ebo tiwai te Hesekiago sulama, konemainu
te şę ola mawai. Aisaiago te po wai,

"Nago te tiwai dađ ilama, pedalubo sueibao.

Te kibu bede, te nosali kibu bede me,

te dagego nai me bulugobeo.

Dagego gide te olo pedelai nai wit sela tueibao.

Tiali goli, te sela wabo kibu bede,

teda dagego te gide nai bulama,

sela tueibao wali.

Tama me, te dagego te ni wain bulama,

te wain du sela tueibao.

³¹ Te Juda we bidi dabe, te boi

bidi dabego augwali dolisawani bage,

te augwali bugagia bidiyu, te hauwa pedelama,

te gide wit waigo pedali tđ aba munama,

tama te nai ge hauwa walobo tiwai yaibao.

³² Te boi bidi dabego te Jerusalem

we bidi tigidali me dologobeo.

Menio. Te augwali dwasianu hani me bididuaibao.

Te Tigidali Bomo Elalubo Genuai Bidi,

agai bomai homu kolesagade

te şę dabe pedalumainu yaibao."

³³ "Tama Genuai Bidigo po ma weyu, te tiwai po wai,

"Te Asiria king aga ami bidi dabe dali te Jerusalem

tomoba me asogobeo,

tama te ene deli te taun tomoba me enegobeo.

Te ami bidi dabego te hwıbo sabele te taun pađa me

tolasa asogobeo.

Te taun pađe augwaligo te tđdu me holama,

augwa tede dolalu, hwıainu me tegobeo. Mu menio.

³⁴ Ena Genuai Bidi, eno te Asiria king te aga asali

sunumidu te begasa ma pomainu ilaibao.

Tama tibaso, aga te Jerusalem tomoba me asogobeo.

³⁵ Eno tama tiaibao, magi baso meni,

eno ena genuai nogi homu kone palama,

te polobadu eno dađ wabo po ena şę bidi Devit dali

wali po koneyu, tama tiaibao,' wali.”

³⁶Tialima, te sogo hulide naga, te Genuai Bidigo ensel mobo bidi me deli te Asiria dabe bidalubo pesageba pelama, te umabo bidi sese hauwa 185,000 ami bidi ela muai. Te kigamu mu Senakerip hodaluama, te ami bidi dabe isai tigi munalua pabo سوالio. ³⁷Tialima, aga dali te meba bidibo ami bidi dali, augwali hogodama, te Asiria pabo sunumidu begasa wali palio. Tama Senakerip te moni hanu Niniveba pelama, bidigi pai dao. ³⁸Me sogo side deli sogo aga te aga tibo godigo lotu beba pelama, te aga god Nisrokba lotu udubo şe yali. Te aga ogwa sigo digi, te Adramelek me Sareser sigo, te bainat hwş selama, te lotu be tomoba pelama, te aga ela muanio. Te nosali augwa si wi pelama, te bulu tş kantri Araratba bidigi pai. Tialima, aga gasa ogwa me, aga nogi te Esarhadongo, te aga aya pesage hasegelama, te Asiria king pedelai dao.

King Hesekia gasi sobaso, te Genuai Bidigo aga tau sali
(2 Kin 20:1-11; 2 Sto 32:24-26)

38 ¹Te Asiria dabego te Juda dabeba dwai şe idu doludali sogo, king Hesekia te genuai gasi selama, te aga pađe isainogo yai. Tialima, profet Aisaia, te Amosgo ogwago, aga sugi pelama, agaba te tiwai po wali, “Genuai Bidigo te po wali, nago gasi te me siligobeo, nage te isaibao wali. Tama nago te naga bede bidibo bidi dabebolo po olama, te nago şe tigidali dodolao po wao,” te po wai. ²Hesekiago te po odobo si da, teda aga gesabidi te be habu daga badu begegi sulama, gedu haluasa po te tiwai wali, ³“Genuai Bidi, ena nage wali mu aselama, te nago şe yalio. Sesemane sogo eno te nago homu wali pai. Tama tialima, nago eno te yali şe dabe homu kone palama, tama nago ena isimainu me elamuo.” Aga te gedu haluasa po ola silama da, te aga gela umabo mu walio.

⁴Tialima, Genuai Bidigo Aisaiabolo te tiwai po ma wai, ⁵“Nago Hesekiabolo te tiwai po wagi pao, ena Genuai Bidi, te aga bulai wai Devitgo God, eno agai gedu haluasa po wali odolama, te aga gela genuagia wabo سوالio. Tama tialima, eno aga te kibu be nogo si olama, şagago a naga bidimainu yaibao wai dao. ⁶Tama me, te eno aga te Asiria kingo aiyaba elalumainu elama, te taun Jerusalem somainogo me iligobeo. Mu menio. Ena digi te dage seselalubo bidi bidaibao. ⁷Tama ena Genuai Bidi eno nageba te dađ ilibo şe me deli menama, te nageba eno te yaibao po dađ wali şe te nageba ola mawaibao. ⁸Te dađ ilibo te tiwai yaibao. Nago suali, te togobili polobadu te king Ahasgo nigali, te togobili dagego te be posali ulade te aua nedebo togobili elalubao. Te eno giliga noma bidi te togobilide te asesa polo nogo si dađba begasa somainu ilaibao,” wali.

Tama tibaso, te giliga nomago te polo asesa begasa ma pomainu ilama, te dađ nogo siba usu nigı pali.

⁹Tialima, te Hesekia usu ma igulali sogo, agai te po aşani,

- ¹⁰ “Eno homugo tama tiali, hobede ya,
 te megi tebogo ena gesi bidi tigi elalubadi,
 te ena isiyu, te tş taga paibao homu yai.
 Tama ena te isali bidigo bulu pesageba bidigi paibao.
- ¹¹ Ena te bidibo ula elalubo we bidi dali ma bidigobe
 da homu yali,
 te eno Genuai Bidi ma sugobeo wali.
 Ena te bidibo ula me elalusişbo bulu pesageba bidigi
 paibao homu yai,
 tama eno te bidibo ula elalubo we bidi ma sugobe homu
 yai dao.
- ¹² Ena te isai bidi tiwai yalio.
 Eno bidibo ula te sel ugwa be bidigo aluama,
 dolasa pali tiwai yalio.
 Te eno bidibo ula te bidigo tigi ugwa dinigilibo şş tiwai
 yalio.
 Eno homugo te bobobage igi paibao homu yali,
 tiali goli polo tama augwaligo togolama,
 te masinde ugwa hobolainu ebo tiwai yali.
 God, polo tama nago eno bidibo ula silimainu yalio.
- ¹³ Eno kone palali, nago eno nogo şaşş dili te hasa
 laion dili tologobo şş ebo tiwai iduama,
 te kigamuba usu nigi pabo tiwai yali.
 Te polo tama nago eno bidibo ula silainu yai dao.
- ¹⁴ Ena dene genuai eyu, te ena gela weyu, i wali,
 eno gela wali te ba higo po wabo tiwai yai.
 Te eno dagaluba ugwa tonaludu, sesabia pai elaluai,
 te nago ena tau somainu yali,
 te ena gedu dene elama,
 te gedu aş paşşana pai dao.”
- ¹⁵ “Te eno magi po wagowe?
 Genuai Bidigo te ena tau sabo po daşş wali,
 te megi aga digi te şş dabe mu pedalubao wali.
 Tama tibaso, enaba te pedelali genuai şşşş te
 homu kone palaibao,
 te ena digi ena aiyaba elaluama, te dua digi bidiyu,
 te ena isibo sogoba usu naibao wali.
- ¹⁶ Genuai Bidi, te tobage şş pedalubo
 te we bidi dabego kolesaga hasegelama,
 te gesi bidibo ula somainu yali.

Te enaba pedelali şe te gesi bidibo ula mawainu yai.

Nago eno gasi sia somainu elama,
te ena wiegi yai ma pedalumainu ilali dao.

17 Megi da, eno konebao, te şeşę dabe pedelali,
te ena tau sainogo naga yai.

Nago ena godolo mu elama,
te nago ena te isali bidi dabego
pesageba pomainu me ilibeo.

Te nago eno yali dwai şe şeşę dabede
homu kone me isayu, tagalai dao.”

18 “Te isali bidi dabego pesagede bidibo hani dabe,
augwaligo te nago nogi ugwaba me sogobeo.

Te nago naga we bidi dabe tau sabo wiegi yai şe ebo
te augwaligo me sugobeo.

19 Te bidibo ula elalubo bidi dabe,
augwaligo naga nago nogi ugwaba siyu,
te megi eno ebo tiwai yaibao.

Te aya dabego te augwa wai dabeba
te nago wiegi yai şe sesemane sogo ebo po waibao.”

20 “Genuai Bidigo ena usu ma ilali.

Te tigidali side da te Genuai Bidigo tempel beba pelama,
te balia po weyu, musik weyu,
te agai nogi ugwaba saibao.

Dago te tiwai şe te da bidibo ula
elalubo sogo tiwaibao,” te po wai.

21 Tama Hesekia te gasi me elaludubadi, Aisaiago te tiwai po wai dao,
“Te kingo şe ebo bidi dabego te ni kaya fik du dabe te augwaligo olali te
selama, te seselama, te Hesekiago bomai keniba magasao, te usu elama,
ma pedelaibao,” wali. 22 Tama me, te sogo me Hesekiago Aisaiabolo te
tiwai po hanalu wai dao, “Genuai Bidigo te magi daş ilibo şe enabolo ola
mayu, te ena agai beba lotu ma wagasomainu egowe?” wali.

Te Babilon king Merodakgo te bidi meba Jerusalemba tagala palali
(2 Kin 20:12-19)

39 1 Merodak Baladan, te Baladango ogwa, aga te Babilon king dao.
Agai te tiwai po odali, Hesekia te genuai gasi elalubao po odali.
Tiali goli, aga usu ma yali. Tama agai te pas asenama, te agai agaba
tolabo, te wiegi yai homu ilabo nai me deli dodolama muani, te bidi
mebabolo menama, te augwaligo sela pelama, Hesekiabolo magi pomainu
yai. 2 Hesekiago te bidi dabego po odolama, tialima megi da, agai te bidi
dabeba te mone dabe, me te aga gasa nai dabe augwaliba ola mawai. Te

agai mone mubo bede te tigidali silva me gol suali, te wiegi yai denami ebo pauda me sanda dabe, me te hwıbo nai tigidali, te gasa nai tigidali te aga bakstuade munolubo me, te ola mena silalio. Hesekiago te nai deli me dualubeo. Menio. Agai augwaliba te kingo moni be tomode elalubo nai tigidali ola mawai, me te aga tonalubo bulu tı kantri pedai tigidali ola mena silai dao. ³Te Babilon bulu bidi dabe ma pela silai madi te sogo, teda te profet Aisaia aselama, te king Hesekia suagasali, te agaba te tiwai po hanalu wali, “Te aselawali bidi dabe, augwali te mena bulu bidi dawe? Te augwaligo mena po nageba waliwe?” Tama Hesekiago agaba te tiwai po wei ponani, “Augwaligo ena suagasu asali, augwali te digibulu buludu mu asalio, te bulu tı kantri buludu mu asalio, te bulu tı kantri Babilon dao.” ⁴Tama Aisaiaġo te po wai, “Augwaligo te mena mena nai mu te nago genuai wiegi yai be tomode sualiwe?” Tama Hesekiago agaba po wei ponoyu, te tiwai po wali, “Eno te tigidali nai doado bage mu augwaliba ola mawai, te eno magi nai deli augwalide geme me dualubeo,” wali.

⁵Tialima, Aisaiaġo Hesekiabolo te tiwai po wali, “Megi da, te eno nagebolo te Tigidali Bomo Elalubo Genuai Bidigo po obao. ⁶Genuai Bidigo te po wali, te nosali sogo me sogo deli pedalubo si da, te Babilon dabe aselama, te kingo bede munalubo nai doado bage, te naga bulai wı dabego te bakstuaba sisinama muani nai saibao. Te nai me deli te augwaligo me sula tagalogobeo. Mu menio. Augwaligo te tigidali nai doado bage Babilonba selasa paibao. ⁷Te nago hanide digi te augwaligo te ogwa meba selama, augwali te Babilonba odasa paibao. Tama augwaligo sogoli te augwaligo dinama, tama augwali te kingo bede olo mu şe ebo bidi pedelama bidaibao,” Aisaiaġo te po wai.^a ⁸Hesekiago te po odolama, tama agai Aisaiabolo te tiwai po wali, “Te Genuai Bidigo po nago enaba pusubao, te wiegi yai po dao.” Hesekiago te po wali, magi baso meni, te aga homu kolesaga tomode, agai te tama homu elaluali, ‘Megi sogo ena te king bidibadi, te dwai şe dabe me pedalugobeo,’ homu yalio. ‘Te da bugagia bididubadi, te me hwıgobeo,’ wai dao.

Godigo aga we bidi dabe augwali ma dobola sabo homu yali

(Dqı 40-55)

Te Godigo we bidiba wiegi yai sogo pedelaibao wali po

40 ¹Duga Godigo te po odubao, “Eno we bidigo haliga dı walama, te augwa haliga dua nagame ilibo po pusao.

² Te wiegi yai po te Jerusalem we bidi dabeba mao,”

^a 39:7 Dan 1:1-7; 2 Kin 24:10-16; 2 Sto 36:10

wali.

“Augwaliba te tiwai po wao, te augwali kalabus bidali
sogo te silalio.

Ena Genuai Bidi, eno te augwaliba te augwa yali dwai
şede wei ponoma, te dwai dene mawai dao.

Awe, eno augwaligo yali dwai şe dolo usu nama,
tama te tiwai si naga te dene mawai dao.

Tama tialima, megi da, eno augwaligo
dwai şeşę tigidali sela şawai dao.”

3 Odao. Bidi me deligo te tiwai i wali,

“Te Genuai Bidigo sunumi te wa pai bulu tş pesagede
dodolao,” wali.

“Te bulude dena Godigo genuai sunumi pebeli diliba
ilao.”

4 Te tş odogo igulali pesage tigidali paşaniyu,
te bulu du tigidali pebela aiyaba tulao.

Te dolo si elaluşawani pesage te dolo si elama,
te du du yali pesage te malu tş naga pedelaibao.

5 Tama genuai ula me te Genuai Bidigo bomo te pebeli
diliba hanilama pedelaibao,

tama tşde we bidi tigidaligo sueibao.

Te po te Genuai Bidigo pedauwalidu digi asai dao,” wali.^p

6 Bidi me deligo te tiwai i wali, “Po pusao.”

Te eno po me wali,

“Mena po eno pusagawe?”

Te aşı te tiwai po wei ponani, “E po pusao.

Tigidali we bidi te tşde sesabi elama,

bobobage sogo mu me bidigobeo.

Augwali te nosai me plaua te polo tama wa pelama,

te sia sabo tiwai ebo dao.

7 Te Genuai Bidigo posolai wali augwaliba tagala
palobo si,

te nosai wa peyu, te plaua telegasa dulubao.

Mu tama, te we bidi dabe te nosai tiwai polo

sia sabo dao.

8 Te nosai wa pelama, te plaua dabe boga selama,
tulalueibao.

Tiali goli, te dena Godigo po da, te sesemane elalua pidu,

elalua paibao. Te po pusao,” wali.^q

9 Jerusalem, nage te genuai bulu duba holama,

- te bulude po pusao.
 Saion, nago bomonama, i hai weyu, te bulude po pusao.
 Nago po hanilama pusao, nage wi me igio.
 Nago te tiwai po te Juda dabego taunba walao,
 “Suao, te duga God asobao,” po wao.
- 10 Suao. Tigidali nai tonalubo Genuai Bidi aga bomo dali asobao.
 Agai te boi bidi dabe aiyaba elaluama,
 te aga we bidi dabe ma dobola sali,
 te aga boi hwiņama, te wiegi yai nai sabo tiwai yalio.^{r s}
- 11 Agai te aga we bidi dabe bugagia tonalubao,
 te sipsip tonalubo bidi dabego te aga sipsip bugagia tonalubo tiwai ebao.
 Te tonalubo bidigo te sipsip wai dabe te hagawiade pageasa bilaibao.
 Te aga dua digi pidu, te dwasianu wai dabe elalubo sipsipba te sunumi ola mayu, ela pidubo dao.^t

Te Israel hanigo God te tedali polalubo mu dao

- 12 Te me deli bidibo bidi agai nogode te tamu ąi tigidali sabua sabo bidi bidiba, agawe?
 Te dagalu daide ugwadu usu siyu ebo bidi me deli elaluba, agawe?
 Te tų tigidali kabude bubo bidi me deli elaluba, agawe?
 Te bulu du dabe te skelba munama,
 skel ebo bidi me deli bidibawe?
- 13 Dego te Genuai Bidiba te nai dabe nigibo kolesaga ola mawai bawe?
 Te agaba homu kolesaga ola maiabo usu elalubo homu ebo bidi me deli bidiba, agawe?^u
- 14 Tama dego agabolo te wiegi yai doloba pai kolesaga ola mawai dawe?
 Tama dego agaba te wiegi yai konea pabo homu kolesaga tigidali ola mawai dawe?
 Bidi deli me mu menio.
- 15 Genuai Bidigo te haniani kantri tųde we bidi suali,

^r 40:10 Te po begelebo gasa sunumi me da e tiwai elalubao, “Agai te boi bidi dabe aiyaba elaluai baso, te aga wiegi yai doado bage dali sela asiyu, te aga we bidi dabe augwaliba mawainu yai dao.” ^s 40:10 Ais 62:11; Ped 22:12 ^t 40:11 Jon 10:11 ^u 40:13 Rom 11:34; 1 Ko 2:16

- te olo nai gagawai tiwai ebao.
 Augwali te t̄ hogomu tiwai elama,
 te dwasianu āi tedebo tudulalubo tiwai āo ebao.
 Tama agai te tigidali bulu t̄ ailango sēge usu selama,
 te t̄ hogomugo sēge tiwai elalubo dao.
- 16 Te we bidi dabego te tigidali kibu hasa elali,
 me te Lebanon genuai ni silide te tigidali ni
 togolama,
 te augwaligo genuai sia nogolama,
 te kibu hasa tigidali te ofa tiwai eyu,
 te siago tigidali domainu igi da, te tagalao,
 augwaligo te ofa te God gedude olo nai tiwai igi dao.
- 17 Te tigidali t̄ pedai kantride bidibo we bidi augwali
 te Genuai Bidi gedude olo bage tiwai elalubao.
 Augwali te olo nai mu tiwai dao.
- 18 Tama tialima, God te de mu tiwai dawe?
 Te elalubo nai me deli te God tonobo tiwai ebo da,
 agawe?
- 19 Aga te bidigo nogogo nigai tibo god piksa noma
 elalua pabo tiwai da homu ebawe?
 Te tibo god piksa noma dabe da,
 te sē ebo koneai bidi dabego
 te piksa kapago nigilama, te golgo mesegelaibao.
 Te augwaligo silva selama, te sen dabe nigilama,
 te piksa nomaba daganainu ebo dao.^{v w}
- 20 Ma, te doado bage meni yai bidi dabego te tibo god
 piksa nigainu te damua piş̄bo bomai ni selama,
 nigaibao.
 Tama augwaligo te ni dulubo mu koneai bidibolo
 olama,
 te augwa tibo god piksa nigao po waibao.
 Te bidigo te piksa bugagia dulaibao,
 tiyu te piksa tulaluidali weyu tiaibao.
- 21 Te dagego konebe, agawe?
 Te dagego odobe da, agawe?
 Te polobadu mu te bidi dabego dagebolo
 te tigidali nai mena tama pedelali
 te po wasīwai meni da, agawe?

^v 40:19 Te koneai bidi mebago homugo te sen dabe olo au ilai nai tiwai naga da homu yali.
 Te meba koneai bidi dabego homugo te sen dabego te piksa tolalu, te augwali tulaluidali
 weyu dāq wabo nai da wali. ^w 40:19 Tpi 17:29

- 22 Te Genuai Bidi aga naga te dagalu daide te sia
kingde dugulaluali, agai te tigidali nai nigai dao.
Agai te dagalu te name ugwa tiwai dinigina palama,
te aga sel ugwa be şealubo tiwai elalui.
Te agai gedude, te tõe we bidi te olo nai kuli mano
tiwai dao.
- 23 Agai te king dabe te olo bidi tiwai pedalumainu
ebo dao.
Tama agai te bomai bidi dabe aiyaba elaluama,
te augwa nogi me elalubo menio.
- 24 Augwali te plaua dabe te bidigo tamadi tama bulama,
te augwa sele aiyaba dulusiawai tiwai elalubao.
Te Genuai Bidigo bomai posolai wali tagala palobo sogo,
augwali te deli sogo polo tama sasia pelama,
te baguasa pabo waligo augwali te hogomu sela
pabo tiwai ebo dao.
- 25 “Ena Genuai Bidi,
ena te Wiegi Yai Doloba Pai Kolesaga Tigidali Ebo
God dao,
tama ena tiwai de dawe?
Te eno kolesaga ebo tobage kolesaga ebo bidi tiwai me
deli elalu, bidibawe?”
- 26 Dagego te dagaluba ugwa tonama,
te ugwade elalubo hõ dabe suiõo.
Dego augwali nigai dawe?
Te Genuai Bidigo naga nigali.
Te nai dabe te Genuai Bidigo ami hani tiwai elalubao.
Agai augwaligo namba koneani,
te agai augwali deli deli nogi koneama,
tama agai augwali nogi nogi yaibao.
Agai tigidali bomo mu elalubo, tama tibaso,
te nai dabe te augwalide me deli me hagagobeo.
- 27 Dage Israel, dage te Jekopgo hani dabe,
magi baso dagego po hauwa dogia pobawe,
“Dago Genuai Bidigo te dago şeşe subeo,” po wai.
“Te dwai şe ebo sogogo da gegali,
tiali goli agai da tau sabo homu ebeo,” po wabo
dao.
- 28 Te dagego konebe da, agawe?
Te dagego odobe da homu eba, agawe?
Genuai Bidi te sesemane bidada pabo God dao,
tama agai te e tõe tigidali badu sese nigai bidi dao.

Te mena bidi mego agai homu kolesaga tigidali me
konea siligobeo.

Agai bomo kimi te meniama, te me sia sogobeo.

29 Genuai Bidigo te bomo meni yai bidi dabe daꝓ
walobaso,

te dili bomo kimi silai digi,

te agai augwali bomo selama, bidimainu ebo dao.

30 Te gesi ogwa bidi dabego te bomai bomo elaluali,
te kimi meniama sia sabo dao.

31 Tiali goli, te Genuai Bidiba konealubo homu daꝓ
olama,

te agai augwali tau sabo tonalubo we bidi dabe,
augwali te bomo sesemane elalu bidaibao.

Tama augwali bomonama eyu,

te ba kemodage bola pabo tiwai yaibao.

Te augwali udalama, te augwali homu he me egobeo,
te augwali bilidu, te bomo kimi me isigobeo.

Genuai Bidigo te Israel dabe ma saibao po wali

41 ¹ Godigo te po wali, “Dage we bidi dabe,
te paꝓe elalubo toꝓ kantri dabe,
me te digibulu elalubo toꝓ kantri dabe me,
dage tigidali pedauwali pania selama, eno po odiaꝓ.

Dagego po bugagia sisila dodola selama asiyu,
te duga po te po toꝓ eboha pusagasao.

Te da deliba sisinama, te po dagalama sueibao,
te dego po mu po yabowe naga konebo dao.

2 Dego mu te giliga pedalubo badu king
hodolama,^x te aga pabo usu nama,

tigidali habu badu te hwibode

aga ugwanu igulumainu yaliwe?

Tama dego te bulu toꝓ kantri aga nogoba munama,

te agai te gasa king dabe aiyaba elalumainu ilaliwe?

Te agai bainatgo me enesigi ene sesemonego te augwali
mu silama,

te augwali toꝓ hogomu tiwai pedelali,

te pobebe bage waligo sela pabo tiwai yai dao.

3 Aga te deli sogo naga polo tama augwaliba pedelama,

^x 41:2 Te po page e tiwai dao. Te ves 2 tede e tiwai po wali, “Te giliga pedalubo badu bidali king,” wali. Te king Sairus te toꝓ kantri Persiade bidai dao. Te Daꝓ 44:28, Daꝓ 45:1; Daꝓ 46:11, te daꝓe te po elalubao.

- te augwali doliyu yali,
tama augwaligo agaba magi şe yabo te usu meni
yai.
- Te waligo digi aga sela pabo tiwai eyu,
agai te tş me dwasianu dişbeo.
- 4 Dego mu te şe dabe pedalumainu ilaliwe?
Te Genuai Bidi, eno naga dao.
Te eno tş gagalama pedalumainu yali sogo,
sesemane sogo eno tigidali nai te tşde
pedalumainu dodoludalio.
- Ena Genuai Bidi ena hasia polasa mu bidali.
Te ena nosali badu sogo me bidaibao.”
- 5 “Te tigidali tş kantri we bidi dabego
te eno yali şe dabe sulama,
te augwali wi elama, noma sali.
Te augwali deliba sisinagaselama,
- 6 te augwade digi haliga daş walabo po dabe minama,
- 7 tama augwa te tibo godigo piksa nigalio.
Te nigo piksa dulubo bidi dabego te golgo nai nigibo
bidi dabeba te po wali,
‘Dagego te wiegi yai şe mu ebao.’
Te gol haluama dodolobo bidi dabego te aingo nai
nigibo bidi dabeba te po wali,
‘Iya, tegobao, dagego te nai bugagia mu daş walobao.’
Te nosali augwaligo te piksa dabe bugagia enani,
tiyu te augwali tulaluidali weyu tiai dao.”
- 8 “Tialima, dage Israel, dage te Jekopgo hani da,
eno dage sa muyu, daş ilama,
te dage eno şe bidi bidibao.
Dage te bulai wai eno abagi Abrahamgo hani dao.”
- 9 Eno dage te digibulu bulude mu,
te tş sesege badu mu selama,
tama dage odasa asali.
Te eno te tiwai po dagebolo wali,
dage eno şe bidi bidibao wai.
Eno dage daş iliyu, dage te ena dao wali,
te eno dage hagela eyu,
te dage tudiba me mubeo. Menio.
- 10 Dage wi igio, magi baso meni, ena duga God da,
ena dage dali bidibao.

Te eno dage boma pai pedalumainu ilama,
te dage eno tau saibao.

Te dage eno bugagia tonalu,
te eno genuai bomogo te eno dagego
boi bidi aiyaba elalueibao wali.

11 Te dagede haliga şeşelama,
te dage po tuşba odasa pobaso da,
te dage augwaligo aiyaba elalusişbaso,
te augwali hale dwai mu yaibao.

Te augwali olo nai tiwai mu pedelama,
te augwali mu hagawaibao.

12 Te dage dali hwınama,
te dage dolainu homu yali hani dabe,
te augwali olo nai tiwai mu pedelama,
te augwali tode mu hagawaibao.

13 Ena Genuai Bidi, te duga God dao,
eno dage ugwaba sagualu tonalu,
te eno te tiwai po dageba obao, dage wi me igio.
Te eno dage tau saibao, te po wai dao.”

14 Genuai Bidigo te tama po wali,
“Te dage Israel te dwasianu hani da,
te dagego bomo meni da wagio,
ena dage ma sabo bidi,
te eno dage ugwaba sagualu tonalu, tau saibao.

Ena dage Israelgo God dao,
ena te Wiegi Yai Doloba Pai Kolesaga Mu Ebo God
dao,
eno te dage ma dobola saibao wali.

15 Te eno dage te wit agayabo te gesi ni nami tiwai
pedalumainu ilama,
te dageba seşemayu,
te dage sunumi palialuali boi bidi dabe te dagego
aiyaba elalueibao.

Te augwali te bulu du tiwai bidali goli,
dagego te bulu du dabe pepedama,
te wit bo yalala pai nai tiwai pedalubo bomo elalubo
tiwai yaibao.

16 Dagego te seşelusişayu,
te bidigo te bo dabe ugwaba şanama,
te waligo tolasa pabo tiwai yaibao.

Tialima, dagego wiegi yai pemene te Genuai Bidi enaba
yaibao.

- Te dagego ena nogi ugwaba saibao, te Israel God da,
 ena te Wiegi Yai Doloba Pai Kolesaga Ebo God dao,”
 wali.
- 17 “Te eno we bidi dabe te aꞑ mu sꞑa pelama,
 te augwali dogoni te aꞑ tuabo wa pali sogo,
 te augwaligo ena i obaso, tialima ena, Genuai Bidi,
 te eno augwaligo gedu haluasa po wabo odaibao.
 Ena, te Israelgo God, te eno dage
 homu kone me gegeda palogobeo.
- 18 Eno te wa pai bulu du dabede te aꞑ
 pedalumainu ilaibao,
 te ulu aꞑ te odogo malu tꞑde pedelaibao.
 Tama eno te sigi aꞑ te wa pai pesagede
 pedalumainu ilaibao.
 Tama te aꞑ meni yai pesagede,
 te aꞑ hauwa elalueibao wali.
- 19 Tama eno te dwagi yai ni sida dabe,
 me ni wuli dabe, me te bulu ni oliv dabe,
 me te ni saipres dabe, te gasa tobage ni dabe,
 te olo masigi kemi tꞑde pedalumainu yaibao.
- 20 Tama te we bidi dabego sulama,
 tama augwa te tiwai koneaibao,
 ena God, te Israelgo Genuai Bidi,
 ena te Wiegi Yai Doloba Pai Kolesaga Ebo God dao,
 ena digi eno te sꞑ pedalumainu ebo dao,” te po wali.

Te tibo god dabe te augwali mu god menio

- 21 Genuai Bidi, te Israelgo king dao,
 agai te tama po wai,
 “Dage te gasa bulu tꞑ kantri god dabe,
 dage te po tꞑ eboba asiꞑo,
 te po tꞑ ebode dagego po odomainu yaibao.
 Te dagego pusabo po bugagia dodolao,
 tama te po tꞑ eboba asao.
- 22 Te po tꞑde dagego te polobadu pedelali sꞑ po weyu,
 te yali sꞑ dabego po page dabolo pusao,
 te dago hania koneaibao.
 Tama dagego te nosali badu pedelabo nai po me wao.
- 23 Tama te nai dabe pedalubo sogo, te dago koneyu,
 te dage god mu da te homu yaibao.
 Dagego te da wi yabo sꞑ me deli iyꞑo
 te wiegi yai nai, ma dwai nai, te sꞑ yao.

- Tama tialima, te dago dagego bomo sueibao.
 24 Tiali goli, menio. Iya, tegoba!
 Dagego magi şe me deli yabo usu isawai,
 magi baso meni, dage tibo god dabe
 te olo dwai nai naga dao.
 Tama te dagebolo lotu po wabo we bidi,
 augwali me eno gedude te dwai nai mu pedela silai
 dao.”
- 25 “Eno te giliga pedalubo badu bidi me deli hodolali.
 Te bidigo enaba genuai nogi mobao,
 tama megi eno te not badu sela aselama,
 tama agai te king dabe aiyaba elaluama, agayu,
 te tço sopen sene nigibo bidigo te tço agalama,
 te sopen nigibo tiwai ebao.
- 26 Dage te gasa bulu tço kantri god dabe,
 te dage tomode dego te nai pedelaibao po waliwe?
 Te dage tomode me deligo te tobage po wali wida,
 teda dago te po weyu,
 agai mu po wali da po waibao.
 Tiali goli, dage me deligo te nai pedelaibao po me
 wabeo.
 Tama dage me deligo te po wabo bidigo me odobeo.
- 27 Ena, Genuai Bidigo naga eno te bulu du Saionba
 weyu,
 te nai pedelaibao wai.
 Tama megi da, suiço, te nai dabe pedelalio.
 Te megi me, eno te bidi me deli tagala palama,
 te Jerusalemba wiegi yai po sela pomainu yai dao.”
- 28 “Eno te tibo god dabe gegali sogo, te eno suali,
 augwaligo te po deli me wasiawai.
 Augwaligo homude te wiegi yai homu kolesaga elalubo
 po pusabo homu meni yai.
 Te me deligo eno hanalubo po wei me ponabo usugobeo.
- 29 Suao. Augwaligo te mena şe me deli ebaso usugobeo,
 magi baso meni, augwa digi te olo nai naga dao.
 Te tibo god dabe te olo piksa dabe naga elalubao.
 Augwaligo te magi şe me deli yabo bomo me elalubeo,”
 te po wai dao.

Genuai Bidigo şe bidi e dao

42 ¹ Genuai Bidigo e tiwai po wai, “Suao, eno şe
 bidi e dao.

- Sesemane sogo eno aga daꝓ walobao.
 Ena eno aga sa munama, daꝓ ilali,
 tama sesemane sogo eno agade wiegi yai homu
 pemene geninama, idubao.^z
 Eno ena mobo noma bidi agaba muani,
 tama agai te doloba pai kolesaga naga igidali te tꝓde
 we bidi haniba selasa asaibao wali.
- 2 Te agai po wabo sogo, te genuai po daꝓ i hai olama,
 po me wagobeo.
 Tama aga te sunumi dabede doligi pelama,
 te agai po bomonama me pusugobe.
- 3 Tama te agai te bomo meni yai,
 te togwa painu ebo awi dili,
 te agai tigidali me togwa saꝓbeo.
 Tama agai te ula bugagia isiꝓbo lam sula somainu me
 iligobeo. Menio.
 Agai te bomo meni yai we bidi tau sabo kolesaga yaibao.
 Agai te doloba pai kolesaga pedalumainu bomo ilaibao,
 agai te seꝓ ebo me tagalogobeo.
- 4 Te aga haliga seꝓe me isiꝓyu,
 te seꝓeꝓo aga aiyaba elalumainu me iligobeo.
 Agai seꝓe bomo elama eyu, agai doloba pai kolesaga ebogo
 te dwai kolesaga ebo kolesaga aiyaba elaluaibao,
 te tigidali tꝓ habu usu nama bomo elalumainu
 ilaibao.
 Te digibulu bulu we bidi dabe te aga tonaluaibao,
 te agai augwali bugagia dugulalu bidabo kolesaga
 ola momainu yaibao.”^a
- 5 God Genuai Bidigo te dagalu me tꝓ nigilama,
 te augwa pesageba munama, elalubao.
 Tama agai te tꝓde haniani nai ni me nosai pedalumainu
 ilali.
 Tama agai te bidibo ula te tꝓde we bidi dabeba mobo
 ponama, mawai.
 Te Godigo aga seꝓ bidiba te tiwai po wali,^b
- 6 “Ena Genuai Bidigo digi,
 eno nage i olama, te eno doloba pai kolesaga
 ola momainu yai.
 Te nage eno ugwaba pogalu bugagia tonaluaeibao.
 Te nagede naga, te eno te Israel hani we bidi dali

^z 42:1 Mat 3:17; 17:5; Mak 1:11; Luk 3:22; 9:35 ^a 42:4 Mat 12:18-21 ^b 42:5 Tpi 17:24-25

bomai po daų walaibao.

Tama nage eno te Israel hani isawai hani dabego ula tiwai ilama, bidaibao.^c

⁷Te nago te gedu hwidai bage dabe te ma tonomainu ilaibao.

Nago te kalabusive bidibo bidi dabe,
me te be hulide bidibo bage me,
te magi naigo me tonalusiama,
te olo mu bidimainu ilaibao,” te po wali.

⁸“Ena naga ena Genuai Bidi.

Genuai Bidi, te eno nogi dao,
tama dagego genuai nogi ena deliba naga maiąo.
Dagego te tibo god dabego nogi ugwaba me sigio,
te bidi dabe augwa digi nigai dao.

⁹Dagego suiąo.

Te polobadu eno po weyu,
te pedelaibao wali nai dabe, megi augwali pedelalio.
Te megi eno dagebolo te gasa nosali badu pedelabo nai po walobao,
te augwali pedalisiąbadi,
te dagego konealumainogo te tiwai po obao,” wali.

Tigidali we bidigo te Genuai Bidigo nogi ugwaba sino

¹⁰Dage tade we bidi tigidali,
dagego gesi balia po weyu,
te Genuai Bidi nogi ugwaba sino.

Dage te sipidu bilibo bidi dabe,
me te tamu aąide bidibo hasa dabe,
dagego agai nogi ugwaba siąo.

Dage te digibulu tade kantride bidibo we bidi dabe,
dagego te gesi balia po waiąo.

¹¹Dage te bulu taun wa pai pesagede bidalubo we bidi dabe,
me dage te Kedar hani we bidi dabe,
dagego te i bomo elama weyu,
te aga nogi ugwaba siąo.

Dage te taun Sela we bidi dabe,
dage te bulu du dabe bageba holama,
te wiegi yai homu pemene dali i waiąo.

¹²Tama dage te pade bidibo we bidi dabe,

^c 42:6 Ais 49:6; Luk 2:32; Tpi 13:47; 26:23

- me digibulu bidibo we bidi dabe,
 dage tigidaligo te Genuai Bidi nogi ugwaba selama,
 te agaba genuai nogi maiąo.
- 13 Genuai Bidi te bomai ami bidi tiwai elalu,
 te megi agai hwığı painu paibao.
 Agai te po daęą genuai olama, i weyu,
 te ami dabego ebo kolesaga tiwai te aga haliga şeęę
 hodolama,
 te hwıabo sisi elalubo tiwai yaibao.
 Te agai aga boi bidi dabe dali hwınama,
 te augwali aiyaba mu elaluaibao.
- 14 Genuai Bidigo te tama po wai,
 “Te bobobage sogode eno pedauwali
 pania selama, te ena dua digi bidali.
 Eno ena haliga şeęę te palia selama, te eno magi deli
 me ebeo.
 Tiali goli, megi eno te gela bomonama weyu,
 te wego wai ame nainu dene ebo sogo gela wabo
 tiwai obao.
 Ena te homu hę weyu, te homu hę wabo bomo elama,
 kekebo dao.
- 15 Te eno bulu du dabe dolama,
 te nosai dabe me ni dabe sasia pomainu ilaibao.
 Tama eno te genuai soabo wę dabe dali,
 te sigi ağı me, sula somainu ilaibao.
- 16 Te eno ena we bidi dabe te polobadu
 augwali bilisąwai sunumidu odasa asaibao.
 Megi augwali gedu halua sai hulide bidibao,
 tialima te be hulua sai elalubo te eno sela şanama,
 te augwaliba ula mawaibao.
 Tama eno te dwai pesage elaluali te dodolama,
 te dolo yai pesage ilama,
 te augwali bilabo madi tiaibao.
 Eno te şę dabe te mu pedalumainu yaibao,
 te eno te şę yaibao wali po tiwai gilama yaibao.
 Te eno magi nai me delide homu kone ebo me kegeda
 palogobeo.
- 17 Tialima, te tibo god piksa dabeba lotu weyu,
 te nai augwa god dao tiwai po wabo we bidi dabe,
 eno augwali sela şawaibao.
 Tama augwali hale dwai mu yaibao,” wali.

Te Israel dabe te olo degai, me gedu widai tiwai bidali

- 18 Genuai Bidigo te po wai,
 “Dage Israel te olo degelama, te gedu mu widalio.
 Dagego olo dala pelama, po odoyu,
 te gedu peda pelama, tonao.
- 19 Dage eno şe bidi tiwai bidimainu elama,
 tama eno dage sa muyu, daş ilama, te dagego eno po
 sela pomainu yali.
 Tiali goli, dage te olo degelama, te gedu mu widali,
 tama te olo degeyu, gedu widiyu yai bidi dabe,
 te augwali aiyaba mu elalualio.
- 20 Dagego te nai hauwa sulama, te po hauwa odali,
 tiali goli, dagego te nai dabe bugagia tonosişyu,
 te poba olo bugagia me mubeo,” wali.
- 21 Genuai Bidigo te doloba pai kolesaga naga eyu,
 tama agai te we bidi dabe ma dobola sabo kolesaga
 ebode dwagi yai homu ebao.
 Tama tibaso, aga bomo yai po dageba mobao,
 te gasa bage dabego sulama,
 te tiwai konemainu ebao,
 te bomo yai po te wiegi yai mu, te mu polalubo dao.
- 22 Tiali goli, megi dage Israel dwai mu bidibao.
 Te boi bidi dabego dage dolagaselama,
 te dagego doado bage wi sela palio.
 Te augwaligo dage me sela pelama,
 tama dage te be dabede,
 me tş dedage dabede kalabus elama, elaluali.
 Te dage augwaligo nogode ma dobola sabo bidi deli me
 meni yai elalubao.
- 23 Tialima, dage tomode dego te poba olo muaibawe?
 Megi gagalasa, te dagego eno po bugagia odaibawe?
- 24 Dego mu te şe yao po obaso,
 te boi bidi dabe aselama,
 te da Israel dabego nai dolama, wi sagasaliwe?
 Dego mu te da Jekopgo hani bage
 te augwaligo nogoba muaniwe?
 Te Genuai Bidigo naga dao.
 Magi baso meni, dago aga tudiba munama,
 te dwai şeş sabo şeş yai.
 Dago te agai wei homu ebo kolesagade dolo bilişama,
 tama dago agai bomo yai po sela şawai.

25 Tama tibaso, agai te boi bidi dabego
 daba hwı̄gasomainu tagalama,
 te dago agai haliga şeḃe ebo page konemainu yali.
 Agai haliga şeḃe te sia dabo tiwai elama,
 te Israel mu ulali.
 Tiali goli, dago tede kolesaga selama,
 te dago kolesaga me hasegelebeo.

Godigo te aga we bidi dabe ma dobola sabo dao po wali

- 43** 1 Dage Israel dabe, dage Jekopgo hani,
 Genuai Bidigo dage deli hani pedalumainu ilali,
 agai te tiwai po wai,
 “Dage wi igio, magi baso meni, eno dage ma sali dao.
 Eno dageba nogi menama,
 tama dage te ena da olama, sa muyu ɗaɗi ilai dao.
- 2 Dagego te aɗi gebo aianu dulai te nogebo sogo,
 te ena dage dali bidaibao,
 tama te aɗigo dage me dologobeo.
 Awe, dage te soabo aɗi nogebo si,
 te aɗigo dage mesegelegobeo.
 Tama dage te posolo yai sia tomoba mu pabo sogo,
 te siago dage me dogobeo.
 Te sia bogoligo dage dogobeo.
- 3 Magi baso meni, ena Genuai Bidi,
 ena te Israel dabe duga God, te eno dage tau saibao.
 Ena te Wiegi Yai Doloba Pai Kolesaga Ebo God dao,
 eno naga eno dage ma dobola sobao.
 Dage te boi bidi dabego nogode bidibo sogo,
 eno te Isip dabe, me Sudan dabe,
 me Seba dabe menama,
 dobu si eyu, dage Israel bage ma saibao.
- 4 Tama eno te gasa hani we bidi dabe me siyu,
 te dage ma dobu si yaibao,
 te dage bugagia bidimainu yaibao.
 Magi baso meni, dage eno godolo homu ebo
 umabo mu idu,
 te eno dageba genuai nogi mawainu ebao.
- 5 Ena dage dali bidibao, dage wi me igio.
 Dage hani dabe te giliga pedalubo badu,
 me giliga dega sabo badu bidibo,
 te augwali eno ma odasa asaibao.
- 6 Eno te bidi dabe te not badu,

me saut badu bidibo bidi dabebolo olama,
 te dage ma asomainu ilao waibao.
 Te eno we bidi dabe te digibulu mu,
 te t̄ sesege badu bidali me,
 te augwali eno ma odasa asaibao.
 7 Dage te eno nogi elalubo hani mu da,
 te ena digi eno dage nigali,
 te gasa hani dabego dage sulama,
 te enaba genuai nogi momainu ebo dao,” wali.

Te Israel dabe te Genuai Bidigo ebo şe sulama, koneani bage tiwai dao

- 8 Godigo te po wai,
 “Te eno we bidi dabe i olama, sisingasomainao.
 Te mu tama, augwaligo te nai subo gedu elalu,
 te po odobo olo elalubao.
 Tiali goli augwali gedu widai me olo degai tiwai bidibao.
 9 Te gasa bulu t̄ kantri we bidi dabe
 te po t̄ yabo pesageba sisingasalio.
 Te augwaligo mena godigo te mena şe nosali pedelaibao
 wabo po hania pusaliwe?
 Te augwaligo mena godigo polobadu po weyu,
 te pedelaibao wali nai megı pedalubowe?
 Te augwaligo ebo şe sualı mena bidi hani dolugulama,
 te tiwai po weyu, agai te god me deligo te nai me
 pedelaibao po wali,
 tama nosalı agai sualı, te wali şe mu pedalubo
 dawe?”
 10 “Tialima, dage Israel, dage te eno po odolama,
 pusubo bage dao.
 Eno dage sa muyu, dađ ilama,
 te ena şe bidi bidimainu yalio.
 Tama tiyu da, te dagego ena koneama,
 enaba homu dađ weyu, tama te tiwai dagego
 bugagia koneyu,
 te ena deli naga te God mu da omainu ebao.
 Polobadu te god me deli me pedalisiađma,
 te aga polasa bidiyu,
 te ena nosalı badu me elalubeo.
 Tama nosalı me, te god me deligo ena bidalı pesage
 me hasegelegobeo.
 11 Ena naga ena Genuai Bidi dao,
 tama sesemane sogo eno dage ma sabo dao.

- Te gasa god dage dali me bidiyu,
te dage tau me sabeo. Menio.
- 12 Eno naga enade po hanilama weyu,
eno dage ma dobola saibao,
te eno dage ma saibao po wali gilama yaibao.
Te dage eno po odolama, pusubo bage
elalubao, tama dagego e po pusaibao,
te ena deli naga ena God, Genuai Bidi dao.
- 13 Megi me, tigidali sogo, ena te God mu bidibao.
Te eno we bidi me deli te bonogo kębo tiwai eyu da,
te niwai bidi me deligo te eno bomo sela şanama,
te augwali eno nogode ma dobola sogobeo.
Te şę me deli eno ebaso da,
te mena bidi me deligo eno te şę ebo
me paligobe,” te po wai.

Godigo te Israel dabe Babilonde kalabus bidibo ma saibao

- 14 Genuai Bidi, aga te dage Israel Dabego te Wiegi Yai
Doloba Pai Kolesaga Naga Mu Ebo God,
te aga dage ugwaba sagoalu,
te dage ma dobola sabo bidi, agai te po wali,
“Te eno we bidi dabe dage tobade eno te ami bidi dabe
te Babilonba hwięagasomainu tagala palaibao.
Te Babilon dabe tigidali augwa te wiegi yai homu
pemene ebo te sip dabe daiba holama,
te augwa bidali bulu pesage tagalama, wi paibao.
- 15 Ena naga ena Genuai Bidi,
ena dagego te Wiegi Yai Doloba Pai Kolesaga Naga
Ebo God dao.
Eno dage Israel dabe te deli hani we bidi pedalumainu
ilama, te megı ena duga king bidibo dao.”

16 “Polobadu ena Genuai Bidi, eno te tamu aı tomode sunumi nigai dao. Awe, eno te bomai aıdu soabo tu nigai dao. 17 Tama eno te boi bidi hauwa dali, te augwa karis me hos dabe dali, augwa te tamu aı sunumi tomodu wali asobadi, te augwali mu dolama, te munu ma hogodalubeo. Augwali te polo tama mu isila pali, te lam sole bidigo pona palobode isibo tiwai yalio. 18 Tialima, megı eno te po obao, dagego eno te polobadu yali şede naga homu kone paligio. Menio. 19 Dagego te gesi şę eno eboba tonono yao. Te megı pedaludubo şę te dagego sube da, agawe? Te wa pai pesage badu te eno sunumi nigilama, tama eno te aı dabe tebadu pomainu ilaibao. 20 Te bulu uni hasa dabe te uni yowi dabe tiwai, te ba uni dabe

me, te augwaligo ena genuai nogi mawaibao, eno te aı te wa pai bulu pesageba asomainu ilama, pedalubo side, te ena digi eno sa muyu daı ilali we bidi, augwa te aı tumainu tiaibao. ²¹Eno te we bidi dabe te ena hani we bidi digi pedalumainu ilali, te augwa wiegi yai pemene eyu, te eno genuai nogi po pumainu te tama tiaibao wali.” Genuai Bidigo te po wali.

Te Israel dabego dwai kolesagago te Godiba seęę mawai

²² Genuai Bidigo te po wai, “Dage Israel dabe,
dage te Jekopgo hani,
eno dage te eno hani we bidi digi pedalumainu ilali
goli,
dagego eno nogi wasiaıyu, enaba lotu wabeo.
Tama magi naigo tibaso, te dagego enaba hagela eyu,
te dagego ena godolo mu isiaıyu ebawe?”

²³⁻²⁴ Te dagego haliga homu kolesaga enaba beaga
sisama,
te dagego haniani ofa ebo sogo tama tibao.
Te dagego te sipsip dabe te tigidali siaba mu uluyu,
ofa tiwai ebo sogo,
tama dagego te tobage awi te denami ebo nai abelama,
te agaba ofa ebo sogo,
te dagego te kibu hasa ili hauwa pesage holama,
te ofa tiwai eyu ebo sogo,
te dagego enaba homu kone palama, te ofa dabe ebeo.
Eno dageba te seęę mayu, te dageba po bomu eyu,
dagego te wit ofa me,
te wiegi yai denami ebo hano
ebo ofa me, sesao po wabe, tama te seę dene ebaso,
te dagego enade hagela homu ebeo. Mu menio.
Tiali goli, dagego genuai seęę enabolo menama,
tama ena dagego te dwai seę ebode,
me haniani dwai kolesaga ebode hagela mu ebo dao.

²⁵ Tialima, ena Genuai Bidi, ena genuai nogiba digi
homu kone palama,
te eno dagego dwai seę ebo seęę tigidali sela saıo
dao.

Tama eno te dwai seę dabeba homu kone me palogobeo,”
te po wali.

²⁶ “Tialima, dagego homu kone palao,
te dagego dwai seę me ebe homu eba wida,
teda dagego eno homu dodolama,

te da tede po minao.

27 Tiali goli, menio.

Te dagego hasia wai nõugo te dwai şe yali,^d
te dagego tobolu bidi dabego me eno
po sela şawai dao.

28 Tama tibaso, eno te het pris dabe eno gedude meda
yai pedalumainu ilali.

Te eno dage Israel dai ilali, te Jekopgo hani dabe,
te tigidali mu dolomainu yaibao.

Tama eno te gasa hani we bidigo te posobo po weyu,
te dageba gisugu momainu yaibao,” wali.

Genuai Bidigo aga we bidi dabe tonalubao

44 ¹Genuai Bidigo te po wali, “Awe, eno dage
dolomainu yaibao.

Tiali goli, dage Israel dabe,
dage Jekopgo hani, dagego odiao.

Ena digi eno dage dai ilama,
te dage eno şe bidi bidibao.

²Eno dage te deli hani we bidi pedalumainu ilali.

Eno dage sisi ilama, dage dai iliyu,
te dage tõe pedalisiaşadi,
te sogo te dage ena hani da olama,
dai ilibo tiwai yali.

Te eno dage negeyu, tonalua asali,
te megi e sogoba usu nagasobao.

Ena digi eno dage dai ilama,
tama dage eno doloba pai şe bidi bidibao.

Tama tialima, ena Genuai Bidi, eno te po obao,
dage wi me elamu dao.

³Te ai şa pabo tũa eno te ai gelaibao,
tama te wa pai tõe te ai somainu ilaibao.

Te eno mobo bidi te dagego wai dabeba gelaibao.

Te eno dagego waigo ame nabo wai dabeba
wiegi yai bugagia ilaibao.

⁴Tama augwali te wẽ ili hauwa elalubo nosai
bugagia holobo tiwai yaibao,
te ai sesegede ni dabe holobo tiwai puapi holaibao.

⁵Te meba gasa Israel hani isawai we bidigo
konealubo homu enaba dai waibao.

^d 43:27 Dago homu te “hasia wai nõu” bidi da, te Jekop dao.

Augwali mebago te tiwai po waibao,
 ‘Ena Genuai Bidigo bidi dao,’ waibao.
 Te mebago te po weyu,
 ‘Ena te Jekopgo hani da,’ waibao.
 Te me badugo eno nogi te augwa nogode aşeibao.
 Te me badugo te po weyu, ‘Ena te Israel hani da,’
 po waibao,” wali.

**Te tibo god nigibo bidi dabe, augwali te
 kolesaga umuna sai bidi mu dao**

- 6 Tigidali Bomo Elalubo Genuai Bidi,
 aga te Israel king da,
 te dage tudibadu pogalu, te dage
 tau sabo bidi, agai te po wai,
 “Ena Genuai Bidi, ena hasia polasa mu bidali,
 tama ena nosali te sabi badu mu bidaibao.
 Te gasa god munu me bidibeo,
 enaduba deli naga bidibo dao.^e
- 7 Te ena tiwai god me deli bidibawe?
 Te aga bidiba wida, teda aga digi te daba pedalubo
 sueibao.
 Tama agai me dabolo te aga polobadu polobadu mu
 yali şe po omainu yaibao, te eno gagalama,
 te we bidi pedelali po tiwai wabo odaibao.
 Tama agai te nosali pedelabo şe po me omainao.
 Awe, te aga hanilama pusao,
 te da tigidaligo te nosali yabo şe po
 hania pusubo odaibao.
- 8 Eno we bidi dabe, dage wi elama, dili tidibi igio.
 Polobadu digi eno dageba weyu,
 te şe pedelaibao po wali.
 Tama dage te eno ebo şe po te mu po da wabo bage
 dao.
 Te ena tiwai gasa god me bidiba homu eba, agawe?
 Eno te me deli munu me konebeo.
 Ena deli naga te dagego toma nabo bomai pesage tiwai
 elalubo dao.”
- 9 “Te tibo god piksa noma nigibo bidi dabe,
 augwa digi te dwai mu ilibao.
 Te sawi wiegi yai piksa augwa wiegi yai pemene ebo,

^e 44:6 Ais 48:12; Ped 1:17; 22:13

- augwali te olo nai tiwai ebao.
 Te tibo godiba lotu wabo bidi dabe, tiwai bidibao.
 Tiali goli, te augwali hale mu yaibao, magi baso meni,
 augwaligo te tibo godigo magi şe me deli ebo
 me sugobeo.
- Augwali te homu kolesaga mu umuna sai bidi tiwai dao.
 10 Augwaligo mena tobage homu kolesaga elalubo,
 augwaligo te tiwai tibo godigo piksa nigibawe?
 Te tibo god dabego augwali dwasianu munu me
 tau sogobeo. Mu menio.
- 11 Te tibo godiba lotu wabo bidi dabe te hale dwai
 mu yaibao,
 magi baso meni, te bidi dabe augwa digi te tibo god
 nigibao.
 Eno homugo te augwa tigidali sisinagaselama,
 te augwa dolugulama,
 te augwa tibo godigo mena şe ebo po te pusumainu
 yaibao.
 Mu tama, te eno augwali wi mu ilibaso,
 te augwali hale dwai mu yaibao.” Te po wai.
- 12 “Te aingo nai nigibo koneai bidi dabego te ain
 selama,
 siaba munama, nagamea pabo si,
 tama augwa te tibo god piksa nigibo dao.
 Augwa te hama nogogo tulama, te ainba elibaso,
 te augwa bomogo digi te piksa nigilama pedelali.
 Te augwa şe ebo sogo, te augwa nai me wę tusiawan
 da,
 te augwa bomo tigidali sia sabo dao.”
- 13 “Te nigo piksa noma nigibo koneai bidi dabego,
 augwa te wiegi yai ni dage selama, usu selama,
 te bugagia mu dodolama, te piksa nigainu ebo dao.
 Tialima, te pensilgo te piksa noma aşenama,
 te piksa togwabo bugagia usu nama usu sali.
 Nosali augwa te ni togobo nai sisel selama,
 te aşani dıdu wali pelama,
 te piksa togoyu, sawi mu elama,
 te sawi gesi ogwa bidi me deli tonobo tiwai ebo dao.
 Tialima, augwa te nigo dulama nigali tibo god,
 te augwa lotu be tomoba muyu ebo dao.
- 14 Augwa te şe yainogo te dwagi yai ni sida togwali.
 Tama augwa te busi tomoba pelama,

te wiegi yai ni kali dabe gegegi pelama, habu
selama,
dađi ilali, augwa te ni genuai igulubo sogo togwainu
tiali.

Te augwa te ni wuli wai me bulali,
te tulubagego te ni genuai ilibo tonaluali,
augwa te ni selama, te se yainu tiai dao.

15 Augwa te ni dabe togolama,
te me badu togwa sabo ni dage te tigi posolo ilabo
nogabo sia sali,
tama te togwa sabo delage me badu te bret ulabo sia
sali.

Tiali goli, te ni dage me deli augwa selama,
te augwa tibo god piksa nigilama,
augwa lotu po teba wai dao.

16 Augwa te tama kolesaga te ni dabede yalio.
Augwa te sia nogolama,
te nai me hasa ula tuainu yali,
te augwa nai tulama, haliga pađanani.
Tama me, te augwa tigi posolo iliyu,
te po wali, 'Sia wiegi yai mu dao,
te eno tigi bugagia mu posolo ilibo dao,' wali.

17 Tama te ni dabego naga te augwa tibo god nigiyu
yali.
Te augwa kidu sugunama, te augwaliba lotu wabo dao.
Te augwa te tiwai gedu haluasa po weyu,
'Nago ena tau sao, magi baso meni,
nage eno god dao,' te po wabo dao."

18 "Mu tamao, te tobage we bidi dabe
te homu kolesaga mu umuna selama,
te augwa homu kolesaga mu meni yai.
Te magi nai me deligo augwa gedu paliama,
te augwa tonono bilibo usu isađo tiwai ebo dao.
Te magi nai me deligo augwa homu kone tuđ palobaso,
tama augwa te homu kone tuđ pabo kolesaga ebo
dao.

19 Te homu kolesaga elalubo bidigo da,
te kolesaga dagalama, te po weyu,
'Eno te ni delagego te sia me badu nogoyu,
te eno bret me kibu mi ulama tubao homu igi dao.
Magi elama eno te ni dagego me deli selama,
te piksa dwai nai me deli nigilama,

kidu sugunama, teba lotu oba, agawe?’ te po wagi
dao.

Tiali goli, te homu kolesaga kone tuş pai
we bidigo homu kolesaga menişayu,
tama te tobage po augwaligo me wagobeo.

20 Augwa homu kolesaga te mu kone tuş palio,
tama augwa te geda mubo homu kolesaga mu eyu,
te bidigo sia keli tubo tiwai yalio.

Te we bidi dabe me deligo homu kolesaga dolo ma siyu,
te po wabo sunumi deli me menio,

‘Te eno dolo nogode tolalubo nai, te ni dage naga,
te god meni,’ te po wagobeo.’ ” Te po wai.

Te agai genuai bomogo Genuai Bidigo te Israel dabe ma sali

21 Genuai Bidigo te tama po wali,

“Dage Israel, dage te Jekopgo hani,
dage eno şę bidi dao, dagego ena homu kone gegeda
paligio,

te eno dage deli hani we bidi pedalumainu ilama,
te dage eno şę ebo we bidi bidibao.

Tama eno dage homu kone me gegeda palogobeo.

22 Eno dagego dwai şę yali seşę sela şawanio,
tama augwali te pş waligo selasa pabo tiwai yalio.

Te dagego yali dwai şę te kigamu pş te giliga
pedalubode sia sabo tiwai yalio.

Eno dage ma salio, tama tialima,
dage enaba ma asişo,” wali.

23 Dagalu, nage wiegi yai pemene elama, i wao,
tama te tş dologode aiyadu elalubo nai dabe,
dagego i waişo.

Dage bulu du dabe me, dage te genuai ni silide elalubo
tigidali ni dabe,

dagego wiegi yai pemene elama, i wao.

Tigidali nai i wao, magi baso meni,

Genuai Bidigo bomo me genuai nogi

te dage Israel dabe ma sali sogo ola mawai dao.

24 “Ena Genuai Bidi, ena dage tudibadu pogwalu,

te dage ma dobola sabo bidi,

eno naga eno sisilama, dage dş ilali,

te ena hani da olama,

te dage e tşba pedalisişbadi tama tiali.

Eno te tiwai po dageba wainu eba.

Enaduba deligo naga eno te tigidali nai
pedela silimainu ilali.

Eno naga eno te dagalu me t̄o nigilama,
te augwali bidabo pesageba munama,
te megi elalubo dao.

25 Eno te magi nai me deli te nosali pedelaibao po
wabo bidi dabego po te homu kone tuā palama,
tama te augwaligo po geda mueibao.

Tama te mena ş̄ aga nade konea pai bidigo po homu
kone tuā palaibao.

Te po page konea pai bidigo homu kolesaga te eno
umuna palobo bidi tiwai pedalumainu ilibo dao.^f

26 Te eno ş̄ bidigo magi ş̄ yabo po me deli pusubo
sogo,

tama te ş̄ nosali badu pedelaibao,
te po eno wabo sogo da,

teda eno te po mu naga pedalumainu ebo dao.

Te megi eno te tiwai po obao.

Te we bidi dabe te Jerusalemde ma bidigi pelama,
bidaibao.

Me te Juda dabego taun augwa ma nigaibao.

Te megi dolama elalubo hanu dabe
te eno ma wiegi yai nigilaibao.

27 Eno te po wabo sogo, ‘Tamu aḡ,
nage sula sao,’ obaso da, teda aga te sula sabo dao.

28 Tama eno te tiwai po wali,
ena digi eno te Sairus te Persia bagego king tiwai
nigilali,
te eno homugo emainu ebo ş̄ tigidali agai emainu
homu yali.

Agai te po obaso, augwaligo te Jerusalem ma nigaibao,
me augwaligo eno be ş̄ yabo ş̄ gagalaibao,” te po
wali.^g

Genuai Bidigo Sairus king pedalumainu nigilali

45

¹ Genuai Bidigo te tiwai po wali, “Eno te
Sairus sa munama,
te Persia bulu t̄o kantri king pedalumainu yali,
te agabolo eno te gasa bulu t̄o kantri dabe aiyaba
elaluama,

- te gasa kingo bomo dabe silimainu yabo bomo
mawai.
- Ena digi eno te taun obo sunumi dala palama,
te Sairus tomoba pelama, te taun somainu elali.
Te Sairusbolo eno te tiwai po wai dao,
- 2 “Te nage pabodu ena polasa peyu,
te bulu du pesage dabe me alula tagalama,
te doloba pai pesage nigilaibao.
Eno augwaligo te brasgo nigai genuai hanu sunumi
aluama,
te boma pai ba aingo te daŋ walali sunumi
te me aluama, dala şawaibao.
- 3 Eno te mone nageba mayu,
te hani dabego te bidigo susayabo pesagede dualali
wiegi yai dila pai nai dabe te nageba mawaibao.
Tama tialima, te nago koneaibao,
ena naga Genuai Bidi da waibao.
Te nago koneyu, te Israelgo Godigo naga
te nago nogi olama,
te nage i wabo da homu koneaibao.
- 4 Te eno şe bidi Israel hani tau sagasao po olama,
eno nage i wali,
te Jekopgo hani we bidi te ena digi sa muani.
Mu tama, nago ena konesiawai,
tiali goli eno nage nogi olama,
te genuai nogi nageba mawai dao.’ ”
- 5 “ ‘Enaduba deli naga ena Genuai Bidi da,
te gasa god me bidibeo.
Sairus, nago ena konesiawai,
tiali goli te eno naga te bomo nageba mabo dao.
- 6 Eno tama tibaso,
te tigidali tŋ habu pedai we bidigo
te tiwai konemainu yali,
ena deli naga ena Genuai Bidi,
te gasa god munu me bidibeo.
- 7 Eno naga eno te po obaso, te be posoyu,
be huliyu ebao.
Te eno naga te we bidi bugagia bidimainu ebao,
te eno augwali te genuai şeş somainu yaibao.
Genuai Bidi eno naga,
eno te şe tigidali pedalumainu ebo dao.’ ”
- 8 “Dagalu, nage te dage pŋ dabe me,

dagego te wiegi yai sogo augwaliba ilibaso,
 te tulubage t̄ba tulumainao.
 Te augwa bugagia bidimainu,
 te wiegi yai doloba pai kolesaga bomo elama,
 pedalumainu ebao, te t̄go tulubage selama,
 te gide nai dabe bugagia holobo tiwai emainao.
 Ena Genuai Bidigo digi,
 eno te ş̄ dabe pedalumainu tebo dao,” te po wali.

Genuai Bidigo naga te tigidali nai tonalubao

- 9 Mena bidigo te Godigo aga nigalide
 wado po wabo bidi da,
 te bidigo kolesaga te umuna sai mu yali,
 magi baso meni, da bidi te olo nai gagawai dao.
 Da te t̄go nigibo sene pepeda pelama,
 e t̄de tedali munalua pabo tiwai elalubao.
 Te t̄go nigibo senego te nigibo bidiba
 te tiwai po hanalu,
 “Nago magi nai nigibawe?” po wagawe? Menio.
 Te t̄go te po wabo homu yaibao,
 “Nago te nai nigibo konesiawai dao,”
 te tobage po wabo usugowe? Mu menio.^h
- 10 Mena bidigo te aga aya idabolo te tiwai po hanalu,
 “Te magi nai dage sigo ame nani dawe?”
 te po wabo bidigo kolesaga te umuna sai mu dao.
- 11 Genuai Bidi, Israelgo Wiegi Yai Doloba Pai Kolesaga
 Mu Ebo God da,
 te God agai te Israel deli hani we bidi pedalubo ş̄
 ilali, agai te tama po wai,
 “Te nosali pedelabo nai po wabode
 dagego te eno ena wai puluba tonalubo ş̄ po munu
 me wagio,
 te mena kolesaga te eno ena ş̄ eyu,
 wali pabo po me wagio.
- 12 Eno naga eno te t̄o nigali,
 te bidalubo we bidi dabe me nigali.
 Te ena digi eno te giliga, me polua,
 me h̄o dabe tonalubo dao.
- 13 Te eno digi eno te king Sairus hodolama,
 te eno ena ş̄ wiegi yai doloba pai emainu yali.

^h 45:9 Rom 9:20

- Te eno aga painu ebo sunumi tigidali dodolaibao.
 Te agai eno taun Jerusalem ma nigimainu yaibao.
 Te agai eno we bidi dabe kalabuside bidali
 te olo tagala palama pomainu yaibao.
 Te şe dabe ebo te bidigo aga me abeligobeo. Menio.
 Aga olo mu şe yaibao.
 Ena, te Tigidali Bomo Elalubo Genuai Bidigo,
 eno te po wai dao.”
- 14 Genuai Bidigo te po wai, “Te Isip tş kantrigo mone
 doado bage tigidali,
 me te tş kantri Sudango doado bage tigidali me,
 te dage Israelgo saibao.
 Te boi bidi dabego te tş kantri Seba
 bobobage bidi dabe te kalabus ilama,
 te augwali dageba tagala palaibao.
 Tama augwaligo nogo te sen dabego dunama,
 augwali dage wali asu, te augwali dagego olo şe ebo
 bidi dabe pedelaibao.
 Te augwaligo dageba kidu sugunama,
 tama wi eyu, te tiwai po waibao,
 ‘Mu tamao, God dage dali bidibao,’ waibao.
 ‘Aga deli naga te God mu,
 te gasa god me bidibeo,’ waibao.
- 15 ‘Nage te Israelgo God,
 nago te naga we bidi dabe ma sabo God dao,
 te gasa we bidi dabede nage te naga digi geme duala
 selama elalubo dao.
- 16 Te tibo god piksa nigibo bidi dabe,
 te augwali hale mu yaibao.
 Awe, te augwali tigidali te hale ebo kolesaga tomoba
 mu paibao.
- 17 Tiali goli, Genuai Bidigo dage Israel ma selama,
 te sesemane sogo agai dage ugwaba igulama,
 ugwa ela holomainu ilaibao.
 Te dage gasa we bidi hani dabede munu ma hale me
 isama,
 te dage sesemane sogo bugagia bidada peyu, bidada
 paibao.’
 Te Seba tş kantri bagego te tobage po waibao,”
 Genuai Bidigo te po wai.
- 18 Genuai Bidi naga te God.
 Agai te dagalu dali, tş dali si nigali bomo mu pedelali.

Agai te t̄o olo elalumainu nigibeo. Menio.
 Agai te t̄o page bugagia dodolama,
 tama tigidali nai tede elalumainu nigali.
 Agai te tiwai po obao, “Enaduba deli naga ena Genuai
 Bidi,
 te gasa god munu me bidibeo.

- 19 Ena geme dualalu, digibulu me bidibeo,
 ena te be hulua sai pesagede, digibulu geme me
 dualalu, te eno po pusubeo.
 Te eno ena we bidi dabe,
 te Israel dabeba, te tiwai po weyu,
 ‘Dagego ena te olo bulu pesagede gegebo
 ş̄ odolali yao,’ wabeo. Menio.
 Ena Genuai Bidi, eno te mu po naga pusubo dao,
 te eno po tigidali dolo wabo dao,” wali.

Tigidali t̄de we bidigo te Genuai Bidi dologode bidao

- 20 Genuai Bidigo te tiwai po wali,
 “Te tigidali t̄o kantri we bidi dabe, dage sisinagasīo.
 Te hw̄iani sogode dolis̄ama bidalubo we bidi dabe,
 dage tigidali te po t̄ba asīo.
 Tama dego te tibo god piksa dali sela asobo bidi,
 aga homu kolesaga mu meni ebao.
 Aga te tibo godiba gedu haluasa po weyu,
 aga tau somainu tiaibao,
 tiali goli te god te bidigo nigo dulama naga nigali,
 tama agai te bidi tau sabo usu me egobeo.
- 21 Dage tigidali we bidi, dage aselama,
 dagego po te po t̄ba pusagasao.
 Dagego duga haside digi hanalu, te gega suyu bolo yao,
 mena god mugo te polobadu mu po wali ş̄ po te
 megi tama pedalubo daweo?
 Ena Genuai Bidi, ena deligo naga eno
 te nai dabe pedelaiba po pusali.
 Tama suao. Te gasa god munu me bidibeo.
 Ena te doloba pai kolesaga naga ebo God,
 eno te ena we bidi dabe ma dobola sabo God da,
 enaduba deli naga ena bidibo dao.”
- 22 “Dage tigidali bulu t̄o habu we bidi dabe,
 dage enaba asīo,
 te dage bugagia bidaibao, magi baso meni,
 enaduba deli ena God, te gasa god munu me bidibeo.

- 23 Ena Genuai Bidi, ena nogide digi
 daide ugwadu mu po obao,
 te eno pedauwalide wali po te me hasegelegobeo.
 Eno te tama po wali, te t de tigidali
 we bidi enaba aselama,
 te enaba kidu sugunagasaibao,
 te augwali tigidaligo ena dologode naga bidabo po
 da  waibao, te po wai.ⁱ
- 24 Te augwaligo te tama po waibao,
 ‘Genuai Bidigo naga te da tau siyu,
 te da da  waliyu,
 te doloba pai kolesaga ugwa igulama,
 ugwa ela holomainu yaibao,’
 te po augwaligo waibao,” wali.
 Tigidali we bidi agaba asobaso,
 te agaba haliga se e ebo hani dabe
 te augwali dwai hale mu yaibao.
- 25 Tialima, te Jekopgo bulai hani wa  dabe,
 te augwa ugwa ela holama,
 te genuai nogi elalumainu elalide,
 te augwa wiegi yai pemene Genuai Bidiba yaibao.

Genuai Bidigo bomo naga elalubao, te tibo god dabe olo piksa dao

- 46** ¹⁻² Genuai Bidigo te tiwai po wai,
 “Dage Babilon dabego te Bel me Nebo si
 nogi ugwaba sobao,
 te si duga tibo god si elalubao,
 te augwali si dagego tolasa,
 te genuai lotu wabo side sabilibao.
 Tiali goli, te augwali sigo genuai nogi te sia saibao,
 te dagego te tiwai sueibao,
 te augwa digi tau sabo bomo meni yaibao.
 Te boi bidi dabego te Babilon taun dolagasobaso,
 te dagego augwali si te donki dabede ke aibao.
 Te donki dabego te hobedagia,
 te augwali si te kalabus dage dali
 sela pabo se  dene yaibao,” te po wai.
- ³ “Tialima, dage dwasianu Israel te bidibo hani,
 dage te Jekopgo hani, dage hani eno selama,
 te bugagia negeyu tonaluali,

ⁱ 45:23 Rom 14:11; Fil 2:10-11

- te dage gesi hani we bidi pedelali sogo gagalasa,
tama tiali, dagego odao.
- 4 Ena duga God dao, te eno dage tonalua pidubadi,
te dage monu dabe eboba usu nama,
te ayadeba nisi elaluaibao.
Ena digi eno dage deli hani we bidi pedalumainu ilali,
te sesemane sogo eno dage auşlu, te tonalu,
te dage ma dobola saibao.”
- 5 “De mu ena tiwai dawe?
Te dagego eno kolesaga te de dali mu dagalaibawe?
Te eno kolesaga tiwai gagawai ebo bidi deli bidiba,
agawe?
- 6-7 Tiali goli, bidi mebago te gol me
silva hauwa pesage holama,
te augwa tibo god piksa nigainu dagalaibao.
Tialima, te nai dabego te augwa tibo god nigali.
Tialima, augwa te tibo god augwa nageba munama,
te tolasa pelama, te augwa muabo
nigilali pesageba mugi pabo dao.
Augwa teba kidu sugunama, lotu wabo dao.
Te tibo god te mugi pali pesage delide naga munaluali,
magi baso meni, aga digi te gasaba bilabo usu
işawai.
Te agai te bidi dabego aga gedu haluasa po weyu,
i wabo wei ponabo usu meni yai,
agai augwali te dwai sogode
tau sabo me usu egobeo. Mu menio.”
- 8 “Dage hagoma eyu, po sela şabo bidi dabe,
dagego eno te pusubo po bugagia homu kone palao.
Tama tiyu, te dage bomo elama, dolalueibao.
- 9 Tama dagego eno te polobadu mu
yali şe homu kone palao,
magi baso meni, enaduba deli naga ena te God,
te gasa god me bidibeo.
Ena naga ena God, te ena tiwai god me bidibeo.
- 10 Te magi deli me pedalisiaşbadi,
eno te tama şe pedelaibao po weyu,
te mena tama siligi pabo po waibao.
Polobadu digi eno te şe pedelabo po olama,
tama nosali te nai dabe te eno po wali gilama pedelaibao.
Te eno mena şe me deli yainogo da,
teda te şe eno eyu naga yaibao.

- Te magi nai me deligo eno te şe yabo sunumi
me paligobeo.
- 11 Eno te giliga pedalubo badu bidi me deli
asao olama, i wali,^j
agai te ba kemodage bola asobo tiwai yaibao,
te agai eno yabo homu yali şe yaibao.
Eno te şe yao po walio,
te eno po wali tiwai gilama te tama pedelaibao.
Te eno yaibao olama, daş ilali şe, eno te şe ebo dao.”
- 12 “Dage hagoma bidi dabe, eno po odao.
Dagego homugo te eno dage sa munama,
ma saibao wali sogo,
te digibulu elaluba homu eba, agawe?”
- 13 Menio. Te paşa pedelalio.
Te eno munu ma tonalugobeo.
Te eno dage Israel dabeba boi bidi ebo
bidi dabeba dene mu menama,
te dage bugagia ma bidaibao.
Te Jerusalem taun me wiegi yai bugagia ma ilaibao,
te eno ena genuai nogi me bomo te dage Israel dabe
tomode hania pepeli diliba pedalumainu yaibao,”
wai dao.

Genuai Bidigo te Babilon dolaibao po wali

- 47** ¹ Genuai Bidigo te tiwai po Babilonba wali,
“Babilon, nago genuai nogi mu elalubo,
te kwin we aga sia kingde dugulalubo tiwai ebao.
Tama nage te gesi wegi bidigo sisawai
bugagia mu bidibo tiwai ebao.
Tiali goli, megi da, te nage sia kingde
bidali tagalama,
te nage olo tş bulude dugulalueibao.
Te nago tigi te polobadu elaluali tiwai gilama
sawi yai me elalugobeo.
Tama te bidi dabego nage te au bugagia elama,
bilibo ma sugobeo.
Mu meni yaibao.^k
- ² Te nage olo mu şe ebo we tiwai gilama şe yaibao.
Te nago tobolude ugwadu banualuali ugwa nami,

^j 46:11 Te “giliga pedalubo badu bidi wali,” te king Sairus dao. Te po te Daş 41:2-3, tede elalubo suo. ^k 47:1 Rom 14:11; Fil 2:10-11

me te nago sawi yai ugwa dabe me dagala şanama,
nago te wit halubo masigi dabe hogogo belebo şe
yao.

Tama nago gudali ugwa sugua selama,
te ađ dabe nogwaibao.

3 Te bidi dabego nago ugwa peda şanama,
te nago habu olo elalueibao.

Te eno nageba dwai dene wei ponabo şe mu ebaso,
te mena bidigo ena me togologobeo,” te po wali.

4 Te Israelgo God, te agai da tudi badu pogwalu
ma dobola sabo bidi,
aga te Wiegi Yai Doloba Pai Kolesaga Mu Ebo God
dao.

Agai nogi da, te Tigidali Bomo Elalubo Genuai Bidi dao.

5 Genuai Bidigo Babilonba te tiwai po wali,
“Babilon, nago te naga pedauwali pania selama,
te be hulua sai pesageba duagi pao,
magi baso meni, te gasa hani we bidigo nageba
te nogi munu ma wasiaıyu,

‘Te tigidali bulu tı kantri kwin da,’ po me wagobe.

6 Eno wado po dwai mu te ena we bidi dabeba wali,
te eno augwali te ena we bidi da
te tiwai homu kone munu ma ebeo.

Te eno nage aselama, augwaliba dwai şe
yagasomainu ilali,
te nago augwaliba homu dene
dwasianu me ebeo. Menio.

Nago augwaliba dwai dene mu ilama,
te augwaliba genuai seęe mawai.

Te nago monu dabeba me te augwali
genuai seęe mu tolomainu ilalio.

7 Nago homugo nage te kwin sesemane
sogo bididuaiba homu yali,
tama tiyu, nago te nageba nosali pedelabo şe te
bugagia homu kone palobeo.

Mu tama, tede nago homu kone palobeo.”

8 “Nage te wiegi yai sogo naga gegelama bidabo homu
ebo we, te po odao.

Nago homugo nage bugagia bidaiba homu eyu,
te dwai şe nageba me pedalugobe da homu elama, te
naga digi nago te po wali, ‘Enaduba deligo eno
tigidali bomo elalubao,

- te ena tiwai gasa me meni,' wali.
 'Te ena te tiwai we, te aga bidi isama,
 te aga wai puluba me isai,
 te tiwai me pedalugobeo,' homu yalio.
- 9 Tiali goli, hobede ya, te deli sogo naga te şe şı
 nageba pedalaibao.
 Naga bidi dali, naga wai puluba tigidali me,
 te deli sogo naga isaibao.
 Nago te naga digi naga tonalubo haniani
 bomai pobi po elaluba homu yaibao,
 tiali goli te pobi pogo nage tau me sogobeo. Menio.
 Te dwai şego isaboba kegebao."¹
- 10 "Nago tama homu yali, te naga dwai kolesaga
 dabego te nage daş walama, bidaiba homu yai.
 Tama nago homugo te nago ebo şe
 te bidi dabego sube da homu yai.
 Te nago koneani tobage hauwa kolesagago,
 te nago homu kone tuş palama,
 te nagaba digi nago te tiwai po wali,
 'Enaduba deligo naga tigidali bomo elaluba,' homu yali,
 'te ena tiwai gasa me elalubeo,' wali.
- 11 Tiali goli, te dwai sogo mu nageba pedelaibao,
 te nago geda muabo bomo meni yaibao.
 Deli sogo tama mu te dolabo genuai şe nageba
 pedalubaso,
 te magi şe me deligo nago te dolobo şe paliabo
 usu meni yaibao.
 Te dwai nai dabe te nago homugo
 nageba pedalugobe da homu yali,
 te pedaliyu, nage mu dolaibao.
- 12 Wiegi yai da, nago te haniani bomai pobi usu sidu,
 te nage gesi sogo gesi tigi elalubo
 sogo usu selama, konea sali.
 Te augwaligo nage tau sabo homu yali.
 Te augwaligo nago boi bidi dabe wi ilama,
 wi paibao homu yali.
- 13 Te kolesaga koneani bidi hauwago
 te nageba homu kolesaga mayu,
 te nago homu mu daş walali.
 Tiali goli, nago te kolesaga koneai bidi dabego

¹ 47:9 Ped 18:7-8

te hõba tonomainu i ola suali,
te bidi dabe te tigidali poluade nageba aselama,
te nageba mena şe pedelabo po wali.

Te augwaligo nage tau sabo homu egobewe?

14 Tiali goli, menio.

Augwali te sasia pai nosai tiwai elalubao,
te nage dolainu ebo siago te augwali tigidali daibao,
te augwa digi augwa tau me sogobeo.

Mu tamao, nago homugo nage te isi pãba duagi pelama,
sia gogo naiba homu me egobeo. Menio.

Te siago nage tigidali daibao.

15 Mu tamao, nageba te homu kolesaga mani bidi dabe,
te nage gesi tigi elalubo sogo
te bidi dabego nage tau sali bidi dabe,
te augwali homu kolesaga umuna palama,
te me deligo nage tau me sogobeo,”

Genuai Bidigo te po wai dao.

Bidi dabego God deliba naga genuai nogi maião po wali

48

¹Dage Jekopgo hani dabe, dage we bidi nogi

Israel elalubao,

dage te Judago bulai wãigo wai dabe, dagego odao.

Dagego po daş waliyu, nogo guni sisu muyu,

dagego te Genuai Bidigo nogide

mu po dao po wabo dao.

Tama dagego te tiwai po weyu,

dagego te Israelgo Godiba lotu obao po wali,

tiali goli dagego aga dologoba mu pelama,

te doloba pai me ebeo wali.

²Tama duga digi duga nogi ugwaba siyu, te po weyu,

dage te God aga digi sa muyu, aga da wali,

te taungo hani we bidi da, po wabo dao.

Tama dage te Israelgo Godide

tau mabo sainu tonalubo dao.

Aga nogi da, te Tigidali Bomo Elalubo Genuai Bidi dao.

³Agai e tiwai po dage dali elalubao wali,

“Polobadu mu eno te po dageba pusuyu,

te nai dabe pedelaibao po wali,

tama eno polo naga tama te şe dabe

pedalumainu ilali.

⁴Magi baso meni. Eno te tiwai bugagia koneani,

dagego tobolu te masigi me ain dila pai tiwai elalu,

- tama dagego eno po wali me pişawai dao.
- 5 Tama tialima, polobadu mu eno te dageba pedelabo
nai po hanilama pusali, tiyu dagego te po waidali,
te dagego tibo god dabego,
te piksa dabe dagego te nigo me aingo nigibo nai
dabego te nai dabe pedalumainu yali da po waidali,”
te po wai.
- 6 “Te nai dabe te eno polobadu te pedelaibao po wali,
te augwali pedalubo dagego سوالio.
Te megi dagego te tama po waiya, ‘Genuai Bidigo mu
po wabo da po wao.’
Tialima, megi te eno dageba te gesi noma nai pedelali
po obao,
te geme dualaluali nai dabe,
te nai po eno polobadu me wabeo.
- 7 Megi eno te po obaso,
te gesi noma nai mu pedelaibao,
te polobadu me pedalisiawai nai dabe.
Tama te nai te dagego munu me konesiawai,
tama dagego te tama po me wasiama,
dagego te nai dabe koneai da po me wagobeo.
- 8 Eno te tama koneani, te eno gagalama,
dage te deli hani we bidi pedalumainu ilali sogo,
dage te po sela şayu,
hagoma ebo hani mu pedelali.
Tama tibaso, eno te nai dabe po
dageba hanilama, me pusubeo.”
- 9 “Eno dageba haliga şeş mu elama,
eno dage silabo homu yali,
tiali goli sesemane sogo eno
ena genuai nogiba homu kone palama,
te eno haliga şeş homu aiyaba
tamugulali, te we bidi dabego
eno nogi ugwaba somainu tiai dao.
- 10 Eno dage wiegi yai pedalumainu homu yali,
tialima eno dage te siaba me ulusiama,
te bidi dabego silvade ebo tiwai eyu,
te aga meda yali sela şawainu ebo tiwai ebo.
Menio.
Eno dageba te haniani şeş pedalumainu ilali, te
dagego dwai kolesaga ebo tagalomainu yai dao.
- 11 Eno ena genuai nogiba homu kone palama,

eno te kolesaga dageba yalio.
 Eno homugo te bidi dabego eno nogi elaluama,
 begela dolidali homu elama,
 te gasaba genuai nogi me magobeo. Menio.
 Augwaligo te ena deliba naga genuai nogi momainogo
 ebo dao,” te po wali.

**Genuai Bidigo naga te Sairus sa munama, te
 agai te boi bidi aiyaba elalumainu ilali**

- 12 Genuai Bidigo te tiwai po wai,
 “Dage Israel, eno i wali we bidi dabe,
 dage Jekopgo hani dabe, dagego eno po odiąo.
 Enaduba deli naga God dao.
 Ena polasa mu bidai, te nosali ena sabi badu
 nosali mu elalueibao.”^m
- 13 Te ena nogogo digi eno nigilama,
 te tų page eno daų walali,
 te eno dolo nogogo te dagalu diniginama, elalubao.
 Eno te dagalu de tų si i wabo sogo,
 te polo tama augwali si aselama,
 te eno geduba dolagasobo dao,” wali.
- 14 “Dage tigidali, dage sisinagaselama, eno po odao.
 Te tibo god me deligo dageba
 te tiwai po me pusai menio,
 “Te Genuai Bidigo godolo homu mu ebo bidi te aselama,
 te Genuai Bidigo sę yagasu, te Babilonba hwąiaibao.
 Te aga bomogo digi, Genuai Bidigo
 te Babilon dabe aiyaba elaluaibao,’
 te tibo god me deligo te po wabe.
- 15 Menio. Ena deligo naga eno dageba weyu,
 te bidi asaibao po wali.
 Ena digi eno aga asao olama, i wali.
 Te eno aga odasa aselama,
 te agai te boi bidi dabe aiyaba elalumainogo yai
 dao,” wali.
- 16 “Megi da, dage ena paąba aselama, eno po odiąo.
 Polobadu digi gagalasa asali, megi sogoba usu nagasu,
 ena te sesąwai pesagede geme dualalu,
 augwaliba te nai pedelaibao po pusubeo. Menio.
 Te sę dabe pedalisiąbadi, eno te tonalu,

^m 48:12 Ais 44:6; Ped 1:17; 22:13

te şe mena tama pedelabo te eno digi dodolobo şe yali,” te po wali.
 God Genuai Bidigo aga bomo yai mobo bidi dali ena tagala palai dao.”

**Genuai Bidigo aga we bidi dabe bugagia
 wiegi yai ilabo sisilama elaluali**

- 17 Genuai Bidi, aga te Israelgo Wiegi Yai Doloba Pai Kolesaga Mu Ebo God,
 aga te dage tudibadu posolalu, te dage tau sabo bidi, agai te tiwai po wali,
 “Ena Genuai Bidi, te duga God dao.
 Sesemane sogo eno te doloba pai kolesaga dagego wali peyu,
 dage bugagia bidimai hagede ola mabo dao.
- 18 Te dagego eno po odigi sogo da,
 teda dage bugagia megi bidiyu,
 te sesemane sogo dagego bidabo ula te wiegi yai pemene ebo paşanalugi da,
 te aşı sesemane sogo sodu, te sula sisabo tiwai igi da.
 Te dagego doloba pai kolesaga te bomo elama,
 sesemane sogo pedaludu, te tamu aşı nambisde peda pabo tiwai igi da.
- 19 Te dagego wai dabe te hauwa mu,
 te nambis aşı masigi kemi sane tiwai pedeligi da.
 Te eno augwali bugagia tonalu,
 te augwa nogi te e tşde mu sia sigi menigi da.” te po wali.
- 20 Dagego te tş kantri Babilon tagalama,
 tama te bulu we bidi dabede wi soao.
 Te duga pemene elama, genuai po daşa weyu,
 te tigidali tş habuba po tagala palu, te tiwai po wao,
 “Genuai Bidigo te aga şe bidi Israel ma dobola salio,” po wao.^o
- 21 Polobadu, Genuai Bidigo aga we bidi dabe te bulu tş wa pai pesageba odasa pali,
 tiali goli augwali weş nogonego me isibeo.

ⁿ 48:16 Te dago konesişwai, te dego mu te Godigo aga tagala palai da po wali. Bidi mebago homugo tiali te profetgo po da homu yali, te mebago homugo te Genuai Bidigo şe bidigo po da wali. Te Daşı 42:17, te mebago homugo te king Sairusgo po dao, te homu yai dao.

^o 48:20 Ped 18:4

Menio.

Agai te masigide ađ pedalumainogo ilali.

Agai te masigi dalama,

te ađ buluba asobode te augwa tuali.

22 Genuai Bidigo te tiwai po wali,

“Te dwai kolesaga ebo we bidi dabe,

te augwa bugagia wiegi yai bidabo sogo me

gegegobeo,” te po wai dao.^p

Genuai Bidigo se bidi te tigidali to kantrigo ula tiwai bidaibao

49 ¹Dage te bulu to kantri pađe, me digibulu
bidalubo we bidi dabe, dagego eno po ođio.

Te idago ena ame nisabadi, te Genuai Bidigo ena sa

muyu, dađ ilama,

enaba te nogi mawai dao.^q

2 Te agai ena sisi ilama, te eno po bugagia miyu,

te eno pogo te we bidi dabego haligade mu enama,

te bainat poai tiwai mu yaibao wali.

Te agai nogogo ena bugagia geme dualali.

Tama agai ena te poa pai ene mu tiwai te polama,

muani tiwai yai dao.^r

3 Te agai te tiwai po wali,

“Israel, nage eno se bidi da.

Te nagede naga, te eno bomo,

me eno genuai nogi te tigidali

we bidiba ola mawaibao,” wai dao.

4 Tiali goli, eno enade digi te tiwai po obao,

“Eno se dene mu elama, te eno bomo tigidali sia salio.

Tiali goli, te nai me pedalisiađma,

te ena odolali se dene yalio.”

Tiali goli, tagalao, Genuai Bidigo te eno yali seđe

koneama,

tama eno tede sabo nai aga nogode elalubao.

Awe, te eno Godigo ena te se yalide

wei ponabo nai sisi elama, munolubao.

5 Genuai Bidigo ena te idago haligade sa munama,

te ena agai se bidi bidimainu yali.

Te agai te po enaba weyu, te Israel dabe sisinama,

te augwali agaba odasa asomainu yali,

magi baso meni,

- God eno Genuai Bidigo enaba te genuai nogi menama,
te aga digi ena bomo mawai.
- Te megı da, Genuai Bidigo enaba te tiwai po walio,
6 “Hasiabolo eno nageba
te boi bidi dabego ela musiawai Jekopgo hani dabe
ma hodolabo şe mawai.
- Eno te Israel bage meba hagea sai dao,
tama eno nageba te augwali sısınama,
enaba odasa asabo şe mawai dao.
- Tialima, te şe ebogo te nago bomogo deę me sogobeo.
Eno te gasa şe me mawaıbao.
- Eno nage te Israel hani isaıwai we bidi hani tıgıdalıgo
sole ula tiwai nıgaıbao.
- Awe, nago te eno te tıgıdali bulu tı habu
we bidi ma dobola sabo şe yaıbao,” te po wali.^s
- 7 Genuai Bidi, aga te Israelgo Wıegi Yai Doloba Pai
Kolesaga Tıgıdali Mu Ebo God dao,
aga te Israel tudıbadu posolalu, tau sabo bidi
elalubao,
agai te po aga şe bıdıba wali.
- Aga da te gasa we bıdigo godolo homu isaıbo bıdi,
te gasa bulu tı kantri we bıdigo te aga dwai nai mu
tiwai tonani,
te aga te genuai bıdi dabego olo şe ebo bıdi tiwai
bıdali.
- Genuai Bidigo te tiwai po wali,
“Te king dabego nage sulama,
te augwali dolagaselama,
te genuai bıdi dabe augwa gesabıdi
te tıba basıgulama,
te nageba genuai nogi mayu tiaıbao.
- Augwalıgo tama tebo, magı baso menı,
ena Genuai Bidi, te Israelgo God,
ena te Wıegi Yai Doloba Pai Kolesaga Mu Ebo God
da,
nage sa muani, te eno şe emainu yalı,
te eno daı wali po te eno me bologobeo,” wali.
- 8 Genuai Bidigo aga şe bıdıba te tiwai po wali,
“Eno digi eno nage ma selama,
te nage wıegi yai ilabo sogo bodolu muani,

^s 49:6 Aıs 42:6; Luk 2:32; Tpi 13:47; 26:23

te sogo mu dolo eno nago i wabo odolama,
nage tau saibao.

Te nage eno bugagia tonaluaibao,
te nagede naga eno te tde we bidi tigidali dali
bomo yai po da waibao.

Tama eno te Israel t kantri wiegi yai ma pedalumainu
ilaibao,
tama te Israel hani augwa te megi olo elalubo tde
ma bidaibao.^t

9 Te eno te kalabuse bidibo,
me be hulua side bidibo bidi dabeba
te tiwai po weyu, 'Asao,' po waibao.
'Dage te kalabus tagalama, olo mu bidaibao,' te po wali.
"Tama augwa te kalabus tagalama, augwa tba ma
asaibao.

Te augwali sunumidu pebelayu, me bulu dudu pabode,
te augwa tubo nai hauwa elaluaeibao.

10 Te augwali nai me, w me sa pogobeo,
te posolai giligago me waligo
te augwali tigi posolo me egobeo.

Magi baso meni, te augwali olo mu tau mabo wiegi yai
kolesaga ebo bidigo te augwali bugagia tonalu,
te sipsip tonalubo bidigo te sipsip dabe
te nosai hauwa elalubo pesageba,
me wiegi yai w elalubo madiba
odasa pabo tiwai gilama ebo dao."^u

11 "Te eno nigali bulu du dabe te pepedama,
dodolaibao, te eno ena genuai sunumi
pedalumainu yaibao.

12 Tialima, eno te digibulu bidalubo we bidi dabe,
te not badu me, te giliga dega sigulubo badu me,
asaibao.

Te augwali te taun Aswan badu me asaibao," wali.^v

13 Dagalua, nago te wiegi yai homu pemene eyu, i wao.
Te t, nage pemene elama, genuai po daa wao.
Dage bulu du dabe, dagego me
te pemene ebo balia wao.

^t 49:8 2 Ko 6:2 ^u 49:10 Ped 7:16-17 ^v 49:12 Tede te po wali, te Hibru pogo te po wali
"Sinim," wali, tiali goli te bulu te menade mu elalubo, te dago konebeo. Bidi hauwago te
homu yai, te profetgo te taun Aswan po olama wali homu yai, te taun me deli te Isip t
kantri te saut badu elaluai dao.

Magi baso meni, Genuai Bidigo olo mu
 tau mabo wiegi yai kolesaga aga we bidiba ebo dao.
 Augwa te seęę hauwa tolali, tiali goli, megi da,
 Genuai Bidigo augwaliba wiegi yai se elama,
 te augwa haliga dua tamugulama ma bidaibao.

Genuai Bidigo te we bidi dabe te Jerusalem taunba ma odasa asaibao

- 14 Te Jerusalem we bidi dabego te tiwai po wali,
 “Genuai Bidigo da tudi ola mobao,
 te agai da homu kone mu gegeda palobao,” wali.
- 15 Tiali goli, Genuai Bidigo augwaligo
 po wei ponoyu, te tiwai po wali,
 “Te idago aga digi ame nai wai homu kone ebo tagalama,
 te agai aga te ame mani wai
 homu dene ebo meni da, agawe?
 Te ida me deligo tama me tiabo homu yali goli,
 eno dage homu kone palobo me tagalogobeo.
 Mu menio.
- 16 Jerusalem, eno nageba homu kone ebo me gegeda
 palogobeo.
 Eno nage noma bidi piksa nigali,
 tama eno nogo sawali si daide
 nago nogi dali piksa dali si aşani.
 Te sesemane sogo eno sulama,
 nage homu kone palobo dao.
- 17 Te nago wai dabe ma asaibao,
 te hanigo dabe nage dolali,
 te augwaligo nage tagalama, wi paibao.
- 18 Nago tobolu ugwaba sagulama, tonono bilao,
 te nago naga wai dabe deliba sisinama,
 te nageba asobo sueibao.
 Ena Genuai Bidi, ena sesemane sogo bidibao,
 eno mu po obao,
 te nago wai dabe te nago au yabo
 nai dabe tiwai elalueibao,
 te we bidiba painu te sawi yai ugwa
 au ebo tiwai elama elalueibao.”
- 19 “Awe, nage mu dolobaso, olo bidali.
 Nago tų te dwai madi pedelali.
 Tiali goli, megi da, te wai dabe te nageba paęana
 sagaselama, te nago tų augwali usu egobeo.
 Te nage dolali hani, te nagede digibulu mu bidaibao.

- 20 Nago te wai dabe te nago we bidi dabe kalabuside
 digibulu bidali sogo pedelali,
 te augwaligo nageba te tiwai po waibao,
 ‘Te t̄q dwasianu mu dao.
 Dago bidabo t̄q dwasianu mu dao.
 Dago bidabo t̄q pedai genuai t̄q sabo homu ebao,’
 waibao.
- 21 Te nago nagade digi te tiwai po waibao,
 ‘Dego enaba te tigidali wai maniwe?
 Eno wai dabe te hagawai,
 te eno wai ma ame nogobeo homu yali.
 Te boi bidi dabego ena kalabus elama, sela pali.
 Dego mu te wai dabe ame nenama, negeduama,
 te genuai eboba usu naniwe?
 Enaduba deli bidai, tiali goli te wai dabe
 menadu asela wai dawe?’
 nago te po hanalu waibao,”
 God Genuai Bidigo te po wali.
- 22 God, Genuai Bidigo
 te taun Jerusalemba te tiwai po wali,
 “Eno te d̄aḡ me deli dodolama, te eno nogo me,
 te d̄aḡ me deli tiwai ugwaba siyu,
 te gasa t̄q kantri Israel hani
 is̄awai we bidi dabego sulama,
 te nago wai dabe ma sela asomainu yaibao.
 Te nago wai dabe te augwa nagede auwasa,
 tama sela asaibao wali.
- 23 Te king dabego, me kwın dabego,
 te nago wai dabe negeyu,
 te augwa aya idago ebo tiwai yaibao.
 Augwa kidu sugunama,
 te augwa tobolu te nago s̄aḡa page t̄q̄ba basigulama,
 te nageba genuai nogi mayu tiaibao.
 Nago te tiwai koneyu, ena tama te Genuai Bidi da
 waibao.
 Enaba homu k̄eḡ pelama,
 te eno augwali tau somainu tonalubo we bidi,
 te augwali odolali me tonalugobeo,”
 God Genuai Bidigo te po wali.
- 24 Te bomai boi bidigo hw̄iḡaselama,
 te bidi me deligo hani kalabus elama, te aga wieḡi
 yai doado bage sali,

te aga hani dali, te aga doado bage dali, ma saiba,
agawe?

25 Tiali goli, Genuai Bidigo Jerusalemba te tiwai po
wali,

“Mu tama, te eno nago hani dali ma siyu,
te nago wiegi yai doado bage
te bomai boi bidi dabe me te dwai king dabego
nogode ma dobola saibao.

Eno te nageba hwıani bidi dabeba te hwıbo wei
ponaibao,

te eno nago wai dabe ma saibao.

26 Te eno nago boi bidi dabe augwa
haside digi tomode hwımainu yaibao.

Te augwa hasi digi elebo şe umabo eyu,
te bidi dabe te wain we tulama,
geş page ebo tiwai yaibao.

Tama te tşde we bidi tigidaligo eno te ebo şe sulama,
te augwa te tiwai koneaibao,

ena naga ena te Genuai Bidi da homu yaibao.

Ena te ena we bidi ma sabo God dao,
te eno nage tudibadu posolalu, tonalu, te nage tau
siyu ebao,
ena te Jekopgo hanigo bomai God elalubo dao,”
wali.

50 ¹ Genuai Bidigo te Israel we bidi dabeba te
tiwai po wali,

“Taun Jerusalem te duga ida tiwai elalubao.

Dagego homugo eno aga tudiba mubao homu eyu,
te bidigo we sabo kolesaga bolama,

te sai we mu sela şabo tiwai homu eba, agawe?

Te dagego tama homu ebaso da,

teda te tama po wali pepa mena elalubawe,

eno aga mu sela şawaniwe?

Tama me, te eno bidi me delide negeli sali me elalubeo.

Te tama homu dagego magi baso ebawe,

eno wai dabe eno dage te gasa bidi dabeba te olo şe

ebo bidi tiwai ilama, tagala paliyu,

eno te negeli sali dodolabo mone saliwe? Mu menio.

Te dagego dwai şe hauwa ena haliga şeşę ilibaso,

eno te Jerusalem tudiba munama,

tama eno dage te gasa bidi dabego nogoba muai

dao.”

- 2 “Eno dage gegagasali sogo,
 magi baso eno te bidi me deli bidibo subewe?
 Te eno dage i wali sogo,
 magi baso dagego eno i wali wei ponobewe?
 Dagego homugo te eno dage ma sabo
 bomo meni da homu yali da, agawe?
 Odao. Eno te po obaso,
 te tamu ą̇ tigidali mu sula saibao.
 Eno te po obaso, te genuai soabo ą̇
 te masigi sane olo elalueibao.
 Te sugu dabe isilama, kugumini dwai yaibao.
- 3 Tama eno te dagalu me sisi mu emainu eyu,
 te aga bidi isaide te wego homu dene ebaso
 gudubo ugwa tiwai yaibao.
 Mu tama, eno te tobage se yabo homu
 elalubao,” Genuai Bidigo te po wali.

Te bidi dabego Genuai Bidigo se bidiba dwai se yali po wai

- 4 God Genuai Bidigo enabolo
 te wiegi yai po wabo kolesaga ola mawai,
 tama eno te wiegi yai po te bomo meni yai we bidi
 dabego haliga daqu walu, waibao.
 Tigidali sogo kigamude agai enabolo te wiegi yai gesi se
 po ola mawainu ebo po odabo homu godolo mu
 ebo dao.
- 5 Genuai Bidigo eno olo dalama,
 te agai po odomainu yali, te eno agade hagoma eyu,
 te agai enaba mawainu ebo se de
 te habu bulu me kilasa pabeo.
- 6 Ena te bidi dabego keloago tudide elama,
 eno penane nisi gudumainu yalio.
 Te augwaligo enaba dwai posobo po weyu,
 eno gesabidiba pesa sayu yali,
 eno ena gesabidi te augwaliba dualubeo.”
- 7 Te augwaligo dwai po wabogo
 ena aiyaba me elalugobeo,
 magi baso meni, God Genuai Bidigo ena tau sabo
 dao.
 Te ena digi ena daqu walama, te ena se yali.
 Eno te tiwai koneani, eno ebo se de

- te ena hale me sogobe homu ebao.
 8 God pađe bidiyu, te agai te po waibao,
 eno dwai şe me ebeo.
 Te bidi me deligo ena po tu ilabo homu eba, agawe?
 Teda agai ena te po tuğa odasa pelama,
 te agai ena po tu ilabo po pusumainao wali.
 9 God Genuai Bidigo ena tau siyu,
 tama dego te po weyu,
 eno dwai şe me yalio waibawe?
 Ena po kisilama wali hani bage,
 augwali te ugwa asobago togolama silibo tiwai mu
 yaibao.^x
- 10 Dage te Genuai Bidi dologoba pelama,
 te agai şe bidigo po wali pabo hani dabe,
 dage wi me igimio.
 Te dage hulide biliyu, te dage ula meni yai,
 te dage konealubo homu Godiba dağ wao,
 te Genuai Bidigo dage tonalu, agai dage tau saibao.
- 11 Tiali goli, dage te Genuai Bidiba
 konealubo homu dağ wasiğbo hani dabe,
 te duga digi isi ula ilama,
 te dage be hulia side bidibo bage,
 dagego te sole dabe domonama,
 tego duga pabo sunumidu te sole uladu pao.
 Tiali goli, Genuai Bidigo te dage bidigi pabo pesage dağ
 ilali, te genuai dene sabo pesage dao.

**Te we bidi dabego Genuai Bidigo bomode
 konealubo homu dağ wao wali**

- 51** 1-2 Genuai Bidigo te tiwai
 po wali,
 “Dage te eno homu kolesaga wali pabo şe dene eyu,
 te doloba pai kolesaga ebo hani dabe,
 dage eno po odiğo.
 Dagego te Abraham de Sarai siba ma homu kone palao,
 aga te duga wağ aya monu,
 me duga ida auwa mosi si dao.
 Augwali si te dage hani bulali wağ nğ mu dao.
 Te eno Abraham i wali sogo, aga wai meni yai,

^x 50:9 Rom 8:33-34

tiali goli eno augwali siba te wiegi yai şe bugagia elama,
 te augwa si wai elaluai,
 tama augwali sigo hani wai dabe
 te genuai hani we bidi mu pedelai dao.”

3 “Ena Genuai Bidi, eno te Jerusalemda
 homu dene mu yali,
 te taun dolai elaluali, te eno agai şeşe tigidali sia
 somainu yaibao wali.

Megi te olo masigi sane pesage elaluai,
 tiali goli eno te wiegi yai şe hauwa pedalumainu
 elama,

tama te tonobo gasa sawi mu eyu,
 te eno nigali Iden gi tonobo tiwai yaibao.

Te wiegi yai homu genuai pemene ebo
 pesage pedelama,
 te sesemane sogo aga we bidigo
 te enaba usu da wabo balia po waibao.”

4 “Dage eno we bidi dabe, eno po odao.
 Eno te wiegi yai bugagia bidabo
 kolesaga te tigidali hani we bidiba ola mayu,
 te eno te po tų dodolobo
 doloba pai kolesaga te tigidali bulu
 tų kantride ula tiwai elalueibao wai dao.

5 Te eno augwali tau siyu,
 ma sabo sogo, te paşa pedelalio.
 Te ena bomogo digi eno te tigidali
 tų kantri tonalueibao.

Te digibulu bulu pesage we bidigo
 te eno bomoba homu daų weyu,
 te eno augwali tau sabo tonalueibao.

6 Dagego te dagaluba ugwaba tonoyu,
 te tųba aiyaba tonoyu yao.
 Te dagalu tigidali te hano sia sabo tiwai mu yaibao,
 tama tų te gudubo ugwa dolobo tiwai yaibao.
 Te tigidali we bidi te dinai sibi isila pabo tiwai yaibao.
 Tiali goli, eno te we bidi tau siyu, ma sabo kolesaga,
 te sesemane sogo elalua pidubadi,
 te me sia sogobeo,” wali.

7 “Dage te doloba pai kolesaga bugagia koneama,
 te eno bomo yai po daų ola sabo hani dabe,
 dage te bidi dabego dwai po weyu,
 dage dolobo po obaso, te dage wi me igio.

- 8 Te hani dabe te ugwa asobago tologolama,
 te silibo tiwai eyu dolaibao.
 Tiali goli, eno te we bidi dabe tau siyu
 ma sabo kolesaga, te me sia sogobeo. Menio.
 Te sesemane sogo elalua pidu elalueibao,” wali.
- 9 Genuai Bidi, nage hogodao.
 Nage hogodama, te nage genuai bomo dali aselama,
 te da tau sagasao, te nago polobadu yali tiwai yao.
 Nago tama nago te Rehap enani,
 te tamu aḡide bidali moni hasamani,
 te nago dwasianu dedelege miani.
- 10 Nago tama nago te tamu aḡi sula somainu ilama,
 te sunumi tomodu pedelali,
 te nago ma sali we bidi dabe soabo sunumi nigilai
 dao.^ʸ
- 11 Te naga ma sali hani dabe tau sali,
 te augwa wiegi yai pemene elama,
 te Jerusalemba ma aselama,
 te augwa balia po weyu,
 genuai po daḡa te sunumidu ola asaibao.
 Te augwa bugagia mu bidiyu,
 te augwa pemene umabo mu yaibao,
 augwa te pemene ebo me sia sogobeo.
 Te dene me haliga seḡe augwali dali me elalugobeo.
- 12 Genuai Bidigo aga we bidiba te tiwai po wali,
 “Ena digi eno dagego haliga daḡ walama,
 te dagego tigidali seḡe sia somainu ilibo dao.
 Tama magi baso dage te gasa
 bidi dabede wi ebo dawe?
 Augwa bomo me elalubeo.
 Tigidali bidi isama,
 te nosai polo sia sabo tiwai gilama ebo dao.
- 13 Te dagego Genuai Bidi, enaba homu
 kone gegeda palali homu yali.
 Eno tama eno dage nigali.
 Eno te dagalu aga pesagede muani, te eno nigilama,
 eno te tḡ page daḡ walali.

^ʸ 51:9-10 Te Rehap wabo po, te po digi po me deli dao. Tama te pode te Rehap da te tḡ pedai kantri Isip dao. Te Israel bage te Isip tḡ tagalali sogo Genuai Bidigo te moni aḡi tomode si bugua sai, tilama, augwali tedu soali.

- Magi baso dage te elaluama,
 te dolainu ebo dwai bidi dabede wi ebawe?
 Te bidi dabego dageba magi şe me egobeo.
 Augwa haliga şebę te odolali silaibao.
- 14 Te kalabuside bidali hani, augwaligo pibia selama,
 wi ebo bage, augwali te kalabus şego me isigobeo.
 Menio.
 Te augwali kalabuside polo silama,
 te augwali olo bidaibao.
 Te augwa tuabo nai hauwa elalueibao.”
- 15 “Magi baso meni.
 Ena da Genuai Bidi, duga God.
 Eno te tamu ađi hodolama, te genuai ađi dini pedelama,
 te genuai mumunu ebao.
 Eno nogi te tiwai, Te Tigidali Bomo Elalubo Genuai Bidi
 dao.
- 16 Eno po te dageba mawai,
 te dagego pedauwalidu te po pusumainu yali.
 Te eno nogogo dage bugagia geme dualali.
 Ena Genuai Bidi, eno te dagalu diniginama, elalubao.
 Tama eno me tọ aga bidabo pesageba munama,
 dađ walama, elalubao,
 eno dage te Jerusalem we bidi dabeba te tiwai
 po wali, dage te eno we bidi hani dolo mu dao,
 wai.” Te po wali.

Genuai Bidigo te Jerusalemba haliga şebę munu ma egobeo

- 17 Jerusalem, nage hogodao.
 Nage hogodama, bomonama ma dolugulao.
 Genuai Bidigo haliga şebę te wain ađi me deli
 te nageba mani tiwai ebao.
 Te agai nago te ađi tulama, silainu ebo tiwai yali.
 Te naga geđ page mu elama, umuna palali dao.^z
- 18 Te nago ogwa dabe deli me bidisađwai,
 te nago nogo tolasa,
 te nage dolo somainu ilabo te meni yai.
- 19 Nago seđe genuai mu tolama,
 te dego nage homu dene elama,
 te nago haliga wiegi yai usu ma iligowe?
 Te boi bidi dabego aluama, nage dolagasali.

^z 51:17 Ped 14:10; 16:19

- Te augwaligo nago we bidi me hauwa te bainatgo elali.
 Te genuai nasi nageba pedelali sogo tiali.
 Te eno mena şeşo nage tau selama,
 nago te haliga şeşę elalubo siligowe?
- 20 Te nago we bidi dabego bomo meni yai,
 te augwa gedu geş page elama, te augwa degasa
 dulama,
 te augwali tigidali sunumi bagude pila muna muna
 palio.
 Augwali te hasa bade tuali tiwai elaluali.
 Augwa te magi şę yabo usu me ebeo.
 God, Genuai Bidigo te augwaliba wado po olama,
 te aga haliga şeşę ebo kabude te aşı tumainu ilali,
 te augwali dodolo pelama, elalui dao.
- 21 Odao. Jerusalem, nago te şeşę hauwa tolama,
 tama nage te aşı tuai geş page yai we bidibo tiwai
 yali.
 Tiali, nage te wain aşı tulama, geş page ebeo. Menio.
 Te Genuai Bidigo haliga şeşęşo
 naga nage geş page yai dao.
- 22 Nago Genuai Bidi,
 te Godigo nago te boi bidi dabe dali hwişo
 tau selama,
 dage ugwa ela holobo ilali, agai te tama po wali,
 "Suao. Eno te haliga şeşę yali kabu
 te eno nageba menama,
 te nago tulama, te geş page dwai mu elama, te
 umuna sali.
 Tiali goli, megi da, eno te kabu nago nogode ma sali.
 Te eno nosali nage te kabude aşı ma tumainu me egobeo.
- 23 Tiali goli, eno te kabu te nage dolobo
 bidi dabe nogoba mueibao.
 Augwaligo nage te tşde pimainu ilama,
 te augwaligo nage agalama,
 te nage tudi daide biliyu,
 te augwa olo tş bulude bilibo tiwai yai dao," te po
 wali.

Genuai Bidigo aga we bidi te Jerusalemba ma odasa asaibao wali

52 ¹ Jerusalem, nage te God aga da olama, sa
 muani hanu, nage hogodao.
 Nage hogodama, bomonama dolugulao.

- Nago au dobage te gasa sawi yai sawi yai munama,
te nage tonobo gasagi me mu yaibao.
Te Godigo po odisabo bidi dabe,
me te God gedude wiegi yai isabo hani bidi dabe,
te augwali nage tomoba me asogobeo.^a
- 2 Hobede ya, Jerusalem, tiali te nage hogodama,
te nago tigide t̄o sela sayao.
Awe, Saion hanu, te nago dogonide keñani sen peda
şanama,
te naga sia kingba duagi soao.
- 3 Magi baso meni. Genuai Bidigo te tama po wai,
“Te bidigo ena me abelisama,
te nago we bidi te olo şe bidi me
şe ebo we tiwai elama, sela pali.
Te eno augwali ma sainu, te mone menama, me sogobeo.
Menio.
Te augwali eno olo mu saibao.
- 4 Magi baso meni. Ena God, Genuai Bidi,
eno te tama po wali.
Polobadu, te eno we bidi dabe
te Isipba pelama, bidigi pali sogo,
te augwa homugo digi palio.
Te nosali, te Asiria dabe aselama,
te augwali olo şe ebo bidi me
şe ebo we tiwai sela pali,
augwaligo ena abelama, te augwali sela pabeo.
- 5 Te Babilon dabego me te tobage
deli kolesaga nosali yalio.
Augwaligo te eno we bidi olo mu selama,
te augwali kalabusiba sela pali,
te eno hanigo tobolu bidi dwai gela mu wali.
Te eno magi nai deli me sabeo. Menio.
Sesemane sogo te bidi dabego te posobo po weyu,
ena nogi aiyaba elalubo şe yai dao.^b
- 6 Te ena digi eno daı ilama,
te ena we bidi ma saiba wabo sogo,
te augwaligo ena nogi bugagia koneaibao.
Augwaligo te tiwai koneyu, ena Genuai Bidi,
eno tama te augwaliba tigidali
pedalubo şe po polobadu wai dao.

^a 52:1 Ped 21:2, 27 ^b 52:5 Rom 2:24

- Suao, ena bidibao,” wali.
- 7 Te we bidi augwaligo bidi me deli
 te bulu du pesagedu udada asobo sulama,
 te wiegi yai pemene mu yaibao, te wiegi yai po
 Jerusalemba selasa asali.
- Agai te tiwai po waibao,
 “Saion, te wiegi yai sogo pedelalio.
 Godigo te boi bidi dabe aiyaba elaluama,
 te agai nage bugagia bidimainu ilalio.
 Megi da, nago Godigo te tigidali nai
 tonalubo dao,” agai te po waibao.^c
- 8 Te tonalubo bidi dabe te masigigo
 nigali bobobage be taua daide bidali,
 te Genuai Bidi te Saion badu ma asobo sueinu yali,
 te augwa tigidaligo te genuai pemene dali eyu,
 te i bomonama mu waibao.
- 9 Dage te Jerusalem badu dolalio,
 dagego te pemene elama, i waiąo,
 magi baso meni, Genuai Bidigo te Jerusalem ma
 selama,
 te agai aga we bidi dabego seęę silalio.
- 10 Genuai Bidigo agai bomo hania ola mayu,
 te tigidali tų kantrigo sumainu yaibao.
 Dago Godigo te aga we bidi dabe ma saibao,
 tama te tigidali tųde we bidigo sueibao.
- 11 Dage tigidaligo te Babilon tagalama, asiąo.
 Te bugagia dua dao, tiyu dage te God gedude wiegi yai
 isąwani naide pania sabuo.
 Dage te hanigo te pou dis dabe, me pou dabe,
 te Genuai Bidigo bede nai sela paibao,
 dagego duga digi te God gedude wiegi yai pedalubo
 kolesaga wali pao.
 Dage tigidali te magi meda meni yai bidama, asiąo.^d
- 12 Tiali goli, dage asesa polo me te Babilon tagalama,
 me wi polo soyu,
 te dagego polobadu te Isipde yali tiwai me egobeo.
 Menio.
 Te dage dua digi asaibao.
 Te God, duga Israel dabego Genuai Bidi,
 te dage pabodu polasa paibao,

^c 52:7 Nah 1:15; Rom 10:15; Ef 6:15 ^d 52:11 2 Ko 6:17

te aga dage nosali badu me asaibao,
te agai dage tonalua asiyu, odasa asaibao.

**Genuai Bidigo şe ebo bidigo te we bidi dabego
dwai şe yali şeşę dali tolasa asaibao**

- 13 Genuai Bidigo te tiwai po wali,
“Suao, bugagia konea sao.
Tigidali şe eno şe bidigo ebo
te bugagia mu pedelaibao.
Te bidi dabego agaba genuai nogi mayu,
te aga nogi ugwanu mu saibao.
- 14 Polobadu te bidi dabego dwai şe mu agaba yali,
te aga tigi me gesabidi te dwai mu tonani,
te aga bidi tigi tonobo tiwai me ebeo.
Te we bidigo aga subo, wi yai dao.
- 15 Tiali goli, nosali da, te bulu tş kantri hauwa we
bidi dabe te agade dwai noma midigi mu selama,
te king dabe pedauwali pania selama,
te bomonama tononalu,
te augwa po deli me wagobeo,
magi baso meni, te augwaligo polobadu
po odisawani nai suali.
Te augwa dwasianu me konesiawani nai
te hania koneaibao,” wali.^e

53 ¹Te Israel hani we bidi dabego te tiwai po wai,
“Dego te megi dago odali pode konealubo homu
daş
waibawe?

Tama dego Genuai Bidigo te megi yali bomai şe tiwai
ebo suai dawe?^f

- ² Genuai Bidigo aga şe bidi te olo ni me deli tiwai te
tş pesagede pedalumainu ilali.
Awe, aga te ni me deli te wa pai tşdu
pedalubo tiwai pedalali.
Te şe bidigo nogi meni yai, magi baso meni,
te bidi dabego gedude tonobo sawi isişawai.
Te agade te bidi dabego godolo elama,
tonabo nai me deli elalusawai.
- ³ Te bidi dabego aga tudi ola menama,
te aga begela dolama, te aga godolo mu me isişawai.

- Sesemane sogo agade te homu dene me
 haniani seęę paęanaluali.
 Augwaligo aga tudiba mu muanio.
 Te dago aga te olo bidi me tonobo tiwai yai dao.”
- 4 “Te dago tama homu yali,
 te Godigo agaba dwai dene mawainu eba homu eyu,
 te dwai seę agaba pedalainogo eba homu yali.
 Tiali goli, menio.
 Te seę bidigo dago seęę me dene te agai tolali dao.^g
- 5 Te dago yali dwai seęęde naga aga dolali.
 Te augwaligo aga dodagia mu elama,
 te aga tigi tologola pali,
 agai te tolali seęęde aga da usu ma ilama pedelali,
 te da bugagia mu bidibo dao.^h
- 6 Da tigidali te sipsip besela palama, bilibo tiwai yali,
 te da deli deligo te dena digi homu wali bilali.
 Tama tibaso, Genuai Bidigo daba
 te dene mabo seę yabo usu igi da,
 te dena yali dwai seęde wei ponainu yali,
 tiali goli aga te tama me tebeo. Menio.
 Te dena digi tolabo seęę te agai aga seę bidiba te seęę
 menama,
 tolomainu yai dao.”ⁱ
- 7 Genuai Bidigo te tiwai po wali,^j
 “Te bidi dabego te seę bidiba dwai seę ilali,
 tiali goli aga digi aga aiyaba elaluama, te dene tolali.
 Te agai po me deli wabeo.
 Agai pedauwali pania sali,
 te augwaligo sipsip wai sela pelama,
 elainu ebo tiwai eyu,
 te sipsip augwaligo te nisi poawainogo sela pabo
 tiwai yai dao.”^k
- 8 Augwaligo aga odolali mu kalabus elama,
 te aga po tuę odoboba odasa pali,
 te po tuęde aga isimainao po wai.
 Te augwaligo aga ela muai.
 Tama tibaso, aga nosali pedelabo hani

^g 53:4 Mat 8:17 ^h 53:5 1 Pi 2:24 ⁱ 53:6 1 Pi 2:25 ^j 53:7 Te kolesaga koneai bidi dabego bugagia konesiayu, dego mu te ves 7-9de po wali. Mebago homugo te po Genuai Bidigo wali homu yali, te mebago homugo we bidi po udali homu yai, te mebago homugo te profetgo po wali homu yai dao. ^k 53:7 Ped 5:6

we bidi me pedalgobeo.

Agai te eno we bidi dabego pesage siyu, hasegelama,
te augwa digi tolabo seęę te agai tolama,
te augwaligo yali dwai seęę dodoliyu,
te aga isai dao.^l

⁹ Te augwaligo aga te haniani dwai kolesaga yali bidi
dabe dali me,
te mone doado bage hauwa elaluali bidi dabe dali,
pubulali.

Tiali goli, te aga digi dwai kolesaga deli me isawai,
te agai tibo po me deli me wabeo,” te po wali.^m

¹⁰ Tiali goli, Genuai Bidigo digi aga seę bidi aiyaba
elaluama,
tama agai te dene selama, tolomainu yali,
magi baso meni,
te seę bidigo digi aga bidibo ula mayu,
te we bidi dabego seęę sela şabo ofa tiwai ebaso da,
teda aga bidibo sogo te bobobage mu igi pelama,
te aga bulai wai nõę wai dabe sueibao.
Te aga yali seęde, te seę bidigo te Genuai Bidigo homugo
yao homu ebo seę ebaso,
te agai te seę bugagia pedalumainu ebo dao.

¹¹ Te aga genuai seęę tolama da,
nosali te aga wiegi yai nai hauwa pedalubo sulama,
te aga wiegi yai pemene umabo mu yaibao.
Genuai Bidigo te tiwai po wali,
“Eno te doloba pai seę bidi, agai ena bugagia koneai.
Agai te hauwa we bidigo dwai seę yali seęę tolama,
te kolesagade agai te augwali
doloba pai we bidi pedelaibao.

¹² Te we bidi dabego aga
te dwai bidi me deli tonobo tiwai yai.
Tiali goli, aga bidibo ula digi
te olo weę mu gelebo tiwai eyu,
agai te hauwa we bidigo dwai seę yali seęę tolalio.ⁿ
Tama augwali dolidali weyu,
agai te dwai seę ebo we bidi tau siyu,
gedu haluasa po wai dao.

^l 53:8 Tpi 8:32-33 ^m 53:9 1 Pi 2:22 ⁿ 53:12 Bidi mebago homugo te ede wali po te tiwai begelaibao homu yali. “Agai te dwai seę yali we bidi dabego seęę selama, te augwa digi tolabo seęę te agai tolai dao.”

Tama tibaso, eno agaba te genuai bidi dabe tomode
 te agaba genuai nogi mawaibao.
 Eno te bomai ami bidi dabego te boi hwınama,
 te sali nai dabe agaba dobolama mawaibao,” wali.°

Genuai Bidigo Jerusalem wiegi yai ma pedalumainu ilaibao

- 54** ¹ Genuai Bidigo te tiwai po wali,
 “Jerusalem, nage te hobedagia wai ame
 nesiąbo we tiwai eyu,
 nage te wai ame nabode dene isiąbo we tiwai ebao.
 Tiali, megi da, nago te balia po weyu,
 pemene elama, i wao, magi baso meni,
 te nago wai dabe hauwa mu umabo elalueibao,
 te aga bidi dali bidibo wego wai
 te aiyaba mu elalueibao.^p
- ² Nago genuai tų pedai daį elama,
 te nago ugwa be tede sę yao.
 Nago ugwa be ugwade eda si dedelasa pelama,
 te bono bobobage tagalama,
 te ni tųba bomonama tulama,
 te bono dabe bomonama kekelama, te nide keąo.
- ³ Magi baso meni, nago tų daį te ugwa de eda si
 pedegasa pelama, genuai igi pelama,
 te dolo nogo badu tiyu,
 te pobase nogo badu me tiao,” wali.
 “Te nage hani wai dabego te gasa tų
 kantri hani we bidi aiyaba elalueibao,
 tama augwali te augwaligo megi olo elalubo hanu
 dabede bidalueibao.”
- ⁴ “Jerusalem, nage wi me igio.
 Te nage hale munu ma egobeo.
 Te bidi dabego posobo po nageba munu ma wagobeo.
 Te nage gesi ogwa bidi elalubadi hale sali,
 te nago homu kone mu gegeda palama,
 te sogo nagaduba te bidibo we tiwai homu ebo kone
 me isiąyu,
 te aga bidi isai we tiwai egobeo.
- ⁵ Magi baso meni.
 Ena, nage nigali God, ena te nago bidi tiwai bidaibao.
 Eno nogi da, te Tigidali Bomo Elalubo Genuai Bidi dao.

Ena, te Israelgo God, ena te Wiegi Yai Doloba Pai
 Kolesaga Mu Ebo God da,
 te ena nage tudi badu posolalu tau sabo bidi,
 eno naga eno te tigidali t̄o habu tonalubo God dao.”

6 “Ena God, Genuai Bidi, eno te tiwai po wali,
 te nage eno enaba ma asomainu i waibao.

Nage te bidigo sai gesi we tiwai
 te aga bidigo tagalama, wi palio,
 te aga hobolu du peda pelama,
 te aga genuai homu dene dali bidalio.

7-8 Ena Genuai Bidi, te nage eno tudi badu posolalu,
 tau sabo bidi,

eno nage p̄w̄adage sogo tagalali,
 te eno genuai homu dene nagede elalueibao.

Tama te nage enaba ma asomainu saibao.

Te eno nageba wado po dwai mu

te p̄w̄adage sogo olama,
 te eno ena gesabidi geme duala sali.

Tiali goli, sesemane sogo te eno nage dali homu dene

eyu, te nage godolo mu eyu,
 te nageba wiegi yai s̄e bugagia yaibao.”

9 “Te Noa bidali sogo, eno te tiwai bomai po daŋ weyu,
 te eno genuai āigo te t̄o ma dologobeo wali.

Te megı eno te tobage bomai po daŋ walaibao.

Eno mu po weyu, te eno haliga s̄eβ̄e ma isiama,
 te nageba wado iliyu,

te nage me dene mabo s̄e egobeo wai.⁹

10 Te bulu du dabe pedasa pelama, degaibao,

tiali te eno nagede homu godolo ebo
 te sesemane sogo elalueibao.

Te da si bugagia dugulalu,

te eno bugagia bidabo sogo maiabo

po weyu, te daŋ walali bomo yai po

te eno me bologobeo.

Ena Genuai Bidi, te eno nagede homu dene mu eyu,

te nage godolo homu mu yai,

eno te s̄e dabe yaibao te po nageba wai dao,” wali.

Jerusalem te usu yai polalubo mu pedelaibao

11-12 Genuai Bidigo te tiwai po wai, “Hobede ya,

⁹ 54:9 Gag 9:8-17

- Jerusalem, nage te hauwa dolali taun,
 te nage homu dene elama, tau sabo bidi meni yai.
 Tiali goli, eno te wiegi wiegi yai masigi te gasagi yai
 mu selama,
 te nage ma nigaibao,
 te nage gasa sawi yai taun mu pedelaibao.
 Eno te gasagi yai tedali masigi dabe selama,
 te t de wasilama, te ugwadu daide taun ma
 nigaibao.
- Te eno te haniani wiegi yai dila pai masigi selama,
 nago be   ebadi, te bomai obogo nage bagulama,
 te obo sunumi dabe me,
 te genuai masigigo nigai obo daide elaluabo taua,
 te dabe nigaibao.”^r
- 13 “Te ena digi eno nago wai dabe ola mayu,
 te augwa bidabo pesage bugagia mu elalueibao.”^s
- 14 Te eno doloba pai kolesagade
 te eno nage bomai pedalumainu ilaibao.
 Te nage aiyaba elaluama, te dwai  go dolabo bidi me
 menio,
 te nage magi nai me delide wi me egobeo.
 Te nago wi ebo tigidali silaibao.
- 15 Te hani mebago nage dali hw ai olama, asobaso da,
 te nago te tiwai koneao,
 te augwali eno tagala palobaso me asobeo. Menio.
 Te augwa homugo digi asali.
 Tama augwali te eno nago nogoba mueibao,” wali.
- 16 “Suao, bugagia konea sao.
 Ena digi eno te haniani nai te aingo
 nigibo bidi dabe nigali.
 Augwa te ain siaba munama,
 te ain dabo posolo yai sia mu nogani.
 Augwa te ain selama, te hamago elama,
 te bidigo hw abo haniani nai dabe nigibo dao.
 Tama eno te ami bidi dabe me nigali,
 tama augwa te nai dabe selama,
 te boi hw inama, te gasa bulu t  kantri dolobo  
 ebo dao.
- 17 Tiali goli, te hw ibo nai dabe me deligo nage me
 dologobeo.

Te nage bomonama dolalu,
 te bidi dabego nageba haniani po kisilama wabo po
 te wei ponoyu,
 aiyaba elalueibao.
 Eno te kolesagade ena şe bidi dabe tigidali bugagia
 tonalu,
 te augwali doloba pai we bidi pedelaibao.
 Ena Genuai Bidi, eno te po wai dao.”

Godigo aga we bidi wiegi yai ilainu yali po

55

- ¹ Genuai Bidigo te po wai,
 “Tega, dage te aı̄ nogonego sabo we bidi dabe,
 dage enaba aselama, dage we tuagasao.
 Dage te mone meni yani hani dabe, dage enaba aselama,
 te dage nai sela tuagasao,
 te aselama te aı̄ wain
 me hasa bulmakaugo ame pe aı̄ sagasao,
 te monego me abeligobeo.^t
- ² Magi baso dagego te duga mone
 te dage tau sisayabo nai dabede odolali silama,
 te dage nai sili bidaiwe?
 Magi baso dagego te tubo nai sabo şe dene elama,
 tama tede sabo monego magi baso
 te dwai olo nai naga abelebo dawew
 Te eno poba bugagia olo muao,
 te eno wabo po tiwai gilama yao,
 te dagede eno mabo haniani nai mu paęanalueibao.
 Awe, dagego homugo tede wiegi yai pemene mu yaibao.”
- ³ “Odao, dage eno we bidi dabe dao.
 Dage bugagia bidimainu eyu, enaba asięo.
 Te eno dage dali bomo yai po daę walama,
 tama te daę wali bomai po sesemane elalueibao.
 Te sesemane sogo eno dage godolo homu mu elama,
 te dageba wiegi yai şe yaibao.
 Te polobadu eno te bomo yai po te king Devitba
 daę wali tiwai gilama yaibao wali.^u
- ⁴ Konea sao, eno aga genuai bidi pedalumainu ilama,
 te agai gasa bulu tę kantri tonalumainu yai.
 Te agade, te eno bomo augwaliba ola mawai dao.
- ⁵ Mu tama, te dagego polobadu konesięawai te bulu tę

^t 55:1 Ped 21:6; 22:17 ^u 55:3 Tpi 13:34

- kantri we bidi dabe augwali i wabo sogo,
 te augwaligo me dage me konesiawai,
 te augwali dageba polo udada asaibao.
 Magi baso meni, ena Genuai Bidi, dage Israelgo God,
 ena te Wiegi Yai Doloba Pai Kolesaga Mu Ebo God,
 eno dage te genuai nogi dali bomo dali si
 mu elalumainu ebao,” Genuai Bidigo te po wali.
- 6 Megi da, Genuai Bidi te dage pađe bidiyu, dage
 tonalubao,
 tama megi sogo te dagego agaba gedu haluasa po
 weyu, te aga pađa pabo sogo dao.
- 7 Te dwai kolesaga ebo we bidi dabego
 te augwa ebo dwai kolesaga tagalama,
 tama augwa te kolesaga me yabo
 homu kone me paligio.
 Te augwali augwa Genuai Bidiba ma asiąo.
 Agai te agaba ma asobo bidi dabeba
 te olo mu tau mabo wiegi yai
 kolesaga umabo mu yaibao.
 Awe, Godigo augwaligo dwai seęę
 tigidali mu sela saıwaibao.
- 8 Genuai Bidigo te po wai,
 “Eno homu kolesaga te dagego homu
 kolesaga tiwai elalubeo.
 Te eno kolesaga te dagego kolesaga tiwai meni,
 te gasa tedali mu elalubo dao.
- 9 Te tų aiyadu elalubode te dagalu ugwadu mu elalubao,
 te tiwai naga te eno homu de eno homu kolesagago
 te dagego kolesaga me homu kolesaga te aiyaba mu
 elalui dao.”
- 10 “Te dagaludu tulubo tulubage, aga odolali
 te dagaluba ugwaba ma hologobeo. Menio.
 Agai te tųba aı mayu, te gide nai holomainogo elama,
 te bidi dabego saibao.
 Me badu augwa tuyu, me badu wai selama,
 ma buluyu ebo dao.”
- 11 Te tiwai naga eno po me te enaba
 odolali ma asogobeo. Menio.
 Agai te eno wali po tiwai gilama pedelaibao.
 Te agai eno homugo pedalumainogo homu yali se

pedalubo dao.”

- 12 “Te dage wiegi yai pemene elama,
 Babilon taga somainu elama, te dage eno odasa
 asiyu,
 te dage wi ilabo magi şe deli me pedalugobeo.
 Te bulu du dabego wiegi yai pemene ebo tşabi po weyu,
 te ni dabego pemene homu elama,
 augwa nogo elaibao.
- 13 Te ni wuli dabe te megi dwai ni dabe
 elalubo madi pedelaibao.
 Te gasa sawi yai dwasianu ni dabe
 te megi sesane bono elalubo pesagede pedelaibao.
 Tama sesemane sogo te tobage ni dabe te pesagede
 pedelama,
 te sesemane sogo te dşı ilali tiwai
 te we bidi dabego sulama,
 te Genuai Bidi, eno yali bomai şe homu kone
 palomainu yaibao,” wali.

Genuai Bidi te gesi Jerusalemde king bidaibao

(Dşı 56-66)

**Te tigidali we bidi aga dologoba asomainu,
 Genuai Bidigo be tş dalalubao**

- 56** ¹ Genuai Bidigo te po wali,
 “Dage eno we bidi dabe, odao.
 Eno dagebolo te eno bomai po polobadu mawai dao.
 Tama eno dage dali te sesemane elaluabo
 po me dşı walai dao.
 Dagego te po si bugagia wali peyu,
 te wiegi yai doloba pai kolesaga naga iyşo,
 magi baso meni, te eno dage tau selama,
 ma sabo sogo, te pşba pedelai dao.
 Awe, dagego eno doloba pai kolesaga
 ebo tamadi sueibao.
- ² Te we bidi dabego wiegi yai doloba pai kolesaga
 wali peyu,
 te Sabat sogode bomo yai po bugagia wali peyu,
 te dwai kolesaga isşbo we bidi,
 augwa wiegi yai pemene yao.
 Eno augwaliba wiegi yai şe yaibao,” Genuai Bidigo te

po wali.

- 3 Te gasa t̄q kantri we bidi dabe augwaligo
 te agai po wali pabo homu d̄aḡ olama,
 te Genuai Bidigo we bidi dali bidali,
 augwade digi te tiwai po wagio,
 “Te Genuai Bidigo da te agai we bidi dabe dali
 bidimainu me iligobeo.”
 Augwaligo te tiwai po wagio.
 Te augwaligo aga domo diani bidi,
 agai te tama homu me elamuo,
 “Te ena wai meniama, te ena nogi meni yaibao,” wagio.
 “Ena te sasia pai ni me deli tiwai da,” homu igio. Menio.
- 4 Genuai Bidigo te tiwai po wali,
 “Te tobage tiwai bidi dabego
 te Sabat side bomo yai po wali peyu,
 te eno godolo homu ebo kolesaga wali peyu,
 te eno ena we bidi dabe d̄aḡ wali
 bomai po tigidali wali pobaso da,
- 5 teda eno te d̄aḡ me deli tiwai
 te augwaligo nogi te eno tempel be
 tomode muai elalueibao.
 Tama sesemane sogo te we bidi dabego
 sulama, te augwali homu koneaibao.
 Te augwaligo genuai nogigo te wai dabe
 ame nai elaluali bidi dabego nogi
 aiyaba mu elalueibao.
 Te eno augwali nogi mu silimainogo
 me iligobeo,” wali.
- 6 “Te gasa t̄q kantri we bidi dabe
 augwaligo te eno po wali pabo homu d̄aḡ olama,
 te eno we bidi dali bidalubo,
 te augwali ena dologoba aselama,
 te ena godolo homu mu elama,
 te enabolo lotu po weyu,
 te Sabat side bomo yai po wali peyu,
 tama te eno we bidi dali po d̄aḡ wali po
 tigidali te wali pali da,
- 7 augwa wiegi yai yaibao.
 Te eno bulu du Saionba te augwali eno odasa paibao,
 te augwali eno bede bidiyu,
 wiegi yai pemene yaibao.
 Te augwa te siago tigidali domainu ebo ofa dabe eyu,

te gasa tobage ofa dabe eno altade yaibao.
 Te eno augwaligo ebo ofa godolo homu yaibao,
 magi baso meni, eno be da te tigidali
 bulu t̄q kantri we bidi aselama,
 te enaba gedu haluasa wagasabo be elalubo dao.”^w

8 “Ena God, Genuai Bidi, eno te Israel we bidi ma
 sisinibao,
 te boi bidi dabego sela pelama, kalabus igi pai,
 eno te tiwai po obao.
 Te eno gasa we bidi dabe me selama,
 te eno sisinani hani we bidi dali bidimainogo odasa
 asaibao,” te po wai dao.

Godigo te Israel dabe augwa polalubo bidi dabeba wado ilali po

9-10 Te Israel polalubo bidi dabego
 te we bidi dabe bugagia me tonalusībaso,
 te Genuai Bidigo te po wai,
 “Asīqo, dage boi bidi dabe.
 Dage te uni hasa dabe te bulu du buside
 bidalubo asīqo,” wai.
 “Dage aselama, te Israel polalubo bidi dabe dolagasao.
 Te polalubo bidi dabego te t̄q kantri
 dwai sēgo elalagasainu ebo po
 te we bidi dabeba wabo sē elalubao.
 Tiali goli, augwa sē bugagia me ebeo. Menio.
 Augwali te gedu widai bage tiwai te taun
 tauade te boi bidi asobo tonalubo tiwai bidali.
 Tama augwali te pedauwali pania sai yowi tiwai
 te nai wi sabo bidi asobode
 gāga wabo usu isāwai bidali.
 Te augwa tobolude dwasianu kolesaga me elalubeo.
 11 Augwali te nai hauwa tuabo
 homu ebo yowi tiwai bidali,
 te dwasianu pāgaşīqo āq yai.
 Augwali te sipsip tonalubo bidigo aga
 sē ebo konesīqo tiwai yali.
 Deli deligo te augwa homu wali pelama,
 te aga tau sabo nai naga homu koneai dao.
 12 Te augwali sisinibo sogo, augwali
 mebago te tiwai po wali,

^w 56:7 Mat 21:13; Mak 11:17; Luk 19:46

‘Ae, tegobao, eno te wain aî selama,
 te da tųdu pelama, te dena godolo
 yaliba usu nigi paibao.
 Te do da wabo sogo, da ma sisinama,
 te umabo mu ma tueibao,’ wabo dao.”

Te Israel dabego hagoma me idu geyu, te tibo godiba lotu ma wali

- 57** ¹Te bidi dabego te wiegi yai we bidi dabe
 isibo sogo,
 te augwa homu si me ebeo,
 tede homu kone palobo menio.
 Tama augwa te tiwai homu me sabeo,
 ‘Genuai Bidigo te bidi dabe isimainogo ilama,
 te augwaliba pedelainu yali dwai sę
 te geda mumainogo ebao,’ te homu egobeo.
- ²Te doloba pai kolesagade bilali bidi dabe,
 te augwa isibo sogo, te augwa gų pagede pila muyu,
 te toma nabo wiegi yai sogo sai,
 magi baso meni, te dwai sę ebo sogo
 augwaliba pedelabo usu egobeo.
- ³Genuai Bidigo te tiwai po wali,
 “Dage te dwai kolesaga haniani ebo
 we bidi dabe, dage edaba asiąo,
 dage te pobi bidi dabe, me penani bidi dabe,
 me penani ebo we dabe te augwaligo wai dabe dao.
- ⁴Dagego po dwai deba wali,
 dage te hagoma ebo bidi dabe,
 me te po geagano pabo bidi,
 me tibo po wabo bidi te augwaligo wai dabe dawę?
 Dagego gesabidi dwai eyu, te dagego
 haę haę elama, deba wabo dawę?
- ⁵Te duga haligade dwai homugo
 te bomonama hodolobaso,
 te genuai ni dologo te lotu wabo pesageba pelama,
 te penani ebo kolesaga ebao.
 Dagego te duga wai puluba dabe elama,
 te ofa tiwai eyu,
 te odogo tų pesagede te genuai
 masigi elalubo tomode ulubo dao.
- ⁶Tama tede dagego te masigi dabe
 selama, te augwa god tiwai pedelali.
 Te augwali te masigi dabe duga god tiwai naga elama,

- te dagego ofa eyu, te wain geliyu,
te wit ofa me augwaliba yali.
Te kolesaga ebo şę dagego elama,
te dagego homugo eno hasegelama,
dageba homu dene yaibao weyu ebawe? Mu menio.
- 7 Dage te lotu wabo bulu du dageba holama,
te ofa eyu, penani kolesaga yalio.
- 8 Dagego ena tudiba mu muanio.
Dagego te duga tibo godigo piksa dabe
te duga be tu dabo tomo badu bogo side muani.
Tama dagego te duga abagi wali weba te mone menama,
augwali dali piainu yali,
tama dagego te duga nigali
genuai bet sai daide te penani kolesaga ebo dao.
- 9 Dagego au ebo, te sanda me pauda,
te wiegi yai denami ebo naigo au elama,
te dage tibo god Melekba lotu wagi pali.
Dagego te bidi dabe digibulu buluba tagala palali,
te dagego lotu wabo god gegemainu yali.
Tama dagego te gu pagede me te tibo
god dabe gegebo kolesaga ebo dao.
- 10 Dage te god dabe gegebo şę dene mu eyu,
te dagego bomo silibao.
Tialima, dage tede ge neyu, te tiwai po me weyu,
'Dago bomo te odolali silibao,' po wabeo.
'Dago te tebo kolesaga tagalinao,'
dagego te po wabeo. Menio.
Te duga dwai homu ebo kolesaga
te bomonama mu pedaliyu,
te dage kekasa mu pobao wabo dao."
- 11 "Dage dede mu wi elama,
te dagego ena ili po ola mayu,
te ena tudiba munama, te ena homu kone mu
gededa palobawe?
Te bobobage sogo eno dageba wado po wabe,
tama tiyu dagego enaba wi ebeo.
- 12 Tiali goli, te eno dagego ebo
kolesaga te pebeli diliba hanilaibao,
tama dagego homugo te wiegi yai
da olama wali pabo şę ebo kolesaga dabe,
te augwaligo dage dwasianu tau me sogobeo.
Mu menio.

- 13 Te dwai sego dage dolobo sogo,
 dagego te pesage holama elalubo
 godigo te dagego augwaliba i obaso,
 te augwali aselama, dage tau sagasaiba, agawe?
 Mu menio.
 Augwa bomo me elalubeo,
 te dwasianu waligo naga augwali sela paibao.
 Tialima, te bidi dabe enaba aselama,
 te eno augwali tau siyu, tonaluainu ebo bidi da,
 augwaligo te t̄ eno sa muyu,
 te eno we bidi dabego somainu yaibao,
 te augwali me eno digi te sa muani
 bulu dude bidimainu yaibao,” wali.

**Godigo te we bidi dabego dwai seęę sela şanama,
 te augwaliba wiegi yai sogo mawaibao wali**

- 14 Genuai Bidigo te tama po wali,
 “Te eno we bidi dabe enaba ma asomainu yaibao.
 Te augwa sunumi bugagia dodolama,
 te sunumi paliabo nai tigidali sela şawaibao,
 tiyu te nai dabego augwali şaęade dolama,
 te augwali tula muidalio,” wali.
- 15 “Ena digi ena God, te ena sesemane sogo bidibao.
 Eno nogide te magi meda mu meni yai elalubao,
 ena te Wiegi Yai Doloba Pai Kolesaga Mu Ebo God
 dao.
 Ena te ena wiegi yai bulude digi ugwadu bidibao.
 Tiali, ena te augwa digi augwa aiyaba elaluama bidiyu,
 te augwa yali dwai seęde homu dene ebo we bidi
 dali bidibao.
 Te eno augwa haliga daę waliyu,
 te augwa bidibo ula te wiegi yai
 ma pedalumainu ebo dao.
- 16 Eno ena we bidi dabeba sesemane sogo wado eyu,
 haliga seębe idugobeo.
 Te eno tama tiyu da, eno koneani,
 te augwa bidibo ula dolama, te mu silaibao,
 te bidibo ula ena digi eno augwaliba mawai dao.
- 17 Eno wado po dwai mu augwaliba wali,
 magi baso meni,
 te augwa haniani dwai kolesagade te augwaligo
 doado bage hauwa mu sabo homu yali.

- Tama tialima, te eno augwaliba dene mayu,
 te eno gesabidi augwaliba geme sesela sali.
 Tiali goli, augwa me hagoma idu geşyu,
 te augwa homu kolesaga wali piduai dao.”
- 18 “Eno te augwaligo ebo dwai kolesaga suali,
 tiali goli te eno augwali me dologobeo. Menio.
 Te eno augwaligo dwai seşeş sela şanama,
 te augwa usu yai ma pedelaibao.
 Te ena digi eno augwali bilibo dodoliyu,
 te augwali haliga daş walaibao.
 Tama te homu denede bidiyu, gela wabo we bidi,
 19 te eno augwa te homu dene ebo tagalomainu elama,
 te augwa enaba usu da olama,
 wiegi yai pemene ebo po mimainogo ilaibao.
 Ena Genuai Bidi, eno te po obao,
 te eno nagame yai haliga ebo homu te pađe bidibo
 we bidi dali,
 me te digibulu bidalubo hani dabe dali me ebao.
 Te augwali eno usu ma ilama,
 te augwaliba wiegi yai sogo mawaibao wai dao.^x
- 20 Tiali goli, te dwai kolesaga ebo we bidi dabego,
 augwa te dwai kolesaga ebo me tagalogobeo.
 Augwali te tamu aşı sesemane sogo
 dinigo te haniani pobele bage me dwai nai sela asu,
 te nambis dolagasobo tiwai ebo dao.”
- Genuai Bidigo te po wai.
- 21 Eno Godigo te tama po wali,
 “Te dwai kolesaga ebo we bidi dabe,
 te augwa bugagia bidabo wiegi yai sogo
 me elalugobeo,” wali.^y

**Te dagego nai tubo habu seliba wida, teda te dwai
 kolesaga ebo me habu selao wali po**

- 58** ¹ Genuai Bidigo enabolo te tiwai po wali,
 “Nago genuai po daşa mu olama, i wao,
 dua digi i me wagio.
 Nago bomonama i wabo, te bu wabo nai biugel
 bu wabo tiwai yao.
 Te eno we bidi dabeba weyu, te Jekopgo hani dabe,
 te augwa dwai seşeş me dwai kolesaga po wao,” po wali.

- 2 “Mu tama, te tigidali sogode augwa
 te enaba lotu wabo kolesaga eyu,
 te eno homu kolesaga osola sueinu yali.
 Te augwaligo enaba hanalu,
 te augwaliba doloba pai kolesaga yao weyu,
 te augwali pađe bidibaso,
 te augwali wiegi yai pemene yaibao wali.
 Tiali goli, te hani dabego tibo po mu wai.
 Augwaligo te eno bomo yai po tudiba munama,
 te augwa dwai kolesaga naga ebo şe yai dao.
- 3 Augwaligo enaba te tiwai po wali,
 ‘Genuai Bidi, dago te nai habu selama,
 te dena digi aiyaba elalubo nago suali,
 tiali goli magi baso nago te da
 tau sabo şe isabawe?’ ”
 “Tiali goli, ena Genuai Bidi,
 eno augwaliba te tiwai po wei ponani,
 ‘Te tigidali side dagego te nai habu selebo sogo dađ ilali,
 dagego te duga naide digi naga homu kone palama,
 te dagego duga şe ebo bidi dabeba dwai şe ebo dao.
- 4 Dagego te po weyu, te dage nai habu selama,
 enaba gedu haluasa po waibao wai.
 Tiali goli, dagego kolesaga te gasagi yai tedali mu yalio.
 Dagego te wado elama, hwiyu, nogo sugunama,
 te gasa bidi gesabidide eliyu ebo dao.
 Dagego te dwai kolesaga te dagego nai habu selama,
 bidibo sogo ebaso da,
 teda eno dagego gedu haluasa po wabo me odogobeo.
- 5 Te dagego homugo eno dagego te tigidali side
 nai habu selebo kolesaga ebode
 te eno dage godolo eba homu eba, agawe?
 Dagego te homu dene ebo ugwa munama,
 te duga tobolu te t̄ba basigulu,
 te waligo awi dili basiasa pabo tiwai eyu,
 te dage sia keli daide piyu, te duga digi aiyaba elalu,
 te gasa tobage kolesaga me yali.
 Tama dagego homugo dagego te tobage kolesaga ebode
 eno dageba bugai haliga eba homu yaibao, agawe?
 Mu menio.”
- 6 “Eno te tobage kolesaga godolo homu me ebeo.
 Eno homugo dagego te haniani
 dwai kolesaga mu ebo habu selama,

- te gasa we bidi dabe elaluama,
 te dolobo kolesaga me habu selao.
 Te we bidi dabe te hobedagia kalabuside bidiyu,
 dagego augwali te bono me sengo kenani,
 tama augwali te bulmakau tiwai
 dagego te ni nami augwa dogonide kenama,
 te duga se emainu ebo tiwai eyu tonalubao.
 Te dagego augwaliba wiegi yai kolesaga eyu,
 te augwali olo pomainu tagala palao.
- 7 Eno godolo homu ebo kolesaga e tiwai dao.
 Eno homugo dagego te nasi ebo
 bidi dabeba nai mao homu ebao.
 Te magi nai doado bage meni yai bidi
 te dagego aga piabo be meni yai subo sogo,
 eno homugo dagego augwali te duga
 beba odasa pao homu ebao.
 Te dagego te bidi aga tigi bea sabo ugwa meni yai
 subaso,
 te eno homugo dagego augwaliba ugwa maiyo homu
 yali.
 Tama eno homugo te duga deli kaneme sibi
 te augwa sege elalubo sogo,
 te augwali tudiba munamo dao.”
- 8 “Te dagego eno godolo homu ebo kolesaga ebaso da,
 teda polo tama te eno dagede elalubo
 dwai sege sia somainu yaibao,
 te kigamude nanobo giliga ulago
 te hulua sai elaluali hola sabo tiwai yaibao.
 Te eno dage usu ma ilaibao.
 Te ena, doloba pai kolesaga ebo God,
 ena dage asobodu polasa paibao.
 Te ena dage tudibadu nosali me te eno
 genuai bomo ula dali asu,
 te dage bugagia tonalueibao.
- 9 Te dagego enaba gedu haluasa po weyu, i wabo sogo,
 te ena Genuai Bidi, eno te dagego
 gedu haluasa po wabo odoyu, tau saibao.
 Te ena dage dali bidibo, dagego koneaibao.
 Te dagego gasa bage dabe aiyaba elaluama,
 te augwaliba nogo tu eyu, po dwai wabo tagalama,
- 10 te dagego suali,
 te bidi dabe te doado bage me

- nai dabe sqa pai elalubo subaso, te dagego augwali
 homu dene mu elama,
 te augwali sqa pali nai mobaso da,
 teda eno dage wiegi yai bugagia ilaibao.
 Te eno dageba wiegi yai sogo pedalumainu elama,
 te bomu yai giliga ula tiwai eyu,
 te be hulialuali hola sabo tiwai ebo dao.
- 11 Te ena Genuai Bidi, te sesemane sogo eno dage
 bugagia tonalu,
 te dage bilibo dodolama,
 te dagego homugo wei homu ebo
 nai dabe usu nama mawaibao.
 Megi dage te ai meni yai tade bidibo tiwai ebao,
 tiali goli eno dage wiegi yai bomai
 we bidi pedalumainu yaibao.
 Tama dage te gi ta ili ai hauwa elalubo tiwai elama,
 te sula sisabo ulu ai tiwai elalueibao.
- 12 Tama te dolali taun dabe dagego ma nigaibao.
 Dagego te be dabe te polobadu se yai
 elaluali pesagede ma se yaibao.
 Tama dage nogi augwaligo te tiwai waibao,
 ‘Te taun obo dabe ma dodolobo hani dabe’,
 me ‘Te augwali te sunumi dabe me be dabe
 bugagia ma dodolobo hani dabe dao,’ waibao,” wali.

**Te dagego Sabat side bomai po bugagia wali
 pobaso da, te dage bugagia mu bidaibao**

- 13 Genuai Bidigo te tiwai po wali,
 “Dagego te Sabat side bomu yai poligio,
 te eno side ena digi dai ilali.
 Te dagego duga se dabe digi te side yabo homu me igio.
 Dagego te Genuai Bidi eno side,
 te ena godolo homu mu elama, te duga genuai side
 da homu kone palao.
 Te dage me tedela pisama, te duga se me isiamu,
 te haniani olo po me minamo dao wali.
- 14 Dagego te tobage yabo kolesaga dolo wali pobaso
 da, teda te Sabat side dagego Genuai Bidi,
 enade wiegi yai pemene umabo mu yaibao.
 Te eno dage te polobadu te duga bulai
 wai nquba bomai po dau weyu,
 te bidao wali bulu du pesagede bugagia bidaibao,

- Te tama tiwai naga dagego te ebo sego
 te gasa bage tau me sogobeo. Menio.
 Augwa te gasa bage tola selama, te augwali elaluama,
 te augwaliba dwai se ebo dao.
- 7 Sesemane sogo dagego te dwai kolesaga yabo homu
 godolo mu ebao.
 Te sesemane sogo dagego te magi dwai se me isaıwai
 bidi dabe ela muabo homu hogodali.
 Dagego te dwai se dabe yabo homu naga ebao.
 Te dage udayu, te gasa we bidi dabego
 bidibo ula dolabo se ebo dao.
- 8 Dagego te haliga nagame elama,
 dua digi bidibo kolesaga konesiama,
 te dagego te Genuai Bidigo godolo ebo doloba pai
 kolesaga me ebeo. Menio.
 Te dagego kolesaga dabe dolo me isaıwai,
 te bidi dabego dage te bilibo sunumi
 wali pobaso da,
 teda augwali te bugagia haliga nagame elama,
 bidabo pesage me gegelama, bidabo usu me egobeo.^z

Te we bidi dabego augwa dwai se yali sege po pusali

- 9 Tialima, te we bidi dabego te tama po wali,
 "Genuai Bidi, nago naga doloba pai kolesaga ola mayu,
 te tau selama da ma sabeo.
 Megi da, te kolesaga page dago koneani.
 Da te be huliasaide bidibo we bidi tiwai elalu,
 tama dago homugo te wiegi yai sogo daba pedelama,
 te giliga bomonama nanobo tiwai elama,
 te be huliasai silimainu homu godolo mu yali.
 Tiali goli, menio.
 Da te genuai be huliasaide bilibo tiwai eyu,
 te da haniani segego gegebo dao.
- 10 Te sege dabego da te gedu widai tiwai biliyu bidibao,
 te da pabo sunumi gege gege bilibo dao.
 Te genuai giliga nanalubode digi,
 da te be huliasaide bilibo bidi dabe tiwai bilalubo,
 te dago saıa dani te masigiba tıa palobaso,
 da tula mubo dao.
 Dago homugo te da bugagia bidaiba homu yali,

^z 59:8 Rom 3:15-17

tiali goli menio.

Da te isai bidi bidibo tiwai yai dao.

- 11 Te seęę dabego da dwai dene mu ebaso,
te dago te genuai hasa bea dabego
gani gani wabo tiwai weyu,
te dago gela wali te ba higo po wabo tiwai yali.

Tama dago te nageba tonalu,
te nago doloba pai kolesaga ola mayu,
te da tau selama, ma sabo tonalubo dao.

Tiali goli, menio.

Te nago doloba pai kolesaga dade
digibulu elalubo dao,” wali.

- 12 “Genuai Bidi, te dago dwai seęę nago gedude
hauwa mu elama,
te seęę dabego da po tų ilali.

Tama dena digi dena yali te dwai seęę tigidali bugagia
koneai dao.

Mu tama, dago dago dwai seęę hauwa yali dao.

- 13 Dago te dena Genuai Bidi, God, nageba dwai seęę yali,
te dago nage tudiba munama, nago po sela şawani.
Dago nage dologode bidibo te hagela homu yai dao.
Dago te gasa bage elaluama,
te haniani hagoma kolesaga yali.

Dago te gasa bage dabe tibo po ola mayu,
po geagano bilama,
haniani sunumi nigibo po wali.

- 14 Tama tibaso, dago te kolesaga
dabego te nago doloba pai kolesaga
te dade digibulu elaluai,
tama tiyu, te nago da tau selama, ma sabeo.
Te dago te doloba pai kolesaga me mu po wabo,
te da tomoba aselama, elalumainu ebeo.
Te da sisinibo side me, te augwali si me bidagasobeo.

- 15 Te doloba pai kolesaga deli dade me elalubeo.
Te bidi me deligo aga dwai kolesaga tagalobaso da,
teda te gasa bage dabego te aga dolabo haniani
sunumi gegebo dao,” wali.

Genuai Bidigo aga we bidi dabe bugagia bidimainu yaibao wali

Genuai Bidigo te we bidi dabego doloba pai kolesaga
ebo me susiřbaso,
te agai augwaliba dwai haliga yalio.

- 16 Te aga dwai midigi siyu, te tiwai suali,
 te gasa bagego dolali bidi dabe
 te tau sabo bidi elalubo subeo.
 Tama tibaso, te aga bomogo digi,
 te aga doloba pai kolesagago digi,
 te Genuai Bidigo augwali ma selama,
 te augwali bugagia bidimainogo ilai dao.^a
- 17 Agai te doloba pai kolesaga te kapa
 holobo ugwa mubo tiwai eyu,
 te aga hagawiade mesega sabo tiwai yali.
 Te aga te we bidi ma sabo bomo
 te hwıbo madi kapa tiwai muani.
 Te aga ugwa gudubo tiwai bomonama daı ıla selama,
 te dwai se ebo bidi dabeba dene mawainu tiaıbao.
 Te aga haliga sebe ebo te bobobage
 ugwa aiyaba tagalalubo tiwai yaıbao.^b
- 18 Te agai haliga sebede,
 te aga boi bidi dabeba dwai dene mayu,
 te augwa yali dwai se dolo usu wei ponaıbao.
 Te agai te pađe elalubo bulu to kantri we bidi dabeba,
 me te digibulu to kantri dabe,
 te dwai dene mabo se mu yaıbao wai dao.
- 19 Genuai Bidi te genuai we asobo tiwai eyu,
 te Genuai Bidigo ponobo sogo te
 daı walali we gisigilama,
 te we asesa mu pomainu yaıbao.
 Te tıgdali to asesa mu pomainu yaıbao.
 Te tıgdali to habu we bidi dabe, te giliga pedalubo badu
 gagalasa pelama,
 te giliga degegi paboba usu nigi paıbao,
 te augwaligo Genuai Bidigo bomo
 me genuai nogi koneama, te aga nogide wi elama,
 te augwali aga dologoba aselama,
 bidimainogo yaıbao.
- 20 Genuai Bidigo te po wai, “Ena te dage posolalu,
 te dage tau sabo God,
 ena te Jerusalemba aselama,
 te tıgdali we bidi te Jekopgo hani te augwa dwai
 kolesaga ebo tagalali bage ma sagasaıbao.^c
- 21 Te ena da, eno bomai po augwali dali daı walama,

^a 59:16 Ais 63:5 ^b 59:17 Ef 6:14; 6:17; 1 Te 5:8 ^c 59:20 Rom 11:26

te augwaliba eno te tiwai po waibao,
 ‘Te eno mobo noma bidi me,
 te eno dagebolo mani po me,
 te dagede bidiyu,
 te dagego pedauwaligo eno po pusaibao.
 Dagego sesemane sogo tama tiaibao,
 te nosali dagego wai dabego me
 te duga bulabo wai dabego me te tama tiyu,
 te sesemane sogo augwaligo me
 eno po elalua peyu, pusaibao,’ ” te po wai dao.

Godigo genuai ula me bomo te Jerusalemde elalueibao

- 60** ¹ Genuai Bidigo te po wali, “Jerusalem, nage hogodama, te giliga nanobo ula tiwai yao, magi baso meni, megi eno genuai ula me bomo, Genuai Bidigo ula te nage daide ugwadu yaibao.
- ² Suao. Te sisi yai po, me te genuai be hulua sabogo, te tode tigidali gasa hani we bidi mesegelaibao. Tiali goli, ena Genuai Bidi, ena nageba aselama, te eno genuai ula te bomonama, nage daidu ula elalueibao.
- ³ Te Israel hani isawai we bidi dabego nago te ula sulama, te augwali nageba asaibao. Te king dabego me nago te bomai ula sulama, te augwali hogodama asaibao,” wali.
- ⁴ “Nago tobolu ugwaba selama, tonono bilao. Te naga wai dabe augwali deliba sisinama, asobo sueibao. Te nago ogwa dabe te digibulude bidai asaibao. Te gasa bulu to kantri bidi dabego te nago wegi dabe augwa hagawiade munama, tolasa asaibao.
- ⁵ Nago te tebo sulama, te nago gesabidi ula umagia mu yaibao. Te nago hoboludu dali pua pelama, genuai pemene yaibao. Te genuai sipidu wiegi yai nai hauwa nageba sesaibao. Te nago mone hauwa mu te tigidali to kantride saibao.
- ⁶ Te Israel hani isawai Midian bage me Efa bage, te augwaligo gesi kamel hauwa mugo te walu dabe nageba sesaibao.

- Augwali te t̄ kantri Seba teba pelama, te gol me,
 te wiegi yai hano denami ebo pauda me,
 te selasa asaibao.
- Te we bidi dabego Genuai Bidi,
 eno genuai nogi ugwaba saibao.
- 7 Te Kedar me Nebaiot dabego te tigidali wiegi yai
 sipsip hani nageba sesaibao.
 Tama ena we bidigo te sipsip dabe seselama,
 te eno alta daiba ofa ebaso,
 te ena wiegi yai pemene ebao wali.
 Te eno be te polalubo be mu pedelama,
 te genuai nogi elalueibao,” te po wai dao.
- 8 “Te magi tedela yai nai asesa mu asu,
 te dagalu p̄ waligo te tamu ā daidu
 selasa asobo tiwai yali,
 te ba hi dabe augwa beba ma
 bola asobo tiwai ebawe?
 Te magi nai dawe?
- 9 Te digibulu buludu asobo sip dabe dao.
 Mu tama, te digibulu bulu we bidi dabego te eno
 augwali tau sabo tonaluai.
 Augwaligo te genuai sip dabe tagala palali,
 te nago ogwa dabe nageba ma sesalio.
 Te we bidi dabego te hauwa silva me gol
 te sip dabego sela somainu tolali.
 Augwa tama tiali, magi baso meni,
 augwaligo te eno nageba wiegi yai s̄ bugagia eyu,
 genuai nogi elalubo sulama yali,
 te augwaligo Israelgo Genuai Bidi,
 te ena Godiba genuai nogi mayu yali,
 ena te Wiegi Yai Doloba Pai Kolesaga Mu Ebo
 God dao,” te po wai.
- 10 “Jerusalem, te gasa bulu t̄ kantri bidi dabego nago
 genuai obo te masigi dabego ma nigagasaibao.
 Te augwa king dabego nago s̄ yaibao.
 Hasia eno wado po dwai nageba wali,
 te eno dene nageba mawai.
 Tiali goli, megi eno bugai haliga eyu,
 te nageba olo tau sabo wiegi yai kolesaga ebao.
- 11 Te nago genuai obo sunumi dabe
 te giligade me hulide dalalueibao,
 magi baso meni, te gasa bulu t̄ kantri we bidi

dabego te augwa mone sesemane sogo
nageba sesaibao.

Te augwaligo augwa king dabe me te nageba olo mu se
ebo bidi tiwai emainu odasa asaibao.^d

12 Tiali goli, te nage dologoba aselama,
nago se isaıbo bulu to kantri dabe,
te augwali dolama, mu silaibao,” wali.

13 “Te bidi Lebanon genuai busiba holama,
te bobage bobage sawi yai ni wuli, me saipres,
me te gasa wiegi yai ni dabe togolama,
te augwaligo nageba sesaibao.

Te ni dabe dali, te bidi dabego eno be ma şenama,
te be gasa sawi wiegi yai mu pedelaibao.

Ena te ena duabo sia kingde dugulalu,
tama te be da eno saıa teba manama elalubo tiwai
elalueibao.

Tama te be eno polalubo be mu pedelama,
tama aga genuai nogi elalueibao.

14 Te polobadu nageba dwai se eyu,
te nage godolo homu isaıwani hani dabe,
te augwa tobolu basiasa nageba asaibao.

Te augwa kidu sugunugulama,
te nago saıa paıde augwa tobolu basigulama,
te nageba genuai nogi mawaibao.

Te augwa nage nogi te tiwai weyu,
‘Genuai Bidigo Taun da,’ te ‘Saion da,’
waibao, ‘te Israel Godigo Taun,
aga te Wiegi Yai Doloba Pai Kolesaga Ebo God mu
dao.’ ”^e

15 “Jerusalem, nage ololama, olo elalu,
te nago sunumi dabede bidi iba oba soyu me isaıwai.

Nage te we tiwai bidiyu, te aga bidigo
aga godolo isaıma, tagalobaso, aga wi pali.

Tiali goli, te eno nage te gasa
sawi wiegi yai pedalumainu ilama,
te nage polalu, polalubo mu pedalubaso,
te we bidi dabego nageba wiegi yai
homu pemene mu yaibao.

Tama nage te tiwai naga sesemane sogo
bidada pidu, bidada paibao.

^d 60:11 Ped 21:25-26 ^e 60:14 Ped 3:9

- 16 Te nago wiegi wiegi yai nai te gasa kantride siyu,
 te king dabego augwa wiegi yai
 sawi yai nai nageba mawaibao.
 Tama nago te tiwai koneama,
 ena naga te Genuai Bidi da waibao.
 Ena te ena we bidi ma sabo God dao,
 ena te nage posolalu, tonalu, tau sabo God,
 ena te Jekopgo hani dabego bomai God dao,” wali.
- 17 “Te eno nago bras hasegelama,
 tama nago gol munolueibao.
 Me nago ain hasegelama, tama nago silva munolueibao.
 Te eno nago ni nami dabe me hasegelama,
 tama nago bras elalueibao,
 me nago masigi dabe hasegelama,
 nago ain elalueibao.
 Te eno wiegi yai bugagia haliga nagame homu elama,
 dugulaluabo kolesaga nigilaibao,
 te doloba pai kolesagago nage bilibo dodolaibao.
 Te niwai bidi mego nage tonalu,
 nageba dwai şe me egobeo.
- 18 Te nago tonalubo tigidali tş habu badu
 te bidi dabe munu me ma hwşgobeo.
 Awe, nago tşde me te doado bage alubo
 kilikili me egobeo.
 Te nago genuai obo nogi te tiwai elalueibao,
 ‘Genuai Bidigo aga we bidi dabe ma salio,’ waibao.
 Te nago genuai sunumide te tiwai nogi elalueibao,
 ‘Genuai Nogi Mao,’ ” wai.
- 19 “Te giligago nageba te bubugade ula mayu,
 elalubo tiwai munu me elaluşşayyu,
 te poluago me nageba ula mayu, me egobeo. Menio.
 Genuai Bidi ena digi ena te giliga tiwai,
 me polua tiwai ula elalu,
 te eno sesemane nageba ula maduaibao.
 Te ena, nago God, ena te genuai ula elalu,
 te nago au ilibo nai elalubo dao.^f
- 20 Nago te giliga me polua iba dega sigi pelama,
 te be hulua siyu ebo me pedalugobeo,
 magi baso meni, ena Genuai Bidi,
 sesemane sogo ena te nago ula tiwai elalueibao.

^f 60:19 Ped 21:23; 22:5

Tama nago seęę dali homu dene ebo
sogo me tigidali silaibao.

21 Te sogo te nago we bidi tigidaligo
doloba pai kolesaga naga eyu,
te eno augwa tų da olama,
sa muani tų te augwa saibao,
tama augwa tede sesemane bidada paibao.

Te ena nogogo digi eno augwali
te deli hani we bidi pedalumainu ilali, tama augwali
te eno bulai ni nologo tiwai pedelali.

Eno tama tiali, te gasa hani we bidi dabego sulama,
te enaba genuai nogi momainogo tiai dao.

22 Jerusalem, te nagede bidibo mena bidi aga nogi me
elalusiąbaso,
te tagalao, aga te genuai hani
wai dabego aya mu pedelaibao.

Te dwasianu mu yali hani dabe
te augwali umabo pedalu,
te augwali genuai bomai kantri
we bidi tiwai pedelaibao.

Ena Genuai Bidigo eno te po obao,
te seę dabe te eno bodolu muani sogo
polo asesa pedelaibao,” te po wai dao.

Te Godigo aga we bidiba wiegi yai seę ilabo sogo te pedelalio

61 ¹Tigidali Bomo Elalubo Godigo Mobo Noma
Bidi enaba bidagasali,
magi baso meni, Genuai Bidi aga
digi eno toboluba wel gelali,
te ena dąi sa muyu,
te aga wiegi yai po te magi
doado bage meni yai bidi dabe selasa pomainu yai.
Te agai ena tagala palali, te haliga seęę genuai elalubo
bidi dabego seęę silimainu yai,
te kalabuside bidibo bidi dabeba po pusu,
te augwa kalabus tagalama,
olo pao po omainogo yai.^ę
² Agai ena tagala palu, te tama po pusao wali,
te dago Genuai Bidi, Godigo seę yabo
sogo pedelalio,

^ę 61:1 Mat 11:5; Luk 7:22

- te aga we bidiba wiegi yai şe bugagia ilama,
te boi bidi dabeba dwai dene mawaibao, wai.
- Te agai ena tagala palali, te homu dene eyu,
gela wabo we bidi dabego haliga daş walomainu
tagala palai dao.^h
- 3 Te Saionde gela udubo we bidi dabeba
eno te nagame yai haliga dua eyu,
pemene ebo homu me selasa asaibao,
te augwa bomo silali bageba tama tiwaibao.
Augwali homu dene ebaso,
te sia keli augwa toboluba muani.
Tiali goli, eno te nai hasegelama,
tama dwagi yai au yabo nai augwaliba mueibao.
Awe, eno augwaligo tigiba te wiegi yai
denami ebo wel mawaibao,
tama augwali homu dene ebo tagalama,
dwagi yai homu pemene eyu bidaibao.
Te augwa bomo ma selama,
te Genuai Bidiba pemene ebo balia waibao.
Augwa tigidali te doloba pai kolesaga
naga ebo şe bomo yaibao.
Te gasa bidi dabego sueibao,
augwali te Genuai Bidigo digi
bulali ni kali tiwai elalubao,
tama augwaligo Genuai Bidigo nogi ugwaba saibao.
- 4 Te dage we bidi dabego te polobadu
dolali taun ma nigiyu,
tama dagego te kibu be hauwa dolai elaluali nai
tigidali ma dodolaibao.
- 5 Te gasa bulu tş kantri bidi dabe aselama,
dagego şe yagasaibao.
Te dagego sipsip dabe augwaligo tonalu,
te augwa tş elama, nai bulaibao.
Tama augwaligo te dagego wain gi me tonaluaibao.
- 6 Tiali goli, duga digi dage te Genuai Bidigo pris bidiyu,
te augwaligo dage nogi weyu,
te dena Godigo şe bidi da waibao.
Te duga nai hauwa elaluaibao,
te gasa tş kantri bidi dabego sela asai.
Te augwaligo wiegi yai nai hauwa dageba mobaso,

^h 61:2 Mat 5:4; Luk 4:18-19

- te dage wiegi yai homu mu pemene yaibao.
- 7 Polobadu te dage hale dwai mu elama,
duga gesabidi seselaluali.
Tiali goli, dage te duga tde digi bidaibao,
te dagego nai hauwa mu siyu,
te dagego polobadu elaluali nai mu edelaibao,
te dage pemene umabo mu yaibao.
Tama dagego te ebo homu pemene
sesemane sogo elalua paibao.
- 8 Magi baso meni. Genuai Bidigo te po wai,
“Eno te doloba pai kolesaga naga godolo ebao.
Eno te bidi elama nai wi sabo kolesaga,
me te gasa bageba dwai şe ebo
kolesaga, te hagela mu ebao.
Te eno we bidi dabe te gasa bidi dabego
augwaliba mani dwai şe ebo seęe hauwa tolali,
te mu tama te megi eno augwaliba
wiegi yai nai mu mawaibao.
Te eno bomo yai po me deli augwali dali daę walaibao,
tama te daę walali bomo yai po
sesemane elalua paibao.
- 9 Te eno we bidigo bulai waę wai dabe
te gasa t kantri hani we bidi tomode
genuai nogi elalueibao.
Te augwali subo we bidi dabe,
te augwa te tiwai koneaibao,
te hani dabe te eno hani dabe dao,
Genuai Bidi, ena digi eno augwali wiegi yai ilaibao,”
wali.
- 10 Te eno pemene ebo wiegi yai balia
Godiba waibao, eno Genuai Bidi dao.
Te eno pemene umabo mu yaibao,
magi baso meni, agai ena ma sali.
Te aga wiegi yai sogo te aga doloba pai kolesagago ena
te bobobage wiegi yai ugwago mesega sabo
tiwai yali,
te ena te we sabo bidigo au ebo tiwai eyu,
te we aga bidigo aga kebo sogode au ebo tiwai yai
dao.ⁱ
- 11 Magi baso meni. God, Genuai Bidigo

ⁱ 61:10 Ped 21:2

doloba pai kolesaga dali,
 te aga nogi ugwaba sabo kolesaga dali,
 te we bidi dabe tomode pedelaibao,
 te gide bulali nai wai kulubi pedelama,
 te genuai ebo tiwai yaibao.
 Tama te gasa Israel hani isawai we bidi dabe tigidaligo
 sumainogo yaibao.

Jerusalem gesi nogi saibao

- 62** ¹ Jerusalem, nage tobade te eno po hanilama,
 bomo elama weyu,
 te Genuai Bidigo nageba wiegi yai şe yao po obao.
 Te eno pedauwali me pania sogobeo. Mu menio.
 Te eno Genuai Bidiba i udu,
 te Genuai Bidigo te bugagia
 wiegi yai doloba pai kolesaga nageba eyu,
 te kigamu nanobo giliga ula tiwai eyu,
 te hulide domanobo sole ula ebo
 tiwai teba usu numainogo yaibao.
- ² Tama te gasa t̄ kantri we bidi dabego
 nago te doloba pai kolesaga ebo sulama,
 te augwa king dabego te nago bomo
 me genuai nogi elalubo sueibao.
 Te augwa nage gesi noma nogi nogi yaibao,
 te nogi Genuai Bidigo digi nageba mawaibao.
- ³ Nage te gasa sawi yai kingo madi
 te Genuai Bidi aga nogode tolalubo tiwai yaibao.
 Awe, nage te aga nogode tolalubo
 wiegi yai au yabo nai tiwai yaibao.
- ⁴ Tama te bidi dabego nageba
 te tiwai nogi ma nogisayu,
 “Genuai Bidigo aga tagalai da,” me wagobeo.
 Te nago t̄ augwaligo te tiwai nogi me wagobeo,
 “Hobede ya, te t̄ dolama, olo elalubao,”
 wagobeo. Menio.
 Te augwaligo nage gesi nogi te tiwai waibao,
 “Eno wiegi yai homu pemene agaba ebo dao.”
 Te nago t̄ augwaligo te tiwai nogi yaibao,
 “We bidigo salio,” magi baso meni,
 Genuai Bidigo bugai haliga eyu, wiegi yai pemene
 umabo nageba ebao.
 Te nago t̄ bugagia ma elalu, te we tiwai,

- te bidigo aga ma sabo tiwai yaibao.
- 5 Te naga wai dabego nage selama,
te nage dali bugagia bidibo tiwai yaibao,
te gesi ogwa bidigo te gesi wegi selama,
te augwa si bugagia mu bidibo tiwai ebao.
Te Genuai Bidigo wiegi yai pemene nageba yaibao,
te gesi noma sogo bidigo we selama,
te aga weba wiegi yai homu pemene
ebo tiwai ebo dao.
- 6 O Jerusalem, te nago masigigo nigai genuai obo
ugwadu daide eno te tonalubo bidi muai,
tama augwaligo pedauwali te giligade hulide me
pania sogobeo.
Eno augwaliba te tiwai po wali,
“Dage te Genuai Bidiba i wabo bidi dabe,
dagego toma me nogobeo. Menio.
- 7 Dagego bomo elama, agaba i ola pidu,
agai te Jerusalem bomo ma iliboba usu nao,
tama Jerusalem te tigidali t̄de we bidi gedude
polalu mu pedelaibao,” eno te po wali.
- 8 Genuai Bidigo nogo guni sisu muyu,
bomai po daŋ wali,
te aga genuai bomode agai te daŋ wali po mu
pedelaibao.
Agai po te tiwai, “Ena Genuai Bidi, te eno te boi
bidi dabego nago we bidi dabego te s̄e dene elama,
bulubo wit dabe munu ma sagasomainu me iligobeo.
Tama eno te gasa t̄q kantri dabego te nago we bidigo
nigibo wain aŋ sagasomainogo me egobeo. Menio.
- 9 Te nago we bidi augwa digi naga
te inayu tau yali wit selama, te bret nigilama
tueibao.
Te augwaligo ena Genuai Bidi,
te enaba genuai nogi mawaibao.
Te nago we bidi dabe augwa te inawani
wain du dabe selama,
te wain aŋ nigaibao.
Tama augwa te eno be obo tomoba sela aselama,
te aŋ augwa tuyu,
te wiegi yai pemene enaba yaibao,” te po wai.
- 10 Dage te megı Jerusalemde bidibo hani dabe,
dage tigidaligo taun tagalião.

- Te taun tagalama, sunumi bogoba pelama,
te sunumi bugagia dodolao,
te duga we bidi dabe ma asobao.
- Te augwa sunumi bugagia sisilao,
te sunumide elalubo masigi dabe sela sayao.
Tama te tigidali t̄q kantride bidibo hani we bidigo
suabo plak me deli nide walao.
- 11 Nage Jerusalem, nago te tiwai koneao,
Genuai Bidigo te tigidali t̄de we bidiba weyu,
nageba te po pusumainogo yali, “Saion, suao.
Te nago we bidi dabe ma sabo bidi, aga asobao.
Suao. Te agai aga we bidi dabe odasa asu,
te aga te boi hw̄inama,
te wiegi yai nai sali tiwai yali dao,” te po wao.^j
- 12 Te augwaligo nago we bidi te tiwai nogi poaibao,
“Te Genuai Bidigo tedali gasagi yai we bidi dao,” me
“Te we bidi dabe te Genuai Bidigo ma salio.”
Te augwaligo nage nogi te tiwai waibao,
“Genuai Bidigo godolo mu ebo taun da,”
me, te “Genuai Bidi ma aselama, bidibo taun dao,”
waibao.

Genuai Bidigo aga boi bidi dabeba dwai dene mawaibao

- 63** ¹ Te king bidi tiwai bugagia mu au elama,
te taun Bosra te t̄q kantri Idom badu
tagalama asobo bidi de dawe?
Te aga genuai bomo dali wele sesa asobo bidi de dawe?
Te aga gudali ugwa tonani te mama mu yalio.
“Te ena, Genuai Bidi tama dao.
Eno te we bidi dabe ma sabo bomo elalubao,
tama eno te tiwai po obao,
te eno doloba pai kolesagade,
eno te augwaligo boi bidi dabe aiyaba elaluaibao,”
wali.^k
- ² Magi elama te nago gudali
ugwa dabede mama kaneme mu yali,
te bidi te wain nigibo tomoba pali tiwai elama,
te wain wai agabo digi pabo tiwai yali da, agawe?
- ³ “Eno bulu t̄q kantri dabe agawali,

^j 62:11 Ais 40:10; Ped 22:12 ^k 63:1 Ais 34:5-17; Jer 49:7-22; Ese 25:12-14; 35:1-15;
Amo 1:11-12; Oba 1-14; Mal 1:2-5

- te bidigo wain du wai te masigi pou tomode agabo
tiwai yali,
te gasa t̄q kantri bidi me deligo ena tau me sabeo.
Eno augwaliba haliga şeḃe eyu,
wado dwai mu olama,
te eno augwali bomonama mu
agawali madi te augwa kaneme gela tagalu,
te eno gudali ugwa dabede kaneme dagana salio.¹
- 4 Eno te ena sainu sa muani we bidi dabe sabo sogo
pedelalio,
tama tiyu, megi sogo te eno augwaligo boi bidi
dabeba dene mabo sogo dao.
- 5 Ena dwagila mu midiga sayu tonani,
te tiwai te ena tau sabo bidi me elalubeo.
Tialima, te ena bomogo digi te eno genuai haliga şeḃego
me,
eno te ena we bidi dabe ma siyu,
te eno augwaligo boi dabe aiyaba elaluai dao.^m
- 6 Te eno genuai haliga şeḃego,
eno tigidali we bidi dabe agala salio.
Te eno haliga şeḃe ebo kabude te āi augwa tumainao,
te augwali aiyoge page dwai mu yalio.
Te eno augwaligo kaneme t̄ba gelu tiai dao,” wali.

Te we bidi dabego Genuai Bidigo wiegi yai kolesaga homu kone palali

- 7 Te eno Genuai Bidigo wiegi yai olo mu tau sabo
kolesaga po pusubao.
Te eno aga nogi ugwaba siyu,
te agai da tau siyu, wiegi yai kolesaga hauwa
yali po pusaibao.
Awe, te aga genuai olo mu tau sabo wiegi yai kolesaga,
me homu dene ebogo,
agai te Israel haniba wiegi yai şe mu yalio.
- 8 Genuai Bidigo te po wali,
“Te hani dabe, augwali te eno hani we bidi dabe
mu da,
te augwa hagoma elama, eno po me sela şagobeo.”
Tama te aga augwali ma sali bidi pedelai dao.
- 9 Te augwali dene me seḡe tolali sogo,
Genuai Bidi me augwali dali te dene me seḡe tolali.

¹ 63:3 Ped 14:20; 19:13, 15 ^m 63:5 Ais 59:16

- Te agai haliga augwalide homu dene ebaso,
 te agai augwaliba te olo mu tau sabo
 wiegi yai kolesaga yali,
 tama aga digi te mobo bidi ensel tiwai pedelama,
 te augwali ma sali.
- Te tobage sogo sesabi mu elama,
 te agai augwali tolalu,
 te augwali bugagia mu tonaluai dao.
- 10 Tialima, te augwaligo agaba hagoma eyu,
 te agai homu ogwa wai mobo te haliga seęę mu
 ilali.
 Tama tibaso, aga digi augwaliba boi bidi elama,
 te augwaliba hwįani.
- 11 Tialima, nosali augwa te polobadu
 yali sogoba homu kone palali.
 Augwa te Moses me aga we bidi dabeba homu kone ma
 palama,
 augwa te tiwai po wai,
 “Te Genuai Bidi mena bidibawe?
 Polobadu agai te polalubo bidi aga
 we bidi dabe dali odasa asu,
 te tamu ąi nogeali Genuai Bidi mena bidibawe?
 Polobadu agai homu ogwa wai mobo
 te augwali dali bidimainu yai dao.
- 12 Agai te aga genuai bomo te Mosesba mawai.
 Agai te tamu ąi si badu peda somainu elama,
 te aga we bidi dabe te ąi nogelama,
 u badu pedaiba sabolali,
 tama te kolesagade aga genuai nogi sali,
 te sesemane elalumainu yai dao.”
- 13 Te augwali asobodu aga polasa peyu,
 augwali te tamu ąi dologo badu mu
 elalubo tųdu pali.
 Te augwali te bulu wa pai pesagede bidibo
 bulu uni hos dabe pabo tiwai bomonama asesa pali,
 te augwali me tula mubeo.
- 14 Te Genuai Bidigo Mobogo digi
 te aga we bidiba nagame yai homu mayu,
 te augwali toma nomainu ilali,
 te bulmakau dabe te nosai hauwa

elaluboba pelama,
 nai tuyu, toma nomainu ebo tiwai yalio,”
 augwaligo te tiwai po wai.
 Genuai Bidi, nago te bomai şe dabe yali,
 tama te kolesagade nago te naga
 we bidi dabe pabo sunumi dodolali,
 te tigidali we bidigo nago genuai nogi
 me bomo konemainu yai dao.

**Te Israel dabego te Genuai Bidigo augwali tau
 sao olama, gedu haluasa po wali**

- 15 Genuai Bidi, nage te naga bulu
 pesage dagalude bidibao,
 te tedali gasagi yai mu dao,
 te bulu pesagede te nago genuai ula
 me bomo paşanalubao.
 Tiali goli, te nago aiyaba tonoyu, te da suo.
 Magi baso nage hogodama,
 te nago genuai bomu daba waselisama ebawe?
 Nago homu dene eyu, olo tau sabo
 wiegi yai kolesaga te dabolo me ola mabeo.
 Te nago da godolo homu me isişyu ebo da, agawe?
- 16 Tiali, nage te dago aya dao.
 Te da bulai wai monu aya, Abraham me Jekop
 augwali te da dali me bidibe,
 te augwaligo da konesiawai.
 Tialima, nage Genuai Bidi, nage dago aya mu dao.
 Tama nago nogi te tiwai elalubao,
 “Te da tudibadu tonalu,
 polobadu digi tau sesa asali bidi dao.”
- 17 Genuai Bidi, magi baso nago da
 te besela palama, bilalumainu eyu,
 te dago nago doloba pai sunumi wali
 pişamainogo ebawe?
 Magi baso nago dago haliga me homu kolesaga daş
 weyu,
 te dago nageba wi işama,
 te nago dologode bidisamainu ebawe?
 Nago naga şe bidi dabe da homugo koneama,
 te nage ma aselama, da dali bidagasao,
 te naga digi nago sa muai hani dabe dao.
- 18 Te peşwadage sogo naga nago digi te sa muani be

te nago we bidi dago nogode elaluali,
 te nosali dena boi bidi dabe asu, dolama,
 te nago be mesejelama, agala dolali.

- 19 Tama megi da, da we bidi hobedagia
 mu bidibo tiwai eba,
 polobadu nago tonalu, tolalusawai tiwai bidibao.
 Tama da hani dabe te nago nogi augwalide musiawai
 bage tiwai bidibao.

64 1 O Genuai Bidi, dago homugo nage te dagalu
 buga şanama, dulao homu eba,
 te bulu du dabe nage asobo sogo dwai midigi mu
 saibao.

- 2 Augwali te siade ulalubo sene sospende tomode
 te posolo aı punuguna tagalobo tiwai yaibao.
 Nage te naga genuai bomo dali asobaso,
 te boi bidi dabego nago nogi konemainao,
 te nage augwaliba pedalubo sogo
 te tigidali tı kantri we bidi dabe
 wi elama, noma saibao.

- 3 Polobadu nage asobode, te gasagi yai
 nai tedali mu pedelali,
 tama dago te suyu, dwai noma mu sali.
 Te bulu du dabe nage asali sogo,
 te dwai midigi mu sai dao.

- 4 Polobadu te bidi mego te god me deli
 tobage bomai ş yali po odobeo,
 te we bidi tau siyu, te konealu tonaluabo ş.
 Ma, bidigo aga gedugo te god me deligo
 te tobage bomai ş ebo subeo. Menio.
 Genuai Bidi, nago naga te tiwai bomai ş ebo dao.°

- 5 Nago pemene eyu, te doloba pai kolesaga mu elama,
 nago te godolo homu ebo kolesaga
 wali pabo bidi dabe tau sagasobo dao.
 Tiali goli, nago daba wado po wai goli,
 te dago kolesaga me hasegelebeo.
 Dago te dwai ş yabo bomu iduai dao.

- 6 Da tigidaligo dwai ş eyu,
 te da nago gedude meda yai mu elalubao.
 Te kolesaga dabe dago homugo
 doloba pai kolesaga da olama,

- te kolesaga dabe te dago gawea pai nai tiwai dao,
 tiali goli dago te ebo, augwali nago
 gedude dwai mu eyu,
 te ugwa meda dwai mu tiwai ebao.
 Te dena ebo dwai şęgo te pađe da mu haga yabo homu
 yai,
 te wa pai ni yabe te waligo sela pabo
 tiwai yaibao wali.
- 7 Te nageba gedu haluasa po weyu,
 te nage nogi wabo bidi meni yai,
 te nage pađa asu,
 nageba homu kolesaga keđa pabo bidi meni,
 magi baso meni,
 nago naga gesabidi daba geme dula selama elalu,
 te nago dena şęęęo da dodolomainu ilama,
 te da dwai mu bidibao.
- 8 Tialima, Genuai Bidi, nage dago aya dao.
 Nage te sospen sene toęo nigibo bidi tiwai,
 tama da nago te sene niginu sabo
 tę tiwai elalubao.
 Te nago nogogo digi da tigidali nigibo dao.
- 9 O Genuai Bidi, nago dade haliga şeđe mu idu,
 te sesemane sogo dago ebo
 dwai şede homu kone paludigio.
 Menio.
 Da tigidali te naga we bidi da homu elama,
 te nago daba olo mu tau sabo wiegi yai kolesaga
 yao.
- 10 Te nago tedali gasagi yai taun dabe te olo bulu dwai
 tę pesage tiwai elalubao,
 te Jerusalem me mu dolama, tede bidi me bidibeo.
- 11 Tama nago tempel be da, nago te po weyu,
 da teba pelama, nageba lotu waibao wali,
 te me siago delama, tigidali dolali.
 Polobadu te be te gasa sawi yai mu elalu,
 te da bulali wađ dabe teba pelama,
 te nago nogi ugwaba sali.
 Tiali, megi da, te dolali,
 te dago godolo homu yali gasa wiegi yai pesage
 dabe,
 augwali me te dolama elalubao wai dao.
- 12 Genuai Bidi, nago te şe dabe sulama,

nago haliga hogodiyu,
 te magi şe me deli yabo homu ebo meni da, agawe?
 Te nago homugo dago te şeşe hauwa
 tolodumaina homu elama,
 tama nago dago gedu haluasa
 po wabo wei ponisama eba, agawe?

**Godigo te hagoma ebo haniba dwai dene mayu, te
 aga şe bidi dabeba wiegi yai şe ilaibao wali**

- 65** ¹ Genuai Bidigo te po wali, “Ena, Genuai Bidi,
 te eno augwali tau somainu
 gedu haluasa po wasiabo we bidigo
 gedu haluasa po wabo odainu,
 te tonalu sisilalubao.
 Te ena bidibo augwali enaba asobo tonalubao,
 tiali te augwaligo ena gegabo homu isawani.
 Eno te po wali, ‘Sesemane sogo ena bidibo,
 te dage tau sainu eba,’
 tiali goli augwali te enade digibulu bidiyu,
 te eno nogi augwalide musiawai hani
 bidibo tiwai ebo dao.^p
- ² Te tigidali side eno nogo dinigalubao,
 tama eno te eno po sela şabo we bidi
 ma sainu tonalubao,
 te dwai kolesaga ebo sunumidu
 augwa homugo digi wali bilibo
 we bidi te ma sainu tebo dao.^q
- ³ Te eno gedude augwa te eno haliga şeşe elama,
 wado po wabo tobage kolesaga eba.
 Augwa te Godigo po odisabo bidi dabego ebo kolesaga
 yai.
 Augwa te lotu wabo pesage te gide elalubo te sisinama,
 ofa eyu,
 tama augwa te tibo god dabego altaba pelama,
 te wiegi yai denami yabo hano ilibo pauda ulubo
 dao.
- ⁴ Tama hulide augwa te gu pageba bidalugi pelama,
 te isai bidi dabede po sainogo ebo dao.
 Tama augwa te kibu mi tulama,
 te gasa tobage hasa te eno gedude

- wiegi yai isabo sup nai aı me tubo dao.
- 5 Te augwa gasa bageba te tiwai po weyu,
 ‘Dage dade digibulu bidao,
 magi baso meni, dago tigde habu selali.
 Tama tibaso, dage da dali me kisalugobeo,’
 te po wabo dao.
 Eno te hani dabego te tobage kolesaga ebo te eno
 homude hagela yali.
 Augwa te tama tebode te eno haliga şeşę
 dwai mu augwaliba ebao.
 Augwalide eno te haliga şeşę ebo te mu siligobeo,
 te sia bogoli gamonama dabo tiwai ebo dao,” wali.
- 6 “Suao. Ena Genuai Bidi,
 eno te dage dwai we bidi dabego ebo
 dwai şę tigidali te eno bukude aşani.
 Tede eno sagia sogobeo. Menio.
 Te eno dageba dwai dene mayu,
 te duga yali dwai şę tigidalide
 dolo mu wei ponaibao.
- 7 Te eno duga yali şęgo şęęę dali,
 te duga bulai wai nõ dabego yali
 şęęę dali tolomainu yaibao.
 Te duga bulai wai nõ dabe te lotu wabo
 pesage te bulu du bageba holama,
 tama augwa te wiegi yai hano denami ilibo ofa eyu,
 tama augwa te haniani dwai kolesaga ena gedude yali.
 Tama eno augwa yali dwai şę tigidali usu nama,
 dolo mu te wei ponaibao,” wali.
- 8 Genuai Bidigo te po wai,
 “Te bidi me deligo te bono du wain
 te du pa elalubo nogogo şawainu ebaso,
 gasa bidigo te po wagi da,
 ‘Tonalu bolo yao,’ wai.
 ‘Eno te wiegi yai wain wai du meba
 te pađe elalubo suali.
 Dago selama, te tuabo wain aı meba nigibaso,
 usu yaibao,’ wai.
 Te tiwai tama, ena Genuai Bidi,
 eno te tigidali Israel we bidi me dologobeo,
 magi baso meni, augwali eno şę bidi dabe dao.
- 9 Te eno Juda dabeba wiegi yai şę eyu,
 te tigidali Israel haniba me tiaibao.

- Eno augwali te genuai we bidi hani pedalumainu ilaibao,
 te augwali eno bulu du pesagede
 bidalumainu yaibao.
- Te hani we bidi dabe eno augwali sa munama,
 te eno şe bidi bidimainogo yai,
 te tõe augwali bidimainu yai dao.
- 10 Te augwa sipsip dabe, te bulmakau me,
 te tõe pağanalueibao,
 te Saron te giliga dega sigulubo
 pedai te odogo pesagede gagalasa pali,
 te Akor giliga pedalubo badu
 te odogo tũa usu nigi paibao.
- Te augwa nosai hauwa elalu, te nai tuyu,
 toma neyu, bidaibao.
- Eno te şe dabe ebo te ena gegebo homu elalubo we bidi
 dabeba tiaibao,” te po wali.^r
- 11 “Tiali goli, dage da, te dage ena tudiba muyu,
 te eno bulu du, te Saionba asisama,
 te enaba lotu wagasisaño hani dabe,
 dage te dwai dene mu saibao.
- Dagego te Gat me Meni, te siba nai me wain aı mayu,
 lotu wabo dao.
- Te tibo god dabe te augwaligo dage
 tau somainu ebo da homu elama,
 te duga wiegi yai sogo elalueiba homu yalio.
- 12 Tiali goli, eno gasagi yai sogo dageba sa muai.
 Te boi dabego dageba hwiğaselama,
 te dage augwa bainat hwa dabego ela mueibao.
 Te duga kidu sugunama, te tobolu tũa basigulama,
 te boi bidi dabego dage tobolu mage togwaibao.
 Te şe dabe pedelaibao, magi baso meni,
 eno dage i wali, te dagego eno i wabo wei ponobeo.
 Te eno po me dageba pusali,
 tiali dagego wali pabeo. Menio.
- Dagego eno po sela sayu, te eno gedude
 dwai kolesaga naga yali,
 te eno godolo homu isaıwai
 kolesaga dabe mu eıao wali.
- 13 Tama tibaso, ena God, Genuai Bidi,

^r 65:10 Jos 7:24-26

eno te tama po obao.

Te eno şe bidi dabego te nai me aşı hauwa elalueibao.

Tiali, dage te ena tudiba mubo hani dabe,

te dage nai sili bidu, te tuabo aşı meni yaibao.

Te eno hani dabe, te augwa wiegi yai pemene yaibao,

tiali te dage dwai hale mu saibao.

14 Te eno şe bidi dabego haligade

te wiegi yai homu pemene paşanalı,

te augwa homu pemene ebo teşabi po waibao.

Te dagego haligade te homu dene ebo paşanalı,

te dagego homu kolesaga kone tuş pelama,

te dage gela bomonama mu waibao.

15 Te eno hani dabe, te augwa gasa

bageba po dwai wabo sogo da,

teda augwa te tiwai po waibao,

‘God, Genuai Bidigo dage dolomainu yaibao,

te agai te dwai hani dabe dolali tiwai yao,’ waibao.

Tama te bidi dabego dage nogi

te dwai nai homu tiwai yaibao,

tiali goli eno te wiegi yai gesi nogi

te ena şe bidi dabeba mawaibao.

16 Tama te tigidali tş habu pedai badude,

te bidi dabego gedu haluasa po enaba weyu,

te mu po naga wabo God da po weyu,

te augwali wiegi yai bugagia ilao

po enaba hanalueibao.

Te bidi dabego augwa po daş walabo homu elama,

augwa te eno nogi delide naga te mu po

dao waibao.

Tama augwa te polobadu elaluali haliga

şeşe me dwai şe yali dabe

te homu kone gegeda palaibao,

te ena, Genuai Bidi, te eno augwa

te polobadu yali dwai şe dabeba

homu kone mu gegeda palaibao,” wali.

Tigidali nai te gesi Jerusalem dali bugagia elalueibao

17 Genuai Bidigo te tiwai po wali,

“Suao, eno gesi dagalu me tş nigaibao.

Te bidi dabego te polobadu pedelali

naiba homu kone me palogobeo.

- Augwaligo te nai mu gegeda paibao.^s
- 18 Dagego te eno megı nigali gesi naiba bugai haliga eyu,
wiegi yai pemene sesemane sogo yao. Magı baso meni.
Te eno nigainogo ebo gesi Jerusalem
te we bidi dabego godolo elama,
wiegi yai pemene yabo pesage pedelaibao,
te aga we bidi dabe te bugai haliga mu elama bidaibao.
- 19 Ena digi me eno wiegi yai pemene
te Jerusalemba elama,
te ena we bidi dabeba bugai haliga yaibao.
Te gesi nigali Jerusalemde te bidi dabe gela wabo kulukulu munu me elalugobeo,
te genuai dene elalubo bidi dabego
te i wabo şę me elalugobeo.^t
- 20 Te dwasianu ogomani dabe me
te ogomani bidi elalubo sogo me isigobeo. Menio.
Tigidali we bidi te bobobage sogo sesabi elama,
mu bidama, te monu dabe mu pedelaibao.
Te augwa kibu be bidi sese a naga 100 yia bidali,
te tagalao, augwali te gesi tigi elalubo we bidi bidaibao,
tiyu augwali me deli te kibu be bidi sese a naga 100 yia bidisiqbadi isibaso,
te gasa bagego homugo te Genuai Bidi eno aga isimainu yai da,
te homu yaibao,” te po wai dao.
- 21 “Te eno we bidi dabego te be dabe şenama, tede bidalueibao.
Te augwa te wain gi dabe bulama,
te wain du tabila tuyu, bidaibao.
- 22 Te boi bidi dabe munu ma aselama,
te eno we bidi dabe sela şayu, ela gudulama,
te augwaligo beba bidagaselama,
te augwa wain gi selama,
te wain du tabilama tuyu, me tegobeo.
Te eno we bidi dabe sesabi elama,
bobobage sogo mu bidaibao,

^s 65:17 Ais 66:22; 2 Pi 3:13; Ped 21:1 ^t 65:19 Ped 21:4

- te bomai dila pai ni tiwai elalueibao.
 Awe, tama augwa digi şe dene elama,
 pedalubo naide wiegi yai
 homu pemene elama, bidaibao.
- 23 Augwa ebo şe te odolali me ela tagalogobo.
 Te augwa wai dabe me doloyu,
 me egobeo, magi baso meni,
 augwaliba eno te wiegi yai şe bugagia yainu,
 te sa muani hani dabego wai dabe dao.
 Te eno augwaliba bugagia wiegi yai şe eyu,
 te augwa wai dabeba me,
 te augwa nosali bulabo wai nõu
 wai dabeba te tama tiaibao wali.
- 24 Te augwa godolo homu eyu,
 te sabo homu ebo nai po te enaba gedu haluasa po
 weyu,
 hanalusı̂badi, te eno augwaligo
 hanalubode wei ponaibao.
 Te augwa gedu haluasa po wabo sogo da,
 teda eno te nai dabe augwaliba mawaibao.
- 25 Te bulu uni yowi dabe me te sipsip wai dabe
 augwali hodobo deliba nai tueibao.
 Te laion dabego te bulmakau dabego
 nosai tubo tiwai yaibao.
 Tiali goli, te hasamani dabego da,
 te t̄ hogomu naga tueibao.
 Te Genuai Bidi, eno buludu pesage tigidalide,
 te tigidali nai bugagia elalueibao,
 te bidi me deligo gasa bidi meba
 dwai şe iliyu me tegobeo.
 Ena Genuai Bidi, eno po wai dao," wali."^u

**Genuai Bidigo aga boi bidi dabe aiyaba elaluama, te aga
 dologoba asali haniba wiegi yai şe yaibao wali po**

66 ¹ Genuai Bidigo te po wai,

“Dagalu da, te ena dugabo sia king tiwai elalu,
 te t̄ eno şağ ugwadu mubo pesage dao.
 Tega. Te dagego eno be şe ebo usugowe?
 Te mena badu ena toma nabo pesage elalueibawe?”^v

^u 65:25 Ais 11:6-9 ^v 66:1 Mat 5:34, 35; 23:22

- 2 Genuai Bidi ena digi, eno te dagalu
 me t̄o tigidali nai nigilama,
 te augwali pedelama, megi elalubao.
 Eno te tobage bidi dabeba bugagia haliga yaibao,
 te augwa digi aiyaba elaluama,
 te augwa yali dwai şede homu dene eyu,
 enaba wi elama,
 te eno po dologoba aselama, bidibo bidi.”^w
- 3 “Tiali goli, te augwa digi dobo homu wali pabo
 we bidi dabego augwa te haniani dwai kolesaga
 godolo mu eyu,
 tama augwa te enaba lotu mu obao, te homu ebao.
 Tiali goli, augwaligo enaba te ofa ebo
 tigidali te eno godolo mu me is̄wai.
 Te augwaligo bulmakau elama, enaba ofa ebo sogo,
 eno suali, augwa te bidi elali tiwai ebao.
 Te augwa sipsip wai elebo sogo,
 eno suali, augwa te yowi elama,
 te enaba ofa tiwai yali.
 Augwa te wit dabe ofa ebo sogo, eno suali,
 augwa te kibu kaneme ofa ebo tiwai yali.
 Te augwa wiegi yai denami ebo hano ebo ofa ebo sogo,
 eno suali, augwa te tibo god piksa
 me deliba ofa ebo tiwai yai dao.
- 4 Te pagede tama te augwaligo tolabo şeş̄ eno sa
 muani,
 augwa te wi mu ebo şeş̄ dao.
 Magi baso meni, eno augwaliba i obadi,
 te eno i wabo augwaligo wei ponobeo.
 Te eno po me augwaliba pusubadi,
 tiali goli augwa wali me pabeo. Menio.
 Augwa eno po sela şayu, te eno gedude
 dwai kolesaga naga yali,
 te eno godolo homu is̄abo kolesaga dabe mu dao.”
- 5 “Dage te wi elama, te Genuai Bidi,
 eno po dologoba asobo hani dabe,
 dagego te megi eno dageba pusainu ebo po odao.
 Dage ena wali asobo bomu yai,
 tama te duga deli hani dabego
 te dage godolu mu me is̄ama,

^w 66:2 Tpi 7:49-50

- te augwaligo dage tudiba muai.
 Te augwaligo dageba posobo po weyu,
 dageba te tiwai po wali,
 ‘Te Genuai Bidi aga genuai bomo dali asomainu eyu,
 te dage pemene ilimainao, te tebo dago sueibao.’
 Tialima, eno te po obao,
 te dagego augwali dwai hale mu
 sabo sueibao, te po wali.
- 6 Te taun tomode genuai i weyu,
 te eno be tomode kulukulu wabo odao.
 Te eno i me kulukulu weyu ebao, te Genuai Bidi dao.
 Eno te ena boi bidi dabeba dwai dene mayu,
 te augwa yali dwai kolesaga wei ponaibao,” wali.
- 7 “Ena, Genuai Bidi, eno te po obao,
 eno taun te wego wai deli sogo polo
 tama ame nabo tiwai yaibao.
 Aga te wai ame nabo tigi dene isaḅadi,
 tama te wai polo pedelali.^x
- 8 Dagego te tobage se polobadu sulama,
 odai da homu eba, agawe?
 Te bulu toḅ kantri me deli te deli sogo
 pedalubo da, agawe?
 Te genuai hani we bidi me deli te deli sogo tama me
 pedalubo homu eba, agawe?
 Tiali, Saion aga te wai ame nabo
 tigi dene ebo gagalobo sogo,
 te polo tama aga te wai ame naibao.
- 9 Ena God, Genuai Bidi, ena digi eno
 aga te wai ame nabo dene ilali.
 Tama tibaso, te magi elama eno agai haliga paniama,
 eno aga wai somainu iligobe dawe?
 Ena da, ena dagego God dao.”
- 10 “Dage te Jerusalem godolo mu ebo hani dabe,
 dagego aga dali wiegi yai pemene yao.
 Dage agade te homu dene elama,
 gela weyu yali hani dabe,
 megi da, dagego aga dali wiegi yai homu pemene yao.
- 11 Magi baso meni. Aga bugagia bidibaso,
 te duga wiegi yai pemene elama,
 agade te wiegi yai nai hauwa saibao.

^x 66:7 Ped 12:5

- Aga te dagego ida me deli tiwai elama,
 tama dagego aga ame tuyu,
 te dage bugagia mu pağanama,
 te haliga nagame yai bidaibao,” wali.
- 12 Genuai Bidigo te tiwai po wali, “Magi baso meni.
 Eno te Jerusalem bugagia mu elalumainu yaibao,
 te sesemane sogo agai te gasa tō kantrigo wiegi yai
 nai dabe hauwa saibao.
 Te aga magi deli me sqa pişama,
 te wē sesemane sogo asudu,
 te sula sişbo tiwai yaibao.
 Te dagego te nai dabe siyu, wiegi yai pemene mu yaibao,
 te waigo idago ame tuyu, pemene ebo tiwai yaibao,
 te waigo aga idago sabilibaso, pemene ebo tiwai eyu,
 te idago aga telede pilama,
 aga dali gagali ebo tiwai ebo dao.
- 13 Te eno dage bugagia mu tonalu,
 te idago aga wai bōq bugagia tonalubo tiwai eyu,
 te aga waigo haliga dua nagame
 ilibo po wabo tiwai yaibao.
 Dage te Jerusalemde bidiyu,
 te duga haliga nagame elama bidaibao.
- 14 Eno te tama sē dageba ebo subaso,
 te duga haliga pemene mu elama,
 te dage genuai bomai hani mu pedelaibao.
 Te dage eno sē bidi dabego te duga Genuai Bidi eno
 bomo bugagia koneaibao.
 Tiali goli, eno boi bidi dabego te eno
 haliga sēbē koneyu, gē naibao.”
 Genuai Bidigo te po wai.
- 15 Te dagego Genuai Bidi te sia dali asobo sueibao,
 te aga karisde dugulama, bomonama,
 umagia mu udayu,
 te bomai wali asobo tiwai yaibao.
 Te aga haliga sēbē ebo siago te aga boi bidi dabe ulama,
 te augwali mu silaibao.
- 16 Magi baso meni. Te Genuai Bidigo isigo te we bidi
 uluyu,
 te agai hwa ge bainatgo te we bidi hauwa mu ela
 mueibao,
 te augwa yali dwai sē wei ponoyu, tiaibao.

¹⁷Genuai Bidigo te tama po wali, “Te tibo godiba lotu wabo hani dabe, augwa te tibo godigo gedude wiegi yai pedalumainu ebo kolesaga wali peyu, augwa te lotu wagi pabo pesage giba pelama, te augwa polalubo bidi dabego ebo kolesaga wali pelama, augwa te kibu mi, me bolo mi tuali, te gasa nai dabe eno gedude wiegi yai isabo nai tuali, augwa tigidali dolama, mu silaibao,” wai dao.

Te tigidali tō kantri we bidi dabe te Genuai Bidi dologode bidaibao

¹⁸Genuai Bidigo te po wai, “Eno te we bidi dabe homu kolesaga sulama, tama eno konebao, te megi da, eno te tigidali we bidi dali sisinibo sogo dao, te mena po haniani wabo bage me sisinaibao. Te augwali sisinagasobo sogode, teda augwaligo te eno genuai ula me bomo sueibao. ¹⁹Te eno augwali tomode te dāi me deli pedalumainu ilaibao.”

“Tialima, eno te hani meba, te dolisawani hani bage, te digibulu tō kantri we bidiba tagala palama, te eno genuai nogi me bomo te eno genuai bomo ebo po odisawani we bidi dabeba pusugi pomainu yaibao. Te augwali eno te hani dabe Tarsis, me Pul dabe, me Lidia, te haniba tagala palaibao, te Lidia bage augwali enesigigo ene enebo mu konea pai bidi dabe mu, te Tubal me Gris dabeba, te digibulu bidalubo gasa we bidiba me tagala palaibao. ²⁰Tama te tō kantri we bidi dabego te duga deli hani dabe duga abagi te augwa bulu kantridu enaba te ofa tiwai elama, odasa asaibao. Augwa te augwali te hos dabede, me donki dabede, me kamel dabede, me karisde dugulasa asomainu ilaibao, te augwaligo augwali te eno bulu du Jerusalemba odasa asaibao. Augwaligo augwali enaba odasa asobo, te dage Israelgo te ofa yabo wit te wiegi yai pou dis te eno gedude wiegi yai yaide wit munama, te eno beba sela asobo tiwai yaibao. ²¹Tama te augwali meba eno te pris pedalumainu ilaibao, te meba Livai hani bidimainu yaibao,” Genuai Bidigo te po wali.

²²“Ena Genuai Bidi, eno te po obao, te gesi dagalulu me gesi tō eno nigaibao, te eno gedude sesemane bomu elalueibao, te tiwai duga wai dabe te sesemane sogo bomu elalu, te dagego nogi me sia sogobeo.” ²³Te genuai si tigidalide, te gesi poluade nanobo side, me tigidali Sabat side, te tigidali tō habu we bidi te asiyu, te ena geduba kidu sugunama, enaba lotu waibao, Genuai Bidi dao. ²⁴Te augwa eno be tagalobo sogo, te augwa hagoma elama, eno po sela sawani hani dabe tigi, te tōde pila muna muna pabo sueibao. Te dwasianu sawi dabego augwa tigi dabe tuyu, te bidada paibao. Te isigo augwa tigi deyu, te me siligobeo. Te tigidali we bidigo te bidi hani dabego tigi sueibao, te damua pai dwai nai mu tiwai yaibao,” God Genuai Bidigo te po wai dao.”